


Yus Papí: Shuarja  
Yus Yamaram Chicham  
Najanamu



New Testament in Shuar (EC:jiv:Shuar)

**Yus Papi: Shuarjaj Yus Yamaram Chicham Najanamu  
New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Shuar

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

MATEU . . . . .	1
MÁRKUS . . . . .	47
RÚKAS . . . . .	76
JUAN . . . . .	126
TÚRAMU . . . . .	160
RÚMANAM . . . . .	206
1 KURINTIUNAM . . . . .	224
2 KURINTIUNAM . . . . .	242
KARASEANAM . . . . .	254
IPISIUNAM . . . . .	262
JIRIPIUSNUM . . . . .	268
KURUSENAM . . . . .	273
1 TISARÚNIKIANAM . . . . .	278
2 TISARÚNIKIANAM . . . . .	283
1 TIMIUTÉUN . . . . .	286
2 TIMIUTÉUN . . . . .	291
TITIUN . . . . .	295
JIRIMIÚNKAN . . . . .	298
ISRAERNUM . . . . .	300
SÁNTIAK . . . . .	314
1 PÍTIUR . . . . .	319
2 PÍTIUR . . . . .	325
1 JUAN . . . . .	329
2 JUAN . . . . .	334
3 JUAN . . . . .	335
JÚTAS . . . . .	336
APUKARÍPSIS . . . . .	338

## Yúsan Shiir Chichamen MATEU aarmia nu

### *Jesukrístu weatrí (Rúkas 3.23-38)*

<sup>1</sup> Jesukrístu weatrí ju ániawai. Tura ashí nankaamas ti uunt weat Tawitcha Apraámsha ániawai. <sup>2</sup> Apraáma uchirí Isak. Tura Isaka uchirí Jakup. Jakupa uchirísha Jutá ní yachijjai. <sup>3</sup> Tura Jutá uchirín Páresan tura Sarancha Tamar jurermiayi. Páresa uchirísha Esrum, nuna uchirísha Aram. <sup>4</sup> Nuna uchirísha Aminiatáp. Nuna uchirísha Nasun. Nuna uchirísha Sarmun. <sup>5</sup> Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí. <sup>6</sup> Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

<sup>7</sup> Sarumúnka uchirí Rupuam. Nuna uchirísha Apías. Nuna uchirísha Asa. <sup>8</sup> Asa uchirísha Jusapát. Nuna uchirísha Juram. Nuna uchirí Usías. <sup>9</sup> Usíasa uchirí Jutam. Nuna uchirí Akas. Nuna uchirí Esekías. <sup>10</sup> Esekíasa uchirí Manasés. Nuna uchirí Amun. Nuna uchirí Jusías. <sup>11</sup> Jusíasa uchirí Jekunías ní yachí armia nujai. Nuí Papirúnianmaya shuar Israer shuaran mesetjai nupetkar Papirúnia nunkanam achirar júkiarmiayi.

<sup>12</sup> Nu ukunmanka Jekuníasa uchirí Saratiár akiiniamiayi. Tura nuna uchirí Surupapír. <sup>13</sup> Surupapíra uchirí Awiut. Nuna uchirí Iriakím. Nuna uchirí Asur. <sup>14</sup> Asura uchirí Satuk. Nuna uchirí Akim. Nuna uchirí Eriut. <sup>15</sup> Eriuta uchirí Ereasár. Nuna uchirí Matañ. Nuna uchirí Jakup. <sup>16</sup> Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

<sup>17</sup> Tuma asamtai Apraámnumiá Tawitnium Jesusa weatrí katurse (14) ániawai. Tawitniumiasha Papirúnianam jukimiunma nuísha katurse weat ániawai. Papirúnianam jukimiunmayasha Krístunam ataksha katurse ániawai.

### *Jesukrístu akiiniamu (Rúkas 2.1-7)*

<sup>18</sup> Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaníatsain Yusa Wakaní ajaprumtikiamiayi. <sup>19</sup> Ajaprukmetaisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniaisatniun wakerimiayi aents nekainiatsain. <sup>20</sup> Nuna tu enentáimia pujái, mesekranam Yusa suntari tarí chicharuk tímiayi “Juséá, ame weatrum Tawitchakait. Tuma asam Maríjjai nuatnaikiatin ashamkaip. Uchin jurertatna nuka Yusa Wakaníniuiti. <sup>21</sup> Uchin áishmankan takustatui tura nuna naari *JESUS* anaikiattame. Ashí ní shuárin ní tunaariya uwemtikiartin asa Jesus anaikiatniuiti” tímiayi.

<sup>22</sup> Yus ní etserniurijjai yaunchu timia nu uminkiatí tusa nu túrunamiayi. Juna áamtikramiayi:

<sup>23</sup> “Nuwa natsa ajapruktatui tura uchin takustatui. Nuna náarísha Emanuér anainiak-tatui.” Tu áarmaiti.

Emanuérsha nu chichamnum “Yus iijjai pujuwiti” tawai.

<sup>24</sup> Jusesha mesekranmaya shintiar Yusa suntari timia núnisan Marin nuatkamiayi.

<sup>25</sup> Tura uchin júreatsain tsaninchamiayi. Tura jurermatai uchin Jesus anaikiamiayi.

## 2

*Ti neka apach Jesusan eakarmiania nu*

<sup>1</sup> Jutía nunkanam Pirin pépru ana nuí Jesus akiiniamiayi. Nuísha nú nunka akupniurí Irutisauyayi. Akiiniamtai ti neka apach nantu tátainmaaniya Jerusaréñ péprunam táarmiyai. <sup>2</sup> Taar inintruiniak “¿Israer shuara úunt akupniurí tuí akiiniait? tiarmiyai. Nantu tátainmaani pujaati ni yaarí wáinkiamji. Tura tikishmatratai tusar winiaji” tiarmiyai.

<sup>3</sup> Irutis nuna antuk nusháa enentáimpramiayi. Tuma asamtai ashí Jerusaréñnumia shuarsha antukar nusháa enentáimprarmiyai. <sup>4</sup> Irutis nuikia ashí Israer-patri uuntrincha tura yaunchu akupkamun jintinniuncha untsukarmiyai. Tura Kristu akiiniatniurín inintrusmiayi. <sup>5</sup> Tutai chichainiak “Jutía nunkanam Pirin pépru ana nuí akiiniatniuiti, tiarmiyai. Yaunchu Yúsnan etserin tu áaruiti:

<sup>6</sup> “Jutía nunkanam, Pirin pépru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásarmatai, péñker wáinkiattawai,” tawai Yus.” Tu tiarmiyai.

<sup>7</sup> Nuna tuíniakui Irutis ti neka apachin úusan, urutía yaa emka wáinkiamarum tusa aniasarmiyai. <sup>8</sup> Nuyá Pirinnum akupeak “Nuí werum uchi péñker inintrusrum wáinkiatarum. Tura wáinkiarum ujatatarum. Wisha werin tikishmátuutaj” tímiayi.

<sup>9-10</sup> Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiyai. Tura nú yaa uchi pujumia nuí ejeniarmiyai. <sup>11</sup> Jeá wayawar uchincha ni nukurí Marijjai wáinkiar miayi. Tura uchin tikishmatrarmiyai. Nuyá ni kajuntriyan kurincha, mirá kunkuinniasha, chíkich kunkuinniasha súarmiyai. <sup>12</sup> Nuyá mesekranam Yus “Irutisaini weerap” tutai chíkich jintianam wakеткиarmiyai.

### *Ejiptunam pisaamu*

<sup>13</sup> Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjjai Ejiptu nunkanam jukim nuí pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

<sup>14</sup> Tutai Jusé kurat shintiar nú káshik uchincha nukuríjjai Ejiptunam jukimiayi. <sup>15</sup> Irutis jáatsain nuí pujusarmiyai. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi: “Ejiptunmayan winia Uchirun untsukmajai.” Tu áarmiyai.

### *Irutis uchin máawarat tusa akupkamu*

<sup>16</sup> Irutissha ti neka apach nin anañka yajá waketran nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi. <sup>17</sup> Nuka Yusnan etserin Jeremías aarmia nu uminkiamiayi. Juna áarmiyai:

<sup>18</sup> “Ramá nunkanam ti úutainiak uur ajainiwai. Raker ti uutu asa atsankrachminiaiti ni uchirí jákarmatai.” Tu áarmiyai.

<sup>19</sup> Tura Irutis jakamtai Yusa suntari mesekranam Jusen ujakmiayi. <sup>20</sup> “Uchin máataj tiarmia nuka jákarai. Yamaikia ataksha uchi ni nukuríjjai jukim Israer nunkanam wakеткиtia” tímiayi. <sup>21</sup> Tutai Jusé nantaki uchincha nukuríjjai jukin Ejiptunmaya Israer nunkanam wakеткиmiayi. <sup>22</sup> Túrasha Irutisa uchirí Arkiráu Jutía nunkanam uunt akupin ajasun nekáa nuí wétinian aránkamiayi. Mesekranmasha ujakma asa nuí pujutsuk Kariréa nunkanam wémiayi. <sup>23</sup> Nuí jeá Nasarét péprunam pujusmiayi. “Nasarénumia átatui” Yusnan etserin yaunchu tu etserkamu nujai uminkiamiayi.

### 3

#### *Imiakratin Juan atsamunam etserkamiania nu (Márkus 1.1-8; Rúkas 3.1-9, 15-17; Juan 1.19-28)*

<sup>1</sup> Nuyá imiakratin Juan Jutía nunkanam aents atsamunam etserki támiayi. <sup>2</sup> “Enentáim yapajiátarum. Tsawant ishichik ajasai Yus juí akupin ajastin.” Tu etserkamiayi.

<sup>3</sup> Nú Juan kan yaunchu Yúsnan etserin Isayas juna áarmiayi: “Shuar atsamunam aents untsumui. Untsumuk “Atumí enentái Uunta jinti iwiartur tarum tura naka awajsatarum” tawai.” Tu áarmiayi.

<sup>4</sup> Nu Juan sha kamiyu ure najantramun entsauyayi. Emenmamkesha nuapeyayi. Tura yutai-títikriátsnasha chinijjai yúuyayi. <sup>5</sup> Tura Jerusarén péprunmaya shuarsha tura ashí Jutía nunkanmaya shuarsha Jurtañ entsanam matsamiarmia nú shuarsha mash Juán kan tariarmiayi ni chichamen anturkatai tusar. <sup>6</sup> Tura ni tunaarín paant etserkar matai Juan Jurtañ entsanam imiainiarmiayi.

<sup>7</sup> Juan sha Pariséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasha ti asutniátniunmaya uwempratniuncha ujamakmarum? tímiayi. Asutiátin tsawant ishichik ajasai. <sup>8</sup> Tuma asamtai enentáim yapajiámuitkiuinikia péñker wekaamurmijjai paant iniakmatarum. <sup>9</sup> Atumsha “Iikia Apraám weeitji” tu enentáim tumasairap. Nujai uwemprashtatume. Yus wakerakka ju kayan Apraáman tiran ki najankainti, tímiayi. <sup>10</sup> Numi ajaktinia áintsan kampuwarín jacha atuttsamuiti. Tura numi péñker nereatsna nuka tsupikia jinium apeamu ártatui. <sup>11</sup> Wikia aya entsajain imiajume atumi enentái yapajiáwakrumin. Antsu winia ukuruí winiana nuka péñker awajtamsataj tusa imiantinia áanis tura já áanis Yusa Wakanin enketramprattarme. Wijjai nan kaamantu asamtai wikia tsunsumpruan ni sapa trínkisha atitrachminiaitjai. <sup>12</sup> Aruusa nerejai túruinia áintsan átatui. Awajtiutairín achikiuiti tura nujai saepen awajtittiwai. Tura nerén péñker ikiustatui, antsu saepenka jinium apeattawai. Nu jisha tuke kajinchaiti.” Tu tímiayi Juan.

#### *Juan Jesusan imiaimiu amia nu (Márkus 1.9-11; Rúkas 3.21-22)*

<sup>13</sup> Nuyá Jesus Kariréa nunkanmaya winis Jurtañ entsanam támiayi Juan imiatti tusa. <sup>14</sup> Juan sha emka nakitiak Jesusan tímiayi “Ame winia imiatminiaitme. Túrutamniaiatmesha ¿urukamtai winia tarutnium?” tímiayi.

<sup>15</sup> Tura Jesus tímiayi “Ántsan asati yamaikia. Núnisrik ashí Yus akupkamu umirkatniuitji.” Tutai Juan iniaisamiayi. <sup>16</sup> Tura Jesus imiani entsaya jínkímtai nayaimpí uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi. <sup>17</sup> Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtajai” tímiayi.

### 4

#### *Uunt iwianch Jesusan anankataj tímiania nu (Márkus 1.12-13; Rúkas 4.1-13)*

<sup>1</sup> Nu túrunamtai Yusa Wakaní Jesusan iwianchjai nekapmamtiksatts aents atsamunam jukimiayi. <sup>2</sup> Nuí kuarenta (40) tsawant, káshisha tsawaisha yurumtsuk pujak tsukarmiayi. <sup>3</sup> Nuí uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

<sup>4</sup> Tutai Jesus tímiayi “Yus-Papinium áarmaiti: “Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

<sup>5</sup> Tutai uunt iwianch Jerusarén péprunam jukí Yusa Uunt Jee cháikin iwiak <sup>6</sup> tímiayi “Nekas Yusa Uchirínkiumka juya akaikim iniaata. Kame Yus-Papinium áarmaiti:

“Yus ni suntarın akatar akúptúrmaktatui. Nawemin kayanam ajiıntsumnin wenkurmaktatui” tawai” tímiayi.

<sup>7</sup> Tutai Jesus tímiayi “Núnisan Yus-Papinium áarmaiti:

“Ame Úuntrum Yus “Nekapsataj” tiip” tawai” tímiayi.

<sup>8</sup> Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi. <sup>9</sup> Tura tímiayi “Winia tikishmatrurakminkia juna mash amastatjai.”

<sup>10</sup> Tutai Jesus tímiayi “Werumta, uunt iwianchi. Yus-Papinium aarma awai:

“Ame Úuntrum Yúsak tikishmatrata tura Niñki shiir awajsata” tawai” tímiayi.

<sup>11</sup> Tutai uunt iwianch Jesusan ikiuak wémiayi. Túramtai Yusa suntarj tariar atsumamurın súarmiayi.

*Jesus Kariréa nunkanam etserkamiania nu  
(Márkus 1.14-15; Rúkas 4.14-15)*

<sup>12</sup> Juan sepunam enketui taman antuk Jesus Kariréa nunkanam wémiayi. <sup>13</sup> Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarıın pujumiayi. Ti yaunchusha Jakupu uchiri Sapurúnsha tura Niptarışa nu nunkanak nuı pujustaitsar achikiaruyayi. <sup>14</sup> Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

<sup>15</sup> “Sapurúnsha Niptarışa nayaantsanam tíjiuch Jurtañ entsa amainini nunkan achikiarmiayi. Nuka Kariréaiti Israer-shuarsha matsatainia nuı. <sup>16</sup> Nu aents kiritniunam pujuiniyatañ ti tsáapninian wáinkiamiayi. Jákatniunam pujuiniaı tsáapin tsáapnirmiayi.” Tu áarmaiti.

<sup>17</sup> Nuyá Jesus étseruk tímiayi “Tunaarum enentáimturum enentáim yapajiátarum. Ju nunkanam Yus akupkatin tsawant ishichik ajasai.”

*Jesus kuaru aents namakan achinian ni unuinamurı ajasarat tusa achikmiania nu  
(Márkus 1.16-20; Rúkas 5.1-11)*

<sup>18</sup> Jesus Kariréa antumianka kánmatkarın wesa jimiará áentsun nuámtak yáchinniun wáinkiamiayi. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajai nanıkak yujaarmiayi. <sup>19</sup> Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáı namak achíarmena núnisan shuaran-eau awajsatjarme.” <sup>20</sup> Tutai ni nekarın ikiukiar Nin nemariarmiayi.

<sup>21</sup> Nuyá ishichik wésañ ataksha nuámtak yachinniun wáinkiamiayi. Jakupu Juanjai mai Sepetéu uchirı ármiayi. Niisha kanunam enkemsar ni nekarın ni aparıjııı iwiarainiak pujuriarmiayi. Tura Jesus “Nemartusta” tutai <sup>22</sup> nu chichamaik kanuncha tura aparıncha ikiukiar Jesusan nemariarmiayi.

*Jesus untsurı shuaran jintintiamiania nu  
(Rúkas 6.17-19)*

<sup>23</sup> Ashı Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurı sunkurjai jáinian ashı tsuármiayi. <sup>24</sup> Ashı Siria nunkanam Jesus tsuákratman nekaawar ashı nánkamas sunkurjai wáitin armia nuna Jesusan tsuarti tusa itiararmiayi. Ashı jaancha, najaimiancha, yajauch wakantrukuncha, wáuruncha, tampemaruncha Jesus tsuármiayi. <sup>25</sup> Tura untsurı shuar Jesusan nemariarmiayi. Kariréa nunkanmayasha, Tekapurisnumiasha, Jerusarın péprunmayasha, Jutiá nunkanmayasha, Jurtañ entsa amainiyasha Jesusan nemariarmiayi.

## 5

*Náinnium Jesus etserkamu*

<sup>1</sup> Jesus untsurí shuar káunkarun wáiniak náinnium waka nuí pujusmiayi. Tura ni unuiniamurisha taar pujusarmiayi. <sup>2</sup> Nuyá Jesus júnis unuiniamiayi.

*Warastin ainia nu*  
(*Rúkas 6.20-23*)

<sup>3</sup> “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniutrum. <sup>4</sup> Kúntuts pujarum nu warastarum. Yus atsantamprattarme. <sup>5</sup> Péjchach enentáimtumarmena nu warastarum. Yus ashí nunkan amastatrum. <sup>6</sup> Eseer wekasataj tusa aya kitiamarum nu warastarum. Yus imiktamprattarme. <sup>7</sup> Waitnenkratniutiram warastarum. Yus waitnentramprattarme. <sup>8</sup> Péñker enentáimniutiram warastarum. Yus wáinkiáttarme. <sup>9</sup> Chicham iwiarin árum nu warastarum. Yusa uchirí turamartatui. <sup>10</sup> Péñker túrakrumin yajauch awajtamainiakui warastarum. Yus akupeamunam pachiinniutrum. <sup>11</sup> Wíi shuar asakrumin katsekramainiakui, itit awajtamainiakui, tura ashí tsanumprutmainiakui warastarum. <sup>12</sup> Núnisan yaunchu Yúsnan etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkiattarme’ tímiayi.

*Ju nunkanam átum tsáapninia áintsarum tura weeya áintsarum árum*  
(*Márkus 9.50; Rúkas 14.34-35*)

<sup>13</sup> ‘Átumka ju nunkanam wee ana áintsanketrum. Tura wéeaitiat jeakchaitkiunka míchuiti. ¿Nusha itíur yuámniak ati? Antsu ántraití. Tuma asantai aa najatai tepet tusar ajapashtinkiait’ tímiayi.

<sup>14</sup> ‘Átumka ju nunkanam shiripkia áintsanketrum. Náinniumka pepru úumkachminiaiti. <sup>15</sup> Núnisan shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam. <sup>16</sup> Núnisan atumsha Yusjai péñker túramu paant atí. Tura ashí aents nuna iisar niisha Yus Apan shiir awajsartatui’ tímiayi.

*Yaunchu akupkamun pachis Jesus unuiniamiania nu*

<sup>17</sup> ‘Muisais akupkamuncha tura yaunchu Yúsnan etserin etserkarmia nuna ántar awajsattawai” turutiirap. Antsu nuna Wikia umiktaj tusan táwitjai. <sup>18</sup> Nekasan tájarme. Ashí túrunatniua nu amúatsain nu akupkamu ishichkisha yapajniáshtatui. Nayaimpisha tura nunkasha tuke amúatsain nu akupkamusha amuukashtatui. <sup>19</sup> Nu asantai shuar chikichik akupkamun, yúpichuch ana nunaksha, umirchakka tura chíkich shuaran umirkashtinian unuiniakka Yus nekas akupin paant ajastatna nuí nú shuar uunt áchattawai. Antsu ashí shuar akupkamun umiana nu tura chíkich shuaran umirkatniun unuiniiana nusha Yus nekas akupin paant ajastatna nuí, nu shuarka uunt átatui. <sup>20</sup> Tuma asantai Yus akupeamunam pachiinkiatat takumka Pariséujai nankaamas tura akupkamu jintinniujaí nankaamas eseera wekasatniutrum’ tímiayi.

*Kajeamun pachis Jesus unuiniamiania nu*  
(*Rúkas 12.57-59*)

<sup>21</sup> ‘Yaunchu tiniu armia nu ántichukaitrum: “Mankartuawairap. Mankartana nuka asutniátniuiti” tiniu ármiai. <sup>22</sup> Tura Wisha tájarme: Shuar ni yachin aya kajerakka nusha asutniátniuiti. Ni yachin kátseka nuka akupniunam junaktiniaiti. Tura ni yachin “netsé” takunka jinium akupnakminiaiti.’

<sup>23</sup> ‘Tuma asantai Yus susataj tusam wakerakum tura ame yatsum ámin itit enentáimturman enentáimpramka, <sup>24</sup> suamu nuí ikiuakum emka ame yatsum werim niijjai iwiarata. Turam waketkim Yus suam nu susata.’

<sup>25</sup> ‘Shuar úuntnum júramkuinkia jintian wesam niijjai iwiarata úuntnum ejetamtsain. Túrachakminkia úuntnum surutmaktatui tura niisha suntarnum surutmaktatui tura



sepunam enketmattawai. <sup>26</sup> Tura nekas tajai, nuĭ enkemamka ashí rearchisha akikmachkumka jíinkishtatme' tímiayi.

*Tsanirmatniun pachis Jesus unuiniamiania nu*

<sup>27</sup> 'Yaunchu tiniu armia nu ántichukaitrum: "Tsanirmawaip." <sup>28</sup> Tura Wisha tájarme: Shuar nuwan tsanirmataj tu iiska nuĭkia ni enentáin tsanirmayi.'

<sup>29</sup> 'Tuma asamtai ame jíimi tunaanum yajauch awajtamkuĭkia ukuĭkiam yajá ajapata. Ashí ame ayashim jinium esaatsain aya chikichik ayashmi muchitmarĭ emesratin péñkeraiti. <sup>30</sup> Ame ewejmesha untsuurmetiat tunaanum ajunmakuĭkia tsupikiam yajá ajapata. Ashí ame ayashim jinium esaatsain aya chikichik ayashmi muchitmarĭ emesratin péñkeraiti.'

*Nuwa ajapatniun pachis Jesus unuiniamiania nu*

*(Mateu 19.9; Márkus 10.11-12; Rúkas 16.18)*

<sup>31</sup> 'Núnisan yaunchu tiniu ármiayi: "Shuar ni nuarĭn ajapatniun wakera nuka papí najana susati." <sup>32</sup> Tura Wisha tájarme: Shuar ni nuarĭn tsanirmachun ájapeakka nuwan tsanirmamtikiaiti. Tura ajapamujai nuatnaiyakka nuka tsanirmaiti.'

*Jesus aya nekasa nu titinian unuiniamiania nu*

<sup>33</sup> 'Núnisan yaunchu tiniu ármiayi: "Yusa naarĭ pachisan turattajai" tákumka nekas takamtsuk umiktiniaitme." <sup>34-37</sup> Tura Wisha tájarme: Áyatik "Ee" tákumka tura "Atsá" tákumka wáitrutsuk nuke titiá. Támena nu nekas umiktaj takum ame nú arant pachistini-aitkiumka nuka yajauchiiti, iwianchnumiáiti. Ti nekas tajai tusam nayaim pachischatniuitme. Nuka Uunt Yus pujutainti. Nunkasha pachischatniuiti Yusa tarimtairĭ asamtai. Jerusaren péprusha pachischatniuiti Uunt Akupin pujutai nuĭ asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.'

*Ikkiatniun pachis Jesus unuiniamiania nu*

*(Rúkas 6.29-30)*

<sup>38</sup> 'Yaunchu tiniu armia nu ántichukaitrum: "Shuar máanikiar jíi apujtukka niisha apujtuktiniaiti. Tura naj akarkasha ni najsha akarkatniuiti." <sup>39</sup> Tura Wisha tájarme: Yajauch shuar taritairap. Antsu ame yapimin ijiutmamtai áatú yapimsha tsankatkata. <sup>40</sup> Tura pushirmin jurutramkitiaj tákuisha sakurmasha susata. <sup>41</sup> Tura káarkancha chikichik kirumitruk jurutkitia túramkui ámeká jimiará kirumitru ejeeta. <sup>42</sup> Seatmana nu susata. Ikiatmakuisha páchitsuk ikiasta.'

*Nemasrĭ aneetniun Jesus unuiniamiania nu*

*(Rúkas 6.27-28, 32-36)*

<sup>43</sup> 'Núnisan tiniu armia nu ántichukaitrum: "Ame shuarum aneeta tura nemasrumka kajerkata." <sup>44</sup> Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta. <sup>45</sup> Atumsha nu túrakrum atumí Aparĭ nayaimpiniam pujana nu túrana áitkiasrumek túrarme. Iista, Yus yajauch shuarnumsha péñker shuarnumsha tsáapin awajmatkiatsuk. Núnisan yumincha yajauch shuar pujuiniamunmasha péñker shuar pujuiniamunmasha yúumtiktsuk. <sup>46</sup> Aya atumin anenmainia nuke aneakmesha ¿yaki akirmakat? Yajauch shuarsha nuna túrin áiniawai. <sup>47</sup> Aya ame yatsumek shiir chichaakmeká ¿warĭ péñkerak túram? Yus-shuarchasha nuna túrin áiniawai. <sup>48</sup> Nu asamtai atumí Aparĭ Yus nayaimpiniam pujana nujai métek ti péñker átiniaitrume.'

<sup>1</sup> ‘Ashí íimiainiain̄ aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu penké akirmakchattarme. <sup>2</sup> Nu asantai shuar atsuma nu yaiyakmeka ashí shuar ujakairap. Anankartin ainia nuka iruntainmasha tura pepru jintí wekasasha ashí íimiainiain̄ shiir túrajai tusar nuna túrin áiniawai. Junasha “pénker túrawai” tu enentáimturarti tiniu ásar Yus akiátsain̄ aya tu enentáimturmajain̄ akinkiaruiti, nekas tajai. <sup>3</sup> Antsu átumka atsumainia nu yaiyakmeka penké úukam túrata. Chikichkisha nu yáinman nekaashti. <sup>4</sup> Úukam túrakminkia ame Apa Yus uukman wainia nu, nuna akirmaktatui.’

*Yus áujsatniun Jesus unuiniamiania nu*  
(Rúkas 11.2-4)

<sup>5</sup> ‘Atumsha Yus áujeakrumsha ántar chichamtin ainia núnis áujssairap. Nu shuarka iruntainmasha tura pepru jintísha shuar iirsarti tusa wajakiar Yúsan áujin áiniawai. Nekasan tájarme, Yus akiátsain̄ aya nu iismajain̄ akinkiaruiti. <sup>6</sup> Tura ame Yus áujeakmeka ame kuárturmin wayam waiti epenim nuñ amek ame Apa Yus áujssata. Nuna ame Apa Yus uuka túramu waitma asa akirmaktatui.’

<sup>7</sup> ‘Yus áujeakmesha ántam esaram áujsaip. Yúsan nékainiatsna nuka “Esaram áujeakuinkia Yus anturtuktatui” tu enentáimainiawai. <sup>8</sup> Niijjiaí métek ajasairap. Átumka seatsrumniñ Yus Apa átum atsumamun nékawai. <sup>9</sup> Nu asantai Yus áujkuram júnis títiniaitrame:

‘Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. <sup>10</sup> Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan̄ ju nunkanmasha uminkiatí.

<sup>11</sup> Aparu, ii yurumkarí ashí tsawant amasta. <sup>12</sup> Tura winia nemasrun tsankurajna núnismek, Aparu, winia tunaaru tumashrísha tsankurturta. <sup>13</sup> Tunáa wakeruktin tsankatrukaip. Antsu ashí tunaanumiá uwemtikrurta. Tuke ashí aents akupkamniaitme. Núnisam Amesha tuke ti kakarmaitme. Tura ti shíiraitme. Tuma asakmin seajme. Nuke atí.’

<sup>14</sup> ‘Amesha chíkich shuar yajauch awajtamka nu tsankureakminkia Yus Apa nayaimpiniam pujana nu amincha tsankurtamprattawai. <sup>15</sup> Tura chíkich tsankureachkumnñkia Yus Apasha ame tunaarmincha tsankurtamprashtatui.’

*Ijiarmatniun pachis Jesus unuiniamiania nu*

<sup>16</sup> ‘Ijiarmarum Yus áujkurmesha wake mesekrum susuntrairap. Anankartin shuar chíkich shuar “ijiarmaiti” tu enentáimtursarti tusa tuma áiniawai. Nekasan tájame, Yúska akiátsain̄ aya nujaí akikma áiniawai. <sup>17</sup> Antsu ámeke ijiarmamsha pénker temashmaram pénker jaupmitia. <sup>18</sup> Shuar ijiarmaiti tu enentáimturmasarain̄. Aya Yus Apak nekaatawai. Tura asa akirmaktatui.’

*Kuítian pachis Jesus unuiniamiania nu*  
(Rúkas 12.33-34)

<sup>19-20</sup> ‘Ju nunkanmaya kuit ikiaun̄katniujai nan̄kaamas nayaimpiniam kuit ikiaun̄kata. Juñkia kayaá yúchakait tura mash meseatsuk. Tura kasasha wayá kasamtsuk. Antsu nayaimpinman̄ka kayaasha yuatsui tura mash meseatsui tura kasasha wayá kasamtsui. <sup>21</sup> Kuítrum ana nuñ enentáimtustatme. Tuma asam nayaimpiniam ikiaun̄kata.’

*Ayashi tsáapnintrí*  
(Rúkas 11.34-36)

<sup>22</sup> ‘Ame jímijiaí tsáapin amiin wayamniaiti. Tuma asantai ame jimi pénkeraitkiuñkia amiin tsáapin wayá tuke tsáapniiti. <sup>23</sup> Antsu ame jimi yajauchitkiuñkia tsáapin amiin wayachmin asantai tuke kiritin átatui. Núnisan̄ yajauchia nu wakerakmeka pénkera nu ame enentáim̄in wayachmin asantai tuke kirit ajastatui. Nu kiritcha imiá yajauchiti.’

*Yussha kuitsha máimtek enentáimtushamniaiti  
(Rúkas 16.13)*

<sup>24</sup> ‘Shuar jimíarâ úuntriñ umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisan átumka Yussha kuitcha máimtek enentáimtustin tujinkiattarme.’

*Yus ni uchirín péñker wáinkiaiti  
(Rúkas 12.22-31)*

<sup>25</sup> ‘Tuma asamtaí tájarne: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsataincha amaschamniakait. <sup>26</sup> Chínkisha enentáimpratarum. Yakí nanamainiak yurumkan arakmainiatsui. Tura juuk yurumkan ikiuiniatsui. Tuma ain Yus Apa nayaimpiniam pujana nú Yusak áyureatsuk. Atumsha chin̄kia nú nan̄kaamaschakaitrum. <sup>27</sup> Nu arantcha ti enentáimkiumsha ¿nujaj tsakartatmek?’

<sup>28</sup> ‘Nuikia ¿urukamtaí entsartincha timiá enentáimprum? Iistá, kukujsa takachuitiat tura najanchaitiat <sup>29</sup> ti shíirmach áiniawai. Yaunchu uunt akupin Sarumún ti shiir iwiarmamniuitiat kukujsa tímianchayuyai. <sup>30</sup> Iis, nupa yamá tsakaawai tura kashin aents tsupikiar jinium epeenawai. Tuma ain Yus ti shiir áentseatsuk. Nuna tura asa atumniasha nú péñker waitmakchattawak. ¿Urukamtaí Yus nekas enentáimratsrum? <sup>31-32</sup> Ju nun̄kanam ana nu pachikiairap. Chíkich shuar, Yúsan nékainiatsna nu, wariñ yuataj wariñ umartataj wariñ entsartataj nuna ti pachiiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai. <sup>33</sup> Tuma asamtaí Yusjaj shiir wekasatin tura Yus akupkamu ana nu umiktin emka enentáimsatarum. Túrakrumniñkia atsumamurmin Yus suramsattawai. <sup>34</sup> Kashin áatna nujaj itiurchat enentáimsairap. Kashinkia nusháa itiurchatrijjaj tsawarchattawak. Yamá tsawanta jujaj máakchakait.’

## 7

*Chíkich sumamtikiawairap  
(Rúkas 6.37-38, 41-42)*

<sup>1</sup> ‘Chíkicha tunaari ti enentáimtusairap. Núnisan Yus atumí tunaari iirtamsashtatui. <sup>2</sup> Chíkich wárik sumamtikiatin enentáimkiumniñkia Yus núnisan sumamtikramattawai. Tura ame chíkicha túramuri nekapmarmena nú nekapkajain amincha nekapmarmattawai. <sup>3</sup> Tuma asamtaí ¿itiurtsuk atumi jijn numi enketna auk ítskesha atumí yachí jijn tsuat enketusha iyarum? <sup>4</sup> Ame jijimjin numi tuke enketajsha ¿itiurtsuk ame yatsumi jiiya tsuátan jurustajme tame? <sup>5</sup> Antar shuará, ame yáintaj tákumka emka ame jijimjin numi enketna nu jusata. Nuyá paant iistatme yatsumi jijn tsuat enketna nu jurustin.’

<sup>6</sup> ‘Ti shiira nuka yawá súsashtiniaiti. Nuna nakitrar amincha esatmichartimpiash. Kuítrumsha kuchi súsashtiniaiti. Aya najatrachartatuak.’

*Yus seakmin suramsattawai  
(Rúkas 11.9-13; 6.31)*

<sup>7</sup> ‘Yus seakrumin suramsattawai. Eakrumka wainkiattarme. “Winiajai” tákurmin awaintiamattarme. <sup>8</sup> Seana núnaka suíniawai. Eana nuka wáiniui. “Winiajai” tuinia núnaka awainiawai.’

<sup>9</sup> ‘Ame uchiram apatkun seatmakui ¿kayaash súsaintiam? <sup>10</sup> Tura namakan seatmakui ¿napíash súsaintiam? <sup>11</sup> Nuikia átum yajauchitirmesha atumi uchirí péñker ana nu tuke súuchakaitrum. Nuna nan̄kaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.’

<sup>12</sup> ‘Júnaka Muisaishsha Yúsnan etserniusha akupenawai: “Chíkich ámin túrutatí tusa wakerakmeke amesha núnismek túratá.” Tu akupenawai.’

*Wañkaram jintiasha tura yupikiach jintiasha*  
(Rúkas 13.24)

<sup>13-14</sup> ‘Wañkaram jintia awai. Wayatniusha yúpichuchiiti. Nuisha untsurí wáiniawai. Tura nusha menkakatniunam jeawai. Túrasha chíkich jintia awai. Nusha yupikiach asa itiurchataiti. Wayatniurisha yupikchiiti. Nuí ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.’

*Nerejai numi nekaatainti*  
(Rúkas 6.43-44)

<sup>15</sup> ‘Aneartarum. Wáitruiniak “Wi Yúsnan étserjai” tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawa áinis áiniawai. Pátatek shiir chichaini-awai tura ni enentáin yajauch piakuiti. <sup>16</sup> Atumsha túramujai nin nekaatniuitrume. Naranmaya shuiya júukchamniaiti. ¿Tsachiksha kushin̄kiapen nerektatuak? <sup>17</sup> Núnisan̄ péñker numia nu tuke péñkeran nereatsuk. Tura yajauch numia nu yajauchin nereatsuk. <sup>18</sup> Péñker numi yajauchin nereatsui. Núnisan̄ yajauch numi péñkeran nereatsui. <sup>19</sup> Yajauch numi ajakar tsupirar jinium apeashtinkiait. <sup>20</sup> Tuma asamtai wáittrin ainia nuka túramujai nekanattawai.’

*Ashikia Yus akupeana nui jeachartatui*  
(Rúkas 13.25-27)

<sup>21</sup> ‘Aya winia Apar nayaimpiniam pujana nuna wakeramurin umirin ainia nuke Yus akupeamunam pachiinkartatui. Chíkichka “Uuntá, Uuntá” turutainiyat nayaimpiniam jeachartatui. <sup>22</sup> Amuukatin tsawant jeamtai untsurí turutiartatui “Uuntá, Uuntá, ame náaram pachisar ashí nun̄kanam etserkachmakaji. Ame náarmesha pachisar yajauch wakan̄cha j̄iiki akupkamji. Tura ame náaram pachisar aentsti tujintiamu túramji” turutiartatui. <sup>23</sup> Nuí chichainiakui “Werumtarum. Pen̄ke nekachuitjarme. Aya yajauchitrume” títiatjai.’

*Péñker ukurma tura yajauch ukurma*  
(Rúkas 6.47-49; Márkus 1.22)

<sup>24</sup> ‘Shuar winia chichamprun antuk umirkanka nu shuar ti péñker enentáimniuiti. Niisha ju shuarjai métekete. Jēa jeamuk kayanam ukurmai. <sup>25</sup> Tura yumi ti yutuk entsa nujan̄kruamai tura nase ti kakaram umpuimiai. Túmaiñ pukukachmai ni ukurmar̄i kayanam ukuamu asamtai. <sup>26</sup> Tura shuar winia chichamprun antuk umirtukchan̄ka ju shuara núnisan̄ enentáimchaiti. Jēa jeamuk náikminiam ukurmai. <sup>27</sup> Tura yumi yutuk entsa nujan̄kruamai tura nase ti kakaram umpuimiai. Túmakui jēa mash saanaki iniaamai” tímiayi Jesus.

<sup>28</sup> Jesus nuna tinia amukmatai ashí shuar ti enentáimprarmiyai. <sup>29</sup> “Yusa kakarmarij̄iai unuitiamtsujik. Israer-shuara jintinniur̄inkia núnis unuiniainiatsui” tiarmiyai.

## 8

*Jesus tunamarun tsuarmiania nu*  
(Márkus 1.40-45; Rúkas 5.12-16)

<sup>1</sup> Jesus muraya támatai untsurí shuar Nin nemariarmiyai. <sup>2</sup> Nuí shuar tunamaru Jesusan jearin tikishmatramiyai. Tura tímiayi “Uuntá, wakerakmeke tsuáramniaitme.”

<sup>3</sup> Tutai Jesus uwejéjai antin̄ “Wakerajai. Péñker ajasta” tímiayi. Tutai tunamaru ni tunamarmari péñker ajasmiyai. <sup>4</sup> Tura Jesus tímiayi “Pai, pen̄ké etserkaip. Áyatik Israer-patr̄i iniakmamsam Muisais timia nu susata ashí shuar nekaawarti tusam.”

*Jesus suntara uchir̄in tsuarmiania nu*  
(Rúkas 7.1-10)

<sup>5</sup> Jesus Kapernáum péprunam wayamtai apachi suntara kapitiántri Nin tarimiayi.  
<sup>6</sup> “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

<sup>7</sup> Jesussha “Ayu, winin tsuartajai” tímiayi.

<sup>8</sup> Tutai kapitián tímiayi “Uuntá, Ame ti nan̄kaamaku asam winia jearuí wayachminiaitme. Áyatik “Pénker ajásti” tákumin winia uchir pénger ajatrustatui.  
<sup>9</sup> Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umíawai.”

<sup>10</sup> Kapitián nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsán tímiatrus enentáimtin atsawai. <sup>11</sup> Maa, yajaya untsurí shuar Yus akupeana nuí jeawar Apraámjajisha Isakjajisha Jakupjajisha iruntrar yurumáwartatui.  
<sup>12</sup> Tura Israer-shuar Yúsnum jeamnia áiniayat aa kiritniunam ajapnawartatui. Nuí ti úutin tura ti wáitsatin átatui.”

<sup>13</sup> Nuyá Jesus kapitiánin chicharuk “Jeemjin waketkitia. Nekas enentáimtusu asakmin uchiram pénger ajatramsattawai” tímiayi. Túramtai ni uchirí nu chichamtaik pénger ajatsamiayi.

*Jesus Pitru tsatsarin tsuármiania nu*  
*(Márkus 1.29-31; Rúkas 4.38-39)*

<sup>14</sup> Jesus Pitru jeen we Pitru tsatsarin tsuemujai jaa tepan wáinkiamiayi. <sup>15</sup> Tura ni uwején antinmatai tsuemun michatramiayi. Tura nuwa nantakin ashí ajamsarmiayi.

*Jesus untsurí jáinian tsuármiania nu*  
*(Márkus 1.32-34; Rúkas 4.40-41)*

<sup>16</sup> Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichik chichamjai chicharas jiki akupiarmiayi. Ashí jáiniancha tsuáramiayi.  
<sup>17</sup> Yúsnan etserin Isayas “Ii pimpirmarincha ii sunkurincha jurutramkimiaji” yaunchu timia nu uminkiatu tusa nu túrunamiayi.

*Jesus nemarsatin*  
*(Rúkas 9.57-62)*

<sup>18</sup> Shuar untsurí Jesusan káutkarmatai “Entsa amain katintai” tímiayi.

<sup>19</sup> Nuí Israer-shuara jintinniurí Jesusan tarí tímiayi “Uuntá, Ámin páchitsuk nemarsatniun wakerajme.”

<sup>20</sup> Tutai Jesus tímiayi “Kujanchmasha ni waarin takaktsuk. Chin̄kisha pasun̄ken takaktsuk. Tura Wi Yúsnumiatiatan tepestiniur atsawai.”

<sup>21</sup> Nin nemarniusha tímiayi “Uunta, emka winia aparun iwiarsan ikiuuttajai.”

<sup>22</sup> Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

*Nasesha entsasha Jesusan umirkarmiania nu*  
*(Márkus 4.35-41; Rúkas 8.22-25)*

<sup>23</sup> Nuyá Jesus ni unuiniamurijjai uunt kanunam enkemámiayi. <sup>24</sup> Nuí nase ti kakaram umpuimtai antumian ti tamparintin ajasmiayi. Tura entsa kanunam yaráná piákmiai. Tuma ain̄ Jesus kanunam kanar tepemiayi. <sup>25</sup> Nuyá ni unuiniamurí kurashim Jesusan ishintiarar tiarmiayi “Uuntá, wayaji. Kakaram ajachkumniñkia jakattaji.”

<sup>26</sup> Jesus tímiayi “¿Urukamtai timiá ashamarum, Yus enentáimtutskesha?” Nuyá wajaki nasencha entsan̄cha chicharkamiayi. Tutai mash miaaku ajasmiayi. <sup>27</sup> Nuna íisar ni unuiniamurí ti enentáimsarmiayi. Tura tiarmiayi “Jusha ¿warí áentsuit? Nasesha entsasha Nin umirainiatsuk” tiarmiayi.

*Jatara nun̄kanam Jesus yajauch wakantrukun tsuármiania nu*  
*(Márkus 5.1-20; Rúkas 8.26-39)*

<sup>28</sup> Nuyá Jesus entsá amaini katiñ Jatara nunkanam jeamiayi. Nui jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asantai shuar nu jintianam nankaamachu ármiai. <sup>29</sup> Niisha Jesusan wáinkiar kakantar tiarmiayi “¿Warí pujuram iijjaj, Jesúsá, Yusa Uchiría. Tsawant jeatsain in amukratkataj tusamek taum?” tiarmiayi. <sup>30</sup> Nui arant kuchí untsurí shushunmak yujaarmiayi. <sup>31</sup> Yajauch wakancha Jesusan seainiak “Jiiki akupkartakmeka kuchíniam wayatin tsankatkartukta” tiarmiayi.

<sup>32</sup> Tutai Jesus “Pai, wetarum’ tímiayi. Yajauch wakancha shuara enentáiya jíinkiar kuchiniam enkemáwarmiai. Túramtai kuchí wáurkiar arau utsanamiayi. Nuyá entsá iniankar jakerarmiayi.

<sup>33</sup> Kuchí wáinniusa nuna ashamkar péprunam tseke wéarmiayi. Nui jeawar ashí túrunamun etserkarmiayi. Yajauch wakantrukun péñker ajasmancha etserkarmiayi. <sup>34</sup> Nuyá ashí nú peprunmaya shuar Jesusan inkiuntai tusar ashinkiararmiayi. Tura inkiunkar ni nunkeya waketkiti tusar seawarmiayi.

## 9

### *Jesus emearun tsuármiania nu* (Márkus 2.1-12; Rúkas 5.17-26)

<sup>1</sup> Nuyá Jesus kanunam enkemar antumian amaini katiñmiayi. Tura nui ni péprurin Kapernáumnum jeamiayi. <sup>2</sup> Nui jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsankuramuiti.”

<sup>3</sup> Takui Israer-shuara jintinniuri yajauch enentáimprar “Juka Yúsan ti yajauch chicharui” tiarmiayi.

<sup>4</sup> Tu enentáimainian Jesus nekáa tiarmiayi “¿Urukamtai imiá yajauch enentáimprum. <sup>5</sup> Tua imiá yúpichuchit. Shuara tunaarin tsankuratin yúpichuchikiait. Tura emearun “Nantakim wekasata” títin yúpichuchikiait? <sup>6</sup> Wi Aents Ajasua núchakaitiaj. Ju nunkanam Wi tunaan asakátratniuitjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemijn wetá” tímiayi. <sup>7</sup> Tutai emearu tsuámar nantaki ni jeen wémiayi. <sup>8</sup> Tura nuna ashí aents wáinkiar Yus kakarman shuáran susa asantai ashamkar Yúsan shiir enentáimtusarmiayi.

### *Jesus nemartusat tusa Mateun achíawai* (Márkus 2.13-17; Rúkas 5.27-32)

<sup>9</sup> Nuyá Jesus wémiayi. Nui wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

<sup>10</sup> Nú ukunmasha Mateu jeen yurumuk pujaj yajauch armia nu Israer-shuar untsurí káunkar Jesusa unuiniamurijjaj irunar yurumiarmiayi. <sup>11</sup> Pariséusha nuna ísar Jesusa unuiniamurin aniasarmiayi “¿Urukamtia atumí Uuntrí kuitia achinjaisha tunaarinni-ujajsha irunar yuruma?”

<sup>12</sup> Tura Jesus nuna antuk tímiayi “Péñker ainia nuka tsuákratniun atsumainiatsui. Antsu jainia nu tsuákratniun atsumainiawai. <sup>13</sup> Werum ju aarma unuimiutarum: “Murik maam Winia surusum nujaj “máakete” tátsujai. Antsu waitnenkartutain wakerajai,” Yus-Papinium tu áarmaiti.

Wikia “péñkeraitjai” tuínian untsuktaj tusan táchaitjai. Antsu tunáa shuar ni enentáin yapajáawarat tusan táwitjai” tímiayi.

### *Ijarmatniun Jesusan aniasarmiania nu* (Márkus 2.18-22; Rúkas 5.33-39)

<sup>14</sup> Nuyá imiakratin Juanka unuiniamurij Jesusan tariar aniasarmiayi. “¿Urukamtai iikia tura Pariséusha ijarmaji tura ame unuiniamurmeka ijarmainiatsu?” tiarmiayi.

<sup>15</sup> Jesus ayak tímiayi “Nuatma nampernum ipiaamu ainia nu çajakra uutu wayamniakait? Yamái-nuatu pujakui úutchamin áiniawai. Núnisan Wi pujakui ijiarmashtin áiniawai. Tura tsawant jeattawai nuatua áintsan Wi junaktatjai. Antsu nuikia ijiarmawartatui’ tímiayi.

<sup>16</sup> ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chiníkiá nuna nankaamas jaaktatui. <sup>17</sup> Nijiamanch yamáí nawar nuap najanamun arutnum yaraachminiaiti. Túramka kariak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai péñker ártatui.”

*Jesus Jairu nawantríncha tura chíkich nuwáncha tsuármiania nu*  
(Márkus 5.21-43; Rúkas 8.40-56)

<sup>18</sup> Jesus nuna taj Israer-shuara uuntri Jesusan tarí tikishmatar tímiayi “Winia nawan-tur jarutkayi, tura Ame winim ewejmijjai antinrukakminkia ataksha nantaktiatui.”

<sup>19</sup> Tutai Jesus ni unuiniamurijjai wajakiar nijijai wearmiayi.

<sup>20</sup> Tura jintiá weenai nuwá tuse (12) uwitin numpá ajapeak wáitias pujú asa Jesusa ukurini amainian ni pushirin antinmiayi. <sup>21</sup> “Áyatik ni pushirin antinnaka péñker ajastatjai” tu enentaimpramiayi. <sup>22</sup> Nuna nekáa Jesus ayantar nuwan tímiayi “Shiir enentáimprata, nawantru. Yus shiir enentáimtusú asam péñker ajasume.” Nu chicham-taik ni jáamuri péñker ajasmiayi.

<sup>23</sup> Nuyá Jesus uunta jeen jeamiayi. Tura nuji charaatum ajainiancha tura jakan iwíarsatai tusar péeman umpuiniiancha wáiniak <sup>24</sup> tímiayi “Aa jíintrarum. Nuwáchikia jákachai antsu aya kanarai.” Peñké jakan nekayat túratta nuna neka asa “aya kanarai” tímiayi. Takui aents Nin wishikrarmiayi. <sup>25</sup> Tura nuna ashí jiiir Jesus jeá wayá nuwáchin uwejnun achik iniantkimiayi. Túram nantakmiayi. <sup>26</sup> Nu túramu ashí nu nunkanam etsernarmiayi.

*Jesus kusurun jímiaran tsuármiania nu*

<sup>27</sup> Nuyá Jesus wéakui jimiará shuar jii kusuru untsunki weriarmiayi. “Uuntá, ii Uuntri Tawit ame weatrum asamtai in waitnenkarturta” tiarmiayi. <sup>28</sup> Jesus jeá wayamtai jii kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

<sup>29</sup> Tuíniakui Jesus ni jiiin antinkiar tímiayi “Átum nekas enentáimtarmena núnisan túrunati.” <sup>30</sup> Nujai jii péñker ajasarmiayi. Nuyá Jesus “Etserkairap. Shuar peñké nekáwarain” tímiayi. <sup>31</sup> Támaiatiat jíinkiar Jesus túramun ashí nu nunkanam etserkarmiayi.

*Jesus chichachun péñker awajsamiania nu*

<sup>32</sup> Nuyá wenai shuar yajauch wakantruku chichachun Jesusan itiararmiayi. <sup>33</sup> Tura Jesus yajauch wakanin jiiiki awemamtai nu chichachu chichakmiayi. Ashí nuna íisar ti enentáimprarmiayi. Tura tiarmiayi “Yáunchusha Israer nunkanam jujai métek túramu peñké atsuwiti.” <sup>34</sup> Antsu Pariséuka yajauch enentáimtuiniak tiarmiayi “Nu shuar iwianchi uuntri kakarmarijjai yajauch wakanin jiiiki akupeawai.”

*Jesus shuaran waitnentawai*

<sup>35</sup> Jesus ashí péprunam we ni iruntairin wayá “Yus akupeana nuji enkemátarum” tu etsermiayi. Tura ashí nánkamas sunkurjai jáiniancha tsuármiai. <sup>36</sup> Shuaran íisar murik wáinchatia núnis pimpikiar tura kúntuts pujuinia asamtai waitnentrarmiayi. <sup>37-38</sup> Nuyá ni unuiniamurin tímiayi “Ju aents Yus-Chicham ujaktiniaitji Yus-shuar ajasarat tusar. Nu takat ti núkap awai tura takarin ishichik áiniawai. Nu takatka júuktinia áintsankete.

Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

## 10

*Jesus tuse (12) unuiniamurin achikmiayi tuke nemarsatniun  
(Márkus 3.13-19; Rúkas 6.12-16)*

<sup>1</sup> Nuyá Jesus tuse (12) unuiniamurin achik Yusa kakarmarin súsarmiaiyi yajauch wakanin shuara enentáiya jiki akupkatniun. Núnisañ ashí sunkurjai jáinian tsuáartinian susamiayi.

<sup>2</sup> Ju áiniawai Jesus tuse (12) unuiniamurin achikiarmia nu: Emka Semuñ núnisañ Pitru náartiniuyayi. Nuyá ni yachi Antres. Nuyá nuámtak yáchintin Jakupusha Juansha, Sepetéu uchirí armia nu. <sup>3</sup> Nuyá Jiripi, Parturumí, Tumas, Mateu. Mateusha kuítian achiniuyayi. Arpeu uchirí Jakupusha. Ripíu núnisañ Tateu náartiniuyayi. <sup>4</sup> Ásumpí Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiaiyi.

*Jesus ni unuiniamurin etserkarti tusa akupkarmiania nu  
(Márkus 6.7-13; Rúkas 9.1-6)*

<sup>5</sup> Nu tuse (12) unuiniamurin Jesus júnis chicharak akupkarmiaiyi. “Israer-shuarcha matsatmanum weerap. Samaria nunkanam péprunam weerap. <sup>6</sup> Antsu Israer-shuar murikiua áinis Yusaiya wákaru ainia nu weritiarum. <sup>7</sup> “Tsawant ishichik ajasai Yus jú nunkanam akupin ajastin” tu etserki wetarum. <sup>8</sup> Tunamarusha chikich sunkurjai jainia nusha tsuatarum. Jakasha iniantkitiarum. Yajauch wakanha shuara enentáiya jiki awematarum. Nu túratin kuítchajai kakaram susamuítrome, tuma asantai atumsha ashí ánrarmek túratarum.’

<sup>9</sup> ‘Kurisha ashí kuitcha jukiirap. <sup>10</sup> Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampram-sartin áiniawai.’

<sup>11</sup> ‘Péprunam jearmesha péñker shuar wáinkiarum nuñ wayarum tuke nuñ pujustarum. <sup>12</sup> Nu jeañam wayamsha “Ju jea shiir atí” titiá. <sup>13</sup> Nekas péñker shuaraitkiunka shiir ajasarti. Antsu nu shuar péñker itiamachkuñka shiir ajascharti. <sup>14</sup> Tura nánkamsañ atumin awaintiamainiachkuñkia anturtamainiachkuñkia nuyá jinkitiarum. Nu shuar yajauch ásarmatai jinkirum atumí naweya nunka japimiarum ikiuktiarum. Ni tunaari aents nekaawarat tusarum túratarum. <sup>15</sup> Nu shuaran nekapsatin tsawant jeamtai Yus asutiáshtatuak. Sutum péprunmaya shuara nankaamas Kumura péprunmaya shuarnasha nankaamas Yus asutiáttawai nu shuaran’ tímiayi.

*Yajauch awajsatniun ujakmiania nu*

<sup>16</sup> ‘Aneartarum. Wisha murik yawanum akupkatniua áintsanak akupeajrume. Tuma asantai shiir nawamkartin áyatrúm aneartarum. <sup>17</sup> Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui. <sup>18</sup> Wíi shuar asakrumin uuntnumsha tura nuyá akupniunmasha juramkiartatui. Núnisrum akupni-uncha tura Israer-shuarchanha winia chichamur ujaktatrome. <sup>19</sup> Tura akupniunam surutmakakrumnisha wariniak titiaj tu enentáimprairap. Nuñ uuntjai chichaakrumin Yus titinian jintinramattarme. <sup>20</sup> Nuiñkia átum enentáimmiajai chichaschattarme antsu atumí Apari Yusa Wakaní atumin chichamtikramsattarme.’

<sup>21</sup> ‘Shuar ni yachincha máawarti tusa surukartatui. Apasha ni uchirin surukartatui. Uchisha ni aparin máawarti tusa surukartatui. <sup>22</sup> Tura Wíi shuar asakrumin mash muíjramkartatui. Tura tuke katsuntea nu uwemprattawai. <sup>23</sup> Chikichik péprunam yajauch awajtamainiakui chikich péprunam pisartarum. Wi Aents Ajasuitjai. Tuma asan nekasan tájarne, átum Israer-shuar mashi ujatsrumniñ wantinkiattajai.’



<sup>24</sup> ‘Unuiniamuka nin unuiniana nuna nan̄kaamaschaiti. Takarniusha ni uuntri nan̄kaamaschaiti. <sup>25</sup> Unuiniamuka nin unuinia nujai métek ajaska maak. Takarniusha ni úntrijjaj métek ajaska maak. Wátsek, Winia atumí úntrin “Iwianchi uuntri” túrutainiakui atumniasha nuna nan̄kaamas yajauch turamtatui.’

*Yúsak ashamkatniuiti*  
(Rúkas 12.2-9)

<sup>26</sup> ‘Tuma asamtai aentska ashamkairap. Ashí uukma nu paant nekanattawai. <sup>27</sup> Ishishmasan kiritniunam ujaajrumna nu, tsawái kakantrarum etserkatarum. <sup>28</sup> Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asamtai Yus ashamkatarum.’

<sup>29</sup> ‘Jimiará chin̄ki pen̄ké ishichik kuitjaj surukmin áiniawai. Túmaitiat Yus tsan̄kateachkuin̄kia nun̄ká jaka iniainiatsui. <sup>30</sup> Ame intiashmisha mash nekapmarmaiti. <sup>31</sup> Nu asamtai jákatin ashamkairap. Yusjaj átumka ti untsurí chin̄kijjaj nan̄kaamas pen̄kerchakaitrum.’

*Jesus natsantrashtiniaiti*  
(Rúkas 12.8-9)

<sup>32</sup> ‘Ashí shuar ashí íimiainiajn Winia natsantruiniatsna núnaka Winia Apar yakí nayaimpiniam pujana nuj natsantrashtatjai. <sup>33</sup> Antsu shuar íimiainiajn Winia natsantra núnaka Wisha yakí nayaimpiniam winia Apar pujana nuj natsantrattajai.’

*Jesusa chichamejaj shuar akannartatui*  
(Rúkas 12.51-53; 14.26-27)

<sup>34</sup> ‘Ashí shuar nawamnaikiar shiir pujusarat tusan ju nun̄kanam táchaitjai. Nuna túrat tusarum enentáimturairap. Antsu wi tamaajaj shuar pen̄ker ajasarmatai yajauch shuar nin nakitrartatui. <sup>35</sup> Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai. <sup>36</sup> Tuma asa shuar ni shuarijjaj nemasrintin ártatui.’

<sup>37</sup> ‘Shuar ni aparíncha nukuríncha Wijjaj nan̄kaamas aneakka Wíi shuar áchamniaiti. Núnisan ni uchiríncha nawantrin̄cha nan̄kaamas aneakka Wíi shuar áchamniaiti. <sup>38</sup> Tura ashí wáitsatniun surimiatsuk ni krúsrin̄ yanaki jukí nemartachkuñka Wíi shuar áchamniaiti. <sup>39</sup> Aya jú nun̄kanam pen̄ker pujustaj tana nu ni iwiaakmarin̄ emesrattawai. Tura Winia anentu asa ju nun̄kanam pen̄ker pujustinian páchiatsna nu tuke shiir pujustatui.’

*Akinkiatin*  
(Márkus 9.41)

<sup>40</sup> ‘Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai. <sup>41</sup> Yúsnan etserniuncha Yúsnumia winiá asamtai itiaakka etserin akínkiáttana nujaj métek akínkiáttawai. Pen̄ker shuárnasha pen̄ker asamtai itiaakka pen̄ker shuar akínkiáttana nujaj métek akínkiáttawai niisha. <sup>42</sup> Uchin̄cha Wíi shuar asamtai entsá michan shikirak súsan̄ka imiá nekas nusha akínkiáttawai.” Tu tímiayi Jesus.

## 11

*Imiakratin Juan Jesusaj shuaran akupkamiania nu*  
(Rúkas 7.18-35)

<sup>1</sup> Tura tuse (12) unuiniamurin̄ Jesus tinia akupkar Niisha nú nun̄ka péprunam we Yus-Chichaman jintíak etserkamiayi.

<sup>2</sup> Tura Juan sepunam en̄kemas Kristu túramun antukmiayi. Antuk ni unuiniamurin̄ jímíaran Jesusaj akupkamiayi. <sup>3</sup> Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataji?”

<sup>4</sup> Tutai Jesus tímiayi “Waketkirum ashí ántarmena nusha wáintrumna nusha Juan̄ ujaktarum. <sup>5</sup> Kusurusha wáinmainiawai. Shutuapsha wekainiawai. Tunamarusha pen̄ker

ajainiawai. Empekarusha ántuiniawai. Jákarusha nantainiawai. Tura kuítrinchamasha uwempratin chicham ujakmaiti. Nu ujaktarum. <sup>6</sup> Túrasha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

<sup>7</sup> Waketkiarmatai shuar káunkarun Jesus Juánkan pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juánkka nú shuarchaiti. <sup>8</sup> Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen pujuiniatsuk. <sup>9</sup> Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juánkka yaunchu etserniu nankaamas enentáimtustiniaiti. <sup>10</sup> Yaunchu Yus-Papinium áarmaiti:

“Winia akatramurun amiini emka akupeajai ame jintimin iwiarat tusa.”

Juan nu akatramuiti. <sup>11</sup> Nekasan tájarme, shuar imiakratin Juanjai nankaamas uunt atsuwiti. Tuma ain Yus akupeamunam pachiinia nu shuarnaka, nekasmianchancha, Juanjai nankaamas shiir enentáimtustiniaiti. Tuma asamtai nu pachiinkiatin enentáimpratarum.’

<sup>12</sup> ‘Kakaram shuarka imiakratin Juan támia nú tsawantnumia Yus akupeamunam ti pachiinkiatniun wakeruiniak kakarmajai pachiinkiatniun enentáimiainiawai. <sup>13</sup> Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi. <sup>14</sup> Yaunchu Yúsnan etserin “Kristu táatsain Erías tátiniaiti” tímiayi. Tura nekaatin wakerakrumka Juan nu Eríasaiti. <sup>15</sup> Antuktin jeakrumka nekaatarum.’

<sup>16</sup> ‘Ju áentsnasha ¿warijjai métek nakumkataj? Uchijjai métek áiniawai. Ni ajijai iruntrar nakurustaj táyatan tuíniawai <sup>17</sup> “Námpera áinis nakurustaitsar peem umpuarji túrasha jantsemáchurme. Nuyá iwiarsatniua áinis nakurustaitsar íwiareakur kantamtaí kantamáji túrasha átum úutcharme.” <sup>18</sup> Atumsha núnisaitrume. Kame Juan núkap yurumtsuk nijiamchinchá úmutsuk wekaimiayi. Túmakui átumka “Yajauch wakantrukuíti” tímiarme. <sup>19</sup> Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

*Yajauch péprunmayá shuaran chicharkamiania nu  
(Rúkas 10.13-15)*

<sup>20</sup> Nuyá tujintiamun túramiania nú peprunmayá shuaran pachis Jesus chicharkamiayi. Tuma ain nuyá shuar ni enentáin yapajíácharu asamtai juna chicharkamiayi.

<sup>21</sup> “Wáinkiatá, Kurasín péprunmayatiram, Petsaitia péprunmayatirmesha. Nuí aents tujintiamun ti túraitjai. Tiru péprunmasha Setun péprunmasha nu tujintiamu túramuitkiuinikia yaunchu ni enentáin yapajíáwaraayi. Túrawar kúntuts pujutai pushín entsarar yunkunim ajakiaaraayi. <sup>22</sup> Tura Wisha tájarme, nekapsatin tsawant jeamtaí Yus atumin tí asuttiamattarme. Tirunmayá shuaran nankaamas tura Setunnumia shuaran nankaamas asuttiamattarme.’

<sup>23</sup> ‘Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestamprartatui. Atumjin aents tujintiamun ti túraitjai. Sutuma péprunam nu tujintiamu túramuitkiuinikia nu pepru yamaisha tuke aayi. <sup>24</sup> Tura Wisha tájarme, nekapsatin tsawant jeamtaí Yus Sutkanmayá shuar nankaamas atumin asuttiamattarme.’

*“Winin ayampratarum” tímiania nu  
(Rúkas 10.21-22)*

<sup>25</sup> Nuyá Jesus tímiayi “Shiir enentáimtajme, Aparu, ashí nayaimpisha nunkasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nankaamantu enentáimtumainiatsna nú shuar paant awajtusuitme.

<sup>26</sup> Ame, Aparu, núnis wakera asam túraitme.’

<sup>27</sup> ‘Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. <sup>28</sup> Ashí pimpikniutirmesha itiurchat pujarmena nusha Winí winitiarum. Túrakrumniñkia ayamtikrattajrume. <sup>29</sup> Wi kajechu asan tura péejchach enentáimin asamtai Winí winirum unuimiartarum. Winia chichamur ántakrum umíakrumniñka atumí wakaní ayamprattawai. <sup>30</sup> Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

## 12

### *Jesusa unuiniamurí ayampratin tsawantaj trikiu neren pakaarmiania nu* (Márkus 2.23-28; Rúkas 6.1-5)

<sup>1</sup> Nuyá Jesus ayampratin tsawantaj ajanman ajapenin nankaamamiayi. Ni unuiniamurísha tsukarar trikiu neren majusar yukí wekasarmiayi. <sup>2</sup> Pariséu shuarsha nuna wáinkiar Jesusan aniasarmiayi “Iista, ame unuiniamuram ayampratin tsawantaj túratin surimkiamua nuna túruiniawai.”

<sup>3</sup> Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. <sup>4</sup> Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemanin ana nunasha suritkiamuyayi. Túmain yúawarmiayi. <sup>5</sup> Muisais akupkamunam aarma nu áujkachukaitrum. Israer-patrikia ayampratin tsawantaj takainiayatan nusha tunaachuiti. <sup>6</sup> Nekas tájarne, yamá Yusa Jeen enentáimtustinia nuna nankaamas Wíniaka Aents Ajasuitjiana nu, nekas enentáimtursatniuitrume. <sup>7</sup> Yus-Papinium tawai: “Murik maam Winia surusum nujaj “maakete” tátsujai. Antsu waitnenkartutain wakerajai.”

Nu chicham nekas nékaitkiurmeka yamá túrarmena núnisrum tunáa túrachu ántarum súmantikiachaintrume. <sup>8</sup> Wi Aents Ajasu asan ayampratin tsawantan Úntrintjai.”

### *Shuara uweje jakan Jesus tsuármiania nu* (Márkus 3.1-6; Rúkas 6.6-11)

<sup>9</sup> Jesus nuyá wé Israer-shuar iruntainiam wayamiayi. <sup>10</sup> Nuj shuar ámiayi ni uweje jaka. Tura Jesusan ántar nekapsatai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

<sup>11</sup> Tutai Jesus tímiayi “Atumsha atumí murikrj ayampratin tsawantaj waanam akaiki iniamtai jusatai tusarum wéchaintrupash. <sup>12</sup> Antsu shuarka murikjai nankaamaschakait. Tuma asamtai ayampratin tsawantaisha péñker ana nu túramniaiti.” <sup>13</sup> Tinia iniais áishmankan uweje jakan tímiayi “Uwejem takuitia.” Tutai uweje takuí chíkich uwejējai métek péñker ajasmiayi. <sup>14</sup> Nuna túramtai Pariséu shuarsha aa jíinkiar Jesus itiurak máawaintiaji tusar chichaman najatiarmiayi.

### *Isayas Jesusnan tímia nu uminkiamiayi*

<sup>15</sup> Jesus nin máatniun nekaama nuyá jíinkimiayi tura wéakui untsurí shuar nemariarmiayi. Untsurí jáiniancha tsuámiayi. <sup>16</sup> Tsuar “etserkairap” tinia akupiarmiayi. <sup>17</sup> Yaunchu Yúsnan etserin Isayas tímia nu uminkiaiti tusa túrunamiayi. Niisha juna áarmiayi:

<sup>18</sup> “Júiti Wi achikmaj nu. Niisha Wi tájana nuna umin asamtai ti aneakun Ni-ijjai waraajai. Winia Wakantru kakarmarin takamtsuk susattajai. Túramtai winia uwempratin chichamprun ashí Israercha nunkanmasha etserkattawai. <sup>19</sup> Jiakchattawai tura kakaram chichaschattawai. Winia anturtukarat tusa

péprunam weak untsukchartatui. <sup>20</sup> Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisan shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui. <sup>21</sup> Tura Israer-shuarchasha Nin nekas enentáimtusartatui.”

*Jesusan “iwianchi uuntri kakarmarijiaí túrawai” tiarmiania nu*  
(*Márkus 3.19-30; Rúkas 11.14-23; 12.10*)

<sup>22</sup> Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant ímsamiayi tura chichakmiayi. <sup>23</sup> Nuna wáinkiar shuar shiir enentáimprar tiarmiayi “¿Tawitia uchirí pampanku iniannamu uwemtikkiartin tátinia nuáshit?”

<sup>24</sup> Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitíantrin Pirsepún umirniuti. Tuma asa nuna kakarmarijiaí yajauch wakanin jiki akupeawai.”

<sup>25</sup> Jesus tu enentáimainian neka asa tímiayi “Nú nunkanmaya shuar nuamtak kajer-naiyakuinkia nú nunka wari meserchattawak. Núnisan nuamtak shuar ní shuarjai mánainiakka amunaikchartatuak. <sup>26</sup> Núnisan iwianch nuamtak jiki akupnainiakka máanaikiar wárik amuukashtatuak. <sup>27</sup> Kame Wi Pirsepú iwianchi kakarmarijiaí iwianchin jiki akupeakuinkia atumí uchirísha ¿yana kakarmarijiaín jiki akupena? Ni túramurijiaí átum awajirma nekamatarum. <sup>28</sup> Wi Yusa Wakaní kakarmarijiaí yajauch wakanin jiki akupea asamtai atumsha Yusa akupeamuri atumjin jeartarmena nu nekaatniuitrume.”

<sup>29</sup> ‘Iista. Shuar kakaram shuara kuítrin kasarkatin wakerakka emka kakarman jiníkiá aya túran ni jeen wayá kasarkamniaiti. Wi iwianchin jikmiajai uunt iwianch nupetkamua nu nekaamniaiti.’

<sup>30</sup> ‘Wijiai tsanin pujatsna nuka winia nemasruiti. Núnisan Winia yáintsuna nu aya itiurchat nájateawai.’

<sup>31</sup> ‘Tuma asamtai tájarne, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanin yajauch chicharin ainia nuka tsankurashtiniaiti. <sup>32</sup> Winiasha Aents Ajasuitjiana nuna yajauch chichartuinia nú shuarsha tsankuramniaiti. Tura Yusa Wakanin yajauch áujmatainia nuka penké tsankurachminiaiti. Ju nunkanmasha tura ukunmasha tsankurnarchattawai’ tímiayi.

*Ni nerejai numi nekaamniaiti*  
(*Rúkas 6.43-45*)

<sup>33</sup> ‘Yutai numi péñkeran nereawai. Tseas numisha yajauchin nereawai. Ni nerejai numi nekaamniaiti. Núniskete atumjai. <sup>34</sup> Tseas wenunniutirmesha, ¿atumsha itiu-rak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti. <sup>35</sup> Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. <sup>36</sup> Tura Wisha tájarne, nekapsatin tsawant jeamtai ashí enentáimtsuk chichakma nuna Yúsan paant ujakartatui. <sup>37</sup> Iis, ame chichammijiai nekanattarme. Péñker chichakuitkiumka sumamash-tatme. Tura péñker chichachaitkiumka sumamattame.”

*Nu shuar yajauch ásar iniakmamun seawarmiania nu*  
(*Márkus 8.12; Rúkas 11.29-32*)

<sup>38</sup> Pariséu shuarsha Israer-shuara jintinniurisha Jesusan chicharuk “Uuntá, ame Yúsaiyaitjai tusam nayaimpinmaya kakarmajai iniakmamun túrata, iisha wáinkiatái” tiarmiayi.

<sup>39</sup> Tutai Jesus tímiayi “Shuar yajauch tura Yúsan enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastini-aiti. <sup>40</sup> Junas menaintiu kashi menaintiu tsawantcha namaka ampujen enkemsamiayi.

Núnisnak Wi, Aents Ajasu asan, menaintiu kashi menaintiu tsawantcha nunká jakan tepestatjai. <sup>41</sup> Junás Níniwi péprunmaya shuaran Yus-Chichaman etserkamtai nu shuar ni tunaarin enentáimtusar ni enentáin yapajíawarmiayi. Tura juí yamáí Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmamtikiawartatui.

<sup>42</sup> ‘Yaunchu nuwa yajaya shuaran úunt akupniuriyayi. Nu nuwa Sarumún ti neka asamtai nin anturkataj tusa tarimiayi. Tura juí yamáí Sarumúnjai nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwa juyá shuaran súmamtikiawartatui’ tímiayi.

*Yajauch wakan jüiki akupkamuitiat wáketna nu*  
(Rúkas 11.24-26)

<sup>43</sup> ‘Shuara enentáiyá yajauch wakan jíinkin yumi penké yútatsna nuí wéawai. Tura nuí péñker pujustinian wáinkiach ataksha waketkitniun enentáimiui. <sup>44</sup> “Wi jíinkimíaj nuí waketkittiajai” tawai. Tura waketki shuara enentáin péñker iwiaramu tura ankantán wáiniak <sup>45</sup> ni ain siati (7) iwianchin níijíaj nankaamas yajauchin itia shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisan juyá shuar túrunawartatui” tímiayi Jesus.

*Jesusa yachí, Jesusa nukurí*  
(Márkus 3.31-35; Rúkas 8.19-21)

<sup>46</sup> Jesus nu shuarjai tuke chichaak pujai ni nukurísha ni yachísha tariarmiayi. Tura aa wajasar Níijíaj chichastaj tiarmiayi. <sup>47</sup> Túramtai Jesusan ujarak “Ame nukusha yatsumsha aa wajasar chichastaj turamainiawai” tiarmiayi.

<sup>48</sup> Chichaman ujakmia nuna Jesus tímiayi “¿Ya ainia winia nukursha winia yatsursha?”  
<sup>49</sup> Nuyá ni unuiniamurín iniakmas tímiayi “Ju áiniawai winia nukur tura winia yatsursha.  
<sup>50</sup> Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur áiniawai” tímiayi.

## 13

*Untsurí métek-taku chichamjai Jesus unuiniamiania nu*

(1) *Atsaamin atsaampramiayi*  
(Márkus 4.1-9; Rúkas 8.4-8)

<sup>1</sup> Nu tsawantai Jesus ni jeeya jíinkin antumianka kánmatkarín pujusmiayi. <sup>2</sup> Tura ti untsurí shuar káunkarmatai kanunam enkemar nuí pujusmiayi. Shuarsha antumianka kánmatkarín pujusarmiayi. <sup>3</sup> Túrunawarmatai untsurí métek-taku chichamjai unuiniamiai. “Atsaamin atsaamprataj tusa jíinkimíai, tímiayi. <sup>4</sup> Atsaamki wesa arakrí jintia písunmasha iniaarmai. Tura chiníki tariar yuawarmai. <sup>5</sup> Chikichcha kaya írunmanum iniaarmai. Nunka ishichik asamtai wárik tsapainiarmai. <sup>6</sup> Tura nantu etsantramtai péñker kankáprúrcharu asa sukuam káararmai. <sup>7</sup> Chikichcha janíki nupanam iniaarmai. Tura janíki wárik tsakar nupetak ajakramai. <sup>8</sup> Chikichcha péñker nunkanam iniaarmai. Nusha péñker nerekar chíkich siañsha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. <sup>9</sup> Kuishim ákuinkia antuktatum” tímiayi.

*“¿Urukamtai aya métek-taku chichamjai jintiam?” aniasarmiania nu*  
(Márkus 4.10-12; Rúkas 8.9-10)

<sup>10</sup> Nuyá ni unuiniamurín Jesusan taruntar aniiniak “¿Urukamtai aya métek-taku chichamjai ju shuar unuiniam?” tiarmiayi.

<sup>11</sup> Tutai Jesus tímiayi “Urukuk ju nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chíkich

nuna nekaachmin áiniawai. <sup>12</sup> Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiarme. <sup>13</sup> Tuma asamtai aya métek-taku chichamjají unuiniyajai. Nú shuarka íniayatan wáiniáiniatsui. Ántuiniayatan ántachua núnis nékainiatsui. Túmainiak Winia nekarainiatsui. <sup>14</sup> Nujají yaunchu Yúsnan etserin Isayas timia nu uminkiaiti. Juna tímiayi:

“Ti ántayatrum anturkashtatrome. Wáiniatrumsha nekaashtatrome. <sup>15</sup> Ju shuara enentáí kátsuram ásar péñkera nuna nakitiainiawai. Nu asamtai péñker ántuiniatsui, jjísha pusá áinis áiniawai. Túrachkunka paant nekaawarainti, tura nekas antukarainti, tura enentáíjjají enentáimias Winia tsuarat tusa tarutiarainti.”

<sup>16</sup> Tura átumka paant wainkia asarum péñker anta asarum shíiraitrome. <sup>17</sup> Nekasan tájarme, untsurí Yúsnan etserniusha tura péñker shuarsha átum yamáí wáintrum nuna wáinkiatniun wakeruiniayatan wáinkicharmiayi. Tura átum yamáí ántarme nuna antuk-tinian wakeruiniayatan antukcharmiayi’ tímiayi.

*Jesus atsaampramu chichaman paant jintintiamiania nu  
(Márkus 4.13-20; Rúkas 8.11-15)*

<sup>18</sup> ‘Ayu, antuktarum. Atsaampramu chichaman paant jintintiatjarme. <sup>19</sup> Árak jintia písunam iniaararma nuka shuar Yus-Chichaman ántayatan ni enentáin ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai. <sup>20</sup> Árak kaya írunmanum iniaararma nuka shuar Yus-Chichaman antuk waras umirainia núiti. <sup>21</sup> Tura núkap kankaprurcharu ásar katsuiniatsui. Antsu itiurchatan íñkiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai. <sup>22</sup> Árak janquí nupanam iniaararma nuka shuar Yus-Chichaman antuk emka umirniua núiti. Tura ju nunkanam írunna nuna tuke páchiniak ni kuítríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai. <sup>23</sup> Tura árak péñker nunkanam iniaararma nuka shuar Yus-Chichaman antuk péñker umirainia núiti. Tura péñker nerenawai. Chíkich siañ (100) nerekarma núnis chíkichcha sesenta (60) nerekarma núnis chíkichcha trainta (30) nerekarma núnis áiniawai” tímiayi Jesus.

*(2) Yajauch nupá tríkiunam atsaamkamu*

<sup>24</sup> Jesus ataksha ju métek-taku chichaman áujmatsamiayi. “Shuar Yus akupeamunam pachiinkiertin júnisaiti. Shuar péñker arakan, tríkiun ni nunken araamai. <sup>25</sup> Tura ashí kanarmatai nemasrj kashi taa trikiu arakmanum yajauch nupañ aratak ikiukmiai. <sup>26</sup> Trikiu tsapakar nereakui nuyá yajauch nupasha nusháa nereku asa ti paant ajasmai. <sup>27</sup> Nuna ísar takainia nu ni úuntrín werí tiarmai “Uunta, ¿péñker arak araachmakam. Itiura jusha yajauch nupasha tsapakuit?” ’

<sup>28</sup> “Tutai nérentin timiai “Winia nemasur arakuiti.” ’

‘Takui ni takarniurj tiarmai “¿Yajauch nupañ uwerat tusam wakeramek?” ’

<sup>29</sup> “Tutai timiai “Atsá, uwerairap. Yajauch nupá uweaj tukamarum trikiu uweniirum.

<sup>30</sup> Iniaisatarum. Antsu métek tsakakti. Júuktin tsawant jeamtai winia takartinian emka yajauch nupañ uwer irumar jinkiawarat tusan akupkartatjai. Tura áesawartatui. Tura trikiu nerēn júukar péñker ikiusarat tusan akupkartatjai” timiai” tímiayi Jesus.

*(3) Mustasa jiníkiái*

*(Márkus 4.30-32; Rúkas 13.18-19)*

<sup>31</sup> Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jiníkiaya áintsan̄kete. Shuar péñker nunken araamai.

<sup>32</sup> Mustasa jin̄kiáikia imiá uchichiitiat tsapái tsakaakka ashí numichijai nan̄kaamas uunt ajawai. Ti uunt asantai chin̄ki ni kanawen pasun̄mainiawai” tímiayi Jesus.

*(4) Karin enketatin  
(Rúkas 13.20-21)*

<sup>33</sup> Núnisan̄ chíkich métek-taku chichaman áujmatsamiayi. “Shuar Yus akupeamunam pachiinkiertin karinia áintsan̄kete. Nuwá nijiamchiniam karinia en̄kea mashi páchimiawai. Tura nu mash karimtikiawai” tímiayi.

*Jesus aya métek-taku chichamjaīn̄ jintintiamiania nu  
(Márkus 4.33-34)*

<sup>34-35</sup> Ashí nuna Jesus métek-taku chichamjaī áujmatsamiayi. Yaunchu Yúsnan etserin timia nu uminkiatí tusa túramiayi. Etserin jun̄a áarmiayi: “Métek-taku chichamjaī áujmattiatjai. Yámankamtaiknumiá nékashtain etserkattajai” tu áarmiayi. Nu asantai aya métek-taku chichamjaīn̄ áujmatmiayi Jesus.

*Jesus yajauch nupá trikiunam atsamkamun paant awajsamiania nu*

<sup>36</sup> Nuyá shuaran ikiukin Jesus jeá támiayi. Túramtai ni unuiniamurj̄ tariar “Yajauch nupá áujmatmena nu paant awajsata” tiarmiayi.

<sup>37</sup> Tutai Jesus tímiayi “Wi Aents Ajasuitjai. Wi péñker arakan atsaamkajtjai. <sup>38</sup> Ashí nun̄ka aja áintsaiti. Péñker jin̄kiái Yus-shuaran Yus akupea nuna nakumeawai. Yajauch nupá iwianchna ainia nuna nakumeawai. <sup>39</sup> Tura íwianch ii nemasrj̄ asa yajauch nupān arakuiti. Tura nun̄ka amúamunam Yusa suntarj̄ arakan júuktinia áintsan̄ shuaran yaruaktatui. <sup>40</sup> Yajauch nupá irur jinium áesatniua áanis nun̄ka amúamunam túrunattawai. <sup>41-42</sup> Nuj̄ Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawartatui. Nuj̄sha ti úutin ti wáitsatniusha átatui. <sup>43</sup> Antsu péñker túruinia nuka ti shiir wincha ajarar ni Aparj̄ akupeana nuj̄ etsa núnis tsáapnin ajasartatui. Wats, kuishim átsuk. Antukta.’

*(5) Kuit wáinkiamu*

<sup>44</sup> ‘Shuar Yus akupeamunam pachiinkiertin kuit nun̄ká uukma áintsan̄kete. Shuar nu kuítian wáiniak nuiñ ataksha uukmai. Tura ti waras waketki nu kuit niiniu atí tusa ashí ni takakman suruk nu nun̄kan sumakmai.’

*(6) Kaya shiirmach ti kuitia nu*

<sup>45</sup> ‘Shuar Yus akupeamunam pachiinkiertin júnisaiti. Shuar kayachin ti shíрман eak wekaana áintsan̄kete. <sup>46</sup> Tura kayan ashí nan̄kaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

*(7) Neka*

<sup>47</sup> ‘Shuar Yus akupeamunam pachiinkiertin júnisaiti. Shuar nekajaī namakan achía áintsan̄kete. Nekan nayaantsanam ajuntak niisháa namakaim achíawai. <sup>48</sup> Tura nekanam nemarmatai kukar j̄iki, nuj̄ péñker namaknasha chañkinnium chumpiniawai. Tura yajauch namaknaka ajapenawai. <sup>49</sup> Núnisan̄ átatui nun̄ka amúamunam. Yusa suntarj̄ taar Yus-shuaran tura íwianch shuaran akantrattawai. <sup>50</sup> Tura íwianch shuarnaka uunt jinium apeattawai. Nuj̄sha ti úutin ti wáitsatin átatui.” Nuna ashí ni unuiniamurj̄jaī áujmatsamiayi Jesus.

*Yamá nekaamujaj̄isha tura yaunchu nekaamujaj̄isha Yus-shuaran yáintiniaiti*

<sup>51</sup> Jesus nuna tinia amuk “¿Ju mash antukurmek?” tímiayi.

Tutai ni unuiniamurj̄ “Ee, Uunta, ashí antukji” tiarmiayi.

<sup>52</sup> Tuiniakui Jesus tímiayi “Shuar ashí Yúsnan péñker unuimiaruka aents kuítriniua áintsan̄kete. Ni ikiutairīya yamarmancha yaunchu sumakmancha jusamniaiti. Núnisan̄ nu shuar yamá nékamujaj̄isha tura yaunchu nékamujaj̄isha Yus-shuaran yáintiniaiti.”

*Jesus Nasarétnum waketkimiania nu*  
(*Márkus 6.1-6; Rúkas 4.16-30*)

<sup>53</sup> Jesus nu métek-taku chichaman áujmatas amuk nuyá wémiayi. <sup>54</sup> Tura ni péprurin Nasarétnum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiayi. Tura “¿Jusha tuj imiá unuimiaruit, tiarmiayi. Itiurak aents tujintiamun túramniait? <sup>55</sup> Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas áiniatsuk. <sup>56</sup> Tura ni umaisha iijiai írutra pujuiniatsuk. ¿Nuikia itiura mash neka?” tiarmiayi. <sup>57</sup> Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar pénker anturainiawai, antsu aya nuna nunkeyañka ni shuarinikia nin anturainiatsui” tímiayi. <sup>58</sup> Tura nú shuar Jesusan enentáimtuiniachu asamtai aentsti tujintiamun aya ishichik túramiayi.

## 14

*Imiakratin Juan jakamu*  
(*Márkus 6.14-29; Rúkas 9.7-9*)

<sup>1</sup> Kariréa nunkanam Erutis akupniuyayi. Tura Jesus túramuncha antukmiayi. <sup>2</sup> Tura ni írutramurin tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

<sup>3-4</sup> Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujai jinkia sepunam enkeatarum tusa akupkamiayi. <sup>5</sup> Niisha Juan kan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashamiayi. <sup>6</sup> Tura akupin Erutis akiiniamu tsawantri jeamtai nú námpertin Jirutíasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak <sup>7</sup> “Ame ashí wakeram nu seattia, tímiayi. Nekasan amastatjai, Yussha iirui” tímiayi.

<sup>8</sup> Tutai nu nuwach emka ni nukurí akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

<sup>9</sup> Tutai Erutis wake mesekmiayi. Túrasha “nekas Yus iirui” tiniu asa tura ni amikrisha antukaru asamtai umikmiayi. <sup>10</sup> Ni suntarin sepunmayan Juan ka muuken tsupik itiarti tusa akupkamiayi. <sup>11</sup> Tura amamkunam itiar nuwachin súsarmiayi. Tura niisha ni nukurí susamiayi.

<sup>12</sup> Nuyá Juan ka írutramurí tariar ayashí jukiar iwiarsarmiayi. Túrawar Jesusan ujauwearmiayi.

*Jesus senku mir (5000) áishman kan ayuramiania nu*  
(*Márkus 6.30-44; Rúkas 9.10-17; Juan 6.1-14*)

<sup>13</sup> Jesus nuna antuk Niñki ni unuiniamurijjain kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan. <sup>14</sup> Kanunmayá jiniaj tukamá untsurí áentsun wáinkiamiayi. Tura wáiniak waitnentrarmiayi. Tura jániancha tsuáramiayi. <sup>15</sup> Kíakui ni unuiniamurí Nin tariar tiarmiayi “Kíawai, Uunta. Tura shuar tíjiuch pujaaka atsawai. Ju aents akupkarta. Péprunam wear sumak yuuwearti” tiarmiayi.

<sup>16</sup> Tutai Jesus tímiayi “¿Urukamtaik wearat? Antsu atumek ayuratarum.”

<sup>17</sup> Tutai tiarmiayi “Íikia takaktsuji. Aya senku (5) tantachik jimiaarchik namakchijjain takakji.”

<sup>18</sup> Tuíniakui Jesus “Wats, nu itiantitarum” tímiayi. <sup>19</sup> Tinea aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam ímias Yúsán yuminsamiayi. Tura puur ni unuiniamurin aents ayuratarum tusa súsarmiayi. <sup>20</sup> Ashí yurumáwar jémararmiayi. Tura nuyasha puunaruka tuse (12) chan kin



tiármiai. <sup>21</sup> Nui yurumáwarmia nusha nuwasha uchisha nekapmatsuk senku mir (5000) aya áishman ármiai.

*Jesus entsá pátatek wekasamiania nu*  
(Márkus 6.45-52; Juan 6.16-21)

<sup>22</sup> Nuyá Jesus ni unuiniamurin kanunam enkemprarum amain émaa ajatarum tusa akupkarmiai. Niisha áentsun akupkarmiai. <sup>23</sup> Akupkarsha naint waka Yúsan áujumiayi. Káshisha nui Ninki tuke pujumiayi. <sup>24</sup> Tura antumian tí wan̄karam asamtai kanu ajapén ajasmatai nase tukumma entsa tamparukmiayi. <sup>25</sup> Tsawaana aī nii tuke wenaī Jesus entsá pátatek wekas pujuiniamunam jeumiayi. <sup>26</sup> Tura ni unuiniamurī entsá pátatek wekaan wáinkiar ti sapijmiakarmiai. Tura ashamainiak “wakanchashit” tiarmiayi.

<sup>27</sup> Tuíniakui Jesus tiarmiayi “Kakaram ajastarum. Wiitjai. Ashamprukairap.”

<sup>28</sup> Takui Pítur chicharuk tímiayi “Uunta, Ámetkumka nuī wekasa jeatin untsurkata.”

<sup>29</sup> Takui Jesus tímiayi “Wats, winitiā.”

Tutai Pítur kanunmayā akaikin Jesus wajana nuī jeataj tusa entsá pátatek wekasamiayi. <sup>30</sup> Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsunmiayi.

<sup>31</sup> Nu chichamtaik Jesus uwejn̄um achik júak “Maa, Yus imiá ishichik enentáimtuschamek” tímiayi. <sup>32</sup> Tura kanunam enkemáwarmatai nasesha men̄kakamiayi.

<sup>33</sup> Túramtai kanunam enkemarmia nusha Jesusan tikishmatar chicharuk “Nekas ame Yusa Uchir̄inme” tiarmiayi.

*Jesus Jinisarítniumiá shuaran tsuármiania nu*  
(Márkus 6.53-56)

<sup>34</sup> Tura amainī katinkiar Jinisarít nun̄kanam jearmiayi. <sup>35</sup> Tura nuyá aents Jesusan nekaawar nu nun̄kanam ashí ujanairarmiayi. Túrawar jaancha ni pujamunam itiararmiayi. <sup>36</sup> Ni pushir̄inkisha antint̄ai tusar seawarmiayi.

## 15

*Shuáran yajauch awajeana nuna Jesus jintintiamiania nu*  
(Márkus 7.1-23)

<sup>1</sup> Nuyá Jerusarén péprunmayā Pariséusha yaunchu akupkamu jintinniur̄isha Jesusan tariar aniasarmiayi <sup>2</sup> “¿Urukamtai ame unuiniamuram ii uuntr̄i yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

<sup>3</sup> Tuíniakui Jesus aniasarmiayi “¿Urukamtai atumsha Yus akupkamu umirtsuk aya aents akupkamu umiirum? <sup>4</sup> Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni apar̄in̄cha nukur̄in̄cha katsekka nu shuar jakati” tíchamkia.

<sup>5-6</sup> Antsu átumka tárume “Shuar ashí niiniu ír̄unna nuna mash “Yúsnaiti” takui nuikia nujaī ni apar̄in̄cha nukur̄in̄cha yáin̄chamniaiti, tárume. Nin yáin̄tinian nakitiak ayatik “Ashí winia áiniana nu Yusna asamtai yáin̄chamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi. <sup>7</sup> Antra chichamtiniaitrume. Yúsnan etserin Isayas yaunchu nekas atumin áartampramiayi juna:

<sup>8</sup> “Jū aents ni wenejaī shiir awajtuiniawai, tura ni enentá̄i jeachat pujuiniawai.

<sup>9</sup> Tura tukeneasan̄ shiir awajtuiniawai. Aentsu chichamen̄ jintintiainiayat “Yusa chichamente” tuiniawai.” Tu áarmiayi” tímiayi Jesus.

<sup>10</sup> Tinia shuaran untsuk tiarmiayi “Jū antukrum pé̄nker nekaatarum. <sup>11</sup> Aents yúana nuka shuáran yajauch awajsashtatui. Antsu wenunmayā j̄inia nuka shuáran yajauch awajeawai” tímiayi.

<sup>12</sup> Nuyá ni unuiniamurí Jesusan tariar “Maa, Pariséu ame chichammin antukar ti itiurchat enentáimprarai” tiarmiayi.

<sup>13-14</sup> Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiniawai. Mai kusuru ásar mai wáanam akaiki iniaawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

<sup>15</sup> Takui Pítiur Jesusan tímiayi “Nu métek-taku chicham paant awajsata.”

<sup>16</sup> Tutai Jesus tímiayi “¿Atumsha nekaachurmek. <sup>17</sup> Enentáimprachurmek? Ashí wenumam wayaana nu wakenam wéatsuk. Tura nuyá iniankastiniaiti. <sup>18</sup> Antsu wenunmaya jinia nu enentáimmaya jiniu asa áentsun yajauch awajeawai. <sup>19</sup> Enentáimmaya ashí yajauch enentáimsatin jiniainiawai. Mankartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha <sup>20</sup> ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwá Israer-shuarcha Jesusan enentáimtusmiania nu  
(Márkus 7.24-30)*

<sup>21</sup> Jesus nuyá jinki Tiru péprunmasha Sitiun péprunmasha wémiayi. <sup>22</sup> Tura nu nunkanmaya nuwá Jesusan tarí tímiayi “Uunta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

<sup>23</sup> Tura Jesus áikchamiayi. Tura ni unuiniamurí tariar “Awemata, tiarmiayi. Tuke untsumki apapétmaji” tiarmiayi.

<sup>24</sup> Nuyá Jesus tímiayi “Aya Israer-shuarnum menkakarú áinia nuna eaktinian Yus akuptukuiti.”

<sup>25</sup> Túrasha nuwá tikishmatar tímiayi “Uunta, waitnentrurta.”

<sup>26</sup> Tutai Jesus tímiayi “¿Uchí apatkurí jurukir yawá susamniakait?” tímiayi.

<sup>27</sup> Tutai nuwá tímiayi “Nekas, Uunta, tame. Tura yawasha ni aentsrj yurumainiakui nunká iniaarun yúniatsuk.”

<sup>28</sup> Takui Jesus tímiayi “Maku, nekas Winia enentáimtursaitme. Ame wakeram núnisan atí” tímiayi. Tura nu chichamaik ni nawantrj péñker ajasmiayi.

*Jesus untsurí jáinian tsuararmiania nu*

<sup>29</sup> Jesus nuyá jinki Kariréa antumianka káanmatkarin waketkimiayi. Tura naint waka nuj pujusmiayi. <sup>30</sup> Nu j untsurí aents Nin tariar shutuapnasha kusuruncha chichachuncha tsupirkamuncha chikich jáiniancha itiararmiayi. Túrawar nawenam aeprusarmiyai. Túram tsuararmiayi. <sup>31</sup> Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yuminsarmiayi.

*Jesus kuaru mir (4000) áishmankan ayuramiania nu  
(Márkus 8.1-10)*

<sup>32</sup> Nuyá Jesus ni unuiniamurin untsukar tiarmiayi “Ju aentsun waitnentainiajai. Warí, menaintiu tsawant Wijiaj yurumtsuk yujainiatsuk. Ayurtsuk ni jeen akupkach-miniaitjai. Jintiá pimpiki wáitsartatui.”

<sup>33</sup> Ni unuiniamurí tiarmiayi “Túrasha, Uunta, ¿shuar atsaasha tuyan yurumak imiá sumaktaj jü aents ayurawartincha?”

<sup>34</sup> Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

<sup>35</sup> Nuyá aents nunká pujusarti tusa akupkamiayi. <sup>36</sup> Tura siati tantan achik namaknasha achik nuyá Yúsan yuminsamiayi. Tura puur aents ayuratarum tusa ni unuiniamurin susamiayi. <sup>37</sup> Ashí yurumáwar jémararmiayi. Tura puunaru siati chan kin tiarmiayi. <sup>38</sup> Tura nu j yurumáwaruka nuwasha uchisha nekaptatsuk aya áishmankak

kuatru mir (4000) ármiai. <sup>39</sup> Nuyá Jesus áentsun akupak kanunam enkemar Maktara nunkanam wémiayi.

## 16

*Pariséusha Satuséusha iniakmamorin Jesusan seawarmiania nu*  
(Márkus 8.11-13; Rúkas 12.54-56)

<sup>1</sup> Pariséusha tura Satuséusha Jesusan nekapsatai tusar tariarmiayi. Túrawar “Ame Yúsajyáitkiumka kakarmarmijai nayaimpinmaya iniakmasta, iisha wáinkiatái,” tiarmiayi.

<sup>2</sup> Tutai Jesus tímiayi “Átumka “Kapaaku péetar kintiamkui kashin esatrurtatui” tñiuitrume. <sup>3</sup> Túrasha “Te ajas kapaaku péetar tsawaaku yumi yajauch átatui” tñiuitrume. Tura nekasaiti. Maa, átumka nayaim ísrum ju nunkanam túrunattana nu nékarme. Antsu Yus yamá jú nunkanam tura nuka nékatsrume. Ántraitrume. <sup>4</sup> Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmastiniaiti” tímiayi. Tinia ikiuak wémiayi.

*Pariséusha Satuséusha jintintiainia nu aneartiniaiti*  
(Márkus 8.14-21)

<sup>5</sup> Tura entsá amaini katinkiar ni unuiniamurí tantan júkitniun kajinmatkiarmiayi. <sup>6</sup> Nuyá Jesus tímiayi “Wáinkiatarum, Pariséusha Satuséusha wakaprutai takakainia nújaisha aneartarum.”

<sup>7</sup> Tutai ni unuiniamurí tiarmiayi “Ii tanta itiachakrin tátsuk.”

<sup>8</sup> Jesus nuna antuk tímiayi “¿Urukamtai tanta itiachji tunaiyarum. Yusa kakarmari kajinmatkintrumek. <sup>9</sup> Senku tantajai túramiaj nu kajinmatkintrumek. Senku mir (5000) áishmankan ayuramtai untsurí chan kin tiármia nu enentáimtsurmek. <sup>10</sup> Tura siati tantajai kuatru mir (4000) áishmankan ayuramtai nuna ishichik chan kin tiármia nu kajinmatkintrumek. <sup>11</sup> Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penké tantan tátsujai” tímiayi. <sup>12</sup> Nuna Jesus takui ni unuiniamurísha nekaawarmiayi. Penké tantaa wakaprutairin tichamiayi antsu Pariséusha Satuséusha unuiniatairin tímiayi.

*Pítiur Jesusan Yus anaikiamun paant ujakmiania nu*  
(Márkus 8.27-30; Rúkas 9.18-21)

<sup>13</sup> Tura Sesaria-jiripiunam jeawar Jesus ni unuiniamurin aniasarmiayi “Aents Aja-suitjiana juna ¿yaiti turutainiawa Winia?”

<sup>14</sup> Niisha ayak tiarmiayi “Chíkich, imiakratin Juánkaiti turamainiawai. Chíkichka, Eríasaiti turamainiawai. Chikichcha Jeremíasaiti, chíkichcha chíkich aents Yúsnan etserniuiti turamainiawai” tiarmiayi.

<sup>15</sup> Tutai nincha aniiniak “¿Atumsha yaiti túrutrum?” tímiayi.

<sup>16</sup> Semun Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

<sup>17</sup> Tutai Jesus tímiayi “Shiiraitme Junasa uchirí Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. <sup>18</sup> Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeaman pukukchattawai. <sup>19</sup> Yus akupeamu yawincha amastatjai. Ju nunkanam jin kiatniusha atiatniusha amasmaiti. Tuma asamtai ame ju nunkanam surítiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui” tímiayi. <sup>20</sup> Nuna tinia Jesus ni unuiniamurin Krístuitiaj nu etserkairap tinia akupkarmiayi.

*Jesus Nin máatniun etsertumakmiania nu*  
(Márkus 8.37-9.1; Rúkas 9.22-27)

<sup>21</sup> Nuyá Jesus juna unuiniatan nankammiayi. “Wi Jerusarénum wétiniaitjai. Nuí Israer-shuara úntrisha, Israer-patri úntrisha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

<sup>22</sup> Takui Pítiur arantach jukí chicharuk tímiayi “Uunta, nuka penké áchatniuiti. Áminkia túrutmacharminiaiti.”

<sup>23</sup> Jesus ayanmatar Pítrun tímiayi “Werumta, Satanása. Yajauch awajtame. Ámeke Yus wakeramu enentáimtsume. Antsu jú nunkanam enentáimainia áinis enentáimme.”

<sup>24</sup> Nuyá Jesus ashí ni unuiniamurin tímiayi “Shuar Winia nemartustaj tusa wakerakka ni wakeramurin iniais ni krusi yanaki Winia nemartusti. <sup>25</sup> Shuar áyatik penker pujustaj tákunka nu shuar uwemtsuk jakattawai. Antsu jákatniuitkuisha penker pujustinian enentáimtsuna nú shuar nekas iwiaakman wainkiattawai. <sup>26</sup> Wats, shuar ashí jú nunkanam írunka nuna sumakka tura nujai ni wakaní emeseak ¿itiurak penker pujustin? Shuara wakaní emesramu ¿ashí jú nunkanam írunka nujai iwiamramniakait? <sup>27</sup> Wi Aents Ajasu asan, winia Aparu kakarmarijia tura ni suntarijia tana ashí shuáran ni takasmajai métek akiktatjai. <sup>28</sup> Paant tájarne, shuar juí wajainia ju játsuk Wi akupin ajasmatai wáitkiartatui” tímiayi.

## 17

*Jesus nushá iira ajasmiania nu*  
(Márkus 9.2-13; Rúkas 9.28-36)

<sup>1</sup> Nuyá sais (6) tsawant nankaamasar Pítruncha, Jakupuncha, tura ni yachi Juannasha níniak júkiar Jesus náinnium yakí wakamiayi. <sup>2</sup> Nuí Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirisha ti puju jiitsumir ajasmiai. <sup>3</sup> Nuísha Muisaisnasha Eríasnasha Jesusjai chichainian wáinkiarmai. <sup>4</sup> Nuyá Pítiur Jesusan tímiayi “Uunta, ti shiir pujaji juí. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.” <sup>5</sup> Tura Pítiur tu auju wajái yuran kim ti puju amuamiayi. Tura nu yuranminmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii penker anturkatarum” tímiayi. Tu chichasmiai Yus. <sup>6</sup> Nuna ni unuiniamurí antukar ti ashamkar pákea ajakiarmiayi. <sup>7</sup> Túrunawarmatai Jesus táriar antiñ “Ashamkairap, nantaktiarum” tiarmiayi. <sup>8</sup> Tura pañkainiar ímiaj tukamá aya Jesusan wáinkiarmai.

<sup>9</sup> Nuyá náinniumia akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsain etserkairap’ tímiayi.

<sup>10</sup> Nuyá ni unuiniamurí Jesusan aniiniak “¿Urukamtai in jintintramin “Kristu táatsain Erías emka tátiniaiti” tuinia?” tiarmiayi.

<sup>11</sup> Tuíniakui Jesus áikmiayi “Nekas Erías tátiniaiti. Tura nii mash iwiarattawai. <sup>12</sup> Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisan Winiasa, Aents Ajasu ain, wáitkiarsartatui.” <sup>13</sup> Nuna takui ni unuiniamurí imiakratin Juáñkan áujmatui, tu enentáimprarmiayi.

*Jesus iwianchin jiki akupkamiania nu*  
(Márkus 9.14-29; Rúkas 9.37-43)

<sup>14</sup> Ataksha aents matsatmanum jeawarmatai shuar Jesusan tarí tikishmatramiai. <sup>15</sup> Tura tímiayi “Uuntá, winia uchir waitnentrutata. Wainchi tukum ti wáitniuiti. Jiniumsha patamniuiti. Entsasha iniainaiti. <sup>16</sup> Ame unuiniamurmíncha itiarjia tura tujinkiarai.”

<sup>17</sup> Takui Jesus ashí tímiayi “Maa, Yus penké enentáimtichuitume. Imiá úmichuitume. ¿Wi atumin katsuntu ajatniukaitjarum? Wats, uchi itiarjia tura tujinkiarai? <sup>18</sup> Itiarim Jesus

yajauch wakanin jiiki akupkamiayi uchí ayashínia. Túramtai nu chichamaik pé<sub>n</sub>ker ajasmiayi.

<sup>19</sup> Nuyá urum ni unuiniamurí Jesusjai ni<sub>n</sub>ki pujusar áujmatainiak “¿Urukamtai yajauch wakan jiiktin iikia tujinkiamaj?” tiarmiayi.

<sup>20</sup> Tuíniakui Jesus tiarmiayi “Yus nekas enentáimtachu asarum tujinkiar<sub>m</sub>e. Túmaitiat nekasaiti mustasa jin<sub>k</sub>iaí timiá uchichitiat ti uunt tsakaatsuk. Núnisa<sub>n</sub> Yus ishichkisha enentáimtakrumka nu naint ékemkata tutai nu naint túrunattawai. Pen<sub>k</sub>é tujinkiashtatrume Yus nekas enentáimtakrumka. <sup>21</sup> Kame nu yajauch wakan jiiki akupkatniuka ijiarmam Yus áujsatniuiti.”

*Ataksha Jesus ni játniun ujakmiania nu*  
(Márkus 9.30-32; Rúkas 9.43-45)

<sup>22</sup> Jesus ni unuiniamurí jiiai Kariréa nu<sub>n</sub>kanam wekas ju<sub>n</sub>a ujakarmiayi. “Wi Aents Ajasu asan, aentsnum surunkattajai tura mantamnattajai. <sup>23</sup> Túrutawarmatai menaintiú tsawantaj nantaktiatjai.” Tura ni unuiniamurí nuna antukar ti kúntuts enentáimprarmiayi.

*Jesus an<sub>k</sub>antaitiat akiktinia nuna akikmakmiania nu*

<sup>24</sup> Jesus ni unuiniamurí jiiai Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntri Israer-patrin akiktinia nuna akínkai?”

<sup>25</sup> Tutai Pítiur “Ee” tímiayi.

Tura Pítiur jeá wayá chichaatsa<sub>n</sub> Jesus emka tímiayi “Chíkich nu<sub>n</sub>kanmaya akupin ¿yana kuítrí jiain takainia. Ni shuár<sub>n</sub>iunkek atantainia. Antsu yaja<sub>y</sub>a shuár<sub>n</sub>an atantainiatsuk. Nekaschak, Semu<sub>n</sub>ká?”

<sup>26</sup> Tutai Pítiur “Nekas yaja<sub>y</sub>a shuár<sub>n</sub>an atantainiawai” tímiayi.

Jesus tímiayi “Nuikia ni shuarí an<sub>k</sub>ant áiniawai. Iisha núnisrik nu akiktin an<sub>k</sub>antaitji. <sup>27</sup> Túrasha itiurchat enentáimprara<sub>n</sub> tusar akiktai. Ame tsau jukim entsá wetá. Túram emka namak japikim iwian<sub>k</sub>am nu<sub>i</sub> kuit wáinkiatame. Nu jukim Wíniasha áminiusha akikmakta.”

## 18

*“¿Ya imiá nan<sub>k</sub>aamantuit?” tunaiyarmiania nu*  
(Márkus 9.33-37; Rúkas 9.46-48)

<sup>1</sup> Nu tsawantaj ni unuiniamurí tariar Jesusan aniasarmiayi “Yus akupeamunam pachiinia nu ¿ya imiá nan<sub>k</sub>aamantu áminiait?”

<sup>2</sup> Nuna tuíniakui Jesus uchin untsuk ajapen awajtusar <sup>3</sup> tímiayi “Tí nekasán tájar<sub>m</sub>e, atumí enentáimtai<sub>r</sub>i yapajiarum uchia áinis ajachkurmeka Yus akupeamunam pachin<sub>k</sub>iachminiaitrume. <sup>4</sup> Nu asantai ju<sub>n</sub> uchia áinis pééjchach enentáimtumana nuka Yus akupeana nu<sub>i</sub> nekas nan<sub>k</sub>aamantu ajasminiaiti. <sup>5</sup> Nú arantcha Winia anentuk uchin itiaana nú shuar Winiasha itiaareawai’ tímiayi.

*Tsumainti yajauch túrumtikiatin*  
(Márkus 9.42-48; Rúkas 17.1-2)

<sup>6</sup> ‘Shuar ju<sub>n</sub> uchin Winia umirtana nuna tunaanum ajuarmatain<sub>k</sub>ia nuna túratsa<sub>n</sub> niisha kuntujén kayajai jin<sub>k</sub>iar nayaantsanam ajapen kunanam ajunmaitkiun<sub>k</sub>a maak ainti, tímiayi. <sup>7</sup> Ju<sub>n</sub> nu<sub>n</sub>kanam tunáa iniaatai írunuk tuke itiurchataiti. Antsu shuar chikichan tunaanum ajuarka ti itiurchatan in<sub>k</sub>iun<sub>t</sub>atui’ tímiayi.

<sup>8</sup> ‘Nu asantai ame uwejem tura nawem tunaanum ajunmatniuitkiuin<sub>k</sub>ia tsupikiam ajapata. Kame muntuch pujustin tura ukunam nayaimpiniam wétin pé<sub>n</sub>keraiti. Antsu kajinkiashtin jinium takamtsuk jeatniuka imiá yajauchiiti. <sup>9</sup> Núnisa<sub>n</sub> ame jiimi tunaanum ajunmatniuitkiuin<sub>k</sub>ia ukuinkiam ajapata. Kame chikichik jiijiai pujusam

nayaimpiniam wétin péñkeraiti. Antsu jinium mai jíintiuk wétin imiá yajauchiiti' tímiayi.

*Murik menkaaka áujmatsamu*  
(Rúkas 15.3-7)

<sup>10</sup> 'Uchi ainia nu nakitraitrap. Yusa suntari nin wáinkiatniua nu winia Aparuj tíjuch pujuiniawai. <sup>11</sup> Kame wi Aents Ajasu asan, menkaakarun eaktajtsan táwitjai.'

<sup>12</sup> 'Enentáimpratarum. Shuar sian (100) murikiun takakuitiat chikichik menkakamtai untsurí menkakacharun náinnium matsaak, menkakan eaushtatuak. <sup>13</sup> Wáinkiasha untsurí menkakacharua nujai nankaamas waraschattawak. <sup>14</sup> Núnisan atumi Aparí nayaimpiniam pujana nu, nu uchi chikichkisha menkakacharti tawai' tímiayi.

*Yus-shuarti tsankurnairatin*  
(Rúkas 17.3)

<sup>15</sup> 'Chikich Yus-shuar ámin yajauch túrutmakuinkia nii werim áujmata. Tura ámechik werim ame yatsumjai chichasta. Anturtamkuinkia ame yátsum yáinkiume. <sup>16</sup> Tura anturtamchakuinkia nuyá chikichik shuar jimiara shuarsha jukim ataksha weritia. Túram ataksha áujnaisatarum, niisha paant nekaawarat tusam. <sup>17</sup> Túrasa yatsum tuke ántachkuinkia Yus-shuar iruntainiam iwaiainakta. Túrasa yatsum tuke ántachkuinkia Yus-shuar núnisan enentáimtusta nu shuar.'

<sup>18</sup> 'Nekasan tájarme, ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui.'

<sup>19</sup> 'Núnisnak tájarme, ju nunkanam pujusrum jimiara Yus-shuartiram métek enentáimprarum winia Apar nayaimpiniam pujana nu seakrumninkia wakerarmena nuna suramsattarme. <sup>20</sup> Jímiar menaintiusha Yus-shuar Winia enentáimturuk iruntrarmatai Wisha nujai níjjai pujajai" tímiayi Jesus.

<sup>21</sup> Takui Pítiur werí Jesusan aniasmiayi "Uuntá, winia yatsur yajauch awajtakui ¿urutma tsankuratniuitiaj. Siátik tsankuratniuitiaj?"

<sup>22</sup> Jesus aiyak "Siátik tátsujme, antsu iniannatsuk tsankuratniuitme" tímiayi.

*Takamau tsankurachun pachis áujmatsamiania nu*

<sup>23</sup> Tuma asa Jesus Yus akupeamunam pachiinkiaru tsankurnairartiniaiti tusa ju métek-taku chichaman áujmatuk tímiayi, "Uunt akupin takarin tumashin akirkarat tusa untsukarmai. <sup>24</sup> Yama náñkamuk tí nukap tumashmakua nuna untsukmai. Akikmakchamnia ti tumashmakuyi. <sup>25</sup> Tura nu takamau kuitri atsakui uunt akupin "Yajasma áitkiasrum nuartiuk uchirtiuk ashí waririntiuk suruktaram, timiai. Nu kuitjai akirkati" timiai.

<sup>26</sup> Tutai nu takamau uunt akupniun tikishmatar seek timiai "Uunta, waitneasam náarsatá. Auka, mash akiktatjame." <sup>27</sup> Uunt akupin waitnentar mash tsankur ankant akupkamai. <sup>28</sup> Tura nú chichamaik nú takamau jinki ni ain inkiunmai. Nú aisha nin ishichik tumashiyi. Tura tsékenki suwenam achik chicharuk timiai "Wari akirkata tumashitmena nu."

<sup>29</sup> Tura ni aj nin tikishmatar timiai "Waitneasam náarsatá. Auka, mash akiktatjame" timiai. <sup>30</sup> Túrasa nakitramai. Antsu tsankurtsuk sepunam enkeamai ashí akirkati tusa. <sup>31</sup> Chikich takamau nuna wáinkiar ti kúntuts enentáimtuiniak uunt akupniun ashí etsertukarmai. <sup>32</sup> Nuna antuk uunt akupin untsuk itia timiai "Yajauchiitme. ¿Winia "waitnentrurta" túrutkumin tsankurachmakjam? <sup>33</sup> Amesha núnismek ame aim tsankuratniuitme" timiai. <sup>34</sup> Tinea uunt akupin kajekmai. Tura ashí tumashin akikmatsuk asutniati tusa suntarnum surukmai." <sup>35</sup> Jesus nuna áujmatas amúak tímiayi "Núnisan winia Apar nayaimpiniam pujana nu atumin túrutmattarme atumi yachi nekas enentáijai tsankureachkurminkia."

## 19

*Jesus nuwá ajapatniun áujmatsamiania nu  
(Márkus 10.1-12; Rúkas 16.18)*

<sup>1</sup> Jesus nuna tinia ikiuak Kariréa nunkanmaya wémiayi. Tura Jurtañ entsa amain Jutía nunkanam jemiayi. <sup>2</sup> Untsurí aents nemariarmiayi tura jáiniancha péñker awajsamiaayi.

<sup>3</sup> Nuñ Pariséu Jesusan nekapsataj tusar aniasarmiayi “¿Shuar ni nuwen itiurchat akui ajapamniakait?”

<sup>4</sup> Tutai Jesus tímiayi “¿Átumka Yus-Papí áujkachukaitrum? Yámankamtaik Yuska shuáran áishmanñan nuwancha najanamiayi tawai. <sup>5</sup> Tuma asamtai áishmanñ ni aparín ni nukurín ikiuki ni nuwejaj tsanin chikichik ayashtinia áinis ajasartatui, tu áarmaiti, tímiayi. <sup>6</sup> Tuma asa jímíarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

<sup>7</sup> Takui tiarmiayi “Nuikia ¿urukamta papí áarar nuwá ajapatniun Muisais tsanñkatkamia?”

<sup>8</sup> Tutai Jesus tiarmiayi “Timiá ántichu asakrumin nuwá ajapatniun tsanñkatkamiayi. Túrasha émkaka núnischauyayi. <sup>9</sup> Wi tájarne, shuar ni nuwen chikichjaj pujuschan ajapeakka tura chikichan nuatkunñka tsanirmayi. Chikich áishmanñsha nuwá ajapamun nuátkanñka nusha tsanirmayi” tímiayi.

<sup>10</sup> Takui ni unuiniamurí tiarmiayi “Nuikia áishmanñ ni nuwé penké ikiukchamniaitkiuinñka nuátkachminiaiti.”

<sup>11</sup> Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. <sup>12</sup> Chikich chikich nuatkachmin áiniawai. Chikich nuátkachmin akiiniawaru áiniawai. Chikichcha aentsjaj nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

*Jesus uchin shiir awajsamiania nu  
(Márkus 10.13-16; Rúkas 18.15-17)*

<sup>13</sup> Nuyá Jesusan uchin itiariarmiayi. Nin antiñ Yúsan áujtusarat tusar wakeriarmiayi. Túruiniakui ni unuiniamurí chicharkarmiayi. <sup>14</sup> Túruiniakui Jesus tímiayi “Uchi Winí winitin tsanñkatkatarum. Suritkiairap. Kame ju uchia áintsanñ péejchach áinian nunak Yus akupkamniaiti.” <sup>15</sup> Tinia uchin miniakas nuyá wémiayi.

*Kuítrintin Jesusjaj chichasmiania nu  
(Márkus 10.17-31; Rúkas 18.18-30)*

<sup>16</sup> Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

<sup>17</sup> Tutai Jesus nin enentáimtikrataj tusa tímiayi “¿Urukamta péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

<sup>18</sup> Tutai shuar “¿Tuna nekas umirkatniuitiaj?” tímiayi.

Takui Jesus tímiayi “Mañkartuawaip, tsanirmawaip, kasámkáip, chikich shuar tsanumpruraip, <sup>19</sup> ame apa nukusha umírkartá, ame shuárum ame ayashim aneamna nútksamek aneeta.”

<sup>20</sup> Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

<sup>21</sup> Takui Jesus tímiayi “Nekas péñker átaj tákumka, weme ame kuítrum kuítrincha ainia nu sústá. Tura nayaimpiniam kuítrintin ajastatme. Nuyá Winia nemártústá” tímiayi Jesus. <sup>22</sup> Tura natsa nuna antuk kúntuts wémiayi ti kuítrintin asa.

<sup>23</sup> Nuyá Jesus ni unuiniamurin tiarmiayi “Nekasan tájarme, kuítrintin Yus akupeamunam pachiinkiatin ti itiurchataiti. <sup>24</sup> Ataksha tájarme, kamiriuka kawái nan̄kaamas uunt asa auja j̄in wayachminiati. Núnisan̄ kuítrintin Yus akupeamunam pachiinkiatin ti itiurchataiti.”

<sup>25</sup> Ni unuiniamuri nuna antukar antúu ajarmiayi. Túrawar aniniainiarmiayi “¿Nuikia yaki uwempramniait?”

<sup>26</sup> Tuíniakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsui.”

<sup>27</sup> Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warin wáinkiattaji iisha?”

<sup>28</sup> Jesus tímiayi “Nekasan tájame, ukunman̄ka ju n̄nka yamaram ajastatui. Aents Ajasu asan, Wisha nūj, uunt akupin ajastatjai tura atumsha winia nemartusutirmeka Wij̄ijai métek akupin ajastatume ashí Israer-shuar akupkatin. <sup>29</sup> Tura shuar ni j̄eēncha, yach̄incha, umāncha, apar̄incha, nukur̄incha, nuar̄incha, uchir̄incha, tura nun̄kencha Winia anentu asa ikiukin wekaakka, nu shuar nii ikiukmia núnisan̄ yamaisha ti untsur̄i wáinkiattawai tura ukunmasha tuke shiir pujustatui Yusjai. <sup>30</sup> Untsur̄i yamá pen̄ker̄i áiniana nu ukunam ukunmaani pujusartatui, tura yapaj̄iáwar yamá ukunmayá áiniana nu ukunam emka pujusartatui’ tímiayi Jesus.

## 20

### *Jesus takarniun pachis áujmatsamiania nu*

<sup>1</sup> ‘Yus akupeamunam pachiinkiatin júnisaiti. Nun̄ka nérentin ni araamur̄in júuktaj tusa káshik iniartaj tusa j̄iinkimiayi. <sup>2</sup> Chikichík tenariu kuit jean tsawant takamtsuk akiktajrume tusa chichas ni araamun júuktinian akupkarmiayi. <sup>3</sup> Nantu takuntaish̄a ataksha j̄iinki shuar yujan wáiniak <sup>4</sup> timiai “Atumsha winia arakur júuktin yáintkiatarum. Shiir akiktajrume.” Tutai wearmai. <sup>5</sup> Ataksha tutupin āj nuyá áan̄kúsha j̄iinki, núnisan̄ tinia akupkarmai. <sup>6</sup> Ataksha nantu patamsāj j̄iinkimiai. Tura shuaran yujan wáiniak “¿Urukamtai takakmatskesha áani pujarum?” timiai.’

<sup>7</sup> “Warí, iincha iniatmainiatsji” tiarmai.’

‘Tuíniakui timiai “Atumsha winia nun̄karūj takautarum. Péñker akiktajrume.”

<sup>8</sup> ‘Kirit ajátekiá̄j takatr̄in wáinniun timiai “Takatan takasaru untsukam akikiarta. Kíarai nan̄kamawaru emka akikiarta. Túram káshik nan̄kamawarujai amuktá” timiai. <sup>9</sup> Takui nantu patamsāj āj nan̄kamawaru wayawarmatai chikichík tenariu kuit jean ashí akikiarmai. <sup>10</sup> Mash umintramtai nuyá emka nan̄kamawaru wayawar “nuna nan̄kaamas achikchatjiash” tu enentáimsarmai. Tura chikichík tenariu kuit jean achikiarmai. <sup>11</sup> Achikiar nérenniun itiurchat enentáimturarmai. <sup>12</sup> Tura tiarmai “Iikia ashí tsawant nantujai wáitsachjik. Ju shuarsha nantu patamsāj āj nan̄kamawaruka pen̄ké ishichik takasara. Túrasha iij̄ijai métek akikiarume” tiarmai.

<sup>13</sup> Tutai nérentin chikichkiniak iniakmas timiai “Umpá, pen̄ké kasartsujme. Káshik chikichík tenariu kuit jeá chichasar iij̄ijai iwiarachjik, timiai. <sup>14</sup> Pai, ame kuítrum achikiume. Nantu patamsāj takasuncha amij̄ijai métek akiktinian wakerajai. <sup>15</sup> Warí, winia kuítrujai wi wakeramun túrachminkaitiaj. Antsu wi tsan̄ka asamtai ¿yajauch enentáimturmek?” timiai.’

<sup>16</sup> ‘Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsur̄i ipiaamu áiniawai tura ishichik achikma áiniawai.” Tu áujmatsamiayi Jesus.

### *Jesus ataksha ni jákatniur̄in etserkamiania nu (Márkus 10.32-34; Rúkas 18.31-34)*



<sup>17</sup> Jesus Jerusarénnum jintiá wesa ni unuiniamurin akankin tiarmiayi <sup>18</sup> “Iistarum, Jerusarénnum wéaji. Nuisha Israer-patri úuntrin tura ni jintinniurincha Winia surutkartatui. Nuisha, wi Aents Ajasu ain, “mantamnati” túrutiartatui. <sup>19</sup> Tura apachnium surutkartatui. Nuí katsekrukar, awattiar krúsnum máawarti tusar túrutawartatui. Túrasha jakayatan menaintiú tsawantaj nantaktiatjai” tímiayi.

*Jakupu tura Juanka nukurí Jesusan seamiayi*  
(Márkus 10.35-45)

<sup>20</sup> Nuyá Jakupusha Juansha, mai Sepetéu uchirí, nukuríjiai tariar Jesusan tikishma-trarmiayi. Tura nukurí Jesusan waitnentrurarat tusa seamiayi. <sup>21</sup> “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nuí winia uchir chikichik untsuurnumaani chikichcha menaanmaani akupkarti tusam apujsarta.”

<sup>22</sup> Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujai imiaitniua áintsan imiantiniaitjai. ¿Nú pininnumia umarminkiaitrum. Núnisan imianminkiaitrum?”

Tutai “Páchitskea” tiarmiayi.

<sup>23</sup> Tuíniakui Jesus tímiayi “Ayu. Winia pininkruiya umartatrum. Wi imiantiatjana nujai imiantiatrum. Antsu Wijiai tsaninka pujustinniaka Wikia íschatniuitjai, antsu winia Apar iwiarturu áinia nuna nuí apujsattawai” tímiayi.

<sup>24</sup> Chíkich tias (10) unuiniamurí nuna antukar nu jímiaran kajerarmiayi. <sup>25</sup> Túmainiakui Jesus untsukar tiarmiayi “Ju nékarme, apachniumka kapitían ajasar ni shuarin nérenniua áinis ti akupenawai. Ni úntrisha waantu enentáimsar “wítjai akupniun” tu enentáimtikiainiawai. <sup>26</sup> Antsu atumjaiinka núnis áchatniuiti. Nanakaamaku ajastaj tákuuka chikicha yaintri átiniaiti. <sup>27</sup> Ame kapitíantrum ajastaj tákuuka ashí shuara yaintri ajástí. <sup>28</sup> Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuáran tunáa tumashrin akikmatkataj tusan jákatniuitjai. Nuna tarimjai” tímiayi Jesus.

*Jímiar jii kusurun Jesus tsuármiania nu*  
(Márkus 10.46-52; Rúkas 18.35-43)

<sup>29</sup> Jirikiú péprunmayá wénakui untsurí aents Nin nemariarmiayi. <sup>30</sup> Nuí jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirin chukaitiam. Waitnentrurta” tiarmiayi.

<sup>31</sup> Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

<sup>32</sup> Tuíniakui Jesus wajas jii kusurun untsukar aniasarmiayi “¿Warí itiurtukat tusarum wakerutarum?”

<sup>33</sup> “Uuntá, iimtiaí tusar wakeraji” tiarmiayi. <sup>34</sup> Tuíniakui Jesus nin waitnentrar ni jijn antiñkiarmiayi. Nu chichamaik ímiar niisha Jesusan nemariarmiayi.

## 21

*Jesus Jerusarénnum wayamiania nu*  
(Márkus 11.1-11; Rúkas 19.28-40; Juan 12.12-19)

<sup>1</sup> Jerusarénnum nuntumsar Petpajái péprunam jeawarmiayi. Nusha Uriwiu náinnium ayamchiiyayi. Nuí jeawar Jesus ni unuiniamurin jímiaran akupeak tímiayi <sup>2</sup> “Tíjiuch péprunam wérum umpuuru umpuuruchijiai jin kiamu wáinkiatarme. Nu atiarum itartitiarum. <sup>3</sup> Tura aents “Urukamtaí áitkiarum” túramkurminkia “Uunt wakerawai, tura wárik awainkittiwai” titiarum” tímiayi.

<sup>4</sup> Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:  
<sup>5</sup> “Ashí Israer-shuarnum ju etserkatarum:

“Iistarum, atumi Akupniuri, péejchach ajas umpuuruchiniam ekeemak winitram-prume. Péejchach asa káarak áintstai umpuuru uchirín ekeemak winitrámtatrum,” titiarum.” Tu áarmaiti.

<sup>6</sup> Tutai nu jímiar unuiniamurí wear Jesus timia núnisan túrawarmiayi. <sup>7</sup> Umpuuruchin nukurtiuk itiarmiayi. Tura ni pushirín áitkiaram Jesus entsamkamiayi. <sup>8</sup> Shuar untsurí ásar ni wéamunam pushirín áitkiarmiayi. Chikichcha nuká jurukar ni wéamunam áeprurarmiayi. <sup>9</sup> Shuar untsurí eem wearmia nusha tura uku winiarmia nusha kakantar untsumiarmiayi. “Juna weatri uunt akupin Tawit asamtai nankaamakuiti. Yusa náarijn winiana ju ii Uuntrinti. Shiir atí. Nayainpinmasha Yus shiir awajsatai.” Tu untsumiarmiayi.

<sup>10</sup> Jesus Jerusarénum wayamtai ashí shuar ti enentáimainiak “¿Jusha yait?” tiarmiayi. <sup>11</sup> Chikichcha “Yúsnan etserin Jesusaiti, tiarmiayi. Nasarét pepru Kariréa nunkanmayaiti” tiarmiayi.

*Yusa Uunt Jeen suruktinian Jesus surimkiamiania nu  
 (Márkus 11.15-19; Rúkas 19.45-48; Juan 2.13-22)*

<sup>12</sup> Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutankríncha núnisan ayanturmiayi. <sup>13</sup> Nuyá tímiayi “Yus-Papinium áarchamukait,

“Yusa Jeenka Yus aujtai jéaiti.” Antsu átumka kasa matsamtaija nútikiarme” tímiayi.

<sup>14</sup> Nui Yusa Jeen jii kusurarusha shutuapsha Jesusan tariarmiayi. Túramtai tsuáramiayi. <sup>15</sup> Tura Israer-shuar pátrisha tura Israer-shuara jintinniurisha aents tujintiamun Jesus túrakui íisar kajerkarmiayi. Nu arantcha uchi Yusa Jeen “Juna weatri uunt akupin Tawit asamtai nankaamakuiti” untsumainiakui Jesusan ti kajerkarmiayi. <sup>16</sup> Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áujsachukaitrum. Júnis tawai,  
 “Uchisha kuírchisha Yusa náarijn imiá shiir awajtusarat tusa Yus tsanatkaiti.” Tu áarmaiti.

<sup>17</sup> Nuna tinia ikiuiniak Jerusarénumia jiinki Petania péprunam we nuí kanarmiayi.

*Jesus iikiu numin yuminkramiayi  
 (Márkus 11.12-14, 20-26)*

<sup>18</sup> Kashin tsawaar Jerusarénum waketas Jesus tsukaarmiayi. <sup>19</sup> Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerechattame.” Takui nu chichamaik káarmiayi.

<sup>20</sup> Nuna wáiniak ni unuiniamurí ti enentáimprar aniasarmiayi “¿Urukaku imiá wárik jaka?”

<sup>21</sup> Tuíniakui Jesus tiarmiayi “Nekasan tájarme, Yus nekas enentáimtakrumka, “nekas-pash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam inianta” tutai túrunattawai. <sup>22</sup> Ashí Yus áujeakum seamna nu, Yus nekas enentáimtakum seakmeke, wáinkiáttame” tímiayi.

*Yusa kakarmarijiaí Jesus takasmiania nu  
 (Márkus 11.27-33; Rúkas 20.1-8)*

<sup>23</sup> Yusa Uunt Jeen Jesus wayá unuiniamiayi. Turai Israer-patri uuntri tura Israer-shuara úuntrisha Jesusan tariar aniasarmiayi “¿Yana chichamejai ju túram. Ya ju túratniuncha akuptamkait?” tiarmiayi.

<sup>24</sup> Tutai Jesus tiarmiayi “Wisha aniaštaj tusan wakerajrume. Ju áirkakrumniñkia Wisha yana chichamejaj túrjaj nuna ujaktatjarme. <sup>25</sup> Wats, ¿ya imiakratin Juanñkan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamta enentáimtichuitrum?” túramtatji. <sup>26</sup> Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi. <sup>27</sup> Nuyá Jesusan “Nékatsji” tiarmiayi.

Tutai Jesussha ainiak “Wátsek, Wisha núnisnak akuptukua nuna ujakchattajrume” tímiayi.

### *Jimiará uchi tiarmia nuna áujmatsamiania nu*

<sup>28</sup> Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

<sup>29</sup> “Tutai uchi “Atsá, nakitiajai” timiai. Tayat urum enentáimiar takaumai.’

<sup>30</sup> ‘Nuyá aparí chikichnasha werí núnisañ timiai.’

‘Tutai uchi “Apawa, páchitsuk wetajai” timiai, túrasha wéchamai.’

<sup>31</sup> ‘¿Túa ni aparí wakeramun umirkama?” tímiayi Jesus.

Tutai “Emkaa nu” tiarmiayi.

Tuíniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiiintsrumniñ nii emka Yus akupeamunam pachiiinkiertatui. <sup>32</sup> Iis, imiakratin Juan péñker wekasatniun etserkamiayi, túrasha antukchamarme. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaari enentáimturhamarme’ tímiayi.

### *Yajauch takaun áujmatsamiania nu*

*(Márkus 12.1-12; Rúkas 20.9-19)*

<sup>33</sup> Ju chíkich áujmatmasha antuktarum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura niñkia yajá nunkanam wemai. <sup>34</sup> Tura júuktin tsawant jeamtai juuk nakak akúptúrkartí tusa chíkich takarniuri akupkamai. <sup>35</sup> Tura nuí pujuinia nu, akupkamun achikiar chikichnaka katsumkar, chikichnasha máawar, chikichnasha kayajaj tukurar máawarmai. <sup>36</sup> Túrawarmatai nérentin takarniun nuna nankaamas akupramai. Ataksha nuí pujuarmia nu núnisañ túrawarmai. <sup>37</sup> Amúamunam ni uchirín akupeak “Winia uchir asamta umirkachartimpiash” timiai. <sup>38</sup> Túrasha nu takau nérenniu uchirín wáinkiar “Nuna aparí jakamtaí juna mashi júkishtatuak, tiarmai. Maatai, túrar ii nérentin ajastai” tiarmai. <sup>39</sup> Tiar achikiar arant júkiar nuí máawarmai.” <sup>40</sup> Tinia Jesus aniasarmiayi “Nunká nérenniuri taa nu takaun ¿itiurkatin?” tímiayi.

<sup>41</sup> Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chíkich takaun neren akanak nin susannia nuna apujsattawai” tiarmiayi.

<sup>42</sup> Tuíniakui Jesus tímiayi “Átumka Yus-Papikia ¿penkek áujchaitrum? Júnis áarmaiti: “Jeajeamin utsañkarmia nú kaya ashí kayajaj nankaamas apujsamuiti. Núnaka ii Uuntri Yus túrait. Iisha ísar ti enentáimtaji.” Tu áarmaiti.

<sup>43</sup> Tuma asamtaí tájarme, Yusna írunna nu wáinkiatárum tusa suramsamuitiat atumíya junas chíkich aents súnastatui. Niisha awantukiartatui. <sup>44</sup> Tura shuar nu kayan tuku-mainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

<sup>45</sup> Israer-patri uuntri sha Pariséusha Jesus áujmatman antukar “in túramji” tusar achiktaj tiarmiayi. <sup>46</sup> Tura ashí aents “Jesus Yúsnan étserui” tuinia ásarmatai nin ashankarmiayi.

## 22

### *Métek-taku chichamjai nuatnaiyamun Jesus áujmatsamiania nu*

<sup>1</sup> Jesus ataksha áujmatuk juna tímiayi: <sup>2</sup> “Yus akupeamunam pachiinkiertin júnis enentáimpramniati. Uunt akupin ni uchirí nuáteakui nampermmamai. <sup>3</sup> Túrak ni takarniurín ipiaamautarum tusa akupkarmai. Tura ipiaamusha nakitrarmai. <sup>4</sup> Ataksha chíkich takarniuncha ipiaamakrum jū titiarum tusa akupkarmai. ““Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. <sup>5</sup> Támaiatiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai. <sup>6</sup> Chikichcha ipiaakratniun achikiar yajauch awajsarmai, tura chikichnaka máawarmai. <sup>7</sup> Túramtai uunt akupin ti kajek, ni suntari mash máatarum túrarum ni jee mash ekeemáktárum tusa akupkarmai. <sup>8</sup> Nuyá ataksha ni takarniurín akupkamai. “Nuatnaikiatin jísat mash iwiamamuiti, timiai. Tura nu ipiaamu winichmin armai. <sup>9</sup> Tuma asamtai pepru jintí werum ashí shuar nánkamas wáintrum nu ipiaatarum” timiai. <sup>10</sup> Takui takarniuri jínkiar pepru jintin wajainian, yajauch shuarnasha péñker shuarnasha, ashí ipiaawarmai. Túramtai jēa piákmai.”

<sup>11</sup> ‘Nuyá uunt akupin ipiaamun íisartaj tusa wayamai. Nuñ shuaran péñker iwiamamprachun wáinkiamai. <sup>12</sup> Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmiayi. <sup>13</sup> Nuyá uunt akupin yurumka ajaaman timiai “Achikrum nawenmasha uwejnusha jínkiarum aa júikrum kiritniunam ajapatarum. Nuñsha ti úutin ti wáitsatin átatui” timiai. <sup>14</sup> Kame untsurí ipiaamu áiniawai antsu ishichik achikma áiniawai.”

### *Uunt akupin Sésar akiktinia nu*

*(Márkus 12.13-17; Rúkas 20.20-26)*

<sup>15</sup> Nuyá Pariséu chichaman najatawar uyumtikiatai tusar tiarmiayi. <sup>16</sup> Túrawar ni shuarincha tura akupin Erutisa nemarniurisha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintíatsme, tiarmiayi. <sup>17</sup> Tuma asamtai jū nekaatai tusar wakeraji. ¿Uunt akupin Sésar akikminkiait?” tiarmiayi.

<sup>18</sup> Jesus ni yajauch enentáijjai aníam nekáa tiarmiayi “Aya shiir chichamtiniaitrome. ¿Urukamtai uyumatkiarkatin wakerutarum? tímiayi. <sup>19</sup> Wats, Sésar akiktinia nú kuit itiertiarum.” Takui chikichik kuítian itiertiarumiayi. <sup>20</sup> Nuna iis Jesus aniasarmiayi “¿Jui yana yapimpiait tura yana naarj áarmait?”

<sup>21</sup> Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. <sup>22</sup> Tura nuna antukar ti enentáimprarmiayi. Tura ikiuiniak wearumiayi.

### *Jesusan jakamunmaya nantaktinian aniasarmiania nu*

*(Márkus 12.18-27; Rúkas 20.27-40)*

<sup>23</sup> Nu tsawantajk Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusjai áujmatsarmiayi. <sup>24</sup> “Uuntá, Muisais juna áartampramijai, “áishman uchin yajutmatsuk jakamtainkia ni yachi nu nuwan nuatak ni yachin yajútmátrati,” tu áarmiayi, tiarmiayi. <sup>25</sup> Ayu, íi shuarnum siati (7) yáchintin áarmiayi. Iwiañri nuatak uchin yajutmatsuk jakamiayi. Tura wajen ni yachin ikiurkimiayi. <sup>26</sup> Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. <sup>27</sup> Nuyá

nuwasha jakamiayi. <sup>28</sup> Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

<sup>29</sup> Tuíniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne. <sup>30</sup> Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui. <sup>31</sup> Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujsachukaitrum. Júnisan áarmiayi:

<sup>32</sup> “Wiitjai Apraáma Yúsrinjai, Isaka Yúsrinjai, Jakupu Yúsrinjai.” Tu áarmiayi.

Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin áiniawai” tímiayi. <sup>33</sup> Ashí aents nuna antukar nu jintintiam ti enentáimprarmiayi.

*Yus akupkamu imiá enentáimtustinia nu  
(Márkus 12.28-34)*

<sup>34</sup> Satuséu Jesusan aiktinian tujinkiar matai Pariséu nuna antukar iruntrarmiayi. <sup>35</sup> Tura chikichik Pariséu jintintin asa Jesusan uyumtikiataj tusa aniasmiayi <sup>36</sup> “Uuntá, ¿túa Yus akupkamu imiá nankaamas enentáimtustiniat?”

<sup>37</sup> Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijaisha tura tuke enentáimtusam aneeta.” Tu áarmaiti, tímiayi. <sup>38</sup> Núiti emka ashí akupkamu nankaamas enentáimtustinia nu. <sup>39</sup> Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.” <sup>40</sup> Nu jímiar akupkamu umirkam ashí Muisais akupkamia nusha tura ashí Yúsnan etserin unuiniararmia nusha umirkattame” tímiayi.

*Kristu Tawit weeaitiat Yusa Uchirinti  
(Márkus 12.35-37; Rúkas 20.41-44)*

<sup>41</sup> Tura Pariséu tuke irunar pujuiniakui <sup>42</sup> Jesussha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

<sup>43</sup> Tuíniakui Jesus tiarmiayi “Nuikia ¿urukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

<sup>44</sup> “Uunt Yus winia Úuntrun juna tímiayi: “Akupin pujutainium, winia untsuuruini, pujusam nákarsata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

<sup>45</sup> Watsek, Tawit Krístun “winia Úuntur” tajsha ¿itiurak ni pampanmari áti?” tímiayi Jesus. <sup>46</sup> Nuna takui penkesha áikcharmiayi. Túrawar atakka uyumantikiatai tusar aniascharmiayi Jesusan.

## 23

*Jesus Pariséuncha Israer-shuara jintiniurincha “yajauchitrume” timiania nu  
(Márkus 12.38-40; Rúkas 11.37-54; 20.45-47)*

<sup>1</sup> Jesus ni unuiniamurincha tura ashí shuárnasha tiarmiayi <sup>2</sup> “Israer-shuara jintinniurisha tura Pariséusha Muisais akupkamun paant ujatmainiawai. <sup>3</sup> Tuma asamtai tunia nu umirkatarum. Túrasha ni túruinia nu jumamkiirap. Nu shuar shiir chichainiayat nusháa túrin áiniawai. <sup>4</sup> Ti itiurchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwejéjaisha ishichkisha takuitniun nakitiainiawai. <sup>5</sup> Aya shuar írsarti tusar ashí túruiniawai. Ashí shuar pénger enentáimturarti tusar Yus-Papin nijiaincha tura kunturincha ti wanakaram awajsar anujak yujainiawai. Tura nu arantcha pushiri sasariarman ashí shuarjai nankaamas esaram awajas wekainiawai. <sup>6</sup> Nampernumsha pénger iwiamunam pujustinian wakeruiniawai.

Iruntainmasha nan̄kaamantu ajasa pujustinian wakeruiniawai. <sup>7</sup> Jintíá wekainiaksha ashí aents áujtuiniak “Jintínkiartiniá” turutiarti tusa wakeruiniawai’ tímiayi.

<sup>8</sup> ‘Túrasha átumka ashí shuar “Jintínkiartiniá” turutiarti tusa enentáimsashtiniaitrum. Átumka nuámtak yáchintrume. Átumka chikichik jintinkiertin ni naari Kristu takakrume. Nu asamtai “Jintínkiartiniá” túramcharmin ániawai. <sup>9</sup> Ju nun̄kanmasha shuar “Aparú” tiirap. Chikichik nayaimpiniam pujana nu atumí Aparínti. <sup>10</sup> Atumi uuntri aya Krístuk asamtai “Uuntrú” túramcharmin ániawai. <sup>11</sup> Antsu átum írutkamunmayá uunta nuka peejchach átiniaiti. <sup>12</sup> Shuar nan̄kaamantu ajastaj tákuinkia Yus nin peejchach awajsattawai. Antsu peejchach ana nuna Yus nin nan̄kaamaku awajsattawai’ tímiayi.

<sup>13</sup> ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Yus akupeamunam wayatin waiti epenniuitrum. Atumsha wayatsuk chikichcha wayataj tuinia nusha suritniuitrum.’

<sup>14</sup> ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Wajé jeé atankiirum aents enentáimturarain̄ tusarum ti esaram Yus áujtiniuitrum. Túrin asarum átum ti asutniátniuitrum.’

<sup>15</sup> ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Nun̄kanmasha nayaantsanmasha yajá wekainiuitrum chikichik shuar winí nemartusat tusarum. Tura atumi nemari ajasmatai atumjai nan̄kaamas tunáa sumamannia awajearme.’

<sup>16</sup> ‘Wáinkiatárum átumka. Jintinkiertiniaitiatrum nékachu asarum kusurua ániuitrum. Ju jintíarme: “Shuar nekasan tajai tusa Yusa Jeen páchiakka nii tana nuna umitsuk ikiukminiaiti. Antsu nekasan tajai tusa Yusa Jeen kuri ana nuna páchiakka ti nekas umiktiniaiti” tíniuitrum. <sup>17</sup> Nétsetrum. Yúsjaín̄kia ashí kuri ánrachukait. Antsu Yusa Jeen írunna nuka aya nuin̄ ikiusma asa Yusna ajasuiti. Tuma asamtai kurijjai nan̄kaamas Yusa Jeé enentáimtustiniaiti. Enentáimcha asarum kusurua ánin wáakuitrum. <sup>18</sup> Nu arantcha tíniuitrum: “Shuar nekasan tajai tusa naman̄-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman̄ patasman páchiakka ti nekas umiktiniaiti” tíniuitrum. <sup>19</sup> Nétsetrum. Pen̄ké naman̄ Yusjai ánrachukait. Aya Yús-sutainiam patasma asa nu naman̄ enentáimtuschatniukait. Enentáimcha asarum kusurua ánin wáakuitrum. <sup>20</sup> Enentáimpratarum. Shuar nekasan tajai tusa Yús-sútain páchiakka aya sútainiak páchiatsui antsu sutaincha tura nuí patasmancha mái-metek páchiawai. <sup>21</sup> Núnisan̄ shuar Yusa Jeen páchiakka aya nunak páchiatsui antsu Yus nu jeanam pujú asamtai nunasha páchiawai. <sup>22</sup> Núnisan̄ shuar nayaimpin páchiakka Yus pujutainchsetrum. Pen̄ké naman̄ Yusjai ánrachukait. Aya Yúa tura Yus nuí pujana nunasha páchiawai.’

<sup>23</sup> ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Kumintsu nukeshá, anisa nukeshá, menta nukeshá tias (10) akantram chikichik akankamu Yus súwitrum. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrum. Yus nekas enentáimtustincha, wait-nentáimturincha tura tuke péñker túratniusha enentáimtsuk ikiuwitrum. <sup>24</sup> Átumka jintinkiertiniaitiatrum nékachu asarum kusuru ániuitrum. Kutanam yajasmach enketu wáinkiermeká júwitrum. Túrayatrum kamiriu wáinkiermeká kawai nan̄kaamas úunt ain takamtsuk kújawitrum.’

<sup>25</sup> ‘Maa wáinkiatárum jintinniutirmesha, Pariséutirmesha. Ántrarum shiir chicham-tiniaitrum. Átumka tsapasha pinin̄sha initiaanī nijiatsuk aya pátatek nijiawitrum. Núnisrum pátatek shiir awajmamniuitrum tura enentáiminkia kasamkatniusha tura chíkina wakeruktincha nujai piákuiterum. <sup>26</sup> Kusuru ániuitrum, Pariséutirmeá. Antsu emka initiaanī tsapasha pinin̄sha nijiaktarum. Túrakrumnín̄kia pátatesha mai péñker

átatui. Núnisrum atumsha atumi enentáin ana nu shiir awajsarum pátatkesha shiir átrume.’

<sup>27</sup> ‘Maa wáinkiatarum jintinniutirmesha, Pariséutirmesha. Ántrarum shiir chichamtini-aitrume. Iwiarsamu pújujaj yakarar shiir awajsamua áiniuitrume. Aanj shiir ániawai. Tura initkia jaká ukunchijjaj piákuiti. <sup>28</sup> Núnisaitrume atumsha. Chíkich shuar íismaka ti shiira áiniuitrume. Túrasha atumi enentáinkia ashí muijmiai piákuiti.’

<sup>29</sup> ‘Maa wáinkiatarum jintinniutirmesha, Pariséutirmesha. Ántrarum shiir chichamtinaitrume. Yaunchu Yúsnan etserin iwiarsamunam átumka shiir enentáimtakrum jea jeamkairume. Tura péñker shuar yaunchu jákarusha shiir enentáimturta tusarum ni iwiarsamu shiir awajearme. <sup>30</sup> Túrakrum ju tñiuitrume: “Íikia yaunchu ii weatrijjaj pujaitkiurkia Yúsnan etserin máatin yáimkiachajjaj.” <sup>31</sup> Nujaj ti paant chichaarme atumsha. “Íi weatrij Yúsnan etserniun máawar tunáa túrin ármiayi” tárume. Tura “Yáimkiachajjaj” táyatrum, atumsha métek túrin asarum “Nijjaj méteketji” tárume. <sup>32</sup> Wats, atumi weatrij nan kamawarmia nu átum amuktatrume’ tímiayi Jesus.

<sup>33</sup> ‘Napia áiniuitrume. Shuar aya yajauch awajniuitrume. Túmatirmesha Yus tunáa shuaran jinium akupkartatna nuyá ¿itiurak uwempratarum? <sup>34</sup> Untsurí shuaran akuptuktatjarme. Yúsnan etserniuncha, ti nekancha, jintinkiartinniasha akuptuktatjarme. Tura atumsha chíkich máattarme, chikichcha krúsnum ajintruarum máattarme, chikichcha iruntai jeanam asutiáttarme, tura chikichcha ashí nun kanam áintrattarme. <sup>35</sup> Nu tura asarum péñker shuara numpé puarma nujaj átum sumamattarme. Yámankamtaik Apir ti péñker shuaraitiat máamuyayi. Tura ukunam Perekíasa uchirí Sakarías atumi uuntrij Yusa Jee ámanum naman-maar-Yús-sutai ajapén aténkamunam máawarmiayi. Wats, Apir máamunmayá Sakarías máamunam ashí péñker shuar ti untsurí máamujaj sumamattarme. <sup>36</sup> Nekasan tájarme, yamá pujuiña nú shuar ashí nujaj sumamawartatui’ tímiayi Jesus.

### *Jerusarénnumiá shuaran Jesus aneak úutmiania nu (Rúkas 13.34-35)*

<sup>37</sup> ‘Jerusarénnumiá tirmeá, Yúsnan etserin máiniaitrume. Yus akatar akupturmak-masha kayajaj tukuram máiniaitrume. Túrin árumniñ waitnentajrume. Atash ni uchirín weaana áitkiasnak weartinian wakerimjarme, tura nakitramarme. <sup>38</sup> Iistarum. Ame pépruram ajapamuiti. <sup>39</sup> Tura “Yusa náarín winiana nu, shiir atí” títiatrumna nu tsawant jeatsain penké wáitkiashtatrume. Nuna tájarme” tímiayi Jesus.

## 24

### *Yusa Uunt Jee saanaktinian Jesus ujakmiania nu (Márkus 13.1-2; Rúkas 21.5-6)*

<sup>1</sup> Jesus Yusa Uunt Jeeñia jinki weaj ni unuiniamurj nin tariar Jean iniaktusar áujmatsarmiayi. <sup>2</sup> Tura Jesus tiarmiayi “Nu mash yamá wáintrume. Tura nekasan tájarme ukunmanka mash saanaktiatui. Chikichik kayaksha eken tramurj atsuttawai” tímiayi.

### *Amúamu tsawant nekaatin (Márkus 13.3-23; Rúkas 21.7-24; 12.22-24)*

<sup>3</sup> Nuyá Uriwiu náinnium wear ninki nuj pujasar ni unuiniamurj Jesusan aniasarmiayi “¿Nusha urutaik túrunatí. Tura ame tátincha tura nun ka amuukatin tsawant jeakuisha warijjain nekaattaj? Nu ujatkata” tiarmiayi.

<sup>4</sup> Tuñiakui Jesus tímiayi “Aneartarum, anankramawairap. <sup>5</sup> Untsurí shuar winia náarun pachisar “wi Krístuitjai” tiar untsurí shuaran anankawartatui. <sup>6</sup> Ti untsurí meset chicham antuktatrume túrasha sapijmiakairap. Núnisan átiniaiti nun ka amúatsain. <sup>7</sup> Apachcha chíkich nun kanmayá apachjaj máaniawartatui. Tura ti tsukasha átatui. Sunkursha ti pampartatui. Uusha ti uurkartatui. Nuka untsurí nun kanam ashí túrunawartatui. <sup>8</sup> Nujaj ti wáitsatin aya yama nan kamui’ tímiayi.

<sup>9</sup> Nuyá atumniasha yajauch awajsarti tusa surutmakartatui. Tura mantamawartatui. Tura winia naar pachia asakrumin ashí shuar muíjramkartatui. <sup>10</sup> Nu tsawantaj untsurí shuar Yúsan iniaisartatui. Túrawar nuamtak muíjniainiak surunairartatui. <sup>11</sup> Untsurí shuar wáitruiniak “wí Yúsnan etserniuitjai” tiartatui. Túrawar untsurí shuáran nusháa enentáimtikrartatui. <sup>12</sup> Tura tunáa ti ákui nuamtak anenaichartatui. <sup>13</sup> Tura shuar ashí nuna tuke katsuntra nu uwemprattawai. <sup>14</sup> Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

<sup>15</sup> Shuar juna áujea nu enentáimprati. Kame Jesus tímiayi “Yúsnan etserin Tanier muijmiamtik tuke emesratin ana nuna yaunchu aar etserkamiayi. Nuka Yusa Jeen wantinkiamtai <sup>16</sup> ashí shuar Jutía nunkanam írúnna nu, muranam pisararti. <sup>17-18</sup> Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitiaj tíchati. Antsu nuyañ wárik pisarti. <sup>19</sup> Nu tsawantaj nuwá ajamtincha tura kuírchin takaku ainia nusha ti wáitsartatui. <sup>20</sup> Ayampratin tsawantajsha tura michá nántutincha nu pisartin tsawant áchati tusarum Yus seatarum. <sup>21</sup> Maa, nu tsawantaj ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai. <sup>22</sup> Nu wáitsatin ti esarmaitkiuinikia chikichkísha uwemprachainti. Tura Yus nu wáitsatniun wárik amuntikiattawai. Shuar Niiniu ajasarat tusa achikma ainia nu uwemprarat tusa wárik amuntikiattawai’ tímiayi.

<sup>23</sup> “Tura atumin “Júiti Kristu,” tuíniakuisha tura “Nuí pujawai” tuíniakuisha anturkairap. <sup>24</sup> Untsurí shuar Krístuitjai tusar wantinkiertatui. Untsurísha “Yúsnan etserniuitjai” tiartatui. Tura shuáran anañkataj tusar aents tujintiamun iniakmasartatui. Tura ti kakarman túruiniak Yús-shuarnasha anañkamin ániakuinikia anañkawarainti. <sup>25</sup> Túrunatsajñ nuna emka ujaajrume. <sup>26</sup> Tuma asamtai “Iis, Kristu nuí aents atsamunam pujawai” túramainiakuisha nuí wéerap. “Jui úumak pujawai” tuíniakuisha anturkairap. <sup>27</sup> Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wí Aents Ajasuka winiakun paant wantinkiattajai. <sup>28</sup> Wats, jaka tepaana nuí chuan káutkachartatuak’ tímiayi.

### *Kristu tátintri*

*(Márkus 13.24-37; Rúkas 21.25-33; 17.26-30, 34-36)*

<sup>29</sup> “Ti wáitsatin nankaasmatai ti wárik tsawáí nantu kajinkiattawai. Tura kashí nantusha etsantrastatui. Yaasha ashí muchitrattawai. Nayaimpiniam kakaram ainia nusha peantrartatui. <sup>30</sup> Nuíkiá Wi Aents Ajasuka, tátiniur paant átatui. Tura ashí nunkanmayá aents Wi winiái wáitkiar asuttiamattaji tusar úutiartatui. Wisha ti kakaram tura Yusa wincharíjjai yuranminiam winiái wáitkiartatui. <sup>31</sup> Yusa suntarín kachu kakaram umpuarterum tinia akupkamtai nu suntar ashí nunkanmayá ashí Yús-shuaran, Yus achikma ásarmatai, irurartatui’ tímiayi.

<sup>32</sup> “Iikiu numirí nakumea nu nekaatarum. Ni nuken eteakui “esat nantu jeatemayi” tátsurmek. <sup>33</sup> Núnisan ashí ju wáinkiumeka “amuukatin tsawant nekas jeatemayi” títiniaitrome. <sup>34</sup> Nekasan tájarne, yamáí aents pujuinia nu amúatsajñ ashí túrunattawai. <sup>35</sup> Nunkasha nayaimpisha amuukartatui antsu winia chichamur amuukashtatui’ tímiayi.

<sup>36</sup> “Tura nu túrunatin tsawant nekanachminiaiti. Yusa suntarísha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai’ tímiayi.

<sup>37</sup> “Wi tátiniur jeamtai yaunchu Nuai pujumia nú tsawantin túrunamia núnisan átatui. <sup>38</sup> Nu tsawantin, tuke amaartsajñ, aya júnisan aa asamtai yurumuk umarar pujuarmiayi. Nuatnainiarmiayi. Ni nawantrincha nuatmamtikiarmiayi. Tura tumá pujuiniaj Nuai uunt kanunam enkemamtai <sup>39</sup> nu aents tuke nékainiatsajñ ama amarak mash amuukarmiayi. Núnisan átatui Wi tátin jeamtai. <sup>40</sup> Nu tsawantajk jimiará shuar ajanam pujuttawai. Chikichik junaktiatui tura chikichkia ikiunkittiwai. <sup>41</sup> Núnisan jimiará



nuwá shana nekeak pujuttawai. Chikichik junaktiatui chikichcha ikiunkittiwai' tímiayi.

<sup>42</sup> 'Nu asamtai atumsha iwiarnarum pujustarum. Nekaachminiaiiti uruk ájntasuk taritjiarum. <sup>43-44</sup> Tuma asamtai aneara pujustarum. Wi nekaachmanum tátin júnisan enentáimpramniaiti. Shuar ju kashi kasa tátinian nekaan̄ka kánutsuk kasa táawai tusa iwiarnar nákasainti. Núnisrum aneara pujutarum.'

*Pénker takantikniuncha yajauch takantikniuncha Jesus áujmatsamiania nu*  
(Rúkas 12.41-48)

<sup>45</sup> 'Shuar pénker uminian tura pénker enentáimniun áujmatsattajai. Nuna uuntri yajá irauweak "Yurumátin jeamtaí winia takartin ayuratarum" tíchanpiash. <sup>46</sup> Nu takantikniuncha ni uuntri taa takatrin tímiatrusan túran tarin̄kia shiir enentáimtusainti. <sup>47</sup> Nekasan tájame, umin asamtai ni uuntri ashí ni waririn wáitrukát tusa takatan susattawai. <sup>48-49</sup> Antsu úuntur wau táchattawai tusa takantikin ni uuntri yáintrin yajauch awajeak tura takatsuk aya yurumátiniun tura nampektinian wararkun̄ka nu takantikin yajauchiiti. <sup>50</sup> Turai ni uuntri aya aneachma taa nu takantikniun, yajauch asamtai, <sup>51</sup> ti kakaram asutiattawai. Yajauch shuar pujuinia nu akupkattawai. Nuisha ti wáitiak ti úuttiatui' tímiayi Jesus.

## 25

*Jesus tias (10) nuwan áujmatsamiania nu*

<sup>1</sup> 'Yus akupeamunam pachiinkiatin júnis átatui. Nuatnaikiatin jísat akui tias nuwá natsa kantiran akaawar nuátkattana nu áishman̄kan in̄kiun jeá itiatatui tusar wearmai. <sup>2</sup> Sen̄ku nuwá enentáimcha armai. Tura chíkich sen̄ku nuwá enentáimin armai. <sup>3</sup> Enentáimcha arma nú nuwá aya akaamunak juíniak amuukamtaí yaraatniun asutin júkicharmai. <sup>4</sup> Antsu chíkich sen̄ku núwaka akaamuncha juíniak tura ataksha amuukamtaí yaraatniun asutin júkiarmai. <sup>5</sup> Tura jíinkiamatai nuatkatin áishman̄ wari taachkui kari pujakui kanararmai. <sup>6</sup> Nuyá kashi ajapén shuar untsukum "Pai nuatkatin winiawai. Werirum in̄kiuntarum" timiai. <sup>7</sup> Tu untsumun antukar nantakiar kantiran akaatai tusar pujursarmai. <sup>8</sup> Nuyá sen̄ku nuwá enentáimcha arma nu, chíkich nuwá enentáimniun tiarmai "Incha atumi asuitiri ishichik ajamprusaitia. Ii kantirisha kajiniawai."

<sup>9</sup> "Tutai chíkich sen̄ku nuwá tiarmai "Atsá, wari íncha jeartamchattaji. Tura atumnia penké jeashtatui. Nekaska surutainium werum sumaka utumtarum" tiarmai.'

<sup>10</sup> "Tura nuyá sen̄ku nuwá enentáimcha arma nu, asutian sumak utitai tusar wéarai ukunam nuatkatin áishman̄ tamai. Túramtai enentáimin nuwá arma nuka nuatnaikiatin námpernam nuatkatniujai wayawarmai. Túramtai wáitin epeniarmai. <sup>11</sup> Tura epeniarai enentáimcha nu táarmai. Tura tiarmai "Úuntá, waiti uratritia."

<sup>12</sup> "Tu untsumainiakui nu uunt kajerak chichak "Cha, ¿yátsukaitrum? Penké nékatsjarme" tiarmai." <sup>13</sup> Jesus nuna áujmatas umik tímiayi "Aents Ajasuitjai tura tátin tsawantrusha tura uruk aiñ tátaj nusha nékatsrume. Tuma asarum tuke iwiarnarum pujustarum' tímiayi.

*Kuit susamun áujmatsamiania nu*

<sup>14</sup> 'Núnisan Wi tátin júnisaiti. Shuar chíkich nun̄kanam wéak<sub>u</sub> ni takarniur̄in untsukar ni kuítrin akanak súsarmai. <sup>15</sup> Chikichkiniak sen̄ku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujai métek súsarmai. Tura ikiuak yajá wemai. <sup>16</sup> Takarin sen̄ku mir kuítian achikmia nujai takakmas ataksha sen̄ku mir kuítian patakmai. <sup>17</sup> Chikichcha núnisan jimiará míran achikmia nujai takakmas ataksha jimiará

míran patakmai. <sup>18</sup> Tura chíkich shuar ni uuntri kuítrín chikichik míran achikmia nuna waa taur úukmai.’

<sup>19</sup> ‘Nuyá ukunam nu shuara uuntri támai. Tura kuítian súkiarma nujai itiurkarmakit tusa untsukarmai. <sup>20</sup> Emka senku mir kuítian achikmia nu tamai. Nuyá ni úuntri chíkich senku mir patakman suak timiai “Uuntá, senku mir kuit surusmame. Pai, atak senku míran patasmajai.”

<sup>21</sup> ‘Takui ni uuntri timiai “Ti péñker takakmauwitme. Nekas uminiaitme. Ishichk-ijjaisha ti péñker takakma asakmin ti núkap yamaikia amastatjai. Winí wayam wijjai ti shiir warasta” timiai.’

<sup>22</sup> ‘Nuyá chíkich shuar jimiará míran achikmia nu tarí timiai “Uuntá, jimiará mir surusmame. Pai, ataksha jimiará míran patasmajai.”

<sup>23</sup> ‘Takui ni uuntri timiai “Ti peñker takakmauwitme. Nekas uminiaitme. Ishichk-ijjaisha ti péñker takakma asakmin ti núkap yamaikia amastatjai. Winí wayam wijjai ti shiir warasta” timiai.’

<sup>24</sup> ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin <sup>25</sup> sapijmiakun ame kuítrumniaka nunká táutran úukmajai. Pai, juíti ame surukmiam nu” timiai.’

<sup>26</sup> ‘Takui ni uuntri timiai “Ámeka yajauchiitme. Aya nákiitme. Wi araachiatan tura atsaamprachiatan júurtuktarum tınıuitme túrutsumek. <sup>27</sup> Tu enentáimkiumka çurukamtai kuit-iruntainiam ikiurtuschamam? Nuikia wi táakun patasan achikiájai” timiai. <sup>28</sup> Nuna tinia nuñ wajainian tiarmai “Ju shuar chikichík mir kuit atankirum tias mir kuítian takaka nu susatarum. <sup>29</sup> Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuiat jurunkittiawai. <sup>30</sup> Ju umichu shuarsha aa kiritniunam ajapatarum. Nuñ ti wáitiak ti úuttiatui” timiai”. Tu áujmatsamiayi Jesus.

### *Akantratin átatna nu*

<sup>31</sup> Jesus áujmatuk tímiayi ‘Aents Ajasuitjiana nu ashí akupin ajasan Yusa suntari éñkekma winittiajai. Tura Uunt Akupin asan shiir pujutairuj pujustatjai. <sup>32</sup> Túramtai ashí nunkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai. <sup>33</sup> Tura kachurtichunka, péñkera nuna, untsuuruinj awajsartatjai. Tura kachurtinniaka, yajauchia nuna, menaruinj awajsartatjai. <sup>34</sup> Túran nekas Uunt Akupin asan untsuuruinj wajainian títiatjai “Atumniaka winia Apar shiir awajtamsaitrume. Wi akupeajna nuñ winitiarum. Yus nunkan najanamia tímianaik átum nuñ warastinian tsankatramkamiarme. <sup>35</sup> Kame Wi tsukamá wekaj ayurtuamiarme. Kitiama wekajsha umartin surusmiarme. Wait ajá wekajsha itiaararum ajamprusmiarme. <sup>36</sup> Pushir atsaisha átumka surusmiarme. Jaa tepajsha íráimiarme. Sepunam enketajsha tarum íráimiarme” títiatjai. <sup>37</sup> Tutai untsuuruinj wajainia turutiartatui “Uuntá, çurutia tsukamá wekaamnisha ayuramaj. Urutiá iisha kitiama wekaa wainkiarsha umartincha amasmaj. <sup>38</sup> Tura urutia wait ajá wekaamnisha tura pushiram mamurmataisha iisha amasmaj. <sup>39</sup> Urutia iisha jaa tepamin tura sepunam enketmin wainkiarsha winitir íimij?” turutiartatui.’

<sup>40</sup> ‘Turutainiakui Wi Uunt Akupin asan tiartatjai “Nekasan tájarme, ashí ju wí shuar péjchachisha waitnentramarum nu Winia anentakum túraitrume” tiartatjai’ tímiayi.

<sup>41</sup> ‘Wi Uunt Akupin asan menaruinj wajainian tiartatjai “Atumsha yajá wetarum. Yajauchijjai yuminukramuitrume. Yus uunt iwianchi ni suntarijiai tuke kajinkiashtin jinium apeatniua nuñ wétatrume atumsha. <sup>42</sup> Átumka Wi tsukamaj ayurtuachmarme. Kitiamaisha umartin suruschamarme. <sup>43</sup> Wait ajá wekajsha ikiatrachmarme. Pushirun imiampraisha entsartin suruschamarme. Jaa tepajsha tura sepunam enketajsha íraichmarme” tiartatjai.’

<sup>44</sup> “Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha ísha winitir yáinçhamaj?” turutiartatui.’

<sup>45</sup> ‘Wi Uunt Akupin asan tiartatjai “Nekasan tájarme, Ashí Wíi shuar, péejchachisha waitnentrachmarum nuí Winiasha túrutachuitrume” tiartatjai. <sup>46</sup> Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjaj pujustinium weartatui” tímiayi Jesus.

## 26

### *Jesus achiktin chichaman jurusarmiania nu*

*(Márkus 14.1-2; Rúkas 22.1-2; Juan 11.45-53)*

<sup>1</sup> Jesus ashí nuna tinia umik ni unuiniamurin tiarmiayi <sup>2</sup> “Atumsha nékarme, Paskua jisat jeatin jimiaarchik tsawant ajasai. Nuí Wi Aents Ajasu asamtai krúsnum máawarti tusar surutkartatui” tímiayi.

<sup>3</sup> Nuyá Israer-patri uuntriísha Israer-shuara jintinniurísha Israer-shuara úuntriísha Kaipiasa jeen áarin iruntrarmiayi. Kaipiassha Israer-patri uuntriíyayi. <sup>4</sup> Nuí anankatin chichamjaj Jesus achikiar maatai tusar chichaman jurusarmiayi. <sup>5</sup> Tura tiarmiayi “Jístatin túrachminiati aents téetet ajarain tusar.”

### *Nuwa Jesusan kunkuinian ukatramiania nu*

*(Márkus 14.3-9; Juan 12.1-8)*

<sup>6</sup> Jesus Petania péprunam pujus tunamaru Semunka jeen pujumiayi. <sup>7</sup> Nuí pujaj nuwa ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunkuinian ukatramiai. <sup>8</sup> Túramtai ni unuiniamurí nuna ísar kajerkar tiarmiayi “¿Urukamtai au kunkuin imiá kuítniasha áantrasha wasurea? <sup>9</sup> Antsu ti kuitjaj suruk shuar kuítrincha ainia nuna yáítskesha” tiarmiayi.

<sup>10</sup> Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti péñkeran túrayi. <sup>11</sup> Kuítrincha tuke atumjaj pujushtatuak. Antsu Wikia atumjaj tuke pujushtatjai. <sup>12</sup> Ju nuwa kunkuinjaj ukatruraj juka, Wi iwiarnastin asamtai áitkiarayi. <sup>13</sup> Nekasan tájarme, ashí nunkanam uwempratín chicham etsernakui tuke ju nuwa pachinias etsernaktatui. Túramtai ni túramurí kajinmankishtatui” tímiayi.

### *Jútas Jesusan surukmiania nu*

*(Márkus 14.10-11; Rúkas 22.3-6)*

<sup>14</sup> Nuyá Jesus tuse (12) unuiniamunmaya chikichik ni naari Jútas Iskariúti Jesusan suruktaj tusa Israer-patri uuntriin wémiayi. <sup>15</sup> Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi. <sup>16</sup> Nu akikiam Jútas itiurak Jesusan súsaraintiaj tu enentáimias wekaimiai.

### *Kristu jakamu enentaimtustin námper*

*(Márkus 14.12-25; Rúkas 22.7-23; Juan 13.21-30; 1 Kurintiunam 11.23-26)*

<sup>17</sup> Wakapruachu tantan yurumáinia nú námper yama nankamkui Jesusa unuiniamurí tariar aniasarmiayi “¿Tuj paskua námper iwiaarakrin yurumáttam?” tiarmiayi.

<sup>18</sup> Tuíniakui Jesus tímiayi “Péprunam wetarum. Nuí chikichík shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjaj ame jeemíin yurumátjai” tawai” titiarum” tímiayi. <sup>19</sup> Tutai ni unuiniamurí wear Jesus timia nuna umikiar paskua nampertin yurumátniun iwiararmiayi.

<sup>20</sup> Tura kashi ajasáí Jesus ni tuse (12) unuiniamurijíají misanam yurumuk pujumiayi. <sup>21</sup> Nuí yurumáiniaí Jesus tiarmiayi “Nekasan tájarme, átum pujarmena juyá chikichik Winia surutkattawai.”

<sup>22</sup> Nuna takui ti kúntuts enentáimprar mai aní awajiarmiayi “Uuntá, ¿wiáshitiaj?”

<sup>23</sup> Mai tu awajenam Jesus tiarmiayi “Wi nú pininnumañ jimiartukan yuajna ju Winia surutkattawai. <sup>24</sup> Wi Aents Ajasu asan Yus Chicham tana nujají métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti” tímiayi.

<sup>25</sup> Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

<sup>26</sup> Tura yurumuk pujuiniaí Jesus yurumkan achik Yúsan yuminsamiayi. Tura puur ni unuiniamurín suiniak tímiayi “Ju yuatarum. Juka winia ayashruiti.” <sup>27</sup> Nuyá pininkian achik Yúsan yuminsamiayi. Tura suiniak tiarmiayi “Jusha ashí umartarum. <sup>28</sup> Juka winia numparuiti. Tura winia numpar puármatai, yamaram chicham nekas uminkiatatawai tawai. Tura puármatai untsurí shuara tunaarín tsankurattawai. <sup>29</sup> Tura ataksha átum Yus akupea nuí jeatsrumniñ ju uwa yumirín umarchattajai. Tura tsawant jeamtai atumjají Yus akupeana nuí yamarman umartatjai” tímiayi Jesus.

*Pítiur natsantratniua nuna Jesus ujakmiayi  
(Márkus 14.26-31; Rúkas 22.31-34; Juan 13.36-38)*

<sup>30</sup> Yús-kantan kantamáwar umikiar Uriwiu náinnium wearmiayi. <sup>31</sup> Nuí Jesus tímiayi “Ju kashi átum Winia ashí natsantrurtatrome. Kame Yus-Papinium áarmaiti “Murikiu wáinnium mantuattajai túram murik pisarartatui.” Tu áarmaiti. <sup>32</sup> Tura nantakin Kariréa nunkanam Wi émkattajai átum wéatsrumin.”

<sup>33</sup> Takui Pítiur tímiayi “Chíkich natsantramainakuisha wikia túrashtatjai.”

<sup>34</sup> Tutai Jesus tímiayi “Nekasan tájame, ju kashi atash shiniatsain̄ menaintiú natsantrurtatme.”

<sup>35</sup> Pítiur tímiayi “Maa, Ámijíají métek mántuiniakuisha penkesha natsantrashtatjame.” Ashí ni unuiniamurí núnisan̄ tiarmiayi.

*Jesus Jitsemaní ajanam Yúsan áujsamiania nu  
(Márkus 14.32-42; Rúkas 22.39-46)*

<sup>36</sup> Nuyá Jesus ni unuiniamurijíají Jitsemaní náartin ajanam jeá tímiayi “Juí pujusrum náarsatarum. Aranta aj wena Yúsan áujsatjai.” <sup>37</sup> Tinia Pítruncha tura mai Sepetéu uchirí jukí wémiayi. Nuísha ti kúntuts enentáimiuk wake mesekmiayi. <sup>38</sup> Nuyá Jesus tímiayi “Ti kúntuts jakamnia enentáimjai. Atumsha juí pujusrum Wijíají métek iwiáa pujutarum.” <sup>39</sup> Tinia Jesus arantach we nuí tikishmar tsuntsuma Yúsan áujeak tímiayi “Winia Aparú, Wi túrunatniua nu nusháa iwiamniaitkiuin̄kia ju wáitsatniua nu tsankatrukaip. Tura Wi wakeraj núniska áchati antsu Ame wakeram núnis atí” áujuk tímiayi.

<sup>40</sup> Nuyá ni menaintiu unuiniamurí pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijíají iwiáa pujutin ¿tujinkiarnek? <sup>41</sup> Iwiáa pujusrum Yus áujsatarum. Tunáa nupettamkairap. Enentáimin̄ ti wakeriniaitrome túrasha ayashim pimpiruiti.”

<sup>42</sup> Tinia ataksha we Yúsan áujeak tímiayi “Winia Aparú, Wi imiá nekas wáitsatniuitkiuin̄kia nuikia Ame wakeramna nu atí.” Tu áujsamiai.

<sup>43</sup> Nuyá ataksha taa ni menaintiu unuiniamurí tarimiayi. Tura karí ti nupeteam ataksha kanúu pujuarmiayi. <sup>44</sup> Túmainiakui nin ikiukin ataksha áujmia núnisan̄ Yúsan áujsataj tusa waketkimiayi. <sup>45</sup> Áujas umik ni unuiniamurí pujamunmañ wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain̄, tunaarintin shuarum surunkatin jeayi. <sup>46</sup> Wari nantaktiarum. Wéartai. Súrutna nu winiawai” tímiayi.

### *Jesusan achikiarmiania nu*

*(Márkus 14.43-50; Rúkas 22.47-53; Juan 18.2-11)*

<sup>47</sup> Jesus tu chichaj Jútas támiayi. Nusha ni unuiniamuriyayi. Nujajisha untsurí shuar puniajajisha tura numijajisha winiarmiayi. Nu shuaran Israer-patri uuntri sha Israer-shuara úuntri sha akupka ármiayi. <sup>48</sup> Jútas, Jesusan sura, tuke Jesusaj jeatsuk nu shuaran tiarmiayi “Wi miniakkan mukunattajna núiti. Nu achiktarum.” <sup>49</sup> Nu asantai Jesusan tarí “Winiajai Uuntá” tinia mukunamiayi.

<sup>50</sup> Takui Jesus tímiayi “Amikrú, ¿warí winitiam?” Nuyá achikar Jesusan júkiarmiayi.

<sup>51</sup> Nuj chikichik Jesusa tsaniákmari ni puniarin ukuiniak shuara kuishin tsupirkamiayi. Nu shuarsha Israer-patri uuntri takarniuriyayi. <sup>52</sup> Túramtai Jesus tímiayi “Puniarum enkeata. Ashí puniajai máanainia nusha puniajai mantamnashtatuak. <sup>53</sup> Wi wakeraknaka winia Aparun timiá untsurí suntarin seakui páchitsuk akupturkainti. ¿Nu nékatsmek? <sup>54</sup> Tura nuna túramtainkia Yus-Chichamnum tana nu uminkiachainti” tímiayi.

<sup>55</sup> Nuna tinia Jesus nu shuaran tiarmiayi “Átum kasá achiktaj tawa nútiksarum puniajajisha numijajisha tarutniurme. Kame ashí tsawantaj Yusa Jeen atumjai pujusan Yus-Chichaman etsermiajai. Nuisha achirkachmarme. <sup>56</sup> Antsu yamaikia yaunchu Yúsnan etserin áararmia nu umínkiatí tusarum jútikrarme.” Tu tímiayi Jesus.

Nuyá ni unuiniamurí Jesusan Níniak ikiuiniak pisararmiayi.

### *Israer-patri uuntriin Jesusan júkiarmiania nu*

*(Márkus 14.63-65; Rúkas 22.54-55, 63-71; Juan 18.12-14, 19-24)*

<sup>57</sup> Shuar Jesusan achikiarmia nusha Kaipiasaj júkiarmiayi. Nusha Israer-patri uuntri yayi. Nuisha Israer-shuara jintinniurisha Israer-shuara uuntri armia nusha irunar matsarmiai. <sup>58</sup> Tura Pítiur árantak Jesusan nemarkin uuntri jeen aari jeamiayi. Tura suntarjai tsanin pujusmiayi Jesusan itiurkartin tusa.

<sup>59</sup> Tura Israer-patri úuntri sha Israer-shuara úuntri sha tura ashí naamka uunt armia nusha Jesusan wait-chichamjai súmamtikiatai tusar áujmatarmiayi. <sup>60</sup> Untsurí shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak <sup>61</sup> tiarmiayi “Ju áishman chichaak “Yusa Uunt Jeen yumpuaran ataksha menaintiú tsawantin jeamminiaitjai,” tu chichamai” tiarmiayi.

<sup>62</sup> Nuyá Israer-patri uuntri wajaki Jesusan tímiayi “¿Áimtsumek. Turamainia nusha anturmammek?” <sup>63</sup> Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náariin tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

<sup>64</sup> Tutai Jesus tímiayi “Ee, ame támena nútjai. Tura ataksha atumin tájarme, wi Aents Ajasu asan ti kakaram Yusa untsuuriní pujaj wáitkiáttarme. Tura yuranminiam winiajisha wáitkiáttarme” tímiayi.

<sup>65</sup> Nuyá Patri uuntri nuna antuk ti kajek ni pushiri jaak tímiayi “Ju áishman ni chichamejai Yusan nekas yajauch chicharniuiti. Nuyásha ¿warí atumaj? Atumsha Yusan yajauch chicharu antukcharumek. <sup>66</sup> ¿Waritia enentáimprum?”

Tutai “Sumamayi. Mantamnati” tiarmiayi. <sup>67</sup> Tiar usukiawarmiayi yapiniam. Tura awattarmiayi.

Chikichcha yapiniam awati wishikiainiak tiarmiayi <sup>68</sup> “Ame Krístuchukaitiam. ¿Ya awattama? Ítsuk nekaata.” Tu chichariarmiayi.

### *Pítiur Jesusan natsantramiania nu*

*(Márkus 14.66-72; Rúkas 22.56-62; Juan 18.15-18, 25-27)*

<sup>69</sup> Nu túmain Pítiur aa pujaj nuwa chikichik jeari tímiayi “Amesha ju Kariréanmaya Jesus tutajjai wekaichamkam.”

<sup>70</sup> Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

<sup>71</sup> Nuna tinia jíinkitaj tusa wéai chíkich shuar wáiniak nuí pujuinian tiarmiayi “Au áishmansha Nasarénumia Jesusjaj wekainiuiti.”

<sup>72</sup> Tutai Pítiur ataksha tímiayi “Nekasan tájarme, ju áishmankan penké nékatsjai.”

<sup>73</sup> Árusan nuí pujuarmia nu Pítrun tariar tiarmiayi “Nekas amesha aujaj wekaimiame. Warí, chichammijaj páantaiti.”

<sup>74</sup> Tutai Pítiur “nekas Yus írui” taku tímiayi “Nu áishmankan penké nékatsjai.” Nuna taj atash shiniukmiayi. <sup>75</sup> Túramtai Pítiur Jesus nuik tímia nuna enentáimpramiayi. “Atash shiniatsain menaintiú natsantrurtatme” tímiayi Jesus. Pítiur nuna enentáimiar jíinki we ti útmiayi.

## 27

### *Piratui Jesusan júkiarmiania nu*

(Márkus 15.1; Rúkas 23.1-2; Juan 18.28-32)

<sup>1</sup> Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi. <sup>2</sup> Tiar Jesusan jíinkiarwar apachi uuntrin Punsiu Piratui júkiarmiayi.

### *Jútas máamamiania nu*

<sup>3</sup> Jútas Jesusan suruk tura máatai tuínian antuk enentáimiar trainta kuítian Israer-patri uuntrincha Israer-shuara úuntrincha awantukiarmiayi. <sup>4</sup> Tura tímiayi “Nu áishman tunaarinchán máatarum tusan surukan wi sumamajai.”

Takui tiarmiayi “Nusha íjiaisha warí urukatin. Nuka amek íschatniukaitiam.” <sup>5</sup> Tinia Jútas nuí Yusa Uunt Jee kuítian utsan ikiuak nuyá we kajempramiayi. <sup>6</sup> Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijaj irur-chamniaiti.” <sup>7</sup> Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuí iwiarsatniun. <sup>8</sup> Shuar sumakma kuitjai sumakma asamtai yamaisha Numpá Nunka tuke tuíniawai. <sup>9-10</sup> Nujaj yaunchu Yúsnan etserin Jeremías timia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuítian seawarmatai nuna akantrar nujaj Nuwe Najantai nunkan sumakarmiayi.” Tu áarmiayi.

### *Piratu Jesusan aníasmiania nu*

(Márkus 15.2-5; Rúkas 23.3-5; Juan 18.33-38)

<sup>11</sup> Jesusan apachi úuntrin ejeniarmatai nii aniasmiayi “¿Nekasmek Israer-shuara uunt akupniuríntiam?”

Tutai Jesus “Ame támena núitjai’ tímiayi.

<sup>12</sup> Nuyá Israer-patri úuntrisha Israer-shuara úuntrisha súmamtikia Jesus pachischamiayi. <sup>13</sup> Nuyá Piratu tímiayi “Ashí yajauch chichartamainia nu ¿anturmammek?” <sup>14</sup> Tútaisha Jesus penké áimkiachmiayi. Túmakui akupin ti enentáimiar títinian nekaachmiayi.

### *Piratu Jesusan “mantamnati” tímiania nu*

(Márkus 15.6-20; Rúkas 23.13-25; Juan 18.39-19.16)

<sup>15</sup> Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jíiki ankant akupniuyayi. <sup>16</sup> Nuí sepunam tunáa shuar Parapás náartin pujumiayi. Ashí shuar nékarmiayi. <sup>17</sup> Tuma asamtai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi. <sup>18</sup> Kame Israer-shuar ántar kajerainiak ni itiarman nekaamiayi.

<sup>19</sup> Tura Piratu nuna inintrak pujaj ni nuarí chichaman akuptukmiayi. “Ju pénger áishman súmamtikiatnuijaj pachiinkiaip. Mesekranam nii áitkiatniun nekaan wáitsan tsawarjai” tímiayi.

<sup>20</sup> Túrasha Israer-patri úuntrisha Israer-shuara úuntrisha “Parapás ankant wetí, tura Jesus mantamnati” titiarum tusar shuáran akatrarmiayi. <sup>21</sup> Apachi akupniuri ataksha aniasarmiayi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

<sup>22</sup> Tutai aniasarmiayi “Jesusnasha. Yusa Anaikiamuri Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

<sup>23</sup> Tuíniakui Piratu tiarmiayi “¿Warí yajauchinia túrait?”

Tutai kakantar untsujuk “Krúsnum máatá” tiarmiayi.

<sup>24</sup> Tura Piratu Jesus uwentikrachminiaiitkiui antsu ashí shuar charaatum ajainiakui entsa uturtitiarum tusa seamiayi. Tura ashí ímiainiain ikijmiak tímiayi “Ju péñker áishman máatniunam wikia pachintsujai. Antsu atumek íistarum.”

<sup>25</sup> Tutai ashí shuar tiarmiayi “Iik ii shuarjjai ju áishman máatin íistaji.”

<sup>26</sup> Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi. <sup>27</sup> Nuyá akupin pujutai jeanam akupniu suntari Jesusan júkiar ashí suntaraim irunturarmiayi. <sup>28</sup> Tura pushiri áitkiar akupin entsatain kapaaku pushin áentsrarmiayi. <sup>29</sup> Múuknúmsha tawaspan janke najanamun etsentikiarmiayi. Tura karisun akupniu numirja áaniun untsuurini ataksarmiayi. Túrawar wishikiainiak tikishmatrar tiarmiayi “Israer-shuara uunt akupniurinme.” <sup>30</sup> Tiar usukiarmiayi. Tura karisun jurukiar múuknum awatiarmiayi. <sup>31</sup> Tura núkap wishikrar kapaaku pushin áitkiar ni pushirin áentsrarmiayi. Nuyá krúsnum maatai tusar júkiarmiayi.

*Jesusa krúsnum máawarmiania nu*

*(Márkus 15.21-32; Rúkas 23.26-43; Juan 19.17-27)*

<sup>32</sup> Jesusan júki wésar Serini nunkanmaya shuaran, ni naari Semun, Jesusa krúsrin jurukit tusar achikiarmiayi. <sup>33</sup> Nuyá Kúrkutanam ejeniarmiayi. Kúrkutaka, shuar chichamjainkia, muuka ukunch tútainti. <sup>34</sup> Nui Jesusan umutai yapajai pachimpra najanamun áartaj tusar súsarmiayi. Tura Jesus apas iis umarchamiayi.

<sup>35</sup> Krúsnum ajintrurar suntar yáki Jesusa pushirin jukit tusar nakurusar awakmakua nuna súsarmiayi. Nújainkia yaunchu Yúsnan etserin áarmia nu uminkiamiayi: “Winia entsarmarun akantrarmiayi tura nakurusar awakmakua nuna winia pushirun súsarmiayi.” Tu áarmiayi.

<sup>36</sup> Nuyá wáinkiatat tusar pujursarmiayi. <sup>37</sup> Tura urukamtai máamuit ashí aents nekaawarti tusa áarman muuknumaani anujtukarmiayi. *JUTI JESUS, ISRAERA UUNT AKUPNIURI*

Tu áarmauyayi.

<sup>38</sup> Núnisan Nijjai métek jimiará kasa chikichkin untsuurnumaní tura chikichnasha menaanmaní krúsnum máawarmiayi. <sup>39</sup> Shuar nui nankaamainiak muuke peatar wishikiainiak <sup>40</sup> tiarmiayi “Ame Yusa Uunt Jee sáakim maintiú tsawantin jeamtatjai tíchakaitiam. Nekas Yusa Uchirinkiumka krúsnumia akaikim uwemprata” tiarmiayi.

<sup>41</sup> Núnisan Israer-patri úuntrisha, Israer-shuara jintinniurisha, Pariséusha, Israer-shuara úuntrisha, Jesusan wishikiainiak nuamtak tiarmiayi <sup>42</sup> “Chikichnaka uwentikraiti tura Nínkikia uwemtsui. Israera Uunt Akupniurintkiunka krúsnumia akaikimtai nekas enentáimtustatjai. <sup>43</sup> “Yúsan nekas enentáimtiniaitjai” tawai. Wátsek, Yus nekas Nin aneakka uwentikrati. “Wi Yusa Uchirintjai” turamchamkaj” tiarmiayi.

<sup>44</sup> Kasá shuarsha Nijjai ajintruamu armia nusha Nin wishikrarmiayi.

*Jesusa jakamuri*

*(Márkus 15.33-41; Rúkas 23.44-49; Juan 19.28-30)*

<sup>45</sup> Nuyá tutupin ai tee ajasmiayi. Túrunayat ataksha aanaku tsáapin ajasmiayi. <sup>46</sup> Nuni ai Jesus kakantar untsukamiayi. “Erí, Erí, rama sapaktani’ tímiayi. Nusha shuar

chichamjainkia “Yusrú, Yusrú, ¿urukamtaí ajapa ikiurkiniam?” tawai. <sup>47</sup> Shuar nuí wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuawai.” <sup>48</sup> Tura chikichik tsékenki we uruchin itiamiayi. Tura churuinian ajamper sapapjai ijiú mukunati tusa susamiayi. <sup>49</sup> Tura chikichcha wíshikeak tiarmiayi “Iniáísatá, Erías tarí uwemtikratpiash.”

<sup>50</sup> Jesus ataksha kakantar untsamak nuyá jakamiayi. <sup>51</sup> Nu chichamaik Yusa Uunt Jee tarach ajamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi. <sup>52</sup> Núnisañ iwiarsamusha uraniarmatai untsurí Yus-shuar jákarusha nantakiarmiayi. <sup>53</sup> Nusha emka Jesus nantakmiatai niisha nantakiar iwiarsamun ikiukiar Yusa péprurin Jerusarénnum wayawarmatai untsurí shuar wáinkiarimiayi.

<sup>54</sup> Nuyá suntar Jesusan wáinkiarimia nusha tura ni kapitíántrisha nunka úurkamtaí nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirínti.”

<sup>55</sup> Nuísha nuwá Jesusan nemariarmia nu, arant wajasar, ii wajaarmiayi. Nusha Kariréanmaya pataatukiar Jesusan yaínki ejeniarmiayi. <sup>56</sup> Nujai Máktaranmaya Marisha, Sepetéu nuwésa, tura chíkich Marisha árimiayi. Chíkich Marikia Jakupuncha tura Jusenchá nukuríyayi.

### *Jesus iwiarsamu*

*(Márkus 15.42-47; Rúkas 23.50-56; Juan 19.38-42)*

<sup>57</sup> Kiarai shuar ti kuítrintin Arimatéu péprunmaya ni naari Jusé támiayi. Nusha Jesusan enentáimtiniuyayi. <sup>58</sup> Nii Piratui we Jesusa ayashin seamiayi. Nin súsarat tusa Piratu akupkamiayi. <sup>59</sup> Túram Jusé Jesusa ayashin krusnumia jusa ti péñker tarachjai penuarmiayi. <sup>60</sup> Tura kaya waa táurmanum yamaram amia nuí iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etektuk ikiuak wémiayi. <sup>61</sup> Nuísha Máktaranmaya Marísha tura chíkich Marísha iwiarsamunam naka ii pujuarmiayi.

### *Jesus iwiarsamun suntar wáinkiarimiania nu*

<sup>62</sup> Nú kiarain ayampratin tsawantna mash iwiarnakui Israer-patri úuntrisha Pariséusha Piratui wearimiayi. <sup>63</sup> Tura tiarmiayi “Uuntá, nu wáittrin áishman iwiaaku pujus “Menaintiú tsawant jakan nantaktiatjai” tiniuyi. <sup>64</sup> Nu asantai iwiarsamunam menaintiu tsawant suntar wáinkiarat tusa akuptukta. Ni unuiniamurí kashi tariar tura ni ayashin kasamkar “Pai, nantakni” shuáran tiarain. Jujainkia nuna nankaamas shuáran anankawarainti” tiarmiayi.

<sup>65</sup> Tutai Piratu tiarmiayi “Nuí suntar takakrume. Werum iwiarsamu urakchamnia péñker wáinkiatárum.” <sup>66</sup> Tutai wear iwiarsamun urankashti tusar etektukma inkiunmanum serajai yakarar ni áarmarin anujtukarmiayi. Tura suntarnasha awaj-tukiarmiayi.

## 28

### *Jesusa nantakmiari*

*(Márkus 16.1-8; Rúkas 24.1-12; Juan 20.1-10)*

<sup>1</sup> Ayampratin tsawant nankaasmatai tumintin yama tsawaana ai Máktaranmaya Marisha chíkich Marijiai iwiarsamu iyutai tusar wearimiayi. <sup>2</sup> Tumai Yusa suntari nayaimpinmaya iwiarsamun tarí kaya atutkamun urak nuí pujusmiayi. Túmakui nunka ti úurkamiayi. <sup>3</sup> Yusa suntarisha peemia tímiatrus wínchayuyayi. Pushirisha ti puju áuyayi. <sup>4</sup> Tura iwiarsamun wáiniarmia nú suntarsha nuna wáinkiar ashamainiak ti kuranarmiayi. Jaká áinis ajasarmiayi.



<sup>5</sup> Nuyá nayaimpinmaya suntar nuwan tímiayi “Ashamkairap. Jesus krúsnum máawarmia nu eatsrumek. <sup>6</sup> Juinkia pujatsui. Nii timia núnisan nantakniuiti. Pai, áepsarma nu ítiarum. <sup>7</sup> Wárik wérum ni unuiniamurí “Jesus jakamunmaya nantakni tura wari Kariréanam wétatui. Nuí werirum wáinkiáttarme” titiarum. Wats, nunak tájai” tímiayi. <sup>8</sup> Tutai nu nuwá iwiarsamunmaya wárik jíinkiar ashamainiyat ti warasar tseke waketkiarmiayi ni unuiniamurín ujaktai tusar. <sup>9</sup> Tumaj Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi. <sup>10</sup> Túram Jesus tiarmiayi “Ashamprukairap. Werum winia yatsur ujutruktarum. Kariréanam weartí. Nuí wear wáitkiartatui. Tu ujaktarum” tímiayi.

*Suntar etserkarmiania nu*

<sup>11</sup> Nuwá wéarmatai iwiarsamu wáinin suntarsha péprunam wéar Israer-patri úuntrin ashí túrunamun ujakarmiayi. <sup>12</sup> Niisha nuna antukar Israer-shuara úuntriíjiaí áujmatsatai tusar wearmiayi. Áujmatsar suntaran ti kuít akikiar <sup>13</sup> tiarmiayi “Atumsha étserkuram “Kashi kanararin ni unuiniamurí taar Jesusa ayashin kasamkarmai” titiarum. <sup>14</sup> Tura akupin átum kanarman nekamtaisha níijiaí ii iwiarattaji atumin yajauch awajtamsain tusar” tiarmiayi.

<sup>15</sup> Nuyá suntarsha kuítian achikiar tiarmia nuna tímiatrusan titiái tusar wéarmiayi. Tura tuke yamaisha Israer-shuar tu túrunaiti tuíniawai.

*Jesus ni unuiniamurín akatar akupkamiania nu  
(Márkus 16.14-18; Rúkas 24.36-49; Juan 20.19-23)*

<sup>16</sup> Nuyá ni auntse (11) unuiniamurí Kariréanam wéarmiayi. Tura Jesus timia nú nainnium jeawar <sup>17</sup> nuí Jesusan wáinkiar tikishmatrarmiayi. Kame chíkichka Jesusashit tuíniayat Nin wáinkiar tikishmatrarmiayi. <sup>18</sup> Nuyá Jesus tíjiuch tantá tímiayi “Ashí nayaimpinmasha nunkasha akupkatniun kakarman surusuiti. <sup>19</sup> Tuma asamtai ashí nunkanam werum ashí shuar jintintiarum Wí shuar awajsatarum. Túrarum Yus Apa náarijiaí, Yus Uchi náarijiaí, tura Yus Wakani náarijiaí imiaitiarum. <sup>20</sup> Ashí atumin Wi akatramajrum nu nútiksarmek umiktin unuiniartarum. Tura ju nekaatarum: Tuke tsawantai ikiutsuk atumjai pujuttajai” tímiayi Jesus.

## Yúsan Shiir Chichamen

### MÁRKUS aarmia nu

#### *Imiakratin Juan̄ka etserkamuri*

*(Mateu 3.1-12; Rúkas 3.1-9, 15-17; Juan̄ 1.19-28)*

<sup>1</sup> Jui Jesukrístunu shiir chicham nánkameawai. Jesukrístu Yusa Uchirínti.

<sup>2</sup> Yuska imiakratin Juan̄kan pachis ni etserniurín Isayasan ti yaunchu ni Papiriin juna áantikramiayi:

“Iisiana, ame wéamurmín emka wetí tusan winia akatramurun akupeajai. Niisha ame jintimin iwiarattawai. <sup>3</sup> Niisha aents atsamunam untsukum juna títiatui: “Unta jinti iwiarturtarum; naka awajsatarum.”

Nuke áarmaiti.

<sup>4</sup> Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim yapajiárum imiantiarum” tímiayi. <sup>5</sup> Anturkatai tusar ashí Jutía nunkanmaya shuar tura Jerusarén peprunmaya shuarsha Niin tariarmiayi. Taar, ni tunaarín ujakarmatai, Juan̄ Jurtañ entsanam imiainiarmiayi.

<sup>6</sup> Juansha kamiriu ure najantramun entsauyayi. Emenmamkesha nuapeyayi. Tura chinijiai yutai-títikriatsnasha yuuyayi. <sup>7</sup> Niisha áentsun ujaak tímiayi “Wíjiainkia nankaamas ana nu winia ukuruj winittiwai. Niisha nekas ii Uuntri asamtai, wikia tsuntsumpruan ni sapatrj jin̄kiamurinkisha atitrachminiaitjai. <sup>8</sup> Wikia entsajain̄ aya ayashmin imiaajrume, antsu Niñkia imiantinia áanis Yusa Wakan̄i atum̄i enentáin̄ enketramprattarme” tímiayi.

#### *Juan̄ Jesusan imiaimiania nu*

*(Mateu 3.13-17; Rúkas 3.21-22)*

<sup>9</sup> Juan̄ áentsun imiak pujurainiai, Jesuska Nasarét pepru Kariréa nunkanam ana nuyá jiinki Juan̄kan tarimiayi. Tura Juan̄ Jurtañ entsanam Jesusan imiaimiayi. <sup>10</sup> Nuin̄, Jesus entsaya jiiniuk, nayaimpin uranniun wáinkiamiayi. Tura Yusa Wakan̄in̄ yámpitsa núnin najanar Niin taarun wáinkiamiayi. <sup>11</sup> Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

#### *Uunt iwianch Jesusan anankataj tímiania nu*

*(Mateu 4.1-11; Rúkas 4.1-13)*

<sup>12</sup> Nuyá wárik Yusa Wakan̄i Jesusan atsamunam jukimiayi. <sup>13</sup> Tura nuj, yajasma yujamunam, kuarenta tsawant pujumiayi. Nūi pujai uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatái tusar nayaimpinmaya suntar tariarmiayi.

#### *Kariréa nunkanam ni takatrín Jesus nan̄kammiania nu*

*(Mateu 4.12-17; Rúkas 4.14-15)*

<sup>14</sup> Ukunam, Juan̄kan sepunam enkeawarmatai, Jesuska Kariréa nunkanam Yusa akupeamurín pachis shiir chichaman etserki támiayi. <sup>15</sup> “Tsawant jeayi. Shuarnum Yusa akupeamur̄i jeatemai. Tuma asamtai, yaunchu enentáimsamuram yapajiárum, Uwempratin Chicham umirkatarum” tu etserkamiayi.

#### *Jesus namakan achinian ni unuiniamur̄i ajasat tusa kuaru achikmiania nu*

*(Mateu 4.18-22; Rúkas 5.1-11)*

<sup>16</sup> Jesus Kariréa antumian̄ka kánmatkar̄in̄ wekas, namakan achinian Semunnasha ni yachi Antresnasha nekan ajuntuk pujuinian wáinkiamiayi. <sup>17</sup> Wáiniak “Nemartustarum,

tímiayi. Namak achiarmena nútiksanak áentsun-əəu Yusna arti tusan awajsatjarme” tímiayi. <sup>18</sup> Tura nuyanka ni nekarin ajapa ikiuiniak Jesusan nemarsarmiayi.

<sup>19</sup> Nuyasha Jesus ishichik arantach wesa, Sepetéu uchirin Jakupun ni yachin Juánasha kanunam ni nekarin apaa pujuinian wáinkarmiayi. <sup>20</sup> Wáiniak, nemartusta tusa untsukarmiayi. Tutai ni aparincha, ni aparí takarniurincha kanunam ikiuiniak Jesusan nemarsarmiayi.

*Jesus iwianchin áishmannumia jiki akupkamiania nu*  
(Rúkas 4.31-37)

<sup>21</sup> Nuyá Kapernáum péprunam jeawarmiayi. Nui Israer-shuara ayampratin tsawantri jeakui Jesus Israer-shuar iruntainiam wayá Yus-Chichaman unuiniamiayi. <sup>22</sup> Tura ni jintinniuri jintintiarmlia nuna iniankas uunt chichamjai Jesus jintiakui ni chichamen anturkar ti enentáimprarmiayi. <sup>23</sup> Nuisha nu iruntainiam áishman iwianchraku ámiayi. Niisha untsumuk <sup>24</sup> “¿Warí itiurtamkattsamea incha taum, Nasarétnumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

<sup>25</sup> Tutai, Jesus kakantar chicharuk “Takamátsatá. Ni enentáiya jíinkitia, tájame” tímiayi.

<sup>26</sup> Tutai iwianch áishman kan ukurak ajakniñkiar untsamak kakaar aa jíinkimiayi. <sup>27</sup> Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Lisiana umirainiatsuk” tiarmiayi. <sup>28</sup> Tura ti wárik nu túrunamu ashí Kariréa nunkanam antunkamiayi.

*Jesus Semunka tsatsarin tsuármiania nu*  
(Mateu 8.14-15; Rúkas 4.38-39)

<sup>29</sup> Nuyá Israer-shuara iruntai jeenia jinki Jesuska Jakupujai Juanjaisha we, Semun ni yachi Antresjai pujuarmia nu jeawarmiayi. <sup>30</sup> Semunka tsatsari tsuer peaknum jaa tepemiayi. Núnaka wárik Jesusan ujakarmiayi. <sup>31</sup> Nuñkia Jesus werí uwejnun achik iniantkimiayi. Tura nu chichamaik michatramiayi. Michatar, péñker ajas, Jesusnasha ni nemarniurincha ayurawarmiayi.

*Untsurí jaan Jesus péñker awajсарmiania nu*  
(Mateu 8.16-17; Rúkas 4.40-41)

<sup>32</sup> Nu tsawantai kiarai, ashí jáinian, iwianchrakuncha Jesusan itiararmiayi. <sup>33</sup> Tura ashí nú péprunmaya shuar taar wáitiniam Jesusan káutkarmiayi. <sup>34</sup> Untsurí shuáran chíkich sunkuraim jáinian Jesus tsuararmiayi. Tura iwianchraku armia nuna enentáiyán iwianchin jirkarmiayi. Jesuska iwianch nékamu asa, winia náarun ántar pachisarañ tusa suritkarmiayi.

*Kariréa nunkanam Jesus Yus-Chichaman etserkamiania nu*  
(Rúkas 4.42-44)

<sup>35</sup> Nuyá kashin káshik tsawaatsain Jesus nantaki Yúsan áujсатаj tusa jinki atsamunam wémiayi. <sup>36</sup> Tura Semun ni amikrijjai Jesus wemaanum wéarmiayi. <sup>37</sup> Nin wáinkiar “Ashi shuar Ámin eatmainiawai” tiarmiayi.

<sup>38</sup> Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túratsan táwitjai” tímiayi.

<sup>39</sup> Nuna ti ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiki akupkini wekaimiayi.

*Tunamaru shuaran Jesus tsuármiania nu*  
(Mateu 8.1-4; Rúkas 5.12-16)

<sup>40</sup> Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmeke tsuaratin tujintratsme.”

41 Jesus nin waitnentak uwejejai antinmiayi. Antin “Wakerajme. Péñker ajasta” tímiayi. 42 Nu chichamaik, Jesus chichakmatai, ni sunkurí menkakamiayi. Tura péñker ajasmiai. 43 Túrunamtai Jesus kakantar chicharuk 44 akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi. 45 Tura etserkaip támaitiat, jiinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

## 2

### *Jesus emearun péñker awajsamiania nu (Mateu 9.1-8; Rúkas 5.17-26)*

1 Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi. 2 Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. 3 Nuinka ni amikrin emearun kuaru shuar tampumpuru-awar júkiar Jesusan itiararmiayi. 4 Tura jeawar, untsurí shuar írunu ásamtai jea wayatniun tujinkiararmiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awaintiuawar itiararmiayi. 5 Tura niisha Jesus nekas tsuártatui tu enentáimmiarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

6 Israer-shuara jintinniurisha nuna antúu pujuarmiayi. Tura ni enentáijiai enentáimsar, 7 “¿Júsha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

8 Jesuska ni enentáimmiarin nekarawar “¿Urukamtia átum tu enentáimprum? tímiayi. 9 Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit? 10 Wats wi, Aents Ajasu asan Yusa kakarmarijiai shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk 11 “Wajaktia, tájame; túram tampuram jukim jéemijn wetá” tímiayi. 12 Nu chichamaik emearu wajaki, tampurin jukí, ashí ímiainiaijn jíinkimiayi.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarin uunt awajsarmiayi.

### *Jesus Riwin untsukmiania nu (Mateu 9.9-13; Rúkas 5.27-32)*

13 Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi. 14 Tura jintintiawar amuk, akupin akitiai jeanam nankaamak, Arpeu uchirin Riwin pujan wáinkiamiayi. Wáiniak “Nemartusta” tímiayi. Tutai Riwi wajaki Jesusan nemarsamiayi. 15 Chikich tsawant, Riwisha Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjai ni unuiniamurijiaisha ashí nuim misanam pujuarmiai. 16 Tura kuítian-juu shuarsha yajauch shuarsha Jesusjai irunar yurumáinian wáinkiar, Pariséu jintinniurisha Israer-shuara jintinniurisha Jesusa unuiniamurin aniasarmiayi. “¿Urukamtai ame úntrum Jesus, kuítian-juu shuarjai tura yajauch shuarjaisha yuruma?” tiarmiayi.

17 Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “péñkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

*Yurumtsuk Yus áujSATniun Jesusan aniasarmiania nu  
(Mateu 9.14-17; Rúkas 5.33-39)*

<sup>18</sup> Juanka unuiniamurisha Pariséu unuiniamurisha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juanka unuiniamurisha, Pariséu unuiniamurisha yurumtsuk Yúsan áujainiatsuk; ¿ame unuiniamurmeka urukantai yurumtsuk áujainiatsu?” tiarmiayi.

<sup>19</sup> Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikri warainiak ijiarmachartin ainiawai. Núnisan winia unuiniamur, Wi pujakui, warainiak yurumtsuk pujuschartin áiniawai. <sup>20</sup> Tura tsawant jeattawai, Winia jurukiartin. Nuinkia winia unuiniamur ijiarmawartatui’ tímiayi Jesus.

<sup>21</sup> Tura nuyá juna tímiayi ‘Mamuru pushí jaanakmatai yamaram tarach anujtukchatniuti. Túramka nijiam yamaram tarach sumpeak mamushan chinikiá nuna nankaamas jáaktatui. <sup>22</sup> Nijiamanch yamáí nawar nuap najanamu arutnum yaraachminiaiiti. Túramka wakaprua kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

*Trikiu nerēn yuawarmiania nu  
(Mateu 12.1-8; Rúkas 6.1-5)*

<sup>23</sup> Chíkich ayampratin tsawantaj Jesus ajanman ajapén nankaamarmiayi. Tura ni unuiniamuri trikiu nerēn majukiar wearmiayi. <sup>24</sup> Nuna wáinkiar Pariséu Jesusan chicharainiak “¿Warí, urukantai ame unuiniamuram ayampratin tsawant takastin surimkiamu aisha takainia?” tiarmiayi.

<sup>25</sup> Tutai Jesus tímiayi “Ii uuntri Tawitia túramuri Yús-Papinium áujSachukaitrum. Niisha ni nemarniurisha tsukamainiak, ni yurumkari atsakui, túrawarmia nu áujSachukaitrum.

<sup>26</sup> Apatár Yusnan pujurniu uuntri pujaj Uunt Tawit Yusa Jeēn wayamiayi. Tura Tawitkia, patri nankaamas uunt asa, pátrichuiat, iniaktusma tantan, aya patri yútainiak, yuamiayi; tura ni nemarniurincha ajamsamiayi. Nu áujSachukaitrum, tímiayi.

<sup>27</sup> Ayampratin tsawantaj túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. <sup>28</sup> Wisha, Aents Ajasu asan imia ayampratin tsawantan Nerenniurintjai” tímiayi.

### 3

*Uweje jakan Jesus tsuármiania nu  
(Mateu 12.9-14; Rúkas 6.6-11)*

<sup>1</sup> Ataksha chíkich tsawantaj Israer-shuar iruntainiam Jesus wayamiayi. Nui shuar ámiayi, ni uweje jaka. <sup>2</sup> Tura tunáan túrayi titiai tusar wakeruiniak “ayampratin tsawantaj tsuártimpiash” tusar, Pariséu shuarsha Jesusan ii pujuriarmiayi. <sup>3</sup> Nuinkia Jesus uweje jaka shuaran chicharuk “Ajapén wajasta” tímiayi. <sup>4</sup> Nuinkia mamikmaun chicharuk “¿Ayampratin tsawantaj péñker túratin yajauch túratniujaj tuá imiá péñkerait. Shuar uwemtikratin máatniujaj tuá imiá péñkerait?” tímiayi.

Nuna takui niisha pachischarmiayi.

<sup>5</sup> Tura Jesus kajak nin íyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmasmatai ni uweje jaruku ataksha péñker ajatsamiayi. <sup>6</sup> Nuyá Pariséu shuar jíinkiar, Jesus maami tusar Erutis shuarjaj áujmatsarmiayi.

*Untsurí shuar Jesusan káutkarmiania nu*

<sup>7</sup> Nuyá Jesus ni unuiniamurijaj antumiannum wémiayi. Kariréa nunkanmaya untsurí shuarsha Jesusan nemariarmiayi. <sup>8</sup> Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itiumía nunkanmayasha, Jurtan entsa

amainiasha, Tiru tura Setuṅ pepru pujuinia nú nunḱanmayasha, untsurí shuar ni túramurṅ nekaawar, Jesusan káutkarmiayi. <sup>9</sup>Untsurí káunḱar chanuntawaraiṅ tusa Jesus ni unuiniamurṅ kanuram inianáastarum tusa seamiayi. <sup>10</sup>Kame untsurí shuaran Jesus nuik tsuaru asamtai, jaa shuar nuṅ káunḱarmiania nu Jesusan antintaj tusar shitianainiakui nuna seamiayi. <sup>11</sup>Tura iwianchrūkusha Jesusan wáinkiar tikishmatrarmiayi. Untsumainiak “Ame nekas Yusa Uchirṅme” tiarmiayi. <sup>12</sup>Tura nuna etserkairap tusa Jesuska kakantramiayi.

*Jesus tuse shuaran anaikiarmiania nu  
(Mateu 10.1-4; Rúkas 6.12-16)*

<sup>13</sup>Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi. <sup>14</sup>Tura Niiṅṅai wekasar Yus-Chichaman unuiniartinian tuse shuáran anaikiarmiayi. <sup>15</sup>Tura sunḱur tsuártinian, iwianchcha jṅiki akupkatniun ni kakarmarṅ súarmiayi nú shuaran. <sup>16</sup>Ju shuáran anaikiamu ármiai: Semuṅ, Jesus chíkich naarin Pítur apujtusmiania nu; <sup>17</sup>Sepetéu uchirṅ Jakupu, ni patai Juánsha; ipiamtajai métek kakaram ásmatai nuna mai “Puanérjis” naari susamiayi. Nusha shuar chichamjainḱia “ipiamta nuke” tawai. <sup>18</sup>Nuyá Antressha, Jiripi, Parturumí, Mateu, Tumas, Arpeu uchirṅ Jakupu, Tateu, ásump Semuṅ, <sup>19</sup>Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

*Yusa Wakanṅ yajauch chicharna nu  
(Mateu 12.22-32; Rúkas 11.14-23; 12.10)*

<sup>20</sup>Waketkiarmatai, ti untsurí shuar taarmatai takatrṅ ti akui, yurumátiniun jeacharmiayi. <sup>21</sup>Jesusa shuárisha nuna nekaawar Jesus ti itiurchat pujus wáurtsuash tu enentáimsar jukitai tusar nu jeanam jeariarmiayi.

<sup>22</sup>Nuyá Israer-shuara jintinniurṅ Jerusarénnumiá táarmiania nu, Jesusan áujmatainiak “Pirsepu enkea asa iwianchrūkuiti. Tuma asa uunt iwianchi kakarmarṅṅai iwianchin jṅiki akupeawai” tiarmiayi.

<sup>23</sup>Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiur ajapmamatṅ? <sup>24</sup>Chikichik nú nunḱanmaya shuar nuámtak kajernaiyakuṅḱia, nu nuṅka wari meserchattawak. <sup>25</sup>Nuámtak shuar ni shuarṅṅai kajernaiyakuṅḱia nu shuarsha amunaikchartatuak. <sup>26</sup>Núnisaṅ ¿Satanáskesha ni suntarṅṅai máaniakka itiurak tuke pujusarat? Amunaikiartatui. <sup>27</sup>Nánkamas shuar kakaram shuara jeen wayá, nérenniun jinḱiatsuk ni kuítrṅ kasarkachminiaiti. Antsu nérenniun jinḱiá ni kuítrṅ kasarkamniaiti. <sup>28</sup>Nekas tájarne, shuar tunáa ashí túruiniana nuka tsanḱuramniaiti. Winiasha winia Aparnasha yajauch áujmatasha tsanḱuramniaiti. <sup>29</sup>Antsu Yusa Wakanṅ yajauch áujmatna nuka tsanḱurachminiaiti; antsu nu shuar ninḱi tuke sumamattawai.” <sup>30</sup>“Jesuska iwianchrūkuiti” tuṅniakui Jesus nuní tímiayi.

*Jesusa yachi Jesusa nukurṅ  
(Mateu 12.46-50; Rúkas 5.19-21)*

<sup>31</sup>Nuyá ni yachi ni nukurṅṅai taar aa wajasar, Jesusan untsukat tusa akupkarmiayi. <sup>32</sup>Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

<sup>33</sup>Tutai Jesus chichaak “Ya ainia winia nukursha yatsursha” tímiayi. <sup>34</sup>Nin téntakar pujuarmia nuna iis “Júiti winia nukurka, yatsurka, tímiayi. <sup>35</sup>Shuar Yusa wakeramurṅ uminiana nu winia yatsuruiti, winia umaruiti, winia nukuruiti” tímiayi.

## 4

*Atsaamin atsaampramiania nu  
(Mateu 13.1-9; Rúkas 8.4-8)*

1 Nuyá jiinki antumianka yantamen Jesus ataksha unuiniartinian juarkimiayi. Tura untsurí shuar iruntrarmatai, kanunam enkempramiayi. Shuarsha antumianka káanmatkarin pujuarmiayi. 2 Jesuska métek-taku chichamjai ti jintintiarmiayi. Jintintiuk juna tímiayi: 3 “Antuktarum. Atsaamin atsaamprataj tusa jíinkimiai. 4 Atsaamkui ni arakri jintiá iniararmai. Chínki yakiyá káutkar yuawarmai. 5 Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai. 6 Tura etsa etsantar sukuám kancape atsá asamtai káararmai. 7 Chikichcha janí nupanam iniararmai. Janísha tsapainiar kankar ajakrarmai; túram nereckarmai. 8 Chikichcha pénger nunkanam iniararmai. Tura tsapainiar nereckarmai, chíkich trainta, chíkich sesenta, chíkich siañ nereckarmai. 9 Kuíshim ákuinkia antuktarum” tímiayi.

*(Mateu 13.10-17; Rúkas 8.9-10)*

10 Untsurí wearmatai, ishichik Níijiai juakarmiania nu, ni tuse unuiniamurijiai aniasarmiayi “¿Ame jintintiamna nusha warimpiait?” tiarmiayi.

11 Tutai Jesus chichaak “Yuska ni akupeamurin atumin paant nekamtikramattsa wakerutmarme. Antsu chíkich shuarka aya métek-taku chichamjai jintintiáwartatui.

12 Íniayatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai’ tímiayi.

*(Mateu 13.18-23; Rúkas 8.11-15)*

13 Tura tímiayi ‘Wi jintintiajrumna nú métek-taku chicham nekaachurmek. Nu nékachkurmeka ¿itiurak chíkich métek-taku chichamsha nekaatarum? 14 Atsaamniua nuka Yus-Chichaman étserna nuna nakumui. 15 Jínkiái jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampramun jurawai. 16 Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. 17 Tura ni kancape atsakui, aya ishichik katsuiniawai. Tura ukunam, Yus-Chichaman wakeruiniakuí shuar kajeram tura chíkich itiurchatan wáinkiar Yúsaiya kanainiawai. 18 Chíkich ántuiniamuka janí nupanam atsaampramua núniskete. Nu shuar Yus-Chichaman ántuiniawai. 19 Ántuiniayat ju nunkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kankar emenkatui. Tuma asamtai nerektinian tujintiainiawai. 20 Tura chíkich ántuiniamusha pénger núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar siañsha nerenawai.’

*Uukma ana nu paant nekanattawai*

*(Rúkas 8.16-18)*

21 Nuyá Jesus juna tímiayi ‘¿Shuar shiripkin ekeemak itia pitiaknum enkeattawak. Peaknum wakenam ikiustatuak? Atsá. Antsu misanam ekentsashtinkiait. 22 Núnisañ ashí uukma ana nu ukunam paant nekanattawai. Tura núnisañ yamá ishishmasa chichasmasha ukunam paant nekanattawai. 23 Kuíshim ákuinkia antuktarum.’ 24 Tura nuyá tímiayi ‘Ántarmena nu esetrarum enentáimsarum antuktarum. Urutá péngerak enentáimsatarum, núnisañ Yuska ámin nekaatniun suramsattarme, tura nú núkap patatramsattarme. 25 Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiawai.’

*Yusa akupeamuri júnisaiti*

26 Nuyá Jesus chichaak juna tímiayi ‘Yusa akupeamuri júnisaiti. Shuar jínkiain atsaampratniua núniskete. 27 Jínkiáin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui. 28 Kame jínkiái nunkanam init aku níngi

tsapaatsuk; emka nukareawai, nuyá tuyureawai tura nujamar katsuawai. <sup>29</sup> Túruna káakmatai júuktin tsawant jeayi tusar júniawai.’

*(Mateu 13.31-32; Rúkas 13.18-19)*

<sup>30</sup> Ataksha Jesus tímiayi ‘¿Yusa akupeamuri warijaink’ nakumkataj. Warijaink’ métek-takuit? <sup>31</sup> Mustasa jinkiaí araamua nujai métek-takuiti. Nu jinkiaisha ashí nankaamas ishitiupchichiti. <sup>32</sup> Tura araam tsapái ashí nankaamas uunt ajawai; tura tsenkeakmarisha kámpuram asamtai nuj mikintranam chinakisha shiir ayamainiawai.”

*(Mateu 13.34-35)*

<sup>33</sup> Núnisan Jesus untsurí métek-taku chichamjai Yus-Chichaman ujaamiayi. Nii nekaatniun jearmia nunak ujaamiayi. <sup>34</sup> Chíkich shuaran aya métek-taku chichamjai ujaamiayi; antsu ni unuiniamurijai Nínki pujus ashí paant jintintrarmiayi.

*Nasencha, entsanacha Jesus imijiánmia nu*

*(Mateu 8.23-27; Rúkas 8.22-25)*

<sup>35</sup> Nu tsawantai etsa akaikimtai Jesus ni unuiniamurin chicharainiak “Entsa amain katintai” tímiayi. <sup>36</sup> Tutai kanunam enkemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi. <sup>37</sup> Tura nasesha ti nasenkatasa nankammiayi; chíchimi kanunam yaráná piáktasa ajamiayi. <sup>38</sup> Jesuska kanú senkarin atamprus kanú tepemiayi. Tura, ni unuiniamurí Jesusan ishintiak chicharuk “Uunta ii wayajnia júka pachitmatsmek” tiarmiayi.

<sup>39</sup> Tutai Jesus nantaki nasen kakantramiayi. Entsanacha chicharuk “Takamatsata. Miaku ajasta” tímiayi. Tutai nasesha menkakamiayi, entsasha miaaku ajasmiai. <sup>40</sup> Túrnamtai Jesus ni unuiniamurin chicharainiak “¿Urukamtai ashamarum? Itiura Yus nekas enentáimtatsrum” tímiayi. <sup>41</sup> Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

## 5

*Jataranmayan iwianchrukun Jesus tsuármiania nu*

*(Mateu 8.28-34; Rúkas 8.26-39)*

<sup>1</sup> Nuyá antumian amaini Jatara nunkanam jeawarmiayi. <sup>2</sup> Jesus kanunmaya jinkimtai áishman iwianchruku, shuar jakáa iwiartainiumiá wárik taa Jesusan inkiunmiayi. <sup>3</sup> Nu shuar iwiartainium tuke pujuyayi. Tura jirujainkia nin jinkiaatniun tujinkiarimiayi. <sup>4</sup> Jirujai nawenmasha, uwejnusha tuke jinkiau árimiayi. Túramaitiat jinkiaarman tsuriar tepet-tepet awajmiayi. Tura ti kakaram asamtai nin nupetkachminiuyayi. <sup>5</sup> Tuke tsawaisha káshisha, iwiartainiumsha murasha kayajai ijiumak untsumuu wekainiuyayi. <sup>6</sup> Tura yajayan wáiniak Jesusan tseke tarimiayi; tura tikishmatramiayi. <sup>7-8</sup> Túrnamtai Jesus chicharuk “Iwianchiá, ni enentáiya jinkitia, tájame” tímiayi.

Takui iwianch kakantar chichaak “¿Winiasha urukamtai tarutnium, Uunt Nankaamaku Yusa Uchiri Jesúsá? Yus iirmanum wáitkiarsaip, tájame” tímiayi.

<sup>9</sup> Takui Jesus tímiayi “¿Ame náarmesha yait?”

Tutai niisha ayak “Untsurí ásar wikia Untsurí-suntar tu anaikiamuitjai” tímiayi.

<sup>10</sup> Nuna ti amik, nu nunkanmaya akuptukain tusa Jesusan ti seamiayi. <sup>11</sup> Nuisha nainnium nuntumas untsurí kuchi shushunmak matsamarmiayi. <sup>12</sup> Tuma asamtai, kuchiniam enkemátin tsankatrukta tusar Jesusan seawarmiayi.

<sup>13</sup> Tuiniakui Jesus “ayu” tímiayi. Takui iwianch áishman kainiá jinkiar kuchiniam enkemáwarmiayi. Kuchisha ti untsurí, jimiará mir (2.000) áchiawash. Ashí mash nánatanam iniaawar antumianum iniankarmiayi. Nuisha entsá kiar jakerarmiayi.

<sup>14</sup> Túrnamtai kuchin wáinin pisarar péprunmasha shuarnumsha nuna etserarmiayi. Tuma asamtai iyutai tusar ashintiukarmiayi. <sup>15</sup> Túrawar Jesusai jeawarmiayi.



Jeawar áishman yaunchu iwianchrukun yamaikia péñker ajasun pushirín entsar pu-jan wáinkiar miyai. Wáinkiar ashankarmiayi. <sup>16</sup> Tura waketkiar kuchi túrunamuncha iwianchruku péñker ajasmancha mash etserkarmiayi. <sup>17</sup> Tuma asamtai ni nunkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk <sup>18</sup> “Wi Ámijiai tuke tsanínkian wekasatjai” tímiayi.

<sup>19</sup> Tura núnaka Jesus suritkiamiayi. “Antsu ame jeemiin, áminiurmiin weme, ashí Uunt Yus túrutma nu tura waitnentrampa nusha ujakarta” tímiayi.

<sup>20</sup> Tutai áishmansha wémiayi. Tura antsu Tekapuris nunkanam Jesus nin péñker awajsamia nuna ashí shuaran ujakmiayi. Nu nunkanmayá shuarka nuna antukar ti enentáimprarmiayi.

*Jimiará jaan Jesus tsuármiania nu  
(Mateu 9.18-26; Rúkas 8.40-56)*

<sup>21</sup> Ataksha Jesus kanujai katinmatai, aents untsurí Nin irunturarmiayi. Jesuska antumianka káanmatkari wajamiayi. <sup>22</sup> Tura Israer-shuar iruntai jea náampruku, ni naari Jairu, támiayi. Taa, Jesusan wáiniak, piniakum tepersamiayi. <sup>23</sup> Piniakumar ti seak, “Winia nawantur jarutui. Winitia, túram péñker ajasat tusam uwejmijiai antintrukta. Nuiñkia jarutkashtatui” tímiayi.

<sup>24</sup> Tu tímiatai Jesus niijiai wémiayi. Tura untsurí shuar wena ásar Nin chánuarmiayi.

<sup>25</sup> Nui pachitkia nuwa ti jaa wémiayi. Niisha tuse uwí numpan ajapeak wáitias pujuyayi. <sup>26</sup> Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítríncha ashí ajapaitiat tsuámarchauyayi; antsu tsuamsha nu arant ajauyayi. <sup>27</sup> Nu nuwasha, Jesus túramun antuku asa, ni ukuurini amainian ni pushirín antinmiayi. <sup>28</sup> “Wi aya ni pushirín antinnaka péñkerapi ajasaintjia” tu enentáimiar túramiayi. <sup>29</sup> Tura Jesusa pushirín antin nú chichamaik numpa ájapman menkakamiayi. Péñker ajasman ayashin nekapramiayi. <sup>30</sup> Tura nuin Jesuska, ni kakarmarijiai tsuarman nekapmampramiayi. Tura nuna nekáa, ayantar chichaak “¿Yaki winia pushirun antintruka?” tímiayi.

<sup>31</sup> Tutai ni unuiniamuri tiarmiayi, “Untsurí Ámin antinmainiasha ¿urukamtai “yaki winia antintkia” tame?”

<sup>32</sup> Tura Jesus, yaki túruta tusa ashí ímpramiayi. <sup>33</sup> Nuiñkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurín ashí paant ujakmiayi. <sup>34</sup> Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

<sup>35</sup> Tura Jesus nuna tuke chichas pujai, iruntai jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

<sup>36</sup> Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata’ tímiayi. <sup>37</sup> Tura Niijiai wétinian aya Pítruncha, Jakupuncha ni yachi Juanjai tsankatkarmiayi. <sup>38</sup> Iruntai jea uuntri jeen jeawar, áentsun charaatum ajainian, úutainian untsukum ajainiancha Jesus wáinkiamiayi. <sup>39</sup> Tura nuwach penké jakan nékayat, wayá nin chicharuk “¿Urukamtai timiá úutrum, tura wa wa ajarum? Nuwach jákachai, antsu kanarai” tímiayi.

<sup>40</sup> Nuna takui wishikrarmiayi. Tura Jesus ashí jiiir akupkarmiayi. Áyatik nuwachí aparín, nukuríncha tura Niijiai táaruncha nuwachí tepamurín jukimiayi. <sup>41</sup> Tura wayawar Jesuska nuwachí uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai. <sup>42</sup> Nuwach tuse uwí takakuya nu, nú chichamaik nantaki wekasamiayi. Túramtai nui pujuarmiania nu ti enentáimprarmiayi.

<sup>43</sup> Jesuska chichaak “Atumsha penké etserkairap’ tímiayi. Tura “nuwäch ayuratarum” tímiayi.

## 6

### *Jesus Nasarétnum pujusma* (Mateu 13.53-58; Rúkas 4.16-30)

<sup>1</sup> Jesus nuyá jiínki ni nunken waketkimiayi. Ni unuiniamurisha nemariarmiayi. <sup>2</sup> Nuisha ayampratin tsawant jeamtaí Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tui unuimiaruit. Ni nekaatniuríncha yaki susait. Tura aentsti tujintiajnía nuna Niisha itiurak tura? <sup>3</sup> Jusha karpintíruchukait; Maríi uchirínchukait. Ni yachisha Jakupusha, Juresha, Jútassha, Semunsha nékatsjik. Tura ni umaisha jui iijjai pujuiniatsuk” tiarmiayi. Túrawar Nin nekas enentáimtustinian tujinkiararmiayi.

<sup>4</sup> Túrasha Jesus nin chicharuk “Yúsnan etserniun chíkich nunkanmayanka shiir anturainiawai. Antsu ní nunkeyanka, ní shuarsha anturainiatsui” tímiayi.

<sup>5</sup> Tura nuisha, ni nunkenkikía aentsti tujintiamun túratniun tujinkiamiayi. Antsu jaancha aya ishichik ni uwejejai antiñ tsuármiayi. <sup>6</sup> Tura nekas enentáimtacham “¿urukamtaí nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

### *Yus-Chicham etserkatarum tusa Jesus ni unuiniamurín akupkarmiania nu* (Mateu 10.5-15; Rúkas 9.1-6)

<sup>7</sup> Tuse unuiniamurín untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarín súsarmiayi. <sup>8</sup> Tura chicharuk “Jintiá yurumátniusha jukiirap, uyuntrumiíncha kuitcha enkearum jukiirap. Antsu aya áanik mashtun jukiirum wetarum. <sup>9</sup> Sapat uwekatarum, tura entsartincha jímiar jukiirap, tímiayi. <sup>10</sup> Tura jea wayarmena nuín pujustarum; pujá-pujakuarum nuyá chíkich peprunmasha wetarum. <sup>11</sup> Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtaí, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

<sup>12</sup> Nuyá Jesusa unuiniamurí jíinkiar enentái yapajjar Yúsai enentáimtumartinian etserkarmiayi. <sup>13</sup> Tura iwianchruku enentáiyá iwianchin jíirki akupkarmiayi, tura asutijjai yakarar untsurí jáinian tsuararmiayi.

### *Juanka jakamuri* (Mateu 14.1-12; Rúkas 9.7-9)

<sup>14</sup> Jesusa náarin tura ni túramurín ashí aents áujmatin ásarmataí, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi. <sup>15</sup> Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi. <sup>16</sup> Erutis nuna antuk “Nekas Juánkaiti. Ni muuken tsupiktinian akupkamiaj nu, jakamunmaya nantakniuiti” tímiayi. <sup>17-19</sup> Kame Uunt akupin Erutis, ni yachi Jiripi nuarín nuatkamiayi. Nu nuwá naari Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasha uunt akupin Erutis nuna surimkamiayi. Antsu Juan achikrum sepunam enkeatarum tusa akupkamiayi. <sup>20</sup> Juansha tuke enentáijjai Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías

wakeramurin túrawain tusa suritkiamiayi. Kame Erutis Juan étserman nékachuitiat antuktinian wakerimiayi.

<sup>21</sup> Jirutías, itiurak máawaj tu pujai, uunt akupin Erutis, ni akiiniamu tsawantri jeamtai, ni suntarincha, Kariréa nunkanmaya úuntrincha, kuítrintin armia nunasha untsukar, namperan najanamiayi. <sup>22</sup> Nuisha Jirutíasa nawantri wayá jantsemámtai Erutis tura nijjai nampernum matsarmia nusha shiir enentáimsarmiayi. Túramtai uunt akupin nuwachin chicharuk “Ame wakeram nu seattia. Wi amastatjai. <sup>23</sup> Nekas tájame, ashí ame seatmena núnaka amastatjai. Wats, seatkumninkia takakjana nuna jímiapetek nakakan, amastatjai” tímiayi.

<sup>24</sup> Tutai nuwach jiinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juanka muuke seata” tímiayi.

<sup>25</sup> Nu chichamaik nuwach wari wayá Erutisan chicharuk “Yamaikia uunt amamkunam Juanka muuken wakerajai” tímiayi.

<sup>26</sup> Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi. <sup>27</sup> Tuma asa uunt akupin Juanka muuke itiata tusa ni suntarin wárikmas akupkamiayi. <sup>28</sup> Túramtai suntar wari we, sepunam Juanka muuken tsupikmiayi. Tsupik, amamkunam itia, nuwan susamiayi. Túram achik ni nukurín susamiayi. <sup>29</sup> Juan maamun antukar ni unuiniamuri ni ayashin iwarsatai tusar júkiarmiayi.

*Senku mir áishmankan Jesus ayuramiania nu  
(Mateu 14.13-21; Rúkas 9.10-17; Juan 6.1-14)*

<sup>30</sup> Tura Jesusa unuiniamuri Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniararmia nunasha ujakarmiayi. <sup>31</sup> Tura untsurí shuar táiniakui, niisha ankant ajastinniasha yurumátniuncha tujinkiararmiayi. Tuma asamtai Jesus chichaak “Iijiai wemí aents atsuiniamunam; nui ishichik ayamprarmi” tímiayi. <sup>32</sup> Nuyá Jesus ni unuiniamurijiai kanunam enkemprar, aents atsuiniamunam jeatai tusar jinkiararmiayi. <sup>33</sup> Túrasha shuar ni wéenan wáinkiararmiayi. Tura “Jesusaiti” tiarmiayi. Tuma ásar ashí péprunmaya untsurí shuar tseke ashintiukar, ni jeatniunam nákakarmiayi. <sup>34</sup> Jesus kanunmaya jiinki ti untsurí aents iruntrar matsatun wáinkiamiayi. Murik pénger wáinchataiya núnisan matsatu ásarmatai Jesus nin wáitnentrarmiayi. Tura núkap unuiniararmiayi. <sup>35</sup> Nuyá kjakui ni unuiniamuri Jesusan tariar chicharainiak “Atsamunam pujatsjik; tura yamá kíatsuk. <sup>36</sup> Shuar wari akupkarta. Tíjiuch péprunmasha, shuarnumsha wearti, ni yurumkari sumarmakarati” tiarmiayi.

<sup>37</sup> Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sian kuitjai yurumak sumaktai tusar wétinkiaitai?” tiarmiayi.

<sup>38</sup> Tura Jesus ni unuiniamurín chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

<sup>39</sup> Tutai Jesus tímiayi “Ju shuar chírichriniam pujusarti tusar akupkatarum.” <sup>40</sup> Ankant ankant sian siansha, senkuenta senkuenta iruntrar matsamsarmiayi. <sup>41</sup> Jesuska senku tantancha, jímiar namaknasha jusa, yakí nayaimpinmaaní íimias Yúsan yu-minsamiayi. Tura yurumkan púurmiayi. Puur ni unuiniamurín súsarmiayi. Namaknasha puur súsarmiayi, ashí shúaran ajamsarat tusa. <sup>42</sup> Ashí yurumáwar ejemararmatai, <sup>43</sup> puunaruncha, namak ampirmancha achikiar, tuse chañkinian áimkiar júkiarmiayi. <sup>44</sup> Nu yurumkan ti untsurí yurumáwarmiayi. Aya áishmankak senku mir (5.000) ármiai.

*Jesus entsá pátatek wekasamiania nu  
(Mateu 14.22-27; Juan 6.16-21)*

<sup>45</sup> Nuyá Jesus ni unuiniamur<sub>in</sub> chicharainiak “Kanunam enkemprarum, kati<sub>n</sub>krum amain émaa ajatarum, Petsaitia péprunam. Wisha ju shuaran áuj<sub>s</sub>an ikiuktiatjai” tímiayi.

<sup>46</sup> Shuáran áuj<sub>s</sub>an ikiuki Yus<sub>j</sub>ai chichastaj tusa náinnium wémiayi.

<sup>47</sup> Tura kirit ajasmanum kánuka antumiannum ajapén nanammiayi. Jesuska nin<sub>ki</sub> juakmiayi. <sup>48</sup> Jesusa unuiniamur<sub>isha</sub> wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nan<sub>ka</sub>amaktiasa wea núnisan<sub>n</sub> wémiayi. <sup>49</sup> Jesus entsá wekaan ni unuiniamur<sub>i</sub> wáinkiar, wakanchashit, tu enentáimprarmiayi. Túrawar ti unsumkarmiayi. <sup>50</sup> Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitjai Jesus; ashamprukairap” tímiayi. <sup>51-52</sup> Nu<sub>n</sub>kia entsaya kanunam waka enkempramiayi. Túramtai nasesha majaantmiayi. Ni unuiniamur<sub>inkia</sub> enentá<sub>i</sub> kiritia áintsan<sub>n</sub> ásarmatai Jesus yurumkan núkap awajsamia nuna paant nekaatniun tuke tujinkiar<sub>miayi</sub>. Tuma ásar yamá<sub>i</sub> túrunamu itiurak aankia tusar ti enentáimprar sapijmiakarmiayi.

*Jinisarít<sub>ni</sub>umi<sub>q</sub> shuáran Jesus tsuármiania nu*  
(Mateu 14.34-36)

<sup>53</sup> Nuyánka kat<sub>in</sub>kiar, Jinisarít nú<sub>n</sub>kanam jeawarmiayi. Jeawar kanun aju<sub>ni</sub>armiayi. <sup>54</sup> Kanunmaya jíntrarmatai, nu nu<sub>n</sub>kanmaya shuar Jesusan nekaawarmiayi. <sup>55</sup> Tura “Jesus pujawai” táman antukar, ashí je<sub>an</sub>maya jaan ni peakrintiuk Jesus pujamunam itiaarmiayi. <sup>56</sup> Tura Jesus wekaak wémia nu<sub>j</sub>sha, péprunmasha, shuar matsatmanumsha, ishichik matsatkamunmasha jaan itiar<sub>iar</sub> jintiá áeprusarmiayi. Túmainiak Jesusan pushirmin anti<sub>n</sub>taj tusar seawarmiayi. Tura ashí anti<sub>n</sub>kiarmia nuka pé<sub>n</sub>ker ajasarmiayi.

## 7

*Jesus Pariséun áujmatsarmiania nu*  
(Mateu 15.1-20)

<sup>1</sup> Pariséusha, Israer-shuara jintinniur<sub>isha</sub> Jerusarénnumi<sub>q</sub> Jesusan tariarmiayi. <sup>2</sup> Tura Jesusa unuiniamur<sub>in</sub> ikijmiatsuk yurumun wáinkiar “Israer-shuara túrutair<sub>in</sub> túruiniatsui” tiarmiayi. <sup>3</sup> (Kame Pariséusha, tura ashí Israer-shuarsha, ni uun<sub>tr</sub>i jintintiamur<sub>in</sub> umikiar ti núkap ikijmiarar yurumin ármiayi. <sup>4</sup> Péprunmaya tari “ikijmiatsuk yurumáshtiniaiti” tiniu ármiayi. Tura ti un<sub>sur</sub>i ni uun<sub>tr</sub>i túrutair<sub>i</sub> núnisan<sub>n</sub> ármiayi. “Tsapancha, ichinnasha, jiruncha, peaknasha nijiakartiniaiti” tiniu ármiayi.) <sup>5</sup> Tuma asantai Pariséusha, Israer-shuara jintinniur<sub>isha</sub> Jesusan chicharainiak “¿Urukamtai ame unuiniamuram ii uun<sub>tr</sub>i jintinramniuitiaj nuna túruiniatsu. Urukamtai ikijmiatskesha yurumáinia?” tiarmiayi.

<sup>6</sup> Tutai Jesus tímiayi “Ántar chichamtiniaitrume. Isayas yaunchu nekas atumin áartampramiayi juna:

Ju aents ni wenej<sub>ai</sub> Winia “ti pé<sub>n</sub>keraiti” turutainiawai, tímiayi Yus, tura ni enentá<sub>in</sub>kia jeachat pujuiniawai. <sup>7</sup> Tura tukeneas Winia shiir awajtuiniawai. Aentsu chichame jintiainiayat, “Yus-Chichamaiti” tu<sub>ni</sub>awai.”

Tu áarmaiti. <sup>8</sup> Tura átum Yusa chichame iniaisarum, aentsu jintintiamur<sub>i</sub> umirkarum, ichinnasha, tsapancha nijiaktin, tura chíkich túrutaisha áintsarmek un<sub>sur</sub>i túrarme. <sup>9</sup> Túrákrum Yus-Chichamka tsukintiaani ikiusurme atumí uun<sub>tr</sub>i chichame umirkatai tusarum. <sup>10</sup> Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni apar<sub>in</sub>, nukur<sub>in</sub>cha yajauch chichareakka, nu shuar jákatniuiti.

11-12 Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáintinian takakjana nu Kurpanaiti” takuinkia, atumsha péñkeraiti, aparíncha nukuríncha yáinchati” tarume. (Kurpan tana nuka, Yus susamu, tawai.)

13 Nekaatarum, Pariséutiram. “Í yaunchu uuntri chichame tuke umiki wétiniaitji” tákurum, Yus-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

14 Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. 15 Aya ayashnium wayaana nu, shuáran yajauch awajsachminiaiti; tura antsu ni enentáiniá jiniia nu, yajauch awajsattawai. 16 Shuar nuna ántakka enentáimprati” tímiayi.

17 Nuyá áentsun ikuiak, jea wayamtai, ni unuiniamuri aniasarmiayi “¿Nu métek-taku chicham warintiua?” tiarmiayi.

18 Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti. 19 Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi. 20 Nuyá tímiayi “Shuara enentáiniá jiniia nu, yajauch awajsamniaiti. 21 Shuara enentáiniá, inia, yajauch enentáimsatniusha, tsanirmatniusha, natsa tsanirmatniusha, shuar máatniusha, 22 kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka inia wininiatsuk. 23 Ashí nu tunáa ainia nu, shuara enentáiniá jiniu asa, shuáran yajauch awajainiawai” tímiayi.

*Serupinísianmaya nuwá Jesusan nekas enentáimtusmiania nu  
(Mateu 15.21-28)*

24 Tiru pepru, Setún péprusha Serupinísia nunkanam ámiayi. Nuka Israer-shuara nunkenchayuyai. Nu nunkanam Jesus wémiayi. Tura jeá, jeá wayáa pujusmiayi. Tura nuj pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. 25 Wárik nu nunkanmaya nuwá Jesus pujan nekaamiayi. Nu núwaka nawantri iwianchrुकuyuyai. Tuma asa Jesusan tarí ni nawen piniakum tepersamiayi. 26 Nu nuwá Israer-shuarcha, Serupinísianmayayuyai. Túmaitiat, nawantru enentáiyá iwianchin jirturkitia tusa Jesusan seamiai. 27 Tutai Jesus nuwan chicharuk “Uchi emka ejemarartí. Uchi apatkuri atankir yawach súsatin péñkerchaiti” tímiayi.

28 Tutai nuwá ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuúniatsuk” tímiayi.

29 Tutai Jesus tímiayi “Péñker tame. Tuma asam, shiir wetá; ame nawantrumi enentáiyá iwianch jinkiyi” tímiayi.

30 Takui niisha wémiayi. Tura ni jeen jeá, ni nawantrin íwianch jinkimtai péñker ajas peaknum tepan wáinkiamiayi.

*Jesus empekun tsuármiania nu*

31 Jesus Tirunmaya jinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi. 32 Nu chichachu ámiayi, kuishin empeku. Nu shuáran Jesusan itiarar, ni uwejejai antinkiat tusar seawarmiayi. 33 Shuar matsatmanumia Jesus nin akanki jukí kuishin tsara uwejejai tsutsukruamiayi. Tura usukia, nu shuara iniain antintkiamiayi. 34 Tura nayaimpinmaani ímias súkaska mayati “Epata” tímiayi. Nuka, shuar chichamnumka “chinkiatí” tawai. 35 Nu chichamaik ni kuishisha chinkiamiayi, iniaisha séermiayi. Tura paant chichasmiayi. 36 Tura Jesus chicharainiak “Penké etserkairap” tímiayi. Jesuska surí-suritiamaitiat, nu nankaamas etseriarmiayi. 37 Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

## 8

*Kuatru mir shuáran Jesus ayuramiania nu  
(Mateu 15.32-39)*

<sup>1</sup> Nu tsawantái shuar timiá untsurí iruntrarmiayi. Yurumkarí atsakui Jesus ni unuiniamurín untsukar juna tímiayi: <sup>2</sup> “Jū shuáran waitnentajai. Menaintiú tsawant Wijíai pujuinia ásarmatai ni yurumkarí amuukachaik. <sup>3</sup> Tura ni jeen ayurtsuk akupeamka, tsukarín jintiá pimpikiartatui, yajaya káunkaru ásar” tímiayi.

<sup>4</sup> Tutai ni unuiniamurí chichainiak “Túrasha jui atsamunam, jū aents ejemarat tusar ¿tuyá yurumkak wáinkiatjaj?” tiarmiayi.

<sup>5</sup> Tutai Jesus nin aniasmiayi “¿Urutmá tanta aa?”  
Tutai “siati awai” tiarmiayi.

<sup>6</sup> Nuinkia ashí áentsun “nunká pujustarum” tiarmiayi. Tura tantan achik, Yúsan yuminsamiayi. Tura puuk, áentsun ajamsatarum tusa ni unuiniamurín susamiayi. <sup>7</sup> Tura uchich namaksha ishichik aan achik, Yúsan yuminkias, ni unuiniamurín chicharuk “Júsha shuar ajamsatarum” tímiayi. <sup>8</sup> Turam ashí yurumáwar ejemarmarmiayi. Ampirma púunaruncha siati chañkinnium áimkiarmiayi. <sup>9</sup> Kuatru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi. <sup>10</sup> Tura ni unuiniamuríjiai kanunam enkemprar Tarmanúta nunkanam wearmiayi.

*Pariséu Jesusan iniakmasta tiarmiania nu  
(Mateu 16.1-4; Rúkas 12.54-56)*

<sup>11</sup> Pariséu Jesusjai áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya kakaram iniakmasta” tiarmiayi.

<sup>12</sup> Tuíniakui Jesus kúntuts enentáimias, súkaska mayati “¿Urukantai, yamaiya aentstiram, nayaimpinmaya kakarman iniakmasat tusarum wakerarum? Nuka penké sunaschat-tarme, paant tájarne” tímiayi.

<sup>13</sup> Nuyá nin ikiukiar ataksha kanunam enkemar amain katiñmiayi.

*Pariséu túramuríjiai aneartarum, tímiayi Jesus  
(Mateu 16.5-12)*

<sup>14</sup> Tura ni unuiniamurí yurumak jukitiai tukamá kajinmatkiarmiayi. Kanunmanka aya chikichik tantanak takaku ármiai. <sup>15</sup> Jesussha ni unuiniamurín enentáimtikiuk tímiayi “Wáinkiatarum; Pariséusha Erutissha wakaprutain takakainia nújajsha aneartarum” tímiayi.

<sup>16</sup> Tutai ni unuiniamurísha tunaiyarmiayi “Tanta kajinmatkin asakrin nuna túramtsujiash” tiarmiayi.

<sup>17</sup> Tura Jesus nuna nekáa chichaak “¿Urukantai aya yurumkak enentáimtarum? Tuke nékatsrumek. Penké enentáimtsurmek. Atumí enentái tuke kiritkai? tímiayi. <sup>18</sup> Jimi ajisha itiura wáintsurmea. Kuíshim ajisha itiura ántatsrum. Ashí kajinmatkintrumek. <sup>19</sup> Nekaatarum, nuik, senku tantan púuran senku mir áishmankan ayurachmakaj. ¿Tura ampirma urutmá chañkinnium chumpiamarum?” tímiayi.

Niisha tiarmiayi “Tuse chañkinnium chumpiamji.”

<sup>20</sup> Ataksha Jesus tímiayi “Tura siati tantajai kuatru mir shuwaran ayuramtai, ¿ampirmasha urutmá chañkinnium chumpiamarum?”

Niisha “siati” tiarmiayi.

<sup>21</sup> Tuma asantai Jesus tímiayi “¿Itiura imiá nékatsrum?”

*Jesus kusurun ímtiksamiania nu*

<sup>22</sup> Nuyá Petsaitia péprunam jeawarmiayi. Jeawarmatai, áishman jii kusurun Jesusan itiararmiayi. Túrawar antinta tusar seawarmiayi. <sup>23</sup> Tuma asantai Jesus uwejnium

achik péprunam aani enkeki jukí j̄in usuk̄ij̄iāi kuérmiayi. Tura uwejēj̄ai antin “¿íimmek?” tímiayi.

<sup>24</sup> Tutai kusuru íimi tímiayi “Aentsun iiyajai, túrasha paantcha. Numi wekainian áaniun iiyajai” tímiayi.

<sup>25</sup> Nuyá ataksha Jesus ni uwejēj̄ai kusuru j̄in antinmiayi. Tura kusurusha úmamkes iis, péñker ajas, ashí paant ímpramiayi. <sup>26</sup> Jesus chichaak “Jeem̄in weakum péprunam wayawaip tura shuar ujakaip” tímiayi.

*Pítur Jesusan “Yusa Anaikiamurinme” tímiania nu*  
(Mateu 16.13-20; Rúkas 9.18-21)

<sup>27</sup> Jesus ni unuiniamur̄ij̄iāi uunt pepru Sesaria-jiripiunam jeatsuk, tíjuch uchich péprunam irasarmiayi. Jintiá wésar Jesus ni unuiniamur̄in chicharainiak, “¿Yaiti turutainiawa Winia?” tímiayi.

<sup>28</sup> Tutai niisha áimkiarmiayi “Chíkich chichainiak, imiakratin Juan̄kaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

<sup>29</sup> Tutai Jesus tímiayi “Atumsha, ¿waritrume. Yáitij?” tímiayi.

Tutai Pítur tímiayi “Ámeka Krístuitme; Yúsaiya akupkamuitme.”

<sup>30</sup> Tutai Jesus chichaak “Peñké etserkairap” tímiayi.

*Jesus ni jákatniur̄in ujakmiania nu*  
(Mateu 16.21-28; Rúkas 9.22-27)

<sup>31</sup> Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntr̄isha, Patri úntr̄isha, ii jintinniur̄isha Winia nakitrurar mantuawartatui. Túrasha menaintiu tsawant nan̄kaasmatai nantaktinaitjai” tímiayi. <sup>32</sup> Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

<sup>33</sup> Tutai Jesus ayantmatar, ni unuiniamur̄in iis, Pítrun kakantar chicharuk “Satanása, werumta. Ámeka Yusna ana nu enentáimtatsme, antsu aya áentsnak enentáimtame” tímiayi. <sup>34</sup> Nuna tuasua amik tura nūi matsamarmia nunasha, ni unuiniamur̄incha untsuk tímiayi, “Shuar Winia nekas nemartustasa wakerakka ni wakeramur̄inkia iniaisati; tura ni krusr̄i yanak̄i nemartustí. <sup>35</sup> Kame shuar ju nun̄kanam aya n̄ink̄i anenmamkun̄ka nu shuar ni iwiaakmar̄in emen̄kaktatui. Antsu Winia anentu asa tura winia chichamprun anea asa, shuar aya péñker pujustinniak enentáimtsuna nu, nekas iwiaakman wáinkiat̄awai. <sup>36</sup> Nekaata, shuar ashí ju nun̄kanam ír̄unna nuna sumaksha túrasha ni wakan̄i jinium wéakuisha, ¿itiurak péñker pujusaint? <sup>37</sup> Shuarka wakan̄in uwemtikrataj tusa wakerak ¿urutmak akikmakaint? <sup>38</sup> Antuktarum. Yamaiya aents Yús̄an nakit̄iar ajapawaru yajauch ainia nu íimiainiamunam shuar Winia natsantrakūink̄ia tura winia chichampruncha natsantakūink̄ia, wi, Aents Ajasuitjiana ju, winia Aparu kakarmar̄ij̄iāi tura nayaimpinmaya péñker suntarjai atak taakun, nú shuaran natsantrattajai Wisha.’ Tu tímiayi Jesus.

## 9

<sup>1</sup> Ataksha Jesus nin chicharuk, ‘Nekas tájarme, shuar játsuk Yus ni kakarmar̄ij̄iāi aentsu enentáin akupkattana nú tsawantan wáinkiertatna nu jūi iij̄iāi pujuiniawai” tímiayi.

*Jesus nusháa iira ajasmiania nu*  
(Mateu 17.1-13; Rúkas 9.28-36)

<sup>2</sup> Nuyá sais tsawant nan̄kaasmatai, Jesus Pítruncha, Jakupuncha, Juán̄nasha uunt náinnium júkiarmiayi. Nūisha Jesus nusháa iira ajasmiai. <sup>3</sup> Ni pushir̄isha ti puju jíitsumir ajattsarmiayi. Nujai métek puju awajsatin ju nun̄kanam atsawai. <sup>4</sup> Túruna nūi Erías, Muisaisjai wantinkiar Jesusjai chichainian wáinkiarimiayi. <sup>5</sup> Nuyasha Pítur Jesusan chicharuk “Uuntá, ii jūi pujustin ti péñkeraiti. Menaintiú áakmaktai, Áminiu chikichik,

Muisaisna chikichik, Eríasnasha chikichik” tímiayi. <sup>6</sup> Jesusa unuiniamurí sapijmainiak, Pítiur wariniak titi nekaachmiayi. Nékachu asa nuna tímiayi.

<sup>7</sup> Tura yurañkim tara mikintiu awajsamiayi. Yurañminmaya chichaak “Júiti winia aneamu Uchir. Nii anturkatarum” tímiayi.

<sup>8</sup> Nuyanka ni unuiniamurí ayantmar iiyaj tukamar aya Jesusnak wáinkiarmiayi. Chíkichkia atsuarmiayi.

<sup>9</sup> Nuyá náinniumiá akainiak Jesus nin chicharuk “Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap” tímiayi.

<sup>10</sup> Tutai ni tímian ímiatrusan úukarmiayi. Tura “jakamunmaya nantaatsain tana nu, ¿wariniak ta?” nuamtak tunainiarmiayi. <sup>11</sup> Tura Jesusan aniasarmiayi “¿Urukamtai Israerti ii jintinniurisha, Erías emka tátiniaiti, tuinia?” tiarmiayi.

<sup>12</sup> Tutai Jesus tímiayi “Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintua?

“Ti wáitsattawai; Nin nakitrartatui.” Tu áarmaiti.

<sup>13</sup> Wi tájarne, Erías nekas táwiti. Támatai, shuar ashí ni wakeriarmia nuna nin túrawarmiayi. Yusa Papiirín Eríasa túrunatniurí aarma amia tímiatrusan túrawarmiayi” tímiayi Jesus.

*Jesus iwianchin jiki akupkamaiania nu  
(Mateu 17.14-21; Rúkas 9.37-43)*

<sup>14</sup> Tura ni unuiniamurí matsatmanum atak wáketuk, ti untsurí aents káutkar Israer-shuara jintinniurisha niijiai tunai pujuinian wáinkiamiayi. <sup>15</sup> Tura aencha, Jesusan wáinkiar wariniak, tsékenki weriar, áujsarmiayi. <sup>16</sup> Túrunawarmatai, Jesus chicharainiak, “Warí tunaiyarum?” tímiayi.

<sup>17</sup> Tutai chikichik ayak “Uuntá, winia uchirun Ámin itiarjame. Iwianchruku asa chichachuiti. <sup>18</sup> Túmakui íwianch enkemtakun paat ajar áepeawai; túram uchisha saun kaput apak najin kátetete awajeawai. Túram kakaakcha ame unuiniamurmin seamjai, jirtukti tusan, túrasha tujintrutkarai” tímiayi.

<sup>19</sup> Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi. <sup>20</sup> Takui uchin Jesusan itiararmiayi. Tura íwianch uchin enkemta Jesusan wániak uchin ajakramiayi. Uchisha chichiaptur nunká iniaan péper-péper ajakin wenunam saun apakmiayi.

<sup>21</sup> Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti. <sup>22</sup> Tuma asa tuke jutikiú pujurniuiti; jiniumsha apeawai, entsá maataj tusa ajuawai. Yaintrukminiaitkiumka waitneasam yaintrukta” tímiayi.

<sup>23</sup> Tutai Jesus chicharuk “¿Urukamtai, yaintrukminiaitkiumka, tame? Nekaata, shuar Winia nekas enentáimturna nu ashí túramniaiti” tímiayi.

<sup>24</sup> Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

<sup>25</sup> Tura shuar untsurí káunainian Jesus wániak kakantuk “Empeku chichachu awajin iwianchi jinkitia, tájame. Jíinkim ataksha wayawaipia” tímiayi. <sup>26</sup> Tura íwianch jiniuk untsamak uchin we-werkasa ajakar chichichiaptu áepkimiayi. Túram uchi jaka ímianis tepemiayi. Túrunamtai untsurí shuar “jakayi” tiarmiayi. <sup>27</sup> Támanak Jesus uwejen achik awajkimiayi, tura uchi nantaki wajakmiayi.

<sup>28</sup> Tura Jesus jeá wayamtai, niniki pujusar, ni unuiniamurí aniasar “¿Urukamtai iisha jiktin tujinkiamaj?” tiarmiayi.

<sup>29</sup> Tutai Jesus tímiayi “Ju iwianchkia iijarmar Yus áujkur jikminiaiti” tímiayi.

*Jesus ataksha ni jakatniurín ujakmiania nu  
(Mateu 17.22-23; Rúkas 9.43-45)*



<sup>30</sup> Nuyá jíinkiar Kariréa nunkanmaani nankaamakarmiayi. Ni unuiniamurin unuinia asa nu nankaamamun nekaawarain tusa Jesus nakitmiayi. <sup>31</sup> Unuiniak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiarsamunmayan menaintiú tsawantaj nantaktiatjai” tímiayi. <sup>32</sup> Tura nu chichaman nekaacharmiayi. Nékainiachiat, anintrustinian arantukarmiayi.

*“¿Yaki imiá nankaamantuit?”  
(Mateu 18.1-5; Rúkas 9.46-48)*

<sup>33</sup> Nuyá Kapernáum péprunam jeawarmiayi. Tura Jesus jeá pujus ni unuiniamurin aniniak, “¿Atumsha jintiá winisrum warí áujmatmiarum?” tímiayi. <sup>34</sup> Tura natsarar pachischarmiayi. Kame jintiá wésar “iijjai ¿yaki imiá nankaamantu ajasat?” tunainiarmiayi. <sup>35</sup> Ni unuiniamurj pachischarmatai, Jesus pujus ashí tuse unuiniamurj irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi. <sup>36</sup> Tura uchin itiáa miniakas chichaak: <sup>37</sup> “Shuar uchin winia naaruj shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

*“Shuar in nakitramachkunka in páchitkiawai”  
(Rúkas 9.49-50; Mateu 10.42)*

<sup>38</sup> Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijjai írutkachu asamtai nu túratin suritkiamji” tímiayi.

<sup>39</sup> Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar warí tsanumprutatniun tujinkiattawai. <sup>40</sup> Shuar in nakitramachkunka, in páchitkiawai, tímiayi. <sup>41</sup> Winia nemarka asakrumin shuar yumiichinkesha ajampramkuka ántar túratsui; akikma átatui’ tímiayi.

*(Mateu 18.6-9; Rúkas 17.1-2)*

<sup>42</sup> Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsain kuntujen kayajai jinjiar nayaantsanam ajunmaka maak ainti. <sup>43</sup> Ame uwejmek yajauchin túrumtikramamniaitkuinkia tsupikta. Mai uwejtuk wáitsatniunam jeatniujainkia chikichik uwejjai ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai, <sup>44</sup> jákaru akarisha jáiniatsui tura jisha tuke kapaawai. <sup>45</sup> Nawemsha yajauchin túrumtikramamniaitkuinkia nusha tsupikta. Mai nawentuk wáitsatniunam jeatniujainkia chikichik nawejai ju nunkanam pujusar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai, <sup>46</sup> jákaru akarisha jáiniatsui tura jisha tuke kapaawai. <sup>47</sup> Jimisha yajauchin túrumtikramamniaitkuinkia ukuinkia. Mai jiiintiuk wáitsatniunam jeatniujainkia chikichik jiiijai ju nunkanam pujusar Yus akupeana nu jeatin ti shiiraiti; <sup>48</sup> wáitsatniunmanka jákaru akarisha jáiniatsui tura jisha tuke kapaawai.

<sup>49</sup> Naman Yus susamu weaktinia áintsan aentstirmesha jijjai nekapnastatrume. <sup>50</sup> Weesha ti penkeraitiat michumarka, ¿itiurak jea-jeat átink? Wats, wee jeakua áintsarmek atumek shiir enentáimtunaistarum” tímiayi Jesus.

## 10

*Nuwá ajapatniun Jesus áujmatsamiania nu  
(Mateu 19.1-12; Rúkas 16.18)*

<sup>1</sup> Jesus Kapernáumnumiá jiiinki, Jutiá nunkanam nankaamaki, Jurtan entsa amain jeamiayi. Nu jeajai, aents ataksha Nin irunturarmiayi. Iruntrarmatai tuke túrin asa ataksha unuiniamiayi. <sup>2</sup> Tura Pariséu Jesusan nekapsatai tusar wakeruiniak, Nin chicharainiak “¿Áishman ni nuarí ajapatin tsankamkamukait?” tiarmiayi.

<sup>3</sup> Tutai Jesus tímiayi “¿Muisais wariniak timia?”

<sup>4</sup> Tutai “Papíjiaí in ajapatniun tsankatramkamiayi” tiarmiayi.

<sup>5</sup> Tutai Jesus tímiayi “Atumí enentái kátsuram asamtai nu chichaman atumin tsankatramkamiarme. <sup>6</sup> Tura Yus yámankamtaik ashí najanamia nuj, áishmanasha nuwancha najanamiayi. <sup>7</sup> Tuma asamtai áishman ni aparíncha nukuríncha kanaki ik-iuki, ni nuaríjiaí tsanintiniiaiti. <sup>8</sup> Warí, áishman nuaríjiaí jímiaraitiat chikichik ajasartatui. Tuma asamtai yamáí jímiarchaiti, antsu chikichik ajasuiti. <sup>9</sup> Tuma asa, Yus atsanikiania nuna, aents akankashtiniiaiti” tímiayi.

<sup>10</sup> Tura urum jeá wayawar, Jesusa unuiniamurí nu chichaman ataksha aniasarmiayi.

<sup>11</sup> Tuiniakui Jesus tímiayi “Shuar ni nuarín ajapa ikiuak chikichan nuátkañka, emka nuarín yajauch awajas, ikiuak, tsanirmayi. <sup>12</sup> Nuwasha ni áishri ajapa ikiuak, chikichjái niiniurtukka, niisha tsanirmayi” tímiayi.

*Jesus uchin shiir awajsamiania nu*

*(Mateu 19.13-15; Rúkas 18.15-17)*

<sup>13</sup> Antiníkiarat tusar uchin Jesusan itiararmiayi. Túruiniakui Jesusa unuiniamurí “itiairap” tiarmiayi.

<sup>14</sup> Tura Jesus nuna wáiniak, kajek juna tímiayi “Uchi Winí winitin tsankatruktarum. Suritkiairap. Iis, shuar ju uchía núnisan peejchach enentáimtumainia nu Yusa akupeamurín pachiinkiamniaiti. <sup>15</sup> Nuní asamtai tájarme, uchi umiana núnisan Yusa akupkamurín shuar umíachkuñka nuna pachiinkiaichminiaiti. <sup>16</sup> Nuyá uchin miniakas, “Yus yáinmakarti” tímiayi.

*Kuítrintin Jesusan áujsamiania nu*

*(Mateu 19.16-30; Rúkas 18.18-30)*

<sup>17</sup> Ukunam, Jesus nuyá weaj, shuar tseke Nin tarimiayi. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

<sup>18</sup> Tutai Jesus tímiayi, “¿Urukamtaí Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti. <sup>19</sup> Yus akupkamu nékatsmek. Ju áiniawai: tsanirmawairap, mankartuawairap, kasamkairap, chíkich shuar tsanumprurairap, anankartuawairap, apasha nukusha umirkatarum. Nu áiniawai” tímiayi.

<sup>20</sup> Tutai kuítrintin chichaak “Uunta, núnaka úchichik mash umiki tsakaruitjai” tímiayi.

<sup>21</sup> Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiauníkkattme. Túram winitia, krus yanaktinia áintsamek itiurchatrum aín nemartusta” tímiayi.

<sup>22</sup> Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

<sup>23</sup> Nii wématai, Jesus ashí ni téntakmarín iis, ni unuiniamurín chicharuk, “Kuítrintin ainia nu Yusa akupeamurín pachiinkiatin ti itiurchaiti” tímiayi. <sup>24</sup> Takui ni unuiniamurí nuna antukar niisháa enentáimprarmiayi. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurín pachiinkiatin penké itiurchataiti. <sup>25</sup> Uunt kamiriu auja jín wayatin ana nú naníkaamas, kuítrintin Yusa akupeamurín pachiinkiatin itiurchataiti” tímiayi.

<sup>26</sup> Nuna antukar nú arant niisháa enentáimprarmiayi. “¿Nuiñkia yaki uwempramniait?” tunaiyarmiayi.

<sup>27</sup> Tura Jesus nin iisar chichainiak “Aents niñki túrachminiaiti, antsu Yus túramniaiti. Yuska ashí túramniaiti” tímiayi.

<sup>28</sup> Nuyá Pítiur Nin chicharuk “Iis, iikia ashí ikiukir némartujuk” tímiayi.

<sup>29</sup> Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachíncha, umaincha, aparíncha, nukuríncha,

nuaríncha, uchiríncha, nunkencha uyumatsuk ikiuakka, <sup>30</sup> nu shuar ju nunkanam sian patatnas jeencha, yachíncha, umaincha, nukuríncha, uchiríncha, nunkencha, ju nunkanam wáitiatat sunastatui. Tura ukunam, nunka amuukamtai, nu shuarsha jáchatainiam tuke péñker pujustatui. <sup>31</sup> Tura untsurí shuar yamá peñkerí ainia nu, ukunam ukunmaaní pujusartatui, tura íksan untsurí shuar yamá ukunmaya ainia nu, ukunam eem pujusartatui” tímiayi Jesus.

*Jesus ni jákatniurí ataksha ujakmiania nu*  
(Mateu 20.17-19; Rúkas 18.31-34)

<sup>32</sup> Nuyá arak Jerusarénum wéenak, jintiak wearmiyai. Jesuska émak wémiayi. Ni unuiniamurísha niisháa enentáimprarmiyai. Ashamainiyatan Jesusan nemarsarmiyai. Túmainiai atak ni nekas unuiniamurín akankiar, ni túrunatniurín ujakmiayi. <sup>33</sup> Ujaak tímiayi “Antuktarum, arak Jerusarénum wéaji. Nui Winia, Aents Ajasuitjiana juna, Patrí uuntriíncha, jintinniummasha surutkartatui. Niisha apachnium mantamnatí tusar surutkartatui. <sup>34</sup> Nusha Winia wishikrurar, katsumprukar, usukruawar mantuawartatui. Túramaitiatnak menaintiú tsawantaj nantaktiatjai” tímiayi.

*Jakupu Juanjai seawarmiania nu*  
(Mateu 20.20-28)

<sup>35</sup> Sepetéu uchirí Jakupusha Juansha Jesusan taruntarmiyai. Taruntar “Uuntá, ii seattajnia nu túrak tusar wakeraji” tiarmiyai.

<sup>36</sup> Tutai Jesus tímiayi “¿Warí itiurtukat tusam wakerutam?”

<sup>37</sup> Tutai “Ame nupetmaktin tsawantrum jeamtai, iisha Ámijiai pujustaitsar wakeraji, wi untsuurumini, winia yatsursha menarmini. Nu tsankatrukta” tiarmiyai.

<sup>38</sup> Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

<sup>39</sup> Niisha tiarmiyai, “Túramniaitji, páchitskea.”

Tuñiakui Jesus tímiayi “Wats, Wi umartatjana nu umartatrume, tura Wi imiantiatjana núnisrumek imiantiatrume. <sup>40</sup> Túrasha winia untsuuruini, menaruinísha átum pujustinian Wikia súsashtiniaitjarme, antsu Yus wakerana nu nuin apujsattawai” tímiayi.

<sup>41</sup> Tura chíkich tias unuiniamurí nuna anturkar Jakupuncha, Juánnasha ti kajerkarmiyai. <sup>42</sup> Tura Jesus ni unuiniamurín irur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuárin ti akupeawai; tura uunt ainia nusha ashí shuar ti takamtikiainiawai. <sup>43</sup> Antsu atumjai núnisan atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitrum.

<sup>44</sup> Shuar atumí peñkerí ajastajtsa wakerakka, takarniua nuke ajas, umirtamkatí.

<sup>45</sup> Wisha, Aents Ajasuitjiana ju, shuar takartusarat tusan táchamjai, antsu ashí shuáran yáintaj tusan táwitjai. Wisha jarukan shuáran uwentikratajtsan táwitjai” tímiayi.

*Jesus Partimiásan tsuármiania nu*  
(Mateu 20.29-34; Rúkas 18.35-43)

<sup>46</sup> Jesus ni unuiniamuríjjiai, tura chíkich untsurí aentsjai Jirikiú péprunam jeawarmiyai. Nuyá Jirikiúnmayasha jíinkiar weenai, Timiasa uchirí Partimiás, kusuru amia nu, jintiá yantam kuítian seamu pujumiayi. <sup>47</sup> Niisha, Nasarénumia Jesusaiti táman antuk, untsukum “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

<sup>48</sup> Tura untsurí nui matsamarmia nu nin chicharainiak “Takamatsata” tiarmiyai.

Niisha nú nankaamas untsummiayi “Tawit weeá Jesusá, winia waitnentrurta.”

<sup>49</sup> Nuna antuk Jesus wajas, chichaak “Untsuktarum” tímiayi.

Takui shuar kusurun untsuiniak “Kakaram ajasta. Wajaktia; untsurmawai” tiarmiyai.

<sup>50</sup> Tuiniakui niisha esekmatairin ajapa ikiuak wajaki Jesusan tseke tarimiayi.

<sup>51</sup> Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

<sup>52</sup> Tutai Jesus chichaak “Shiir wetá. Winia nekas enentáimtursa asam péñker ajasume” tímiayi. Tura nu chichamaik ímpramiayi. Tura Jesusan nemarki wémiayi.

## 11

### *Jesus Jerusaréñnum wayamiania nu*

*(Mateu 21.1-11; Rúkas 19.28-40; Juan 12.12-19)*

<sup>1</sup> Wésar Jerusaréñnum tura Petpajái péprusha Petania péprusha Uriwiu naint íñkiuasmak ámanum jeawar, Jesus jimiará unuiniamurin ujuikimiayi. <sup>2</sup> Ujuiak tímiayi “Aatuniní pépruchiniam werum nuin umpuuru uchich jin̄kiamu wáinkiatarme. Nu umpuuruuka tuke entsamprukchamuiti. Nu atiarum utitiarum. <sup>3</sup> Tura “¿Urukamtia áitkiarum?” turamainiakuisha, “ii Uuntri wakerawai” titiarum” tímiayi. <sup>4</sup> Tutai wearmiayi. Tura umpuurun wáitiniam aani jin̄kiamun, jintiá yantannum wajan wáinkiar atiawarmiayi. <sup>5</sup> Nuj pujuarmia nu “¿Warí áitkiarum. Urukamtai umpuuru atiarum?” tiarmiayi. <sup>6</sup> Takui, niisha Jesus timia nu ujakam suritkiacharmiayi. <sup>7</sup> Tura umpuurun Jesusan itiariar pushirin umpuurunam awantkarmiayi. Túram Jesus entsamkamiayi. <sup>8</sup> Tura untsurí shuarsha pushirin jintianam ayapar áinkiararmiayi. Chikichcha jintiá yantannumiān nukan juuk jintianam áintrarmiayi. <sup>9</sup> Eem wearmia nusha, uku winiarmia nusha warainiak “Jusanna” untsumkarmiayi. “Yusa náarjīn winiana nu imiá péñkeraiti. <sup>10</sup> Ii uuntri Tawitia akupeamurj tátatna nu imiá penker atí. Ii Yusrj naarj shiir ati.” Tu untsumki wearmiayi. <sup>11</sup> Tura Jesus Jerusaréñnum jemiayi. Jeá, Yusa Uunt Jeen wayamiayi. Tura ashí iiyasua amik, kintiamprajj tusa ni tuse unuiniamurijjai tíjiuch Petania péprunam wearmiayi.

### *Jesus iikiu numin yuminkramiania nu*

*(Mateu 21.18-19)*

<sup>12</sup> Kashin tsawar, Petanianmaya jintia wesa, Jesus tsukammiayi. <sup>13</sup> Tura arant wajan iikiu numirin núkenniun wáiniak, nereatsuash tusa iyumiayi. Tura nereshtairin asamtai neren penké wáinkiachmiayi. <sup>14</sup> Nuyá iikiu numin yuminkeak: “Ame nerem penké yunaashti” tímiayi. Ni unuiniamurisha nuna táman antukarmiayi.

### *Yusa Uunt Jeen suruktinian Jesus suritkiamiania nu*

*(Mateu 21.12-17; Rúkas 19.45-48; Juan 2.13-22)*

<sup>15</sup> Nuyá atak Jerusaréñnum jeawarmiayi. Nuj Jesus Yusa Uunt Jeen wayá suruktai tusar pujuarmia nuna jiki akupkatasa nan̄kammiayi. Kuítian yapajin armia nuna misarin tura yampitsan sūrin armia nuna kutan̄krincha ayanturmiayi. <sup>16</sup> Tura káarak entsaki Yusa Uunt Jeen nan̄kaamaktinian suritkiarmiayi. <sup>17</sup> Nuyá “Yus áuj̄satai tusar ashí shuar Yusa jeen wayamnia átatui” tú aarchamukait Yusa Papirjīn. Antsu átumka Yusa jee kasa matsamtaiya nútikiarme” tímiayi. <sup>18</sup> Aents nuj matsamarmia nu Jesusa chichamen antukar ti enentáimprarmiayi. Tuma asamtai Israer-patri úntrisha, Israer-shuara jintinniurisha, nuna nekaawar, Jesusan ashamainiak mantamnati tusar chichaman jurusarmiayi. <sup>19</sup> Nuyá kiakui Jesus Jerusaréñnumiā jin̄kimiayi.

### *Iikiu numin káarun wáinkiarmaniania nu*

*(Mateu 21.20-22)*

<sup>20</sup> Kashin káshik nan̄kaamainiak iikiu numin kan̄kaptuk jaka wajan wáinkiararmiayi. <sup>21</sup> Tura Pítiur enentáimias Jesusan tímiayi “Uunta, iista, iikiu Ame yuminkramam nu kan̄kaptuk káarchaik.”

<sup>22</sup> Tutai Jesus tímiayi “Yus nekas enentáimtustarum. <sup>23</sup> Iis, nekas tátsujrumeck, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju

náintian “jiinki nayaantsanam iniánti” tákuinkia, páchitsuk iniantatui, tímiayi. <sup>24</sup> Tuma asamtai tájarme, ashí Yus áujkuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkíáttarme. <sup>25</sup> Tura Yus áujkuram pujarmena nu, kajernaiyamuram ákuinkia tsankurnáiratarum. Atumí Aparí nayaimpiniam pujana nu atumí tunaarín tsankurturtti tusarum túratarum. <sup>26</sup> Atumsha tsankurnáiyachkurminikia, núnisan atumí Aparí nayaimpiniam pujana nu atumí tunaarín tsankurtámprashatrumé” tímiayi Jesus.

*Yusa kakarmarijiai Jesus takasmiania nu*

*(Mateu 21.23-27; Rúkas 20.1-8)*

<sup>27</sup> Ataksha Jerusarénum waketkiarmiayi. Jesus Yusa Uunt Jeen wekai, Israer-patrí úuntrisha, Israer-shuara jintinniurisha, Israer-shuara iruntai-jeé úuntrisha Nin káutkarmiayi. <sup>28</sup> Káutkar Jesusan tiarmiayi “¿Yana kakarmarijiai ju túram. Ame túramna nuna ya tsankatrama?” tiarmiayi.

<sup>29</sup> Tuiniakui Jesus tímiayi, “Chikichkiniak aniastatjarme. Áirkatarum. Túrakrumninkia Wissha winia takastinian tsankatrukma nuna ujaktatjarme. <sup>30</sup> Wats, turutiarum, ¿ya Juan imiaitniun tsankatkama? ¿Shuar tsankatkamka? ¿Yus tsankatkamka? Áirkatarum” tímiayi.

<sup>31</sup> Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik. <sup>32</sup> Antsu “shuar tsankatkaiti” tákurkia, ashí shuar ashamaji” tunainiarmiayi. Ashí aents Juan nekas Yúsnan etserniuiti, tu enentáimainiakui ashamiarmiayi. <sup>33</sup> Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarijiai takaaj nuna ujakchattajrume.”

## 12

*Yajauch takau armia nu*

*(Mateu 21.33-46; Rúkas 20.9-19)*

<sup>1</sup> Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jean najanamai. Najana takartusti tusa shuáran ikiuak ninkia jeachat wémai. <sup>2</sup> Neretai tsawant jeamtaí, ni takarniurín júukman akankat tusa akupkamai. <sup>3</sup> Tura ajanam takau arma nu, nu takarniun achik, katsumkar, áyatik awainkiarmai. <sup>4</sup> Ataksha chikich takarniun akupkamai, tura nunasha kayajai tukurar, múuknum katsumkar, katsekar awainkiarmai. <sup>5</sup> Tuma ain ataksha chikichan akupkamai, tura nunasha máawarmai. Ti untsurín akupramai. Chikichnasha katsumkarmai, chikichan máawarmai.

<sup>6</sup> Tura niijiai chikichik tuke ámiayi, nuka ni aneamu uchiri. Nu uchinha ukunam akupkamai. Akupeak “Winia uchirnaka shiir awajsartatui” tímiai. <sup>7</sup> Tura ni uchiri winian wáinkiar, takau shuar nuámtak chichainiak “Juka ajá nérenniu uchirínti. Wátsek, maatai; túramka ájaka iiniu átatui” tiarmai. <sup>8</sup> Túsar achikiar máawarmai. Ayashincha ajanmaya ajapawarmai” tímiayi.

<sup>9</sup> Tura nuyá aniasmiayi, “¿Wats, warí enentáimsarum; ajá nérenniuri ititurkattawa? Jeashtanmayá taa, ajá takainia nú shuaran amuktatui. Ni ajaríncha chikichan ikias-tatui. <sup>10</sup> Ju, Yus-Papinium aarma ana nu áujkachukaitrum:

Kaya pénkernak, jeammin “yajauchiiti” tusar ajapawarmia nu ashí kayajai nankaamas pénger apujsamuiti. <sup>11</sup> Nusha Yus túramuiti. Iisha ísar ti enentáimtaji.

Nuke áarmaiti” tímiayi.

<sup>12</sup> Tura nú metek-taku chichamjai nin áujmatma asa achiktaí tusar chichaman jurusarmiayi. Túmainiyat shuáran ashamainiak Jesusan ikiuiniak wearmiayi.

*Uunt akupin súsatin tura Yus súsatin*

*(Mateu 22.15-22; Rúkas 20.20-26)*

<sup>13</sup> Tura wear, imiaamtikiar yaja chichakmatai nújaj yajauch títai tusar Pariséu shuarnasha, Erutisa nemanin shuarnasha akatar Jesusan akuptukarmiayi. <sup>14</sup> Túram Nin jeariar chicharainiak: “Uuntá, aents nakitiainiajn tuke nekas chicham páchitsuk chichaame, nu nékaji. Aents pátatek iiyatsme, antsu nekas Yusa jinti unuiniame. ¿Waritia enentáimiam, ii kuitri uunt Sesar súsatin péñkerkait. Susattajik. Suritkiattajik? Nu nekaatai tusar wakeraji” tiarmiayi.

<sup>15</sup> Tura Jesus ni yajauch enentáimmiarjn nekara “¿Urukamta Winia yajauch titi tusarum wakerutarum? Kuit itiatarum, Wi íistaj” tímiayi.

<sup>16</sup> Tutai kuítian itiararmiayi.

Jesus nuna iis tímiayi, “¿Juisha yana yapj tura yana naari áarmait?” tímiayi.

Tutai “Uunt Sésarna” tiarmiayi.

<sup>17</sup> Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurjn antukar ti enentáimprarmiayi.

*Aents nantaktinian Satuséu anintrusarmiania nu  
(Mateu 22.23-33; Rúkas 20.27-40)*

<sup>18</sup> Nuisha Satuséu aents, jakamunmaya nantaktin penké atsawai tiniu armia nu, Jesusan tariarmiayi. Taar Jesusan chicharainiak: <sup>19</sup> “Uuntá, Muisais juna áatrampramajji: “Áishman ni nuari júreatsajn jakamtainkia, yachin yajutmatrattsa, ni yachi nu wajen nuátkatniuiti.”

<sup>20</sup> Wats, siati yachi árimiayi. Iwairj nuwan nuatak yajutmatsuk jakamiayi. <sup>21</sup> Ni yachi wajen akinkiamiayi. Nusha núnisan yajutmatsuk jakamiayi. Nuna yachisha núnisan tura nuna yachisha núnisan túramiayi. <sup>22</sup> Tura ashí siati patainman, patainman nu nuwan nuátkarmiayi. Yajutmatsuk, yajutmatsuk jíniawarmiayi. Tura ukunam nuwasha jakamiayi. <sup>23</sup> Nuinkia nantaktin tsawantaj, nantakiarmatai, ¿yana nuarjn ati? Ashí siati nuátkacharmaka” tiarmiayi.

<sup>24</sup> Tutai Jesus tímiayi ““Jakamunmaya nantaktin atsawai” tátsurmek. Yusa chichame tura Yusa kakarmari nékachu asarum awajiarne, tímiayi. <sup>25</sup> Iimiatarum, aents jakamunmaya nantakiarmatai, nuatnaikiatin atsuttawai, antsu nayaimpinmaya suntara núnisan pujusartatui. <sup>26</sup> Tura jakamunmaya nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmaya Muisaisan chicharuk “Wikia Apráama Isaaka tura Jakupu Yúsrjntjai” Yus tímiayi. <sup>27</sup> Yaunchu jákaru ajn, Yus nuna taku, ayashnium jakayat iwiaaku pujuinia nuna Yusrjntjai, tawai. Nekas jaka ainia nuna Yusrjinchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péñker ainia nu  
(Mateu 22.34-40)*

<sup>28</sup> Jesussha Satuséusha áujmatnainian Israer-shuara jintinniurj taa anturkamiayi. Anturak, Jesus ti péñker áimkiui, niisha Jesusan juna aniasmiayi: “¿Yus akupkamu tuá imiá péñkerait?” tímiayi.

<sup>29</sup> Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusrj úuntaiti, tura Niñki nekas Yúsaiti. <sup>30</sup> Tuma asantai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íiktusta. Núiti nekas péñker akupkamu, tímiayi. <sup>31</sup> Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nankaamas péñker akupkamu atsawai’ tímiayi.

<sup>32</sup> Tutai jintintin tímiayi “Ee, péñkeraiti, Uunta. Nékasmeke tame. Chikichík Yus awai, chíkichkia atsawai. <sup>33</sup> Tura tuke enentáijjai ti enentáimsar, ii kakarmarisha Yus íiktusar Nin aneakrikia, ii ayashj aneajnia núnik ii írutramurisha aneatniuitji. Nusha ashí Yus sutai ana nujaj nankaamas péñkeraiti’ tímiayi.

<sup>34</sup> Nuna tiniu asamtai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

*Kristu tutai ¿yana uchirimpait?*

*(Mateu 22.41-46; Rúkas 20.41-44)*

<sup>35</sup> Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniuri “Yus anaikiamu Krístun Tawitia shuari” tuinia?” <sup>36</sup> Tawit, antsu, Yusa Wakaní aarta tutai, Yus-Papinium juna áarmiayi:

Uunt winia Uuntrun tímiayi “Ame nemasrumin nupetkatin amuatsain winia untsuuru-ininj pujusta”.

<sup>37</sup> Kame Tawitkia, Krístun áujmatuk, “winia Uuntru” taisha, ¿itiura ní shuarisha átiñki?” tímiayi Jesus. Tuma asamtai untsurí shuar nuñ matsamarmia nu ti shiir antukarmiayi.

*“Israer-shuaran jintintin ainia nújai aneartarum” Jesus tímiania nu*

*(Mateu 23.1-36; Rúkas 11.37-54; 20.45-47)*

<sup>38</sup> Jesus unuiniak tímiayi, “Israer-shuara jintinniuri ainia nújai aneartarum. Ni-isha waantu enentáimtumasar, esaram pushin entsarar wekasatajtsar wakeruiniawai. Pérunmasha shuar shiir áujtusarat tusa wakeruiniawai. <sup>39</sup> Israer-shuar iruntainiam penkeri pujutainium pujustinian wakeruiniawai. Nampernumsha penkeri puju-tainium pujustinnisha wakeruiniawai. <sup>40</sup> Tura waje jeencha atantainiawai. Túrawar aents nekaracharat tusar ti esaram chichamjai Yúsan áujainiawai. Nincha chikichjai nankaamas Yus asutiawartatui” tímiayi.

*Waje kuítrín susamiania nu*

*(Rúkas 21.1-4)*

<sup>41</sup> Jesus Yusa Uunt Jeen kuit enketainiam naka pujus áents kuítrín chumpian wáinkiamiayi. Untsurí kúitrín núnkap enkeawarmiayi. <sup>42</sup> Nuyá waje kuítrincha taa jimiará uchich kuítian, reara áantsañ, enkeamiayi. <sup>43</sup> Jesuska unuiniamurín untsuk “Nekas tájarme, ju waje kuítrinchaitiat, ashí enkeena nú nankaamas núnkap enkeayi.

<sup>44</sup> Iis, kuítrinniusha nii ampirma nuna enkeenawai, tura antsu ju nuwá kuítrinchaitiat, ampirmatsuk ni yurumatniurín takurmakman ashí enkeayi” tímiayi.

## 13

*Yusa Uunt Jeen yumpuntratniun Jesus ujakmiania nu*

*(Mateu 24.1-2; Rúkas 21.5-6)*

<sup>1</sup> Yusa Uunt Jeeniá Jesus jiinkimtai, unuiniamurí Nin tímiayi “Iisia, Uunta, kayasha ti shiir áiniawai. Jeasha imiá úuntchakait.”

<sup>2</sup> Tutai Jesus tímiayi “Ju imiá uunt jea wáinmek. Kaya ekenramu au ashí mash yumpuntrartatui” tímiayi.

*Amuukatin tsawantin uruku átatna nu*

*(Mateu 24.3-28; Rúkas 21.7-24; 17.22-24)*

<sup>3</sup> Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, níñkimas Jesusan aniiniak <sup>4</sup> “Uuntá, tímiam nu, ¿urutiá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

<sup>5</sup> Tutai Jesus tímiayi “Aneartarum, anan̄kramawairap. <sup>6</sup> Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsurín anan̄kawartatui. <sup>7</sup> Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujai sha amuukatin tsawantka tuke jeatsui, tímiayi. <sup>8</sup> Shuar chíkich shuarjai mesetan najanawartatui; apachcha chíkich apachjai núnisan̄ mesetan najanawartatui. Untsurí nun̄kanam úurkattawai. Tsukasha ártatui, charaatum ajamusha núnisan̄ átatui. Tura nujai iturchatka aya yama nan̄kamui.’

<sup>9</sup> “Túmaitkui atumsha aneartarum. Akupin iruntainiumsha surutmakartatrume, tura íi shuar iruntainmasha katsumpramkartatrume. Wíi shuar asakrumin, kapitíánnium, akupniunmasha juramkittiarme. Nuí jearum, Winia chichastatrume. <sup>10</sup> Nu túruntsaín ashí áentsnum Yus-Chicham etsernaktiniaiti. <sup>11</sup> Atumin surutmaktasar juramaini-akuisha, warintiajak tusarum ti enentáimsairap. Chichastin jeamtai, Yusa Wakaní jintintramattarmena nu titiarum. Iis, atumí enentáijíají tichattarme, antsu Yusa Wakaní jintintiam títiatrume. <sup>12</sup> Nu tsawantin shuarsha ni yachín mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisan untsurí shuar túrawartatui. <sup>13</sup> Nuínkia Wíi shuar asakrumin ashí nakitramprartatui. Tura shuar yawetsuk katsuntrańka uwemprattawai” tímiayi.

<sup>14</sup> Nuyá Jesus tímiayi “Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiumesha, ashí Jutía nunkanam pujarmena nu, náinnium pisartarum. <sup>15</sup> Jeá yakiiní pujana nu akaiki wariri achiktajtsa, jeen wayashti. <sup>16</sup> Ajanam pujana nusha ni pushirín jukitiajtsa waketskisti. <sup>17</sup> Tura ajamtin áiniana nusha, kuírchin umuntsainia nusha, nu tsawantin timiá itirchatan wáinkiertatui. <sup>18</sup> Tuma asamtai átum pisaarmena nuí yumitin ahati tusarum Yus seatarum. <sup>19</sup> Nu tsawantinkia ti wáitsatin átatui. Yama nańkamtaik Yus nunkan najanama nuísha, yamaisha ukunmasha timiu wáitsatin penké atsuttawai. <sup>20</sup> Tura Uunt Yus wáitsatin tsawantan ishichik awajsattajai tichaitkuínkia, uwempratin penké atsuinti. Tura ni shuarín anaikiamia nuna yáintajtsa wakerak, nu tsawantan ishichik awajsattawai. <sup>21</sup> Nu tsawantaj “júiti Kristu” túramkuínkia anturkairap. <sup>22</sup> Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yus anaikiamu shuárnasha anańkatai tusar wakeruiniak, ni kakarmarín iniakmainiak aentsti tujintiamun túrartatui. <sup>23</sup> Tura átum aneartarum. Aetak, túruntsaín ujakchajrumek’ tímiayi Jesus.

### *Aents Ajasu tutai tátintri*

*(Mateu 24.29-35, 42-44; Rúkas 21.25-36)*

<sup>24</sup> Jesus tuke unuiniak juna tímiayi: ‘Tura nu wáitsatin nańkaamasmatai, etsaasha nantusha etsantrashtatui. <sup>25</sup> Yaasha nayaimpinmaya kakekartatui, tura nayaimpiniam kakaram ainia nu muchitrartatui. <sup>26</sup> Nuyasha ashí aents Winia wáitkiartatui. Wi, Aents Ajasuitjiana ju, ti kakaran, ti wincha ajasan, yurańminiam winiáí wáitkiartatui. <sup>27</sup> Nuí nayaimpinmaya suntarun akupkattajai, Wíi shuaran ashí nunkanmayan irurarat tusan. Arakaaniya, nunkaanija, ashí nunka nánkatkamunmayan Wíi shuaran irurartatui.’

<sup>28</sup> ‘Ikiu numi nakumea nu nekaatarum. Ni chinimpri punkak nuke jeakuí, “ju nunkanam esat jeatemai” tátsurmek. <sup>29</sup> Núnisurmek Wi tájarmena nu wáinkiumeka, ni tátintri jeatemai tu nekaattarme. <sup>30</sup> Nekas tájarme, yamaí aents pujuinia nu kajiń amuniatsaín, ashí Wi tájana nu túrunatniuiti. <sup>31</sup> Nayaimpisha nunkasha amuukatniuiti. Tura winia chichampruka amuukashtiniaiti. <sup>32</sup> Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai. <sup>33</sup> Atumsha anearum enentáimprarum Yus aujsa pujustarum, tsawant nékachu asarum.’

<sup>34</sup> ‘Tura Wikia ju shuarjai méteketjai. Ju shuarsha jeachat weak, ni jeen ikiuawai. Ikiuak ni shuarín wáitrukartí tusa apujas ikiuak ashí shuaran takatrín súawai. Tura wáitin wáinnium, “ameja péńker wáinkiaata” tímiayi. <sup>35</sup> Wikia nu jea nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátatjai. <sup>36</sup> Nérentin aya aneachmak taa, kanúu tepai wáitkiaí tusarum aneartarum. <sup>37</sup> Wi atumin tájana nu, ashí shuáran tajai, anearum pujustarum” tímiayi Jesus.



## 14

### *Jesusan chichaman jurusarmiania nu*

*(Mateu 26.1-5; Rúkas 22.1-2; Juan 11.45-53)*

<sup>1</sup> Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiayi. Israer-patri uuntrisha, Israer-shuara jintinniurisha Jesusan anañkar achikiar maatai tusar wakeriarmiayi. <sup>2</sup> Túrasha “Jista tsawantin túrachmi, aents charaatum ajarain tusar” tiarmiayi.

### *Nuwa kunkuinian Jesusan ukatramiania nu*

*(Mateu 26.6-13; Juan 12.1-8)*

<sup>3</sup> Jesussha Petania péprunam tunamaru Semunka jeen misanam pujan, nuwa tarimiyai. Nartu kunkuinian arapástru tutai kaya najanamunam piakun itiamiayi. Nu kunkuin ti kuitiaiti. Mutí chuchuke kupik Jesusa muuken kunkuinian ukatramiyai. <sup>4</sup> Tura nuj pujuarmia nu, kajerar tunaiyarmiayi “¿Urukamtai ju kunkuinian ántar wasurea? <sup>5</sup> Júnasha súrakka, menaintiú sian kuítnium surukminiuyi. Nu kuitcha kuítrinchan súsanaka maak” tiarmiayi. Tusa nuwan kajerkarmiayi.

<sup>6</sup> Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiayi. <sup>7</sup> Kuítrincha atumjai tuke íruntsuk. Wakerakrumka tuke péñker awajsatniuitrume. Antsu Wikia atumjai tuke pujushtatjai. <sup>8</sup> Ju nuwa ashí nii túramnia núnaka umikiai. Wi jákatin jeatsain, iwinarsatin kunkuinian shiir ukatrurai. <sup>9</sup> Nekas tájarme, ashí nunkanam Yus-Chicham etsernaktatna nui, ju nuwa túramurisha etsernaktatui, nin kajinmatkiarain tusa” tímiayi.

### *Jútas Jesusan suruktaj timiania nu*

*(Mateu 26.14-16; Rúkas 22.3-6)*

<sup>10</sup> Nuyá Jútas Iskariúti, Jesusa unuiniamurintiat, Israer-patri uuntrin werimiyai, Jesusan suruktaj tusa. <sup>11</sup> Niisha nuna antukar, warasar “Kuit amastatji” tiarmiayi. Jútassha Jesusan itiurak yúpichuch tsankamkattaj tusa enentáimias wekaimiyai.

### *Jesusjai iruntrar yurumáwarmia nu*

*(Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)*

<sup>12</sup> Wakapruachu tantan yuatin jísat nanakama tsawant tsawarmatai, paskua námpertin yúatin murik máatin jeamtai, Jesusa unuiniamuri iniasarmiyai “Paskuatin murikuu yúatin iwiaratai tusar ¿tui wétataj? Tui yurumattam?” tiarmiayi.

<sup>13</sup> Tutai Niisha jimiará unuiniamurin akatar akupeak “Péprunam wetarum. Nui áishman yumin jukí wéa wáinkiatarme. Nu áishman nemarsatarum. <sup>14</sup> Wayana nu jeá nérenniurj títiarum “Uunt túramui, ¿wisha, unuiniamurjai tui yurumáttaj?” <sup>15</sup> Nu nérentin, yakí písunam uunt tesamunam ashí iwiamun iniakturmastatrume. Nui jísat ii najanatin iwiaratarum” tímiayi. <sup>16</sup> Ni unuiniamuri wear, péprunam jeawar, Jesus timia núnisan wáinkiarimiyai. Tuma ásar paskua námperan iwiararmiayi.

<sup>17</sup> Nuyá kíakui Jesus ni tuse unuiniamurijjai wayawarmiyai. <sup>18</sup> Niisha misanam pekaamak, yurumáiniak pujusar, Jesus tímiayi. “Nekas tájarme, chikichik shuar Wijjai yurumna nu, surutkattawai.”

<sup>19</sup> Nujai kúntuts enentáimprarmiyai. Chíkich chíkich Jesusan aniasar “wíashitaj” tiarmiayi.

<sup>20</sup> Jesus tímiayi “Ju misanam tuse irunar yurumprum nu, chikichik surutkattawai. Wijjai piniñnum yurumkan ayak yuana núiti. <sup>21</sup> Nekas Wi, Aents Ajasuitjiana ju, jákatniunam wéajai, áarturma áintsanak. Tura áishman súrutna nu ti wáitsattawai. Niisha akiinmainchu ajakuíti” tímiayi.

<sup>22</sup> Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi. <sup>23</sup> Piniñnasha achik, Yúsan yuminkias, ni

unuiniamur<sub>in</sub> súsarmiayi. Ashí umararmiayi. <sup>24</sup> Umararmatai Jesus tímiayi “Júiti winia numpar, untsur<sub>in</sub> yáintajtsa puártinia nu. Nujai Yamaram Chichaman Yus najanaiti. <sup>25</sup> Nekas tájarme, uwa yumir<sub>i</sub> ataksha ju<sub>i</sub> umarchattajai. Tura tsawant jeamtai, ukun-masha, Yus akupeana nu<sub>i</sub> yamarman umartatjai” tímiayi.

*Pítiur natsantratniua nuna Jesus ujakmiania nu*  
(Mateu 26.30-35; Rúkas 22.31-34; Juan 13.36-38)

<sup>26</sup> Yus-kantan kantámawar, jíinkiar, Uriwiu náinnium wearmiayi. <sup>27</sup> Nuñkia Jesus nin tíarmiayi “Ju kashi átum natsantrurtatrome. “Murikiu wáinnium máattajai, túramtai murik tsakinmakartatui” tu aarchamukait. <sup>28</sup> Tura ukunam Wi nantakin atumin Kariréanam émtuktiajrume” tímiayi.

<sup>29</sup> Tutai Pítiur chicharuk “Ámin ashí natsantramainiakuisha, wikia natsantrashtat-jame” tímiayi.

<sup>30</sup> Tutai Jesus tímiayi “Nekas tájame, ju kashi atash jimiará shiniatsain, natsantrur-tatme. “Núnaka nékatsjai” menaintiú turuttiatme” tímiayi.

<sup>31</sup> Tutai Pítiur kakaram chichaak “Ámijjai métek máantuiniakuisha, núnaka penké tíchattajai” tímiayi. Ashí ni unuiniamur<sub>i</sub> núnisañ tiarmiayi.

*Jesus Jitsemaní ajanam Yúsan áujsamiania nu*  
(Mateu 26.36-46; Rúkas 22.39-46)

<sup>32</sup> Nuyá Jitsemaní ajanam wearmiayi. Jeawar Jesus ni unuiniamur<sub>in</sub> tímiayi “Ju<sub>i</sub> pujustarum, Yúsan áujsatasa pujai”. <sup>33</sup> Pítrun, Jakupuncha, Juánnasha jukimiayi. Tura Jesuska ti kuntuts enentáimiar wake mesek nekapsatasa nan<sub>k</sub>ammiayi. <sup>34</sup> Tura nin chicharuk “Wi ti kuntuts enentáimjai, tura jakamnia nekapeajai. Ju<sub>i</sub> iimia pujutarum” tímiayi. <sup>35</sup> Jesussha ishichik arantach we, nuñká piniakumar tepes Yúsan aujmiayi. “Ju wáitsatin átatna nu, túrutatniuitkuñkia iniaitiusta” tu seamiayi. <sup>36</sup> Tuke áujuk tímiayi “Apawá, ashí tujinchaitme. Piniñnumiá ashí umartinia áantsañ ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” <sup>37</sup> Tura ni unuiniamur<sub>in</sub> tarin, kanúu tepenan wáinkiamiayi. Pítrun tímiayi “¿Semun<sub>k</sub>a kánamek. Kanutsuk ishichiksha iimia pujustin tujinkiamek? <sup>38</sup> Anearum Yus áujstarum, tu-naanum iniaar<sub>aj</sub> tusarum. Atumí wakan<sub>in</sub> kakarmaitrume, antsu atumí ayash<sub>in</sub> kakarmachuitrume” tímiayi.

<sup>39</sup> Ataksha we, nuik Yúsan áujsama núnisañ áujsamiai. <sup>40</sup> Ataksha waketruki, ni unuiniamur<sub>in</sub> kanúu tepenan tarimiayi. Kar<sub>i</sub> ti pujá asamtai, Jesusan áujsatniun tujinkiar<sub>in</sub>miayi.

<sup>41</sup> Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai. <sup>42</sup> Nantáktiár<sub>um</sub>, wemí. Iis, Winia súrutna nu nuntumsai” tímiayi Jesus.

*Jesusan achikiarmiania nu*  
(Mateu 26.47-56; Rúkas 22.47-53; Juan 18.2-11)

<sup>43</sup> Jesus nuna chicháa pujá unuiniamur<sub>i</sub> Jútas tarimiayi. Nijijai untsur<sub>i</sub> aents puniá takaku, tura numincha takaku káutarmiayi. Israer-patri uuntri, Israer-shuara jintinniur<sub>i</sub>, tura Israer-shuara úuntri akupkarma asa káutkarmiayi. <sup>44</sup> Káuntsain Jútas chicharainiak, “Wi mukunattaj áujkin núiti Jesus. Achii<sub>rum</sub>, pen<sub>k</sub>er emetarum jukitiarum” tímiayi. <sup>45</sup> Tura Jesusan tarí, mukunuk áujas “Uuntá, Uuntá” tímiayi. <sup>46</sup> Túramtai aencha Jesusan achikiar emetawarmiayi. <sup>47</sup> Túruiniakui nu<sub>i</sub> wajatusha puniar<sub>i</sub> úkuitsañ, patri uuntri takarniur<sub>in</sub> awati ni kuish<sub>in</sub> tsupirkamiayi.

<sup>48</sup> Túram Jesus áentsun tímiayi “Kasakaitaj. Puniajai numijjai, kasá nútiksarmek achirkatai tusarum tarutniurme. <sup>49</sup> Ashí tsawant atumjai Yusa Uunt Jeen wayan unuiniakun pujuchmakaj. Túmaj nu<sub>i</sub> achirkachmarme. Tura Yus timia nu uminkiat tusa ju túrunayi.” <sup>50</sup> Nuñkia ni unuiniamur<sub>i</sub> Niniak ikiuiniak pisararmiayi.

### *Natsa pisarmiania nu*

<sup>51</sup> Tura áishman nátsaach aya tarachin penumas Jesusan atamprimiayi. Tura natsaach suntar achikiam <sup>52</sup> tarachrın ajapa ikuak misú tsékenkimiayi.

### *Patri uuntriın Jesusan júkiarmiania nu*

(Mateu 26.57-68; Rúkas 22.54-55, 63-71; Juan 18.12-14, 19-24)

<sup>53</sup> Patri uuntriın Jesusan ejeniarmiayi. Nuı Patri uuntriısha, Israer-shuara jintiniurısha, Israer-shuara uuntriısha irunturarmiayi. <sup>54</sup> Tura Pítiur íkian nemarki Patri jeen aach jeá, Patri suntarjııai jinia anamuk pujumiayi. <sup>55</sup> Patri uuntriı ashı naamka uunt armia nujai iruntrar maatai tusar wakeruuniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiayi. <sup>56</sup> Túrasha untsurı shuar Jesusan tsanumpruiniayatan yapajıá yapajıá chichainia ásarmatai wáinkiacharmiayi. <sup>57</sup> Nuyá chíkich wajakiar wáitruuniak juna tiarmiayi <sup>58</sup> “Yusa Uunt Jeen, aents jeamarmia nuna yumpuntiatjai. Túran menaintiú tsawantai, chikichan, aents jeamchamun jeamtatjai” tau antukmaji” tiarmiayi. <sup>59</sup> Tura tuke yapajıáwar tiarmiayi.

<sup>60</sup> Nuısha Patri uuntriı ajapén wajaki Jesusan chicharuk “¿Áimsatin penké tujintiamek. Warinia turamainia?” tímiayi.

<sup>61</sup> Tura Jesus takamtak áimtsuk pujumiayi.

Patri uuntriı atak chicharuk “¿Ame nekas Yusa Anaikiamurınkaitiam. Ii Yusrı Uunt tajinia nuna Üchirınkaitiam?”

<sup>62</sup> Tutai Jesus tímiayi “Ee, núıtjai. Winia, Aents Ajasu tutaintiajna nu Kakaram Yusa untsuurıniı pujai wáitkiattarme. Tura nayaimpinmaya yuraınminiam winiaı wáitkiattarme” tímiayi.

<sup>63</sup> Tutai Patri uuntriı kajek, ni pushırın jaak tímiayi “¿Chíkich títincha warı atsumaji?”

<sup>64</sup> Nii tana nujai Yúsan kátsekeamu antukurme. ¿Warintia enentáimprum?” tímiayi.

Takui “jakamniaiti” ashı tiarmiayi. <sup>65</sup> Chíkich chíkich Jesusan usukiáwarmiayi. Jiın epetkar awatiar “¿Ya áitkiarma? etserkata” tiarmiayi. Patri suntarısha yapiniam awatiarmiayi.

### *Pítiur Jesusan natsantramiania nu*

(Mateu 26.69-75; Rúkas 22.56-62; Juan 18.15-18, 25-29)

<sup>66</sup> Núnaka túruiniaı Pítu nunká, jea aani pujan, nuwa Patri uuntriı takarniuriya nu tarimiayi. <sup>67</sup> Niısha Pitrun jinia anamu pujan wáinkiamiayi. Wáiniak, “Amesha Nasarenumiaı Jesusjai wekaichukaitiam” tímiayi.

<sup>68</sup> Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitiainiam jiinkimiayi. Tumai atash shiniukmiayi.

<sup>69</sup> Nu núwasha Pitrun ataksha wáiniak, shuáran nuı pujuinian tímiayi “Júiti ni shuari.”

<sup>70</sup> Tura ataksha “atsá” tímiayi.

Ishichik árusan, shuar nuı pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auya shuara nunı chichaame” tiarmiayi.

<sup>71</sup> Tutai Pítusha kakantar chichaak, “Ju áishmannaka átum tárumna núnaka nékatsjai. Wáitrakuınkia Yus írsati” tímiayi. <sup>72</sup> Nuyá ataksha atash shiniukmiayi. Pítusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsaiın, ame, núnaka nékatsjai, menaintiu turuttiatme” tíchamka. Pítu nuna enentáimias ti útmiayi.

## 15

### *Jesusan Piratú ejeniarmiania nu*

(Mateu 27.1-2, 11-14; Rúkas 23.1-5; Juan 18.28-38)

<sup>1</sup> Tura kashin káshik Patri uuntriı, Israer-shuara úuntriııai, Israer-shuara jintinniurııai, ashı naamka armia nujai irunturar, chichaman jurusarmiayi. Túrawar Jesusan

jinkiamun apach kapitián Piratuijin ejeniarmiayi. <sup>2</sup> Ejeniar matai Piratu aniasmiayi “¿Amesha Israer-shuara Uuntrinkáitiam?”

Tutai Jesussha “Amek tame” tímiayi.

<sup>3</sup> Nuyá Patri uuntri ti tsanumprurarmiayi. <sup>4</sup> Ataksha Piratu aniasmiayi “¿Áimsatin penké tujintiamek? Ti untsurí etserturmainiatsuk.” <sup>5</sup> Tura Jesus nunasha áikchamiayi. Túmakui Piratu ti enentáimpramiayi.

*Jesusan, mantamnati, tíarmiania nu*

*(Mateu 27.15-31; Rúkas 23.13-25; Juan 18.38-19.16)*

<sup>6-7</sup> Shuar ámiayi, ni naari Parapás. Niisha ni shuarijia*ijai* meset ámanum, shuaran maa asamtai sepunam enkeamuyayi. Tura námper tsawantai Piratu sepunmaya chikichik shuarnak jiiki akupniuyayi, aents seawarmia nuna. <sup>8</sup> Nuisha untsurí shuar Piratun káutkar tiarmiayi “Ame ju námpertin tuke túramna nu túratá. <sup>9-10</sup> Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurin jiiki akupkattajak? ¿Nu wakerarmek?” tímiayi.

<sup>11</sup> Tutai Patri uuntri áentsun chichainiak ““Antsu Parapás jiikim akúpkatá” titiarum” tiarmiayi.

<sup>12</sup> Tutai Parapásan seawarmatai Piratu ataksha chicharainiak “Jesusnasha, átum ii akupniuri tarumna nuna, ¿itiurkattaja?” tímiayi.

<sup>13</sup> Ataksha ni kakantar tiarmiayi “Krúsnum mantamnati.”

<sup>14</sup> Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tiarmiayi “Krúsnum mantamnati.”

<sup>15</sup> Tuma asamtai, aents shiir enentáimprartí tusa, Piratu tunáa shuaran, Parapásan jiiki akupkamiayi. Tura Jesusnasha katsumkarum krusnum ajintrurtarum tusa suntaran tsankatkamiayi. <sup>16</sup> Tiniu asamtai suntar Jesusan jukiar, kapitiáni jeen awayawarmiayi. Nu jea naari Piritiúriuiti. Túrawar untsurí suntaran untsukarmiayi. <sup>17</sup> Ashí káunkar, pushin kapaañniun Jesusan áentsrarmiayi. Tawasap janki najanamun etsenkrumtikiarmiayi. <sup>18</sup> Nuisha Jesusan áujsar “Shíiraitme, Jesúsá, Israer-shuara akupniuriya” wishikiainiak tiarmiayi. <sup>19</sup> Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. <sup>20</sup> Tura Jesusan wishikrar amukar, kapaañtin pushin áitkiar, ni pushirin áentsrarmiayi. Túrawar krúsnum ajintrurtai tusar jiikiarmiayi.

*Jesusa jakamuri*

*(Mateu 27.32-44; Rúkas 23.26-43; Juan 19.17-27)*

<sup>21</sup> Semun Serini núñkanmaya shuárayayi. Arijantruncha, Rupuncha aparíyayi. Semunkan takatnumia winian suntar emetawarmiayi, Jesusa krusrin yanaki jukiti tusar. <sup>22</sup> Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

<sup>23</sup> Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi. <sup>24-25</sup> Nantu yaki jatemsantai krúsnum ayapar ajintrurar ikiusarmiayi. Túrawar suntar yaki jukit tusar nakurutaijia*ijai* nakurusar Jesusa pushirin yaruakarmiayi. <sup>26</sup> Urukamtaí máamuit, ashí aents nuna nekaawarat tusa, ni krúsrin ju aarmauyayi: *ISRAER SHUARA AKUPNIURI*

<sup>27</sup> Nu náinnium jimiará kasa shuaran Niijia*ijai* máawarmiayi. Chikichik Jesusa untsuurini krúsnum, chikichik ni menarini krúsnum máawarmiayi. <sup>28</sup> Yus-Papinium aarma ana nujai uminkiauyayi. Nui “tunáa shuarjai nekapmarmauyayi” tu áarmaiti.

<sup>29</sup> Shuar nankaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt jeen yumpuntiatjai, tura menaintiú tsawantai ataksha jeamkattajai” tíchakaitiam, tiarmiayi. <sup>30</sup> Amek krúsnumia akaikim uwemprata.” <sup>31</sup> Núnisan Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan

uwemtikraitiat, Nin̄ki uwempratniun tujintiawai. <sup>32</sup> Yusa anaikiamuri Krístuashit, ii akupniuriniashit, tiarmiayi. Wats, yamáí krúsnumiá akáikití, iisha nu ísar Yus-shuar ajastai” wishikiainiak ántar nuna tiarmiayi. Jesusjái krúsnum ajintruamusha Nin wishikiarmiayi.

*(Mateu 27.45-56; Rúkas 23.44-49; Juan 19.28-30)*

<sup>33</sup> Tutupin jeamtai ti kiritin ajasmiayi ashí nun̄kanam. Tura, nantu nun̄kaach ajasmatai ataksha tsaapnirmiayi. <sup>34</sup> Nuin̄ Jesus kakantar untsumuk tímiayi “Iruí, Iruí, rama sapaktani.” Nuka shuar chichamjain̄kia, “Yusrú, Yusrú, ¿urukamtai ajapa ikiurkiniam?” tawai. <sup>35</sup> Shuar nūj pujuarmia nu, nu chichaman nékachu ásar, nuna antukar “Eríasan untsúawai” tiarmiayi. <sup>36</sup> Chikichik shuar churuinian uruchjái ajamper, sapapjái ijiú mukunati tusa susamiayi. Tura tímiayi “Wajastarum, Erías Nin jukitiaj tusa winishtimpiash. Iistai” tímiayi.

<sup>37</sup> Nuin̄kia Jesus kakaram untsumak jakamiayi. <sup>38</sup> Túramtai Yusa Uunt Jeen ejamu nin̄ki jaan̄akmiayi, yakíyá nun̄ká. <sup>39</sup> Suntara kapitíántrísha Jesusan ayamtus wajamia nu, Jesus kakaram untsumak jaamun iis tímiayi “Nuka ti nekas Yusa Uchiriyayi.”

<sup>40</sup> Nuwasha arant ii pujuarmiayi. Nu nuwajái Máktara péprunmaya Marí, chíkich Marisha, Sarumáisha pujuarmiayi. Chíkich Marisha uchich Jakupuncha Jusenchá nukuríyayi. <sup>41</sup> Nu núwaka, Kariréa nun̄kanam Jesus wekaimia nūj, Nin nemarsar yáintaitsar wekasarmiayi. Untsurí chíkich nuwasha Jesusjái Jerusarénnum wear, nu nuwajái arant ii pujuarmiayi.

*Jesusan iwiarsarmiania nu*

*(Mateu 27.57-61; Rúkas 23.50-56; Juan 19.38-42)*

<sup>42</sup> Kiatemamtai, ayampratin tsawant jeatsain̄, námper iwiaratin tsawant asamtai, <sup>43</sup> Arimiatíanmaya Jusé arantutsuk, kakaram ajas, Piratuí jeá Jesusa ayash̄in seatajtsa utuamiayi. Nu Jusenchá ashí irunin ainia nu anturin ármiayi. Niisha Yus ju nun̄kanam akupin ajasat tusa nákasmiayi. <sup>44</sup> Tura Jesusa ayash̄in seam, Piratusha “wárik jaka” tímiayi. Tuma asa suntara kapitíántrin̄ untsurak “¿Nekas jakayik?” tímiayi. <sup>45</sup> Tutai kapitíán “Ee” takui, Jesusa ayash̄in Jusén tsan̄katkamiayi. <sup>46</sup> Jusesha puju tarachin péñkeran sumarak, Jesusa ayash̄in itiar áepas penuarmiayi. Tura yamaram kaya táurmanum ikiusmiayi. Ikus wáitiniam kayan átutmiayi. <sup>47</sup> Tura Máktaranmaya Marí, Jusé nukurí Marijái ni ikiuamun ii wajarmiayi.

## 16

*Jesus nantakmiania nu*

*(Mateu 28.1-10; Rúkas 24.1-12; Juan 20.1-10)*

<sup>1</sup> Tura ayampratin tsawant nan̄kaasmatai, Máktaranmaya Marisha, Jakupu nukurí Marisha, Sarumáisha, kun̄kuinian Jesusa ayash̄in kuertai tusar sumakarmiayi. <sup>2</sup> Tura kashin Tumiñtin, ti káshik, nantu yáma jiiniaí, iwiarsamunam jeariarmiayi. <sup>3</sup> Wésar chichainiak “Iwiarsamu wáitirí kayancha ¿yaki akan̄ketramkattají?” tiarmiayi. <sup>4</sup> Jear uunt kaya akan̄kekman wáinkiarimiayi. <sup>5</sup> Iwiarsamunam wayawar, natsan esaram puju pushin entsar, untsuurnumaan̄i pujan wáinkiar ti ashamkarmiayi. <sup>6</sup> Túmainiakui natsa tímiayi “Ashamkairap. Nasarénumiá Jesus krúsnum jakama nu éarme. Iniantkimiuiti. Jūj pujatsui. Wátsek, jū ikiusmanum ístarum. <sup>7</sup> Túrarum werum Pítrusha, chíkich unuiniamurísha jū ujaktarum. Kariréanam atumin émkiyi. Turammarumna núnisan̄ túruna wáinkiatarme” tímiayi. <sup>8</sup> Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chikichkinkesha ujakcharmiayi.

*Máktaranmaya Marin Jesus wantintiúkmiania nu*  
*(Juan 20.11-18)*

<sup>9</sup> Émkaka Tumintin ti káshik Jesus nantaki, Máktaranmaya Marin wantintiúkmiayi. Nu María enentáiyá siati iwianchin Jesus yaunchu ajapruyayi. <sup>10-11</sup> Marisha Jesusa nemari kúntuts uutu matsatainian werí, “Jesus iwiaakui, imia wi wainkijai” tímiayi. Támaiati anturkacharmiayi.

*Jesus jimiará shuaran wantintiukmiania nu*  
(Rúkas 24.13-35)

<sup>12</sup> Tura urum jimiaara shuar Jerusarénnumiá tsaniñ weenan, Jesus nusháa iira ajas tarimiayi. <sup>13</sup> Niisha Jesusan wáinkiar waketkiar, unuiniamurin ujakarmiayi, tura ni chichamencha anturkacharmiayi.

*Jesus ni unuiniamurin akupkarmiania nu*  
(Mateu 28.16-20; Rúkas 24.36-49; Juan 20.19-23)

<sup>14</sup> Nuyasha Jesusa auntse unuiniamuri misanam pekaamkar pujuinian Jesus tarimiayi. “¿Atumí enentái urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiarin wáinkiaru chichamen anturkacharu ásarmatai kakantramiayi. <sup>15</sup> Nuyá chichaak “Ashí nunkanam wetarum. Túrarum ashí shuarnum Yusa shiir chichame etserkatarum. <sup>16</sup> Shuar anturak imiani uwemprartatui. Shuar antukcharka, tuke sumamawartatui. <sup>17</sup> Shuar winia náarun pachis, Yúsan nekas enentáimtakka, juna túrawartatui, Yusa kakarmarin iniakmastaj tusa: iwianchin jiki akupkartatui; chíchich chichamjai chichasarukamtai Winia nekas enentáimurtatui; <sup>18</sup> napincha achiksha, tseasnasha úmaksha, jaa ajaschartatui. Jaa shuaran ni uwejejai antiñ, nu shuaran péñker awajsartatui.” Tu tímiayi.

*Jesus nayaimpiniam wakamiania nu*  
(Rúkas 24.50-53)

<sup>19</sup> Jesus chichas amukmatai, Yus nayaimpiniam jukimiayi. Túruna Yusa untsuurini pujusmiayi. <sup>20</sup> Ni unuiniamurisha jíinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarin nekaawarat tusa, aentsti tujintiamun túratniun susamiayi. Nuke atí.

## Yúsán Shiir Chichamen RÚKAS aarmia nu

<sup>1</sup> Nekas iiní Jesus túramia nuna “ímiatrusan áartajai” untsurí aents tiarmiayi. <sup>2</sup> Yámankamtaikniumiañ ísarmia nú shuar, tura Yus-Chichaman etserkatniun yáinkiarmlia nusha in unuitiamprarmia nútiksaran áartinian wakeriarmiayi. <sup>3</sup> Wisha núnisnak esetsaran enentáimsan, yámankamtaikniumia nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru. <sup>4</sup> Jintinramawarma nú nankaamas nekaata tusan wakerakun áatjame.

### *Imiakratin Juanka akiiniatniurin ujakmiania nu*

<sup>5</sup> Jutía nunkanam uunt akupin Erutis akupkama nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwasha Irisapít Arun weeauyayi. Irisapítia úuntrisha Israer-shuar Yúsnan pujurin ármiai. <sup>6</sup> Yúsjaisha Sakaríassha Irisapítcha máí-metek péñker ármiai. Yus akupkama nunasha umirin ármiai. Tuma asamtai penkesha chíkich nin yajauch chicharkatin atsuarmiayi. <sup>7</sup> Yusjai péñker wekainiyat Irisapít júrechuyayi. Túrasha mai úuntach ármiai.

<sup>8-9</sup> Israer-shuar Yúsnan pujurin chíkich weeanmaya nuyá chíkich weenam, ankant ankant Yusa jeen takáu ármiai. Chíkich tsawant, Sakarías weeá takastin amia nu, Sakaríaska kunkuinian ekeemaktaj tusa init wayatniuyayi. <sup>10</sup> Init kunkuinian ekeemai untsurí aents aani matsamsar Yúsán áujtak pujuarmiayi. <sup>11</sup> Sakarías init pujai kunkuin ekeematainiam untsurnumaani aya aneachma nayaimpinmaya suntar wajamiayi. <sup>12</sup> Nuna wajan wáiniak Sakaríaska purushnairmiayi. <sup>13</sup> Túrasha nayaimpinmaya suntar chicharuk tímiayi “Sapijmiakaip Sakarías. Nekaata. Ame seamna nuna Yus antur-tamkayi. Tura ame nuwem Irisapít uchin takustatui. Nii akiiniamtai, “Juan” anaikiata. <sup>14-15</sup> Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karía ainia nuna umarchattawai. Tura áetak akiinchanak Yusa Wakaní pimiutkattawai, tímiayi. <sup>16</sup> Tura ni shuarin Israer-shuar áiniana nuna, ii Uuntri Yusjai ataksha nawamtikiartatui. <sup>17</sup> Uunt Yúsaiya akatramu átatui. Yaunchu Yúsnan etserin Erías kakaram etserkama núnisan niisha etserkattawai. Nujai shuaran ni uchirijjai nawamtikiartatui. Tura umichu áinia nuna eseer enentáimtikrartatui. Ni Uuntri taakui ni enentái iwiamu arti tusa etserkattawai” tímiayi nayaimpinmaya suntar.

<sup>18</sup> Nuna takui Sakarías nayaimpinmaya suntaran tímiayi “¿Nunasha warijiajn paant nekaataj? Wisha nuarjai máí-metek ti úuntchichukaitiaj” tímiayi.

<sup>19</sup> Tutai nayaimpinmaya suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. <sup>20</sup> Túrasha wi tájamna nu “nekasaiti” tu enentáimprachume. Tura asam uchiram akiintsain muut ajastatme. Chichastin penké tujinkiatame. Tura wi tajana nu, tsawant jeamtai túrunattawai.”

<sup>21</sup> Nuna tumai Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi. <sup>22</sup> Nuyá Sakarías jiinkimtai, áujstataj tukamá tujinkiarmliai. Sakaríaska, muut ajasu asa, aya úwijmiasan chichamiayi. Túmakui, Sakarías inít pujus Yúsai wáimiakun nekaawarmiayi.

<sup>23</sup> Yusa jeen takastin tsawantri amuukamtai Sakaríaska ni jeen waketkimiayi. <sup>24</sup> Nuyá ukunam ni nuari Irisapít ajapruckmiayi. Tura senku nantutin aya jeen pujusmiayi.

<sup>25</sup> Jeá pujus, “Aents wishikruuniakui natsantan jurutkitiaj tusa uchi takustinian Yus tsaṅkatrukai” tu enentáimpramiayi Irisapít.

*Jesusa akiiniatniurin nayaimpinmaya suntar etserkamiania nu*

<sup>26</sup> Nu senku nantu naṅkaasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai. <sup>27</sup> Nasarénumia nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeauyayi. <sup>28</sup> Wats, nayaimpinmaya suntar Marí pujamunam wayá tímiayi “Yus péñker enentáimturma asamtai, ámin winitjiame, Mariya. Yuska ámin nemartamuk ashí nuwá naṅkaamas péñker awajtamui” tímiayi.

<sup>29</sup> Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi. <sup>30</sup> Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. <sup>31</sup> Antukta. Amesha ajapruktatme. Túram Uchi takustatme. Nusha “Jesus” anaikiata. <sup>32-33</sup> Niisha uunt átatui. Nincha “Uunt Naṅkaamaku Yusa Uchiri” tiartatui. Tura Uunt Yuska yaunchu Tawitian uunt akupniuri awajsamia núnisaṅ ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa penké amuukashtiniaiti” tímiayi.

<sup>34</sup> Nayaimpinmaya suntar nuna tutai Marí tímiayi “Nusha winia áishur atsaisha, ¿itiurak túrunataj?”

<sup>35</sup> Tutai nayaimpinmaya suntar Marín tímiayi “Yusa Wakaní tarutramtatui. Tura yurañmia núnisaṅ Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi. <sup>36</sup> Tura Irisapít ame kaná kaimia nusha núnisaṅ weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. <sup>37</sup> Yúsjaínkia itiurchatka penké atsawai” tímiayi.

<sup>38</sup> Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

*Irisapítian Marí iyumiania nu*

<sup>39-40</sup> Nu tsawant Marí wárikmas muranam Jutía nunkanam ni kaná kajin Irisapítian iyutaj tusa wémiayi. Sakaríasai jeá, ni jeen wayá, Irisapítian áujjamiayi.

<sup>41</sup> Marí áujeamun antukmatai Irisapítia ampujén uchiri muchitkamiayi. Tumaj Yusa Wakaní ni enentáin pimiutkamiayi. <sup>42</sup> Nuiñkia kakantar chichaak Marin tímiayi “Yus amincha ti shiir awajtsaiti. Tura Uchiram akiiniattana nusha Yus shiir awajsamuiti.

<sup>43</sup> Kajrua, ame winia Uuntru nukurí áminin, Yus winia ti waitnentra asa, áujtsata tusa ámin akuptamkachaik, tímiayi. <sup>44</sup> Warí, wisha ame áujtamna nuna ántakui ampujruj uchi waras muchitrukayi. <sup>45</sup> Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

<sup>46</sup> Nuna tinia iniaisamtai Marí juna tímiayi:

“Wikia tuke enentairjai “Yus timiá úuntaiti” tajai. <sup>47</sup> Tura Uunt Yuska winia Uwemtikruru asamtai ti warajai. <sup>48-49</sup> Wisha péejchach ain ni wakeramurin umiktajtsan wakerakui winia enentáimturayi. Tuma asamtai ashí aents, “Marincha Yus shiir awajtsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajtsaiti” turutiartatui. Núnaka yamá naṅkamamunak tuke turutú ajartatui. <sup>50</sup> Tura Nin umirkatniun wakerana nunasha Yus tuke waitnentrartatui. <sup>51</sup> Ti itiurchatan páchitsuk túrait Nii. “Naṅkaamantuitjai” tu enentáimtumainia nuna nupetkaiti. <sup>52</sup> Ashí akupin ainia nuna awakkaruiti. Tura íksaṅ péejchach ainia nuna uunt awajsaruiti. <sup>53</sup> Péñker ana nuna kitiamainiakui Yus péñkeran súsaruiti. Tura antsu “ashí takakjai” tuinia nuna aya júnik awajsaruiti. <sup>54</sup> Israer-shuar Niiniu ájinia núnaka waitnentratniun kajinmattsuk yáinmákuitti. <sup>55</sup> Yaunchu ii



Uuntri Apraáman tura ní shuarnasha “túrattajai” timia nuna ímiatrusan̄ tuke túraití.”  
Nuní tímiayi Marí.

<sup>56</sup> Marikia Irisapítjaj̄i menaintiú nantu pujus ni jeen waketkimiayi.

### *Imiakratin Juan̄ka akiiniamur̄i*

<sup>57</sup> Nuyasha ni jurertin tsawantri jeamtaí Irisapítcha uchin áishman̄kan takusmiayi.

<sup>58</sup> Tura ni shuarisha, ni írutramurisha “Irisapítian Yus ti shiir yáinmiayi” tuíniak, nin iyuwearmiayi. Tura máí-metek warasarmiai.

<sup>59</sup> Israer-shuar túrutai júnisaiti: uchi akiiniamur̄i uchu tsawant jeamtaí, shunichir̄i nuapen tsupiktin awai, sírkunsisiún tutai. Yus nuna tú tiniu asamtaí tuke túrin ármiai. Wats, Irisapítia uchir̄i akiiniamur̄iniá uchu tsawant jeamtaí tsupirkataí tusar ni jeen jearmiayi. Nuiñkia ni apar̄i naar̄i Sakarías anaikiataitsar wakeriarmiayi. <sup>60</sup> Tura ni nukur̄i tímiayi “Atsá. Antsu ni naar̄i Juan̄ átatui.”

<sup>61</sup> Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. <sup>62</sup> Nuiñkia uchi apar̄in “¿Warí anaikiatajtsam wakeram?” tusar aya úwejejain̄ iniasarmiai.

<sup>63</sup> Tutai uchí apar̄isha “Nakash surusta; áartaj tusan wakerajai” tusa aya úwejejain̄ iniakmamiayi. Takui nakash susam, ni naar̄i Juánkaiti, tu áarmiai. Nuna wáinkiar “Ayawa urukakuñ ta” tu enentáimprarmiayi. <sup>64</sup> Nú chichamaik Sakarías chichatsuk pujamun chichakmiayi. Tura nuiñ Yusa náarin̄cha shiir awajsamiayi. <sup>65</sup> Nuiñkia ni írutramur̄isha ashamkarmiayi; tura ashí Jutía nuñka murá amia nuñ nu túrunamun ujakam ashí nekaawarmiayi. <sup>66</sup> Nu túrunamun antukar ti enentáimsarmiai. Tura “ju uchin Yus nekas pujurtsuk. Tuma asamtaí uunt ajas ¿urukuk ati?” tu enentáimprarmiayi.

### *Sakarías Yus jintintiam tímiania nu*

<sup>67</sup> Uchí apar̄i Sakarías, Yusa Wakaní pimiutkam tura Yus jintintiam, juna tímiayi:

<sup>68</sup> “Israer-shuartí ii Yusr̄i naar̄i shiir awajsatniuitji. Ii Yúsrīsha tarutmaitji. Tura uwemtikrampraitji. <sup>69</sup> Yaunchu ii uuntri Tawit Yusa wakeramur̄ijjaj̄i uunt akupin áchamkia. Tura ni ukur̄in ti kakaram Uwemtikkiartinian suramsaitji. <sup>70-72</sup> Yuska ii nemasriya tura in nakitramainiajnia nuyá uwemtikrampratniun enentáimsamia nuna, yaunchu ni etserniur̄in péñker armia nuna ujakmiayi. “Winia ti péñker chichamprun tájana nuna yapaj̄itsuk umirkan tuke wáitnentratajrume” yaunchu ii uuntrin̄ tímiania nunasha ni etserniur̄in ujakarmiayi. Yaunchu nu ujakma yamá iisha wainji. <sup>73-75</sup> Nu ujakman Yuska yámankamtaik imiá yaunchu ii uuntri Apraáman tíchamkia. Apraáman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwemtikrattajai. Sapijmiatsuk winia tuke takartusarat tusan túratjajai” Yus tímiayi Apraáman. Iisha ni shuar̄i asakrin, nuna taku incha túramaji. <sup>76</sup> Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntaj̄i émkim wétatme. <sup>77</sup> Ni shuar̄i, ni tunaar̄i tsan̄kurnar uwemprarat tusam túratame. <sup>78-79</sup> Yuska ashí shuaran anea asa, incha wáitnentrak ni pujamunmaya ni tsáapnintr̄in suramsaitji. Ni enentáin kiritniunam wekainia nuna, mesertinnium jeatemá áarmatai, ni tsáapnintr̄i jeat’ tusa túraití. Tura ashí incha ii enentáin imiatkinchanum wekasarmí tusa túraití.” Nuní tímiayi Sakarías.

<sup>80</sup> Uchisha tsakarmiayi. Tura Yúsán nekaki-nekaki wémiayi. Israer shuarum etserkatin tsawantri jeatsain̄kia atsamunam pujuyayi.

## 2

*Jesusa akiiniamur̄i*  
(Mateu 1.18-25)

<sup>1</sup> Wats, Juan akiiniamia nú uwitin uunt akupin Akustu ashí nunkanam áentsun nekapmarartí tu chichakmiayi. <sup>2</sup> Nu nekapmartinian yaunchu túrushtain yamá túriarmiayi. Siria nunkanam Seriniu akupin pujái túrawarmiayi. <sup>3</sup> Ni naari áartaj tusa ashí shuar ni nunkenin wétin árimiayi. <sup>4</sup> Tuma asamtai Jusé Nasarét péprunmayá Kariréa nunkanam amia nuyá jiinki Pirin péprunam Jutía nunkanam amia nuí wémiayi. Juseka Tawit weenam akiinia asa, ni nekas nunkenka Pirinkauyayi. <sup>5</sup> Nu asamtai, ni náarin áartaj tusa Jusé wémiayi Marijiaí. Marisha Jusé núweyayi. Tura tsaniñcharuyayi. Túmaitiat Marisha Yusa Wakaní kakarmarijiaí ajamtiniuyayi. <sup>6</sup> Tura nuí Pirinnum pujuiniaí Marí takustintri jeamiayi. <sup>7</sup> Nuí iwiairin uchin áishman kan takusmiayi. Tura uchi penutaijiaí penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

*Murikiun wáinniun nayaimpinmaya suntar Yus akatar akuptukmia nu*

<sup>8</sup> Tura Pirinnum tíjiuch murikiun wáinin kashi murikrin wáiniuk pujuarmiayi. <sup>9</sup> Túmainiaí nayaimpinmaya suntar murikiun wáinin matsatainian wantintiukmiayi. Tura Yúsnumiá tsáapnin ni matsatainiamunam etsantramiayi. Túrunamtai murikiun wáinniuka ti ashamkarmiayi. <sup>10</sup> Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjiarme. <sup>11</sup> Júiti: yamá tsawantaj uunt Tawitia péprurin Pirinnum yaunchu Yus anaikiamu KRISTU tutai, uwentikramprataj tusa akiinturmarme. Nu Uchisha ashí áentsun akupniuiti, tímiayi. <sup>12</sup> Tura jujai nekaattarme: uchi penutaijiaí penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.” <sup>13</sup> Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

<sup>14</sup> “Nayaimpinmasha Yus nankaamtuiti tu enentáimtusarti. Tura ju nunkanmasha Yusjai nawamnaikiaru ainia nu imiatkinchanum pujusarti.” Tu tiarmiayi.

<sup>15</sup> Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

<sup>16</sup> Nuna tiar wárik wearmiayi. Tura Marincha Jusencha wáinkiarmiayi. Tura uchincha waaka yurumtainiam tepan wáinkiarmiayi. <sup>17</sup> Wear nuna wáinkiar, nayaimpinmaya suntar uchi túrunamurin timia nuna etserkarmiayi. <sup>18</sup> Tura murikiun wáinin tiarmia nuna antukaruka ti enentáimtusarmiayi. <sup>19</sup> Túrasha Marikia ashí túrunamia nuna ni enentáijiainka enentáimtu pujumiayi. <sup>20</sup> Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmajnia tímiatrusan túrunayi” tiarmiayi. Tuma ásar Yusa náarin shiir awajsar kantampru-awar waketkiarmiayi.

*Uchin Jesusan Yusa Uunt Jeen itiarmania nu*

<sup>21</sup> Tura uchi akiiniamu uchu tsawant jeamtai, ni túrutairin túrin ásar, ni shunichiri nuapen tsupirkarmiayi. Túrawar Marí ajapratsain nayaimpinmaya suntar tímia nútiksan “Jesus” anaikiarmiayi. <sup>22</sup> Tura Muisais akiiniatniunam akupkamia núnisan, tsawantri jeamtai, Yusa Uunt Jeen Jerusarénnum uchin Yus iiktustai tusar júkiarmiayi. <sup>23</sup> Kame Yus-Papinium ju aarma awai:

“Ashí uchi iwiairi áishman akiinkiuñka Yusna átatui.” <sup>24</sup> Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iistí tusa Yusa Uunt Jeen Jerusarénnum pujana nuí itiararmiayi. Tura yampitsan jímiar an súsarmiayi. Muisáis akupkamun umiiniak nuna túrawarmiayi.

<sup>25</sup> Nu túmai Semeún naartin áishman Jerusarénnum pujumiayi. Semeúnsha Yusa Wakaní pujurma asa penker áishmankauyayi. Yusan nekas enentáimtiniuyayi. Yusa anaikiamurijiaí Israer-shuar ankant ajastin jeati tusa nákauyayi. <sup>26</sup> “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi. <sup>27</sup> Nú Semeún

Yusa Wakani “wetá” tutai, Yusa Uunt Jeen wémiayi. Tura nú tsawantai Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiararmiayi. <sup>28</sup> Itiararmatai Semeún uchin jusa miniakas Yúsan áujuk juna tímiayi:

<sup>29</sup> “Yamaikia, Uunta, Amiin wi jeatin ankant atí. Turutmiamna nu ímiatrusmek umikiume. <sup>30-31</sup> Ju Uchi ashí aents uwentikrartá tusam susamna nuna yamá imia winia jirujai wáinkiajai. <sup>32</sup> Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminium ájnia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

<sup>33</sup> Tura Semeún Uchiniun tu chicharkui Jusesha Jesusa nukurísha ti enentáimprarmiayi. <sup>34</sup> Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurí nakitrar iniarartatji. Tura chích Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmstatui. Tuma ain untsurí Aun yajauch chichariartatui. <sup>35</sup> Nujai shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiayi Semeún.

<sup>36</sup> Nuwasha Ana naartin nuj Yusa Uunt Jeen pujumiayi. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwá. Niisha ti úuntchiyayi. Niisha yama nuatnaikiamujai siati uwi ni áishrijiai tsanin pujusarmiayi. <sup>37</sup> Tura wajemamiayi. Tura uchenta kuaru uwi takakuyayi. Tura ninikia Yusa Uunt Jeeniá jíintsuk káshisha tsawaisha tuke Yúsan áujniuyayi. Tura yurumtsuk Yúsan áujniuyayi. <sup>38</sup> Semeún tuasua amikmatai Anasha taa, Uchin wáiniak Yúsan yuminsamiayi. Tura Jerusarénum Yus uwentikrampratai tusa nákarmia nuna ájukunka uchin áujmat wémiayi.

### *Nasarénum waketkiarmiania nu*

<sup>39</sup> Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarénum Jusesha Marisha Uchisha waketkiarmiayi. <sup>40</sup> Uchi Jesus tsakaki, kakaram ajaki tura nú nankaamas nekaki wémiayi. Tura Yus Nin ti shiir awajsamiayi.

### *Jesus Yusa Uunt Jeen túrunamuri*

<sup>41</sup> Jusesha, Jesusa nukurísha tuke uwitin paskua námper jeakui Jerusarénum weu áirmiayi. <sup>42</sup> Ni túrutairi túruiniak, Jerusarénum weak Jesusan tuse uwíjeamtai júkiarmiayi. <sup>43</sup> Námper amuukamtai ni nukurísha Jusesha nékachmanum Jesuska Jerusarénum juákmiayi. <sup>44</sup> Marisha Jusesha “wí shuarjai winiawai” tusa, núnaka eątsuk chikichík tsawant wekasarmiayi. Nuyá wáinkiatat tukamá, ni shuariin tura ni nékamunam eąkarsha, <sup>45</sup> wáinkiacharmiai. Nuinkia Jerusarénum ataksha waketrukiarmiayi, eąktai tusar. <sup>46</sup> Tura menaintiú tsawant eąkar Yusa Uunt Jeen Yus akupkamun jintinnian anturak anintrú pujan wáinkiararmiayi. <sup>47</sup> Tura nuj ashí Jesusan anturkarmiania nu, niisha ti nékakui tura áimtanash ti penker áimkiui, ti enentáimturarmiayi. <sup>48</sup> Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiayi “Uchiru, ąasha urukamtai iturchat enentáimtikrurmam? Ame apasha wisha urukayik tusar ti eąkjame” tímiayi.

<sup>49</sup> Tutai Jesus tímiayi “¿Urukamtai eątrum? Winia Aparnan túratniuitjiana nuka nékatsrumek” tímiayi.

<sup>50</sup> Tura timia núnaka penké nekaacharmiayi. <sup>51</sup> Nuyá Jesus niijiai Nasarénum waketkimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. <sup>52</sup> Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

## 3

*Imiakratin Juangka etserkamuri**(Mateu 3.1-12; Márkus 1.1-8; Juan 1.19-28)*

<sup>1</sup> Tipiriu uunt akupin pujamu kinse uwí jeamtai, Jutía nunkanam Punseu Piratu akupin pujumiayi. Tura Kariréa nunkanam Erutis akupin pujumiayi. Itiurea nunkanmasha Trakuniti nunkanmasha ni yachi Jiripi akupin pujumiayi. Tura Apirinia nunkanam Risanias akupin pujumiayi. <sup>2</sup> Tura nu uwitin Anassha Kaipíassha Israerpatri uuntri pujuarmiayi. Nu uwitin Sakaríasa uchirí Juan atsamunam pujan Yúsaiya chichaman antukmiayi. <sup>3</sup> Nuyá Jurtañ entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajiárum imiantiarum.” Tu ujakmiayi. <sup>4</sup> Nu ujakman Isayas yaunchu juna áarmiayi:

Atsamunam wekaana nu untsunun ántuiniawai. Nii untsunuk juna tawai: Atumí enentái Uunta jintí iwiarturtarum; naka awajsatarum. <sup>5</sup> Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti.

<sup>6</sup> Túrunamtai ashí nunkanmaya aents Yúsaiya uwempratin aan nekaawartatui.

<sup>7</sup> Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi. <sup>8</sup> “Iikia Apraám weeitji, tuma asakrin Yus shiir enentáimturmaji” tu enentáimtumasairap. Antsu enentáim yapajiámuitkiuinikia péñker wekaamurmijjai paant iniakmasterum. Warí, Yus wakerakka, ju kayan Apraáma shuarin páchitsuk najankainti, tímiayi. <sup>9</sup> Aneartarum. Numi ajaktinian kampuwarin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

<sup>10</sup> Tutai aentska enentáimprar “¿Nuinikia itiurkatjik?” tiarmiayi.

<sup>11</sup> Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

<sup>12</sup> Uunt akupniuí kuítrin juu armia nú shuar imiantiaj tusar Juáñkan weriar aniasarmiayi. “Uunta, ¿iisha warí itiurkatjik?” tiarmiayi.

<sup>13</sup> Tutai Juan tímiayi “Kuit uunt akupin tana nu iniankasrum achikiairap.”

<sup>14</sup> Suntarsha aniasarmiayi “Uunta, ¿iisha warí itiurkatjik?”

Juañsha tímiayi “Ame kakarmarmijjai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

<sup>15</sup> “Ju Juan Yusa anaikiamurin chuashit” tu enentáimsar paant nekaataitsar náarmiayi.

<sup>16</sup> Tumaj Juan tímiayi “Wikia aya ayashmin entsanam imiajrume. Tura wijjai nankaamas ana nu tátatui. Ni sapatrí jin kiamurinkisha atitrachminiaitjai. Niisha taa, imiantinia áanis tura jíiya áanis Yusa Wakanin enketramprattarme. <sup>17</sup> Shuar aruasan awajtia núnisan, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

<sup>18</sup> Juan nu arant shiir chichaman áentsun ti núkap ujakarmiayi. <sup>19</sup> Tura nuyasha akupin Erutisan chicharkamiayi. Ni yachi Jiripi nuarin Jirutíasan kasaraku nuatkui tura chikich yajauchincha túrakui chicharkamiayi. <sup>20</sup> Tura Erutis núnaka ántutsuk chikich yajauchin túramiayi. Juáñkan achik sepunam enkeamiayi.

*Jesusa imianmiari**(Mateu 3.13-17; Márkus 1.9-11)*

<sup>21</sup> Nu túruntsain, Juangsha ashí nú nunkanmaya áentsun imiak pujurainai Jessusha imianmiayi. Niisha Yusan áujuk pujaí nayaimpisha uranmiayi. <sup>22</sup> Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

*Jesukrístu shuari*  
(Mateu 1.1-17)

<sup>23</sup> Jesus trainta (30) uwí takaku asa ni takatrín nan̄kamamiayi. “Jusé uchirínti” tiniu armiayi. Jusésha Iría uchiríyayi. <sup>24</sup> Irísha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi; <sup>25</sup> Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi; <sup>26</sup> Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi; <sup>27</sup> Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi; <sup>28</sup> Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi; <sup>29</sup> Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi; <sup>30</sup> Matat Riwi uchiríyayi; Riwí Semeún̄ka uchiríyayi; Semeún̄ Jutáa uchiríyayi; Jutá Jusé uchiríyayi; Jusé Junan̄ka uchiríyayi; Junan̄ Iriakímia uchiríyayi; <sup>31</sup> Iriakím Mirea uchiríyayi; Mirea Mainián̄ka uchiríyayi; Mainián̄ Matata uchiríyayi; Matata Natan̄ka uchiríyayi; <sup>32</sup> Natan̄ Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramún̄ka uchiríyayi; Saramún̄ Naasun̄ka uchiríyayi; <sup>33</sup> Naasun̄ Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi; <sup>34</sup> Jutá Jakupa uchiríyayi; Jakup Isaka uchiríyayi; Isak Apraáma uchiríyayi; Apraám Tarea uchiríyayi; Taré Nakura uchiríyayi; <sup>35</sup> Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi; <sup>36</sup> Sara Kainián̄ka uchiríyayi; Kainián̄ Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi; <sup>37</sup> Ramik Matusarín̄ka uchiríyayi; Matusarín̄ Enuka uchiríyayi; Enuk Jaritia uchiríyayi; Jarit Maararíira uchiríyayi; Maararíir Kainian̄ka uchiríyayi; <sup>38</sup> Kainian̄ Enusa uchiríyayi; Enus Seta uchiríyayi; Set Atan̄ka uchiríyayi; tura Atan̄ Yus najanamuyayi.

## 4

*Jesusa nekapsamuri*  
(Mateu 4.1-11; Márkus 1.12-13)

<sup>1</sup> Jesusa enentáin Yusa Wakaní pimiutkamiayi. Jesussha Jurtan̄ entsanmaya waketkimtai Yusa Wakaní aents atsamunam jukimiayi. <sup>2</sup> Tura nuísha kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin Jesus yurumtsuk pujá asa ti tsukammiayi. <sup>3</sup> Nuín̄kia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

<sup>4</sup> Tutai Jesus tímiayi “Yus-Papí tawai:

“Aya apatkujain̄ shuar iwiaaku pujuschamniaiti. Antsu ashí Yus-Chicham tana nujai nekas iwiaaku pujusminiaiti,” tawai” tímiayi.

<sup>5</sup> Tura nuyá íwianch naint yakí wájakmanum jukí, ashí nun̄ka ainia nuna ju chichamaik iniaktusmiayi. <sup>6-7</sup> Tura chicharuk tímiayi “Ashí ju nun̄ka wáinmena nu wíniaiti. Tura wi wakerajna nú shuaran súsatniuitjai. Tuma asantai tikishmatrurakminkia ju nun̄kanam ashí akupkatniun susattajme. Tura nuí ni wariri ainia nusha áminiu átatui” tímiayi.

<sup>8</sup> Tutai Jesus tímiayi “Yus-Papí tawai:

“Aya Niñki Yus ame Úntrum tikishmatram enentáimtustiniaitme.”

Tau asantai, werumta, iwianchi” tímiayi.

<sup>9</sup> Ataksha íwianch Jesusan Jerusarén̄ péprunam jukimiayi. Tura Yusa Uunt Jee yakiini iwiak tímiayi: <sup>10</sup> “Yus-Papí tatsuk:

“Yuska ni suntarin wáinkiatá tusa akupturmaktatui. <sup>11</sup> Kayanam ajintrain tusa wenkurmaktatui.”

Tuma asamtai nekas Yusa Uchirinkiumka juyá akaikim iniaata” tímiayi. <sup>12</sup> Tutai Jesus áimiuk tímiayi “Yus-Papí junasha tawai:

Yus ame Úuntrum nekapsataj tiip.”

<sup>13</sup> Tuma asamtai íwianch penké tujintiak ishichik tsawant Jesusan iniaisamiayi.

*Kariréa nunkanam Jesus ni takatrin nankamamiania nu*

*(Mateu 4.12-17; Márkus 1.14-15)*

<sup>14</sup> Jesus ni enentáin Yusa Wakaní kakarmari pimiutkamu ajas Kariréa nunkanam waketkimiayi. Nu nunkanam nankaamantu túramurin áujmatiarimiayi. <sup>15</sup> Nu nunkanam ashí péprunam Israer-shuar iruntai jea armia nu unuiniarmiayi. Tura anturkarmia nuka ni náarin shiir awajsarmiayi.

*Jesus Nasarétnum pujumiania nu*

*(Mateu 13.53-58; Márkus 6.1-6)*

<sup>16</sup> Ni tsakarmariin Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujsatat tusa wajakmiayi. <sup>17</sup> Nuñkia Yúsna etserin Isayasa áarmarin súsarmiayi. Nuna urak, nu juna áarman wáinkiamiayi:

<sup>18</sup> Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuíti. Tura jii kusuruncha ímtiktinian, tura yajauch awajsamu ainia nuna péñker awajsatniuncha, <sup>19</sup> tura Uunt Yus, shuáran yaintin tsawantri jeán etserkatniuncha akuptukuíti.

<sup>20</sup> Nu áarman aujsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. <sup>21</sup> Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

<sup>22</sup> Jesusan ashí péñker áujmatiarimiayi. Tura Jesus ti shiir chichaakui ti enentáimprar “Juka Jusé uchirinchukait” tiarmiayi. <sup>23</sup> Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juisha túrata tusarum nu turuttiatrume. <sup>24</sup> Túrasha nekas tájarne, Yúsna etserniun ni nunkenkikia nii tana nuna anturainiatsui. <sup>25</sup> Nuyasha tájarne, Irías pujumia nú tsawantin, menaintiú uwí nankaamas yumi yutukcha asamtai ashí Israer nunkanam ti tsuka amia nu ti untsurí waje irunmiayi. <sup>26</sup> Tuma ain nu wajen yainti tusa Yus Iríasan akuptukchamiayi. Antsu chíchich nunkanmaya wajen Sarepta péprunam pujumia nuna yainti tusa akuptukmiayi. Sarepta pepru Sitiún péprunam tíjiuch pujawai. <sup>27</sup> Núnisan ii nunkesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíchich nunka, Sírianmaya Naaman kan tsuármiayi” tímiayi Jesus.

<sup>28</sup> Israer-shuarsha iruntai jeen pujuarmia nu, nuna antukar ti kajerkarmiayi. <sup>29</sup> Tura wajakar Jesusan jiki péprunmaya akupkarmiayi. Tura pepru amia nu naint yakí náñkatkamunam, nuyá akaki ajuatai tusar júkiarmiayi. <sup>30</sup> Túrasha Jesuska irunar matsainiamunman etempraktak jiinki wémiayi.

*Iwianchrukun Jesus tsuármiania nu*

*(Márkus 1.21-28)*

<sup>31</sup> Nuyá Jesus Kariréa nunkanam Kapernáum pepru amia nu wémiayi. Tura Israer-shuara ayampratin tsawantriin tuke etserki wémiayi. <sup>32</sup> Yusa kakarmarin takaku asa nujai etserkamiayi. Tuma asamtai “Yusa kakarmarijai unuitiamtsujik” tiar ti enentáimprarmiayi.

<sup>33</sup> Chíkich tsawantaj áishman iwianchruku Israer-shuar iruntai jeanam pujumia nu untsumuk tímiayi, <sup>34</sup> “Inikiartusta. Iikia Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeka ti penker Tunaarincha núitme” tímiayi.

<sup>35</sup> Tutai Jesus iwianchin kakantar chicharuk “Takamatsata. Ju áishman ikiuktia” tímiayi.

Tutai nu chichamaik íwianch áishmannumiã jiinki weak nunká ajuant ikiukmiayi. Túrasha nekas yajauch awajtsuk ikiukmiayi.

<sup>36</sup> Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman Yusa kakarmaríjiaj iwianchin jiki awematsuk” tiarmiayi.

<sup>37</sup> Tura ashí nú nunkanam Jesusa túramurín áujmatiararmiayi.

### *Semuñ Pitru tsatsarín Jesus tsuármiania nu*

*(Mateu 8.14-15; Márkus 1.29-31)*

<sup>38</sup> Jesussha Israer-shuara iruntai jeeniã jiinki Semuñka jeen wémiayi. Semuñka tsatsarí tsuer ti jáamiayi. Ti jaakui Jesusan “tsuárturtá” tiarmiayi. <sup>39</sup> Jesussha jaa tepan tsuntsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

### *Untsurí jaan Jesus tsuármiania nu*

*(Mateu 8.16-17; Márkus 1.32-34)*

<sup>40</sup> Etsa akaikin aji ni shuari nánkamas sunkurjai jaarmia nuna Jesusan ikiaatkarmiayi. Jesussha jáinian chikichkiniak chikichkiniak uwejejai antinmiar tsuármiaiayi.

<sup>41</sup> Ti untsurí iwianchruku armia nunasha iwianchrin jirkiarmiayi. Jíinkiar íwianchkia untsumainiak “Ámeka Yusa Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiatmamtiarmiayi.

### *Kariréa nunkanam Jesus etserkamiania nu*

*(Márkus 1.35-39)*

<sup>42</sup> Kashin káshik tsawaak Jesus péprunmaya jiinki atsamunam Niniki wémiayi. Tura shuarsha eakiar ni pujamunam jeariarmiayi. Tura iijjai tuke pujusat tusar emetataitsar wakeriarmiayi. <sup>43</sup> Túmaiñ Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktiniaitjai. Nu túrata tusa akupka-muitjai” tímiayi. <sup>44</sup> Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

## 5

### *Namakan ti untsurín achikiarmiania nu*

*(Mateu 4.18-22; Márkus 1.16-20)*

<sup>1</sup> Chíkich tsawantaj Jesus Jinisarít antumianka tutainium káanmatkarí pujaj ti untsurí shuar, Yusa chichamen antuktai tusar wakeruiniak Jesusaj káunkarmiayi. Antuktai tusar wakeruiniak kae ajattsarmiayi. <sup>2</sup> Tura jimiará kanun antumiankan káanmatkaríin tepan wáinkiararmiayi. Ni nérenniurínkia jíinkiar ni nekarín nijiá pujuinia asamtai kánuka ankant ármiaiayi. <sup>3</sup> Tuma asamtai Jesus Semuñka kanurín enkempramiayi. Tura Semuñkan chicharuk “Ishichik ajapén juruktía” tímiayi. Nuñkia kanunam enkemas áentsun káanmatkanam pujuinian unuiniamiayi. <sup>4</sup> Unuinasua amik Semuñkan chicharuk “Kanu kunanam jukim neka aji ajunkatarum” tímiayi.

<sup>5</sup> Tutai Semuñ tímiayi “Túrasha, Untá, káshisha tuke aju-junkuar tsawarji. Túrasha penké achikchaji. Kame áankisha Ame támajaj ajunkatjai” tímiayi.

<sup>6</sup> Tura ajunkar namakan ti untsurín achikiarmiayi. Túram nekasha jaanaki wémiayi. <sup>7</sup> Tuma asamtai ni írutkamurín chíkich kanunam pujuinian uwejejai “winitia,

yáintkiamniuram” tusar untsukarmiayi. Niisha táarmiayi. Túrawar jimiará kanunam métej awajsarmiayi. Tura kanusha init wayastatuk ajamiayi. <sup>8</sup> Nuna túramtai Semun̄ Pítiur Jesusan tikishmatar tímiayi “Uuntá, wikia ti tunaitjai. ¿Wíjiaisha itiurak pujustam?” <sup>9</sup> Semun̄sha ni írutkamurijjaj namakan timiá untsurín wáinkiar ashamkarmiayi. Tuma asa Semun̄sha nuní tímiayi. <sup>10</sup> Tura Sepetéu uchirí Jakupusha Juansha Semun̄jaj pujuarmia nusha ashamkarmiayi. Tura Jesus Semun̄kan tímiayi “Ashamkaip. Yamaikia namaka-achinia áintsamek aents-eəu ajastatme.” <sup>11</sup> Nuyasha kanurín kukar júkiar, ashí takakmaríncha ikiukiar Jesusan nemarki wearmiayi.

*Tunamaru áishman̄kan Jesus tsuármiania nu*  
(Mateu 8.1-4; Márkus 1.40-45)

<sup>12</sup> Ukunam Jesus chíkich péprunam pujaj tunamaru áishman̄ taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

<sup>13</sup> Nuna tutai Jesus antin̄ tímiayi “Wakerajai. Tsuaajme.” Tura nú chichamaik tunamarusha péñker ajasmiayi. <sup>14</sup> Túrasha Jesus chicharuk “Ámeká nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkamia núnismek susata. Nujaj ashí shuar ame péñker ajasmarmín nekaawartatui” tímiayi.

<sup>15</sup> Tura Jesusa túramurí ti etsernamiyai. Túmakui untsurí aents anturkataj tusar káutkarmiayi. Tura ni sun̄kuríncha tsuámartaj tusar káutiarmiayi. <sup>16</sup> Núnisan̄ Jesuska aents atsuiniamunam we ni Aparín áujmiayi.

*Emearun Jesus tsuármiania nu*  
(Mateu 9.1-8; Márkus 2.1-12)

<sup>17</sup> Chíkich tsawantaj Jesus unuiniak pujaj Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarénnumiasha káunkarmia nu antúu pujuarmiayi. Jaa tsuártinian Yusa kakarmarín takakuyayi Jesus. <sup>18</sup> Nuiñkia emearun tampumpua kuaru shuar itiararmiayi. Jesus pujamunam init awayat̄tsar wakeriarmiayi. <sup>19</sup> Tura shuar ti untsurí piaku asamtai wayamnia atsumiyai. Túmaitkui yakiin̄ wear jeən urakar, aents kaē ajas matsatmanum Jesus pujamunam emearun tampunam nená itiararmiayi. <sup>20</sup> Nin itiarmanianu nu, Jesus Yusa kakarmarín takakui, tú enentáimtamun Jesus nekáa emearun tímiayi “Ame tunaarum tsan̄kuramuitme.”

<sup>21</sup> Nuiñkia Israer-shuara jintinniurisha, Pariséusha ni enentáin enentáimsar “¿Jusha yait Yúsa náarin̄ yajauch awajtin? Warí, aya Yúsak tunaan tsan̄kurachminkiait” tu enentáimsarmiayi.

<sup>22</sup> Tura Jesus ni enentáimsamurín nekáa tímiayi “¿Urukamtai tú enentáimprarum átum?” <sup>23</sup> Nuiñkia ¿warí imiá yúpichuchit, tsuártiniak, ni tunaarí tsan̄kuratniuk? <sup>24</sup> Wats, Aents Ajasu tutai Wisha tunaan tsan̄kuratniun Yusa kakarmarín takakjai. Jujaj nekaatarum tusan wats iturchat tárugna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeem̄in wetá.”

<sup>25</sup> Nú chichamaik emearu niisha ímiainiamunman̄ tampurín achik wajaki ni jeən Yúsan wararki wémiayi. <sup>26</sup> Túmakui ashí shuar ti enentáimprar Yusa náarin̄ shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

*Riwin Jesus untsukmiania nu*  
(Mateu 9.9-13; Márkus 2.13-17)

<sup>27</sup> Ukunam Jesus wekas akupniu kuítrin̄-juu, naarí Riwí, ni chíkich naarí Mateu, akupin akitiai jeenam pujan wáinkiamiayi. Wáiniak “nemartusta” tímiayi. <sup>28</sup> Tutai Riwí wajaki takakmarínkia ikiuak Jesusan nemarsamiayi.

<sup>29</sup> Nuyá ukunam Riwí namperan Jesusan najatamiayi. Tura untsurí akupniu kuítrin̄-juu tura chíkich shuarsha káunkar misanam pujuarmiayi. <sup>30</sup> Tura Pariséusha Israer-shuara jintinniurisha Jesusan tsanumpruiniak Jesusa unuiniamurín tiarmiayi “¿Maaj,



urukantai atumsha akupniu kuítrín-juu ainia nújaisha tura chíkich yajauch shuarjaisha iruntrarum yurumprum?”

<sup>31</sup> Tutai Jesus áimkiamiayi “Shuar jaachu péñker ainiana nu ¿tsuákratniun atsumaini-awak? Antsu jaa ainia nu tsuákratniun atsumainiawai. <sup>32</sup> “Wikia péñkeraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

*Yurumtsuk Yus áujsatniun Jesusan aniasarmiania nu  
(Mateu 9.14-17; Márkus 2.18-22)*

<sup>33</sup> Nuyá Jesusan aníak tiarmiayi “Juanka unuiniamurisha, Pariséu unuiniamurisha yurumtsuk Yúsan áujainiatsuk. Tura ame unuiniamurmeka ¿urukantai ijiarma Yúsan áujainiatsu?” tiarmiayi.

<sup>34</sup> Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamáinuatu pujai? <sup>35</sup> Atsá. Wats Wisha ukunam junaktiatjai; nuinkia ijiarmatin átatuí” tímiayi.

<sup>36</sup> Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkam arut pushijjai mai metek yamaram wáinkiachminiaiiti. <sup>37</sup> Núnisañ nijiamanch yamáí nawamu nuap najanam arutnum yaraachminiaiiti. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai. <sup>38</sup> Tuma asantai nijiamanch yamáí nawamu yamaram nuap najanamunam yaraatniuiti. Nu túramka mai metek péñker átiniaiiti. <sup>39</sup> Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatuí” tímiayi Jesus.

## 6

*Ayampratin tsawantaj trikiu neren achikiarmiania nu  
(Mateu 12.1-8; Márkus 2.23-28)*

<sup>1</sup> Ayampratin tsawantaj Jesussha unuiniamurijjai araamunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi. <sup>2</sup> Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nuí, ¿urukantai takaarum?”

<sup>3</sup> Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. <sup>4</sup> Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátrirí yúatin ármiai. Tuma ain Tawitcha yajauchin túrutsuk achikmiayi, tímiayi. <sup>5</sup> Wisha Aents Ajasuitkiun ayampratin tsawantan Nérenniurintjai” tímiayi Jesus.

*Shuara uweje jakaan Jesus tsuármiania nu  
(Mateu 12.9-14; Márkus 3.1-6)*

<sup>6</sup> Chíkich ayampratin tsawantaj Israer-shuar iruntai jeanam Jesus wayá unuiniartasa nankamamiayi. Nuí shuar uweje untsuurja nu jakaa pujumiayi. <sup>7</sup> Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi. <sup>8</sup> Túrasha Jesuska ni enentáimmarín nekariarmiayi. Túmayat uweje jakaan chicharuk “Juí ajapén wajasta” tímiayi. Tutai áishman ajapén wajasmiai. <sup>9</sup> Nuinkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujai ¿tuá péñkerait? ¿Uwemtikratin, máatniujajisha tuá péñkerait?” tímiayi. <sup>10</sup> Nuyá téntakarmia nuna iis áishman kan tímiayi “Uwejem takuitia.” Áishmansha uwejen takuimtai nú chichamaik péñker ajasmiai. <sup>11</sup> Tura chíkichkia ti kajerarmiai. Túrawar “Jesus warí iturkamniakit” tusar aniniaismiai.

*Tuse unuiniamun Jesus anaikiamiania nu  
(Mateu 10.1-4; Márkus 3.13-19)*

<sup>12</sup> Nuyá Jesus Yúsán áujساتaj tusa náinnium wakamiayi. Tura nu kashi Yúsán au-aujkua tsawarmiayi. <sup>13</sup> Tsawarmatai unuiniamurin ikiankar tuse anaikiamiayi. “Winia akatramurutume” tímiayi. <sup>14</sup> Ju ármiai: Emka, Semun chíkich naari Pítiur apujtusmia nu; tura nuyá ni yachi Antres, Jakupusha, Juansha, Jiripisha, Parturumísha, <sup>15</sup> Mateusha, Tumassha, Arpeu uchiri Jakupusha, Ásump Semunsha, <sup>16</sup> Jakupu yachi Jútassha, tura Jútas Iskariúti Jesusan ukunam surukmia nu. Nu tuse achikma ármiai.

*Untsurí shuaran Jesus yáinkiarmania nu  
(Mateu 4.23-25)*

<sup>17</sup> Niijjai Jesus náinniumia pakanam taawarmiayi. Nui pujusarmiayi. Nuisha untsurí unuiniamurisha, tura Jutía nunkanmaya, tura Jerusarénumia tura nayaantsanam ayamach Tiru, tura Setun péprunmaya ti untsurí aents antuktaitisar pujuarmiayi. Jesus tsuarati tusar káunkarmiayi. <sup>18</sup> Iwianchrukusha tsuámararmiayi. <sup>19</sup> Jesus tsuártinian tujinkiachu asamtai ashi shuar antiñtaj tusar wakeriarmiayi.

*Náinnium Jesus etserkamu  
(Mateu 5.1-12)*

<sup>20</sup> Ni unuiniamurin Jesus iis juna tímiayi: ““Yusan atsumajai” tárugna nu, Yus akupea-munam páchitkiaitume; tuma asamtai warasminiaitume.’

<sup>21</sup> ‘Yamá tsukarmena nu ukunam ejemartatume. Tuma asamtai warasmini-aitume. Yamái útrumna nu, ukunmañka wishirtatume. Tuma asamtai warasmini-aitume.’

<sup>22</sup> ‘Atumin nakitramprarmatai, ajapramawarmataisha, tura Winia Aents Ajasu tutaia nú shuar ajasuiti tusar tsanumprutmak katsekkramkarmataisha warasmini-aitume.’

<sup>23</sup> ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsán etserniun nútiksaran yajauch awajsacharmakia.’

<sup>24</sup> ‘Tura kuítrinniutiram atumsha atumí waratairi aya yamaik waintrume. Ukunmañka waraschattarme.’

<sup>25</sup> ‘Atsumatsjai, tu enentáimprumna nu, ukunmañka atsumattarme. Nuñkia waraschattarme. Yamái wishíarmena nu, ukunmañka wáitiakrum úttiatume. Nuñkia waraschattarme.’

<sup>26</sup> ‘Ashí aents atumin shiir awajtamkurmin aneartarum. Nujai waraschatniuitume. Warí nuna uuntri ántar-yusnan etserin armia nuna nútiksaran yaunchu shiir awajsarmi-ayi.’

*Ii nemasri aneatniun Jesus unuiniamiayi  
(Mateu 5.38-48; 7.12)*

<sup>27</sup> ‘Winia anturtarmena nuna juna tájarme: Ame nemasrum aneata, nakitramainia nusha shiir awajsata; <sup>28</sup> yajauch chichartamainia nusha shiir enentáimtusarta; katsekramainia nusha Yus áujtusarta. <sup>29</sup> Ame yapimin ijiutmamtai áatú yapiruisha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam ini-aisata. <sup>30</sup> Seatmana nu susata, tura áminiun jurutramainiakuisha ataksha awanturkitia tiip. <sup>31</sup> Chíkich winia túrutati tusam wakeramna nútiksamek chikichcha túrata.’

<sup>32</sup> ‘Iista, aya atumin anenmainia nuke aneakmesha, ¿nusha warí péñkera túrarum? Yajauch shuarsha nuna túrin ániawai. <sup>33</sup> Tura atumniasha péñker awajtamainia nuke péñker awajkurmesha ¿nusha warí péñkera túrarum? Yajauch shuarsha nuna túrin ániawai. <sup>34</sup> Awanturkimniaiti tu enentáimtarum nuke íkiakrumsha ¿nusha warí péñkera túrarum? Yajauch shuar nuamtak yajauch shuarjai awanturkimniaiti tu enentáimsar ikianainiawai. <sup>35</sup> Tura atumsha nemasrum aneatniuitume, tura péñker túratniuitume,

tura awanturkittiawai tu enentáimtsuk ikiastiniaitrome. Túrakrumninkia Uunt Yus péñker akirmaktatrome; tura ni uchiríntjai tu iniakmastatrome. Yuska, “yumínsajme” ticha nunasha tura yajauch shuarnasha shiir awajeawai. <sup>36</sup> Ii Aparí waitnentramniua nútiksarmek atumsha waitnentratarum.’

*Chikicha túramurí ti enentáimtusairap*  
(Mateu 7.1-5)

<sup>37</sup> ‘Chikicha túramurí ti enentáimtusairap. Núnisan Yuska atumí tunaarín iirtamsashtatui. Chikicha tunaarín “nuke asutniatniuiti” tiirap. Núnisan Yus atumin sumamtikramashtatrome. Tsankurnairatarum. Núnisan Yus tsankurtamprattawai. <sup>38</sup> Chikichcha susata. Núnisan Yus atumin suramsattarme. Niisha péñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksán atumniasha túrutmattarme.’

<sup>39</sup> Tura nuyasha juna métek-taku chichaman ujakarmiayi: “Jíi kusurusha ¿itiurak chíkich kusuruncha jukimniait. Mai metek waanam iniaashtatuak? <sup>40</sup> Unuiniamua nu unuiniana nuna nankaamas áchatniuiti. Túrasha niisha ti unuimiatar unuiniana nujají métek nekaamniaiti.’

<sup>41</sup> ‘¿Itiurtsuk atumí jíin numi enketna auk ítskesha atumí yachí jíin tsuat enketusha iiyarum? <sup>42</sup> Ame jíimjín numi tuke enketaisha ¿itiurtsuk ame yatsumi jíiyá tsuátan jurustajme tame? ¡Ántrairume! Emka ame jíimjín numi enketna nu jusata. Nuínkia paant wáinkiatame yatsumi jíin tsuat enketna nu jurustin.’

*Nerejai numi nekaatainti*  
(Mateu 7.17-20; 12.34-35)

<sup>43</sup> ‘Péñker numi yajauchin nereatsui; tura yajauch numi péñkeran nereatsui. <sup>44</sup> Numisha ni nerén nékanui. Tsachikniumiasha kushínkiap júukchamniaiti. Tura naranmaya shuinia júukchamniaiti. <sup>45</sup> Núnisan péñker shuar ni enentái péñker asamtai péñkeran chichaawai; tura yajauch shuar, enentái yajauch asamtai yajauchin chichaawai. Páantchakait. Enentáin pimiutkamu ana nuyan ni wenejai chichaawai.’

*Jimiará jea ukurtin*  
(Mateu 7.24-27)

<sup>46</sup> ‘Wi tájana nu túrachiatrumsha ¿urukamtai Winia, Uunta, túrutrum? <sup>47</sup> Shuar winia chichamprun ántuinia nu jea jeammajají métekete. Winia anturtuk umiana nu jujají métekete: <sup>48</sup> Shuar jean jeamuk emka inít taur kayanam ukurmai. Tura yumi ti yutuk, entsa nujankrua tukummaiat pukukachmai kayanam ukuamu asa. <sup>49</sup> Antsu Winia anturtukiat umiatsna nuka jujají métekete: Shuar jean jeamuk aya naikminiam jeammai. Tura entsa nujankrua tukumpram nu jeaka pukukamai. Tura mash sáantramai.” Tu unuiniamiyi Jesus.

## 7

*Suntara yáintrín Jesus tsuármiania nu*  
(Mateu 8.5-13)

<sup>1</sup> Jesus áentsun unuiniasua amik Kapernáum péprunam wémiayi. <sup>2</sup> Nuí Rúmanmaya suntara kapitíántri pujumiayi. Nu kapitíáni takarniuri, ti aneamuri, jakamnia jaamiayi. <sup>3</sup> Tura Jesusan pachis áujmatainian antuk, ame shuarum Jesusan itiartiti tura winia takarniun tsuárturti tusa Israer-shuara úuntrín akupkamiayi. <sup>4</sup> Niisha Jesusan weriar, umirtukat tusa ti seainiak tiarmiayi “Ju kapitíán nekas yáintin péñkeraiti. <sup>5</sup> Niisha yajaya apachitiat in shiir enentáimturmají. Tura iruntai jean jeamtinniasa níinkí chicharkaiti, tura yayawai.”

<sup>6</sup> Nuyá Jesus niijjái wémiayi. Tura ni jeen jeastatuk jatemsantai kapitiáncha ni amikrín akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántam wayataj tu enentáimsaip. Ame ti nankaamaku asam winia jearuí wayachminiaitme. <sup>7</sup> Tuma asakmin imia wiki Amiin jeatniun arantukjame. Ayatik “pénker ajastí” tákumin winia takarniusha pénker ajatrustatui. <sup>8</sup> Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitiá” tutai winiawai. Tura winia takartinian “ju túratá” tutai umíawai.” Tu tímiayi.

<sup>9</sup> Jesus nuna antuk ti enentáimias ni nemarainian tímiayi “Nekas tájarne Israer-shuar Yúsán tímiatrus enentáimtinian wáinchaitjai.”

<sup>10</sup> Tura kapitiani akatramurí jeá waketkiar, takarniurí pénker ajasun wáinkiararmiayi.

### *Wajé uchirín Jesus iniantkimiania nu*

<sup>11</sup> Nuyá ukunam chíkich pepru Naín tutainium ni unuiniamuríjjái tura chíkich untsurí aentsjai Jesus wémiayi. <sup>12</sup> Tura péprunam nuntumas jakaan iwíarsatai tusar juínian wáinkiamiayi. Jakáa nukurí wájeyayi, tura uchirí jakamia núchikiiyayi. Tura ti untsurí nu peprunmayá nin nemarsarmiayi. <sup>13</sup> Jesus nu wajen wáiniak tura waitnentar “úutip” tímiayi.

<sup>14</sup> Nuínkia Jesus jakaa enkerman tarunt antiñmiayi; nuna juíniasha wajasarmiayi. Nuínkia Jesus jakaan chicharuk “Umpa nantaktia, tájame” tímiayi.

<sup>15</sup> Tutai niisha nantaki pujus chichaamiayi. Tura Jesus ni nukurín “Jujú uchiram” tímiayi.

<sup>16</sup> Tura matsamiarmia nu, nuna wáinkiar ashamkarmiayi. Tura Yusa náarín shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

<sup>17</sup> Tura ashí Jutía nunkanmayásha tura ni írutkamu nunka ármia nuyásha Jesus túramia nuna nekaawarmiayi.

### *Imiakratin Juan sepunam pujak ni amikrín akatar Jesusan akuptukarmiania nu (Mateu 11.2-19)*

<sup>18</sup> Juan ni írutkamurí ujakam Jesus túramun nekaamiayi. Nekáa ni írutkamurín jímiaran untsukmiayi. <sup>19</sup> Tura Jesusai akupkarmiayi. “Atumsha Jesus aníastarum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa ikiuutarum’ tímiayi.

<sup>20</sup> Tutai niisha Jesusan werí jeariar tiarmiayi “Incha imiakratin Juan akatar akup-tamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

<sup>21</sup> Wats, nii jeawarmia nuí Jesus untsurí jaan tsuártasa pujurmiayi. Iwianchrunkuncha iwianchrín jjiirki akupkatasa pujurmiayi. Tura kusuruncha ímtikmiayi. <sup>22</sup> Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu pénker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchánusha uwempratin chicham ujakmaiti. Juan nu ujaktarum. <sup>23</sup> Yawetsuk Winia tuke shiir enentáimturna nú shuar shiir átatui” tímiayi Jesus.

<sup>24</sup> Waketkiarmatai Jesus Juánkan pachis áujmatman antuk shuar matsamarmia nuí juna tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti. <sup>25</sup> Nuíkia ¿warí werimiarum. Shuar pénker iwíarmampra íistai tusarmek wémarum? Warí, pénker iwíarmampraka uunt akupniu jeen pujuiniatsuk. <sup>26</sup> Nuínkia ¿warí werimiarum. Yúsnan

etserniuk werimiarum? Maa, nú nan̄kaamas wáinkiarne. <sup>27</sup> Yaunchu Yus-Chichamnum ju áarmaiti:

“Winia akatramurun am̄ini emka akupeajai ame jintimin iwiarat tusan.”

Juan̄ nu akatramuiti. <sup>28</sup> Nekasan tájarme, Yúsnan etserin imiakratin Juan̄jai nan̄kaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juan̄jai nan̄kaamas átatu” tímiayi. <sup>29</sup> Pen̄ké shuarsha, kuítian-juusha, Juan̄ imiaimiujai imianiarmia nu, Jesus timian antukar Yusa náarin shiir awajsarmiayi. <sup>30</sup> Túrasha Pariséusha Israer-shuara jintinniur̄isha Yus yáintaj támaitiat Juan̄ imiaamujai imiancha ásar nakitrarmiayi. <sup>31</sup> Nuñkia Uunt Jesus tímiayi “Yamaiya áentstiram, war̄ij̄iain̄ métek árum nuna paant títiatjarme. <sup>32</sup> Uchij̄iain̄ métek árume. Ni aij̄iain̄ iruntrar nakurustaj tukamá tuñiawai “Námpera áinis nakurustaitsar peem umpuarji, túrasha jantsemáchurme. Nuyá iwiarsatniua áinis nakurustaitsar íwiareakur kantamtaí kantamáaji, túrasha átum úutcharme.” Tu tuñiawai. <sup>33</sup> Atumsha núnisaitrume. Kame Juan̄ núkap yurumtsuk úmutsuk wekaimiayi. Túmakui átumka “iwianchrūkuiti” tímiarme. <sup>34</sup> Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume. <sup>35</sup> Wats, nekas neka ainia nu, Yusa nekatair̄in iniakmainiawai.” Tu tímiayi.

### *Pariséu Semun̄ náartin Jesusan ni jeen ipiaamiania nu*

<sup>36</sup> “Winí yurumáitia” tusa Pariséu Jesusan ipiaamiayi. Tutai Jesus ni jeen werí misanam pujusmiayi. <sup>37</sup> Nuñkia nu péprunmayá yajauch nuwá, Jesus Pariséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiayi. <sup>38</sup> Tura úutki Jesusa nawen pujuras neaj̄kij̄iain̄ niñiarmiayi. Tura intiashij̄iain̄ japirmiayi; nuyá nawenam mukuta kun̄kuinian ni nawen ukatramiayi. <sup>39</sup> Pariséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiun̄ka, ju yajauch nuwá ántiana nuna nekaawainti. Warí, niisha netse nuwáchukait” tu enentáimsamiayi.

<sup>40</sup> Nuñkia Jesus Pariséun chicharuk tímiayi “Semun̄ká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

<sup>41</sup> Tutai Jesus tímiayi “Kuítian ikiamniun jimiará áishman̄ tumashmakarmiayi. Chíkich kiniantus (500) tura chíkichka aya sen̄kuentak tumashmakmiayi. <sup>42</sup> Akiktin tsawant jeamtaí mái-metek takakcha ármiai. Tuma asamtaí kuítian ikiamin ni tumashr̄in máimetek asakátrarmiayi. Wats, turuttiá ¿tú áishman̄ka ikiamniun nekas aneamia?” tímiayi.

<sup>43</sup> Tutai Semun̄ tímiayi “Enta, núkap tumashr̄in tsan̄kuramia nu.”

<sup>44</sup> Tutai Jesus tímiayi “Nekas tame.” Nuñkia nu nuwan̄ iis Semun̄kan tímiayi “Ju nuwá wáintsumek. Ame jeem̄iin wayamtaí winia nawer niñiartin entsa suruschamame; antsu ju nuwáka nawerun neaj̄kij̄iain̄ niñiarturai, tura intiashij̄iain̄ japirturai. <sup>45</sup> Mukutam áujtusshamame; antsu niñkia nawerun tuke mukutui. <sup>46</sup> Winia muukarūisha asuiti ikiurtuschamame; antsu niñkia nawerui kun̄kuin asuitin ukatrurai. <sup>47</sup> Nu tuma asamtaí tájame, niisha Winia ti anentu asamtaí ni tunaari untsurí ana nu tsan̄kuramuiti. Tura tunaar ishichik awai tau tsan̄kuramu ana nuka ishichik anen̄kratniuiti.” Tu tímiayi Jesus.

<sup>48</sup> Nuñkia nuwan̄ tímiayi “Ame tunaarum tsan̄kuramuitme.”

<sup>49</sup> Tura chíkich ipiaamu Jesusjai misanam pujuarmiania nu “¿Jusha ya asan̄ tunaancha tsan̄kurea?” nuamtak tunainiarmiayi.

<sup>50</sup> Tura Jesus nuwan̄ chicharuk ““Uwemtikiartiniaiti” tu enentáimturú asam uwempraitme. Shiir wetá” tímiayi.

<sup>1</sup> Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemarsarmiayi. <sup>2</sup> Yaunchu untsurí nuwá jaa armia nuna tura iwianchruku armia nunasha Jesus tsuáarmiayi. Nu nuwasha Nin nemarsarmiayi. Nusha ju ármiai: Maktaranmaya Marí, siati íwianch jírkimiuyania nusha <sup>3</sup> tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarín súsar Jesusan yáinkiararmiayi.

*Atsaamin atsaampramun Jesus unuiniamiania nu*  
(Mateu 13.1-9; Márkus 4.1-9)

<sup>4</sup> Untsurí péprunmaya Jesusan iistai tusaar jíinkiararmiayi. Tura untsurí káunkarmatai ju métek-taku chichaman Jesus unuiniamiayi:

<sup>5</sup> “Atsaamin atsaamprataj tusa jíinkimiayi. Atsaamki wesa jinkiái jintiá iniaararmiayi. Túrunamtaí weenak najakarmiayi. Nuyá chiniki tariar yuawarmiayi. <sup>6</sup> Chíkich jinkiái kaya írunmanum iniaararmiayi. Nu jinkiái tsapainiar, wárik nantu sukuam káarmiayi. <sup>7</sup> Chíkich jinkiái janíkiniam iniaararmiayi. Tura janíkisha jinkiáisha máí-metek tsapainiar, janíki kaníkar ajakramiayi. <sup>8</sup> Tura chíkich jinkiáisha péñker nuníkanam iniaararmiayi. Tura tsapainiar, péñker nerekar chíkichkia siansha (100) nerekararmiayi.” Tuasua amik kakantar chichaak Jesus tímiayi “Kuishim ákuiníka antuktaram.”

*(Mateu 13.10-17; Márkus 4.10-12)*

<sup>9</sup> Nuyá ni unuiniamurí Jesusan aniak tiarmiayi “Ju métek-taku chicham tamena nu ¿warintkumea tame?”

<sup>10</sup> Tutai Jesus tímiayi “Atumnia Yus ni akuptairín nekaachma ana nuna nekamtikram-prume. Tura chikichnaka, wáiniainiyat kusurua núnin ártí tusan, tura ántuiniayat nekaacharat tusan aya métek-taku chichamjai jintintiatjai,” tímiayi.

*Atsaampramu chichaman Jesus paant jintintiamiania nu*  
(Mateu 13.18-23; Márkus 4.13-20)

<sup>11</sup> ‘Wats, ju nekaatarum, tímiayi. Jinkiáisha Yusa chichamen nakumui. <sup>12</sup> Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyán júawai. <sup>13</sup> Kayanam iniaaru tana nuka shuar antuk waras umiana nuna nakumui. Tura nú shuar kaníkapé atsaá asamtai, ishichik tsawantiniñ umikiar itirchatan wáinkiar wárik kanainiawai. <sup>14</sup> Janíkiniam iniaaru tana nuka tuke enentáijjai umíatsna nuna nakumui. Nu shuarsha ántuiniawai, túrasha ni wakeramuríjjai wekainiawai. Ju nuníkanman ana nuna ti páchiníakui, tura kuítian ti wakeruiniakui, warastinníak enentáimtuiniakui, Yus-Chicham ni enentáin takaatsui. Nujai kaníkarma ásar nerektinían tujintíainiawai. <sup>15</sup> Tura jinkiái péñker nuníkanam iniaaru tana nuka shuar antuk umíinia nuna nakumui. Niisha antukarmia nuna péñker enentáimtusar, yawetsuk umirkar ti péñker nerenawai.’

*Ashí iwíainiakma átatui*  
(Márkus 4.21-25)

<sup>16</sup> ‘¿Shiripkin ekeemak nukuktinkíait? Peaknum waaptak ikíuschatniuiti. Antsu jeanam wáiniana nu paant wáinkíarat tusa yakí ekentsatniuiti. <sup>17</sup> Núnisan ashí nekaachma ana nu paant átatui. Tura úukma ana nu nekanattawai. Tura iwíainiakma átatui. <sup>18</sup> Tuma asamtai anearum péñker antuktaram. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai.” Tu timiayi.

*Jesusa nukurí, Jesusa yachí*  
(Mateu 12.46-50; Márkus 3.31-35)

<sup>19</sup> Jesus pujamunam nukurí ni yachísha tariarmiayi. <sup>20</sup> Turamtaí Jesusan tiarmiayi “Ame nukusha yatsumsha aa wajasar untsurmainiawai.”

<sup>21</sup> Tutai Jesus tímiayi “Ee, nukuruiti, yatsuruiti, tura Yus tana nuna antuk umíana nusha winia nukuruiti, winia yatsuruiti.”

*Nasesha entsasha Jesusan umirkarmiania nu*

*(Mateu 8.23-27; Márkus 4.35-41)*

<sup>22</sup> Chíkich tsawantai Jesus ni unuiniamurijjai kanunam enkemprar “Antumian amaini wetai” tímiayi. <sup>23</sup> Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun init awayastatuk awajmiayi. <sup>24</sup> Túram nuinkia Jesusan ishintiainiak “Uuntá, iisha entsá wayaaji” tiarmiayi. Nuinkia Jesus nantaki nasencha entsanacha chicharkamiayi. Nú chichamaik nasesha menkakamiayi, tura entsasha miaaku ajasmiayi. <sup>25</sup> Nuyá ni unuiniamurin chicharuk “¿Urukantai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiatsuk” tiarmiayi.

*Jatara nunkanam Jesus iwianchrukun tsuármiania nu*

*(Mateu 8.28-34; Márkus 5.1-20)*

<sup>26</sup> Kariréa nunka amaini Jatara nunkanam jeawarmiayi. <sup>27</sup> Kanunmaya Jesus jiinkimtai nu péprunmaya áishman Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiansamunam pujuyayi. <sup>28-29</sup> Íwianchkia nu aishman kan ti kakaram nupet wémiayi. Tura emetatai tusar uwejencha nawencha jirujai jinkia wearmiayi. Túrasha tujinkiar miayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakan tar chicharuk “¿Urukantai winiisha tarutnium, Uunt Nan kaamaku Yusa Uchiri Jesusa? Winia wáitkiarsaip tusan seajme” tímiayi. Íwianch niin pujurun Jesus jiki akupeam tu tímiayi. <sup>30</sup> Jesus nu áishman kan anias “¿yáitiam?” tímiayi.

Tutai nii chichaak “Wikia Untsurintjai” tímiayi. Untsurí íwianch niin pujurma asa nuna tímiayi. <sup>31</sup> “In uunt wáanam ii jiinkimiaj nuin akuptukam amutkaip” íwianch seawarmiayi Jesusan. <sup>32</sup> Nui ishichik arantach náinnium untsurí kuchi shushunmak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

<sup>33</sup> Nuna takui íwianch áishman numia jiinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

<sup>34</sup> Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi. <sup>35</sup> Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jintiukiarmia nú áishman kan péker ajas pushí entsar Jesusa nawen pujan wáinkiar miayi. Tura ashamkarmiayi. <sup>36</sup> Iwianchruku áishman tsuarman wáinkiar miia nu yama taan ujakarmiayi. <sup>37</sup> Tura ti ashamainiak Jatara nunkanmaya aents ashí Jesusan “Wetá” tiarmiayi. Tutai Jesus kanunam enkemar wémiayi. <sup>38</sup> Íwianch jintiukiarmia nú áishman Jesusan, wisha ame wéamunam winitiaj tusa seamiayi. Tutai Jesus nuna suritai, <sup>39</sup> “Antsu ame jeemiin weme Yus ámin túrutma nu ashí etserkata” tímiayi. Tutai áishman we Jesus nin túramia nuna ashí nu péprunam etserkamiayi.

*Jairu nawantrincha tura chíkich nuwancha Jesus tsuármiania nu*

*(Mateu 9.18-26; Márkus 5.21-43)*

<sup>40</sup> Tura Jesus katiniki Kariréanam tatí tusar nákas pujuarmiayi. Tuma ásar Nii waketki katiniki támatai nu aencha warasar áujarmiayi. <sup>41</sup> Tumai Israer-shuara iruntai jeá uuntri Jairu naartin támiaiyi. Nii taa, Jesusa nawen tikishmatar “Winia jearui waitneasam

winiétritia” tímiayi. <sup>42</sup> Ni nawantrí chikichik amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaé ajas weena ásar chanuawarmiayi.

<sup>43</sup> Nuí nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuísha ni kuítrín ashí ajapaitiat tsuámarchauyayi. <sup>44</sup> Jesusa úkuriini winiá weantuk ni pushirí nánkatramurín antinmiayi. Nuna tura nú chichamaik numpé ajapeamuncha péñker ajasmiayi. <sup>45</sup> Nuínkia Jesus chichaak “¿Ya Winia antintkia?” tímiayi.

Tura “penksha antinchajme” tuíniakui Pítiur ni tsaniakmaríjiaí Jesusan chicharuk “Uuntá, ti untsurí antinmasha, tura ti untsurí chanunmainiasha ¿itiura “ya Winia antintkia” tame?” tíarmiayi.

<sup>46</sup> Tútaisha Jesus tímiayi “Nekas Winia antintkiayi. Winia kakarmarjiaí tsuárajna nuna nékajai” tímiayi.

<sup>47</sup> Nuyá nu nuwasha, nekarayapi tusa kuranki taa Jesusa nawen tikishmatramiayi. Tura ashí aents ántuiniamunam urukaku antinkia tura itiura wárik péñker ajasmia nuna ujakmiayi.

<sup>48</sup> Nuínkia Jesus nuwan tímiayi “Nawantrú, shiir wetá. Winia nekas enentáimtursa asam péñker ajasume.”

<sup>49</sup> Jesus tuke chichas pujai uunt Jairu jea, ti untsurí antinmasha, turenía taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

<sup>50</sup> Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

<sup>51</sup> Jeá jeawar Jesussha Nijjiaí untsurí wayatniun surinkiamiayi. Antsu aya Pítrun, Jakupun, Juánasha tura nuwachi aparín nukuríncha wayatniun tsankatkamiayi.

<sup>52</sup> Ashí úutainiak atakka wáinkiashtatjapi tu úutiarmiayi. Túmainiakui Jesus penké jakaan nékayat tímiayi “Úutirpa. Nuwachkia jákachai, antsu kanarai” tímiayi.

<sup>53</sup> Jakaancha urukaku ta tusar wishikrarmiayi. <sup>54</sup> Nuyá Jesus nuwachi uwején achik, kákantar chicharuk “Nawantru nantaktia” tímiayi. <sup>55</sup> Túram niisha jakayat atak iwiaaku ajasmiayi. Tura nú chichamaik nantakmiayi; túrunamtai Jesus “ayuratarum” tímiayi. <sup>56</sup> Nuwachi aparí nukurísha ti enentáimprarmiayi. Tura Jesus “Ju túramu penké etserkairap” tímiayi.

## 9

### *Jesus ni unuiniamurín etserkati tusa akupkarmiania nu (Mateu 10.5-15; Márkus 6.7-13)*

<sup>1</sup> Ni tuse unuiniamurín ikiaanank ni chichamejiaí iwianchrukun enentáiyān iwianchin jjiirki akupkatniun tura sunkurjiaí jaa tsuártinniasha ni kakarmarín súsarmiayi. <sup>2</sup> “Yus akupin ajastin ujaktarum, tura jaa tsuártarum” tinia akupkarmiayi Jesus. <sup>3</sup> Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichík pushí jukitiarum. <sup>4</sup> Nánkamas jeanam jearum wayarmeka nuín pujustarum. Nuín pujusrumek chíkich péprunam wéakrum jiinkitiarum, tímiayi. <sup>5</sup> Tura atumin awaintiamatniun nakitiana nú péprunmaya jiinkirum nawemiya nuñka akakekrum ikiuktiarum. Awaintiamachma paant ati tusarum nu túratarum” tímiayi.

<sup>6</sup> Nuyá jiinkiar ashí péprunam uwempratín chichaman ujakiar wearmiayi; tura ashí péprunam jáiniancha tsuákiar wearmiayi.

### *Erutis “Jesusan ístaj” tímiania nu (Mateu 14.1-12; Márkus 6.14-29)*

<sup>7-8</sup> Uunt akupin Erutis Jesus túramun antukmiayi. Nu túramun chíkich shuarka “Juan jakamunmayā nantaki túrawai” tu wearmiayi. Chíkichkia, “yaunchu Yúsnan etserin



Eriás wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asamtai Erutis penké nekaachmiayi. <sup>9</sup> Tura tímiayi “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramurí ashí shuar chichainia nusha yátsukait?” Tu enentáimiuk “iistaj” tímiayi.

*Senku mir áishmankan Jesus ayuramiania nu*  
(Mateu 14.13-21; Márkus 6.30-44; Juan 6.1-14)

<sup>10</sup> Atak Jesusa akatramurí waketki taar ni túramurín Jesusan ujakarmiayi. Nuñkia aents atsamunam Petsaitia péprunam tíjiuch weak nuí júkiarmiayi. <sup>11</sup> Tura penké shuar nuna nekaawar nemariarmiayi. Túram Jesus nin shiir áuj samiayi. Tura Yusa akuptairí pachis unuiniamiayi. Tura jaa armia nuna tsuárarmiayi.

<sup>12</sup> Tura kíakui, tuse unuiniamu Jesusan wériar tiarmiayi “Uuntá, shuar akupkachmini-ashit. Tíjiuch péprunmasha, shúarnumkesha wear ni yurumátniurín sumarmakarti, tura kanartintrín wáinkarti. Juí pujajnia juñkia penké atsawai” tiarmiayi.

<sup>13</sup> Tutai Jesus tímiayi “Atumsha ayuratarum.”

Tutai chichainiak “Isha aya senku tanta tura namaksha jímiarchik takakji. Ju shuar ayuratin sumaktai tusar wétiniatji” tiarmiayi.

<sup>14</sup> Áishmansha ti untsurí senku mir (5000) jeeá ámiayi. Tura Jesus ni unuiniamurín chicharainak ““senkuenta senkuenta kanaarum ankant ankant pujustarum,” titiarum” tímiayi.

<sup>15</sup> Túrawarmatai ashí pujusarmiayi. <sup>16</sup> Nuyá senku tantan tura jimiará namaknasha Jesus achik, yakiini íimias Yúsan yuminsamiayi. Nuyá ajamsarat tusa ni unuiniamurín súsarmiayi. <sup>17</sup> Ashí yurumáwar ejemararmiayi. Tura ampirman tuse chan kinnium áimkiarmiayi.

*Jesus Yusa anaikiamurinti ujakma amia nu*  
(Mateu 16.13-19; Márkus 8.27-29)

<sup>18</sup> Jesus ni unuiniamuríjjai áentsnumiá kanaki pujuarmiayi. Jesus Yúsan aujsua umik ni unuiniamurín tiarmiayi “¿Yáiti turutainia Winia?”

<sup>19</sup> Niisha áimkiarmiayi, “Chíkich “Imiakratin Juánkaiti” turamainiawai; chikichcha “Iriásaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

<sup>20</sup> Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeka Yusa Anaikiamurí, Kristu tutai, núitme” tímiayi.

<sup>21</sup> Tutai Jesus “Penké etserkairap” tímiayi.

*Ni jákatniurín Jesus ujakmiania nu*  
(Mateu 16.20-28; Márkus 8.30-9.1)

<sup>22</sup> Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátrirí úntrisha tura ni jintinniurisha nakitrurar maantuáwartatui. Túrasha iwiartusarmatai menaintiu tsawant jeamtaí nantaktiatjai.”

<sup>23</sup> Nuyá ashí áentsun chicharuk ju na tímiayi “Shuar Winia nekas nemartustajtsa wakerakka ni wakeramurínkia iniaisati. Tuke tsawant ni krusrí yanaki nemartusti.

<sup>24</sup> Kame shuar ju nunkanam aya péñker pujustaj tákunka nu shuar uwemtsuk jakat-tawai. Antsu Winia anentu asa péñker pujustinniak enentáimtsuna nú shuarka nekas iwiaakman wáinkiattawai. <sup>25</sup> Iimiata, shuar ashí ju nunkanam ana nuna súmakui tura jinium wétin ákuisha ¿itiurak péñker pujusat? <sup>26</sup> Wi Aents Ajasuitjiana ju Wini-

asha tura winia chichampruncha shuar natsantraitkuñkia, winia wincharujai, winia Aparu wincharíjjai tura nayaimpinmaya péñker suntara wincharíjjai atak táakun shuar natsantrurmia nuna natsantrattajai Wí. <sup>27</sup> Tura shuar Yusa akuptairín wáintsuk jákachartatna nu juí pujuiniawai. Nuna nekas tájarne” tímiayi.

*Jesus nusháa iira ajasmiania nu*  
(Mateu 17.1-8; Márkus 9.2-8)

<sup>28</sup> Nuna tuasua amik nuyá chíkich semanatin Yúsan áujساتaj tusa Jesus náinnium wakamiayi. Pítiur, Jakupu, Juanjaj nemariarmiayi. <sup>29</sup> Jesus auju pujus nusháa iira ajattsarmiayi. Ni pushirisha ti puju jíitsumir ajasmiai. <sup>30</sup> Nuinkia jimiará áishman Nijijaj chicháa wajarmiayi. Nuka Muisáis Eríasjaj áarmiayi. <sup>31</sup> Níncha wincha jíitsumir téntakarmiayi. Tura Jesus wáitias Jerusarénum jákatniurin amia nuna áujmatarmiayi. <sup>32</sup> Pítiur ni tsaniakmarijjaj karj ti pujainiajn iwiáa pujuarmiayi. Tuma ásar Jesusan tura jimiará áishmanjaj jíitsumir ajas wajainian wáinkarmiayi. <sup>33</sup> Tura nu áishman Jesusan ikiuki weenaj Pítiur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi. <sup>34</sup> Nuna chicháa pujaj yurañkim tarí kaput amuawarmiayi. Tura yurañkim amuam ti ashankarmiayi. <sup>35</sup> Nuinkia yurañminmaya ju chichaamun antukarmiayi: “Juka winia aneamu Uchiruiti. Nii anturkatarum.” <sup>36</sup> Chichaamun antasua amikiar Jesus niniki wajan wáinkarmiayi. Nuinkia takamtak pujuarmiayi. Tura wáinkarmia nuna penké etserkacharmiayi.

*Uchi iwianchrukun Jesus tsuármiania nu*  
(Mateu 17.14-21; Márkus 9.14-29)

<sup>37</sup> Kashin tsawantaj, náinniumia táarmatai, ti untsurí shuar Jesus inkiuntai tusar wearmiayi. <sup>38</sup> Nu shuarnumia chikichik áishman Jesusan untsuak tímiayi “Uuntá, waitneasam uchir írtústá. Uchirsha júchikiiti. <sup>39</sup> Íwianch achik núpeteam niisha nánkamas untsumui. Tura chichichiipu ajas wenunmasha saun kaput apaawai. Íwianch nin tuke yajauch awajas ankant awajsatniun nakitiawai. <sup>40</sup> Túmakui ame unuiniamurmin iwianchin jíirtukit tusan seamjai. Túrasha tujinkiarmai” tímiayi.

<sup>41</sup> Tutai Jesus tímiayi “Yus enentáimtichutirmin, tutupnik wekaichatirmin ¿urutmá tsawanttsuk atumjai pujustaj. Urutmá katsuntratjatsuk? Uchiram jui itiata” tímiayi.

<sup>42</sup> Tura uchi winiaj íwianch nunká ajuant chichichiipu áepsamiayi. Tura Jesus iwianchin kakantar chicharkamiayi. Tura uchin péñker awajas ni aparin awantuki susamiayi. <sup>43</sup> Tura ashí pujuarmia nu ti enentáimprar “Yuska imiá úuntchakait” tiarmiayi.

*Jesus ni jákatniurin ataksha ujakmiania nu*  
(Mateu 17.22-23; Márkus 9.30-32)

Jesus túramun ti enentáimtu pujuiniaj Jesus ni unuiniamurin tímiayi <sup>44</sup> “Wi tájarmena ju péñker antuktatum. Winia Aents Ajasu tútain surutkartatui.”

<sup>45</sup> Tura Nii timia nuna unuiniamurj nekaacharmiayi. Nekaawarajin tusa paantcha awajsamuyayi. Tura warinjit tusa anintrustinniasa arantukarmiayi.

*“¿Yaki imiá nankaamantuit?”*  
(Mateu 18.1-5; Márkus 9.33-37)

<sup>46</sup> Nuyá ni unuiniamurj, yaki imiá nankaamaku ati tusa, nuamtak mai tunai ajarmiayi. <sup>47</sup> Tura ni enentáimsamurin Jesus nekaamiayi. Tuma asa uchin achik ni pujamunam itiamiayi. <sup>48</sup> Itiá tímiayi “Winia anentuk ju uchin shiir awajeana nuka Winiasa shiir awajatawai. Tura Winia shiir awajtana nuka Winia akuptana nunasha shiir awajeawai. Kame átum nankaamantuchu tárugna nu ti nekas nankaamantuiti’ tímiayi.

(Márkus 9.38-40)

<sup>49</sup> Nuyá Juanjaj tímiayi “Uuntá, shuar ame náarmin pachis iwianchin jiiiki akupea nu wáinkiamji. Tura in páchitkiachu asamtai nuka suritkiamji.”

<sup>50</sup> Tutai Jesus tímiayi “Antsu suritkiairap. Shuar in nakitramachkunka in páchitkiawai.”

*Jesus Jakupun Juánnasha chicharkarmiania nu*

<sup>51</sup> Jesus, nayaimpiniam waketkitniuri jeatemamtai, enentáimmia ímiatrusan Jerusarénnum we-wémiayi. <sup>52</sup> Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi. <sup>53</sup> Tura Samarianmaya aentska, Jerusarénnum wéenan nekaawaru ásar itiaatniun nakitrarmiayi. <sup>54</sup> Jesusa unuiniamuri Jakupusha Juansha nuna nekaawar, Jesusan tiarmiayi “¿Uuntá, Erías yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, títiatjik?”

<sup>55</sup> Tutai Jesus nin íisar kakantar chicharuk tímiayi “Atumsha atumi enentáí urukukit nuka nekamatsrume. <sup>56</sup> Wi Aents Ajasu áentsun emesrattsan táchaitjai. Antsu uwemtikratajtsan táwitjai” tímiayi. Nuyá chíkich péprunam wearmiayi.

*Jesus nemarsatin  
(Mateu 8.19-22)*

<sup>57</sup> Jintiá weenai, chíkich áishman Jesusan chicharuk “Uuntá, tuí wétatam nuísha nemarsatjame” tímiayi.

<sup>58</sup> Tutai Jesus tímiayi “Kujanchmasha ni wáarín takaktsuk. Chínkisha pasunken takaktsuk. Tura Wi Yusa Uchiríntiatan tepesan ayampratniur atsawai.”

<sup>59</sup> Chíkich áishmankan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsankátrúktá” tímiayi.

<sup>60</sup> Tutai Jesus tímiayi “Jakaa ainia nu ni shuarín iwiarsatniunka enentáimtusarti. Tura ámeká weme Yus-shuar átin urukukit nu etserkata” tímiayi.

<sup>61</sup> Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áujsan ikiuweartaj tsankátrúktá” tímiayi.

<sup>62</sup> Tutai Jesus tímiayi “Shuar arayát ukunmaaní apajas iimna nu, Yus akupeana nuí takaschamniaiti.”

## 10

*Ni unuiniamurín setenta armia nuna Jesus etserkatarum tusa akupkarmiania nu*

<sup>1</sup> Nuyá ukunam chíkich unuiniamurín setenta anaikiarmiayi Jesus. Tura jímiar jímiaran apatak émkítarum tusa ashí péprunam ashí nunkanam ni wétin amia nuí akupkamiayi. <sup>2</sup> Akupeak tímiayi “Nekas tájarme, Yus-Chicham étserkum, júuktinia núnisan, aents Yus-shuar awajsatin ti awai. Tura ¿yaki júukat, aya ishichik takainiasha? Tuma asamtai ni takarniuri akupkat tusarum Nerentin seatarum. <sup>3</sup> Wetarum. Átumka murikiua núninaitrume. Uunt yawá yujamua núninnium tsuumai ámunam akupeajrume. <sup>4</sup> Yurumkasha, kuitcha, sapatcha júkiirap; shuarjai jintiá áujmamsatai tusarum waja-sairap. <sup>5</sup> Jeá wayakrum emka ju titiarum: “Ju jeanam pujuinia nuna Yus shiir awajsarti.” <sup>6</sup> Nérentin “Ee, nuna wakerajai” tákuinkia túrunattawai. Tura “Atsá, wakeratsjai” tákuinkia, “nuinkia túrunashti” titiarum. <sup>7</sup> Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nuí werum nuí werum ajairap. <sup>8</sup> Awaintiamawartatna nú peprunam jearmeka ajampramsartatna nu yuatarum. <sup>9</sup> Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmaya shuar titiarum. <sup>10</sup> Íksarmek itiaarmachartatna nú peprunam jearum, jintiá wajasrum ju titiarum, <sup>11</sup> “Yusna nakitra asakrumin, atumi pépruriniá nunka ii nawen peema japirar akakekji. Túrasha ju paant nekaatarum: Yus ju nunkanam akupkatin ishichik ajatemsai.” <sup>12</sup> Yusa nekapsatin tsawantri jeamtai nu peprunmaya shuaran ti asutiáttawai. Yaunchu Sutumanmaya shuaran asutiámia nujai nankaamas asutiáttawai. Núnaka paant tájarme tímiayi.

*(Mateu 11.20-24)*

<sup>13</sup> ‘Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí péprurijn aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuinkia yaunchu ni enentáin yapajiwaraayi. Túrawar kúntuts pujutai pushin entsarar yunkunim ajakiaaraayi. <sup>14</sup> Tura atumsha aents tujintiamu túramu wáiniatrum yapajiachu asakrumin Tirunmaya tura Setunnumia aentsjai nankaamas asutniáttarme. <sup>15</sup> Tura atumsha Kapernáumnumiatirmesha, “ti nankaamantu ajarar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

<sup>16</sup> Tura Jesus ni unuiniamurin junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiyai.

### *Setenta unuiniamu waketki táarmiania nu*

<sup>17</sup> Ukunam nu setenta unuiniamu warasar waketki táarmiyai. Tura chichainiak “Uuntá, ame náarmijn íwianch jiki akupeam umirtamkamji” tiarmiyai.

<sup>18</sup> Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai. <sup>19</sup> Atumniaka winia kakarmarun susamjarme, napi najarmasha titin najarmasha yajauch awajtamsairum tusan; tura ii nemasri kakarmari nupetkatniuncha susamjarme. <sup>20</sup> Túrasa íwianch umirtamkui nu enentáimsam warasairap. Antsu atumí naari nayaimpiniam aarma aa asantai warasataram” tímiayi Jesus.

### *Jesus warasmiyai*

*(Mateu 11.25-27; 13.16-17)*

<sup>21</sup> Nuinkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijai nunka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asantai shiir enentáimtajme, Aparú” tímiayi.

<sup>22</sup> “Winia Apar ashí surusuiti. Wisha ni Uchiri asantai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

<sup>23-24</sup> Nuyá ni unuiniamurin iis tímiayi “Wi tájarme, untsurí Yúsnan etserniusha tura uunt akupniusha átum yamá wáintrum nuna wáinkiatniun wakeruiniayatan wáinkiacharmiyai. Tura átum yamá ántarme nuna antuktinian wakeruiniayatan antukcharmiyai. Tura Yus achirmaku asakrumin, wáintrumna nu ti péñkeraiti” tímiayi.

### *Samarianmaya áishman katsumkamun yainmia nuna Jesus unuiniamiania nu*

<sup>25</sup> Nuyá akupkamun jintinkiertin Jesus warintiak chichakat tusa wajatki werimiyai. Werí iniimiayi “Uuntá, wi tuke iwiaaku átaj takun ¿warinia túratniuitiaj?” tímiayi.

<sup>26</sup> Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

<sup>27</sup> Akupkamun jintinkiertin ayak tímiayi “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame írutramurmesha aneeta. Núchakait” tímiayi.

<sup>28</sup> Tutai Jesus tímiayi “Péñker áimsame. Nu túrakmeke tuke iwiaaku átatme.”

<sup>29</sup> Tutai akupkamun jintinkiertin ni anintramun kíishtumaktajtsa wakerak “Winia írutramursha ¿ya ainia?” tímiayi.

<sup>30</sup> Takui Jesus tímiayi “Jerusarénnumia jintia Jirikiú péprunam jeana nú jintianam áishman wean, kasa áishman tariar ni warirín, pushiríncha kasarkarmiayi. Tura katsumkar mayái ashirak ajuantar ikiukiarmiayi. <sup>31</sup> Tura Israer-shuar Patri ukunman winis nu áishman kan wáiniak aya íkian iis ikiukmiayi. <sup>32</sup> Nuyá ukunam Patri yáintrisha nu jintianam wesa, nu áishman kan wáiniak, áyatik iis ikiuak wémiayi. <sup>33</sup> Tura nuyá Samaria nunkanmaya áishman sha nu jintianman wesa, nu áishman kan wáiniak ní shuárinchunak wáitnéntramiayi. <sup>34</sup> Nuyá nu áishman kan weantuk ni numpamnamurín asuitijai tura wíniujai tsuar jaanchjiai penuarmiayi. Tura ni kawairín ekenak jukimiayi. Tura írar kanutainiam jukí ejé nu áishman kan péñker wáinkiamiayi. <sup>35</sup> Tura kashin tsawarmatai Samarianmaya áishman weak jimiará kuítian jusa jeá nérenniurín susamiayi. Susa tímiayi “Ju áishman péñker wáitrukta. Tura wi amaajna ju táasmataisha wi wáketkun akiktajme” tímiayi. <sup>36</sup> Ayu, ámijiaisha, nu menaintiu áiniana nu, ¿tuá imiá nekas katsumkamun waitnéntramia?” tímiayi Jesus.

<sup>37</sup> Takui akupkamun jintinkiartin chichaak “Entá, katsumkamun wáitnéntramia núa” tímiayi.

Tutai Jesus tímiayi “Amesha weme núnismek túrata.”

### *Marta ni kajijai Marí jeen Jesus pujusmiania nu*

<sup>38</sup> Nuyá Jesus jintiá wesa chíkich péprunam jeamiayi. Nu péprunmaya nuwa naari Marta ni jeen itiaamiayi. <sup>39</sup> Marta kai ámiayi ni naari Marí. Marisha unuiniamun anturkataj tusa Jesusa nawen pujursamiayi. <sup>40</sup> Tura Mártaka ni takatrín ti enentáimtak Jesusan weantuk tímiayi “Uuntá Jesusá, ¿winia kajr takatan winiak íiktursainia nuka enentáimsumek? Winia yáintá turuttia” tímiayi.

<sup>41</sup> Tutai Jesus tímiayi “Maaj Martí, untsurí túratin ana nu ti enentáimsam itit awajtamui.

<sup>42</sup> Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

## 11

### *Jesus Yus áujsatniun unuiniamiania nu*

*(Mateu 6.9-15; 7.7-11)*

<sup>1</sup> Chíkich tsawantaj Jesus Yúsan áujsatataj tusa atsamunam pujumiayi. Áujtua amikmatai ni unuiniamurí chikichik Nin tímiayi “Uuntá, imiakratin Juan ni unuiniamurín unuiniamia núnismek Yus áujsatin unuitiurta.”

<sup>2</sup> Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí.

<sup>3</sup> Aparú, ii yurumkarí ashí tsawant amasta. <sup>4</sup> Tura winia nemasrun tsankurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumia uwemtikrurta.”

<sup>5-6</sup> Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaktsujai. Tuma asamtai amikru, menaintiu apatuk ajamprustá” tíchatameash. <sup>7</sup> Tura nii init pujusan chichaak “Warí, wáitisha epenmiaiti, tura winia uchirsha wijjai ashí tepeenawai. Itiur nantakniak amastaj. Itit awajtipia” turamchanpiash. <sup>8</sup> Wats, paant tájarme, niisha amikrum asa, nantaki ikiatmastinian nakitiayat, itit awajtin tusa nantaki ashí wakeramna nuna suramsattawai. <sup>9</sup> Tuma asamtai tájarme: Yus seatarum; túrakrumin suramsattarme. Eakrumka wáinkiatarme. “Winiajai” tákurmin awaintiamattarme. <sup>10</sup> Seana núnaka suániatsuk. Eana nuka wáintsuk. “Winiajai” tuinia núnaka awániatsuk.”

11 ‘Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam? 12 Nujintian seatmakuisha ¿titiñkiash súsaintiam? 13 Warí, átum imiá yajauchitirmesha atumí uchirí péñker ana nu tuke súchakaitrum. Atumí Aparí nayaimpiniam pujana nu, seakrumniñkia nú nankaamas ni Wakanin suramsattawai.” Tu unuiniamiayi.

*Jesusan “iwianchi kakarmarijiaí túrawai” tiarmiayi*  
(Mateu 12.22-30; Márkus 3.19-27)

14 Shuar iwianchruku asa chichachu ámiayi. Nuna enentáyan nu iwianchin Jesus jiki akupkamiayi. Íwianch jiinkimtai chichachu chichasmiayi. Túramtai shuar nuí pujuarmia nu ti enentáimprarmiayi. 15 Tura chíkich tiarmiayi “Juka iwianchi kapi-tiántri Satanásan, ni chíkich naari Pirsepún umirniuiti. Tuma asa nuna kakarmarijiaí iwianchin jiki akupeawai.”

16 Tura chíkichkia, nekas Yúsnumiá taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

17 Tura Jesus tu enentáimiainian neka asa tímiayi “Núu nunkanmayan shuar nu-  
amtak kajernaiyakuñkia nú nunka wárik meserchattawak; nuamtak shuarsha ni shuarijiaí kajernaiyaksha amunaikchartatuak. 18 Wíniaka “Pirsepú iwianchi kakarmarijiaí iwianchin jiki akupeawai” túruttsurmek. Tuma asamtai tájarme, uunt iwianch Satanás naartin, ni suntarijiaí kajernaiyaksha ¿itiur tuke kakaram átinkí? 19 Tura Wi Pirsepú kakarmarijiaí iwianchin jiki akupeakuñkia, atumi shuarisha ¿yana kakarmarijiaín iwianchin jiki akupena? Niisha “iwianchi kakarmarijiaí túrichuitji” tuiniaisha ¿itiura Winiasha, “iwianchi kakarmarijiaí túraiti” turutminiaitrum? 20 Wikia Yusa kakarmarijiaí iwianchin jikin akupeajai. Nu nekaarum Yus atumi enentáin akupin ajasuana nu nékarme.’

21 ‘Kakaram áishman kúishtumaktajtsa iwiarnar wajas jeen wáinkuii, ni warirí init ana nusha tímiatrusan ániawai. 22 Antsu niijiaí nankaamas kakaram ana nu winiakka nupetkashtatuak. Tura kúishtumaktinian iwiar takakman jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai. 23 Iista. Winia nemartatsna nu winia nemasruiti. Núnisan Winia yáintsuna nuka aya iturchat nájateawai.’

*Iwianch jiki akupkamúitiat wáketna nuna ujakmiania nu*  
(Mateu 12.43-45)

24 Nuyá Jesus juna tímiayi: ‘Shuara enentáiyá íwianch jiinki ayamprataj tusa yumi penké yútatsna nuí wéawai. Tura ayampratniun wáincha asa ataksha waketkitniun enentáimui. “Wi jíinkimij nuin waketkitjai” tawai. 25 Tura waketki péñker iwiamun tura ankant aan wáiniui. 26 Nuna wáiniak, ni ain siati iwianchin niijiaí nankaamas yajaunchin itia enkemáwartatui. Túrunamtai nu shuar nuiki nuna nankaamas yajauch ajastatui.” Tu tímiayi Jesus.

*Nekas warastin*

27 Shuar iruniarmia nuí Jesus nuna chichaa pujai, nuwá untsukum “Ame nukun Yus ti yáinñkia. Ni ampujén ame pujuschamkam. Ámin amuntstamachmakam” tímiayi.

28 Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinñkiaru ániawai, tajai” tímiayi.

*(Mateu 12.38-42; Márkus 8.12)*

29 Shuar untsurí Niin káunkarmatai Jesus tímiayi “Yamaiya shuarka yajauch ániawai. Yajauch ásar, chichartuiniak “Nekas Yúsnumiáitkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujai iniakmasmia nujain nekaatin ániawai. 30 Kame Junas túrunamujai Níniwi péprunmaya shuaran

yaunchu Yus ni kakarmarín iniakmasmia núnisan̄ yamaisha Aents Ajasu tutainjiana nu Wi túrunamujaī Yuska ni kakarmarín iniakturmastatrume. <sup>31</sup> Yaunchu Sarumún uunt akupin pujaī Sepa núnkanmayā nuwá akupin Sarumun̄ka chichamen̄ nekaataj tusa ti jeashtanmayā támiayi. Tura yamaikia Sarumun̄jaī nan̄kaamas pujaī átumka anturtatsrume. Tuma asamtaī Wi tájarme, Yus ashí shuaran nekapsattana nu tsawant jeamtaī nu nuwá, akupniun pénker anturka asamtaī, Yus ímianum pénker átatui. Antsu atumsha Winia anturtukcha asakrumin Yus ímianum yajauch átatrume. <sup>32</sup> Tura Yúsnan etserin Junas Níniwi péprunmayā shuarum Yus Chichaman etserkamtaī nu shuar ni tunaarín enentáimtusar enentáin yapajíáwarmiayi. Tura juī yamá Junasjaī nan̄kaamas etserin pujajaī. ¡Tuma asamtaī nekapsatin tsawant jeamtaī Níniwinmayā shuar yamaiyā shuar árumna nuna sumamtikramattarme!

*Ayashi tsáapnintrí*  
(Mateu 5.15; 6.22-23)

<sup>33</sup> ¿Shirikip ekeemakar úuktinkiait? Pitiaknumsha en̄keashtiniaiti. Antsu shuar jeá wayana nu paant ímsat tusar yakí ekensatniuiti. <sup>34</sup> Ame jímijiaī wáinkiam nujaī wekasatin nekaattame. Tuma asamtaī ame jímijiaī pénker ana nu wáinkiumka pénker wekasattame; antsu ame jímijiaī yajauch ana nu wáinkiumka, kiritniunam wekasatniua núnisan̄ yajauchiniam wekasattame. <sup>35</sup> Anearta. Enentáimin tsáapin ana nu kiritin ajaschati tusam anearam wekasata. <sup>36</sup> Ame ayashmiin̄ kirit ajatsuk aya tsáapninaiatkiuin̄kia, shirikip paant awajea núnisan̄ ashí paant wáinkiaittame” tímiayi.

*Pariséuncha, Israer-shuara jintinniurisha “yajauchiitrume” tímiayi Jesus*  
(Mateu 23.1-36; Márkus 12.38-40; Rúkas 20.45-47)

<sup>37</sup> Jesus chichasua amikmataī Pariséu shuar, winia jearuj̄ yurumáitia tusa untsukmiayi. Tutai Jesus wayá misanam pujusmiayi. <sup>38</sup> Tura Israer-shuar ikijmiartin ana nuna túrutsuk aya pujakuí Pariséusha nuna wáiniak “maa ¿urukamtia tura?” tu enentáimsamiayi.

<sup>39</sup> Tura Uunt Jesus tímiayi “Pariséutirmeka atumí yurumtairī aya pátatek nijiaktin ti wakeriniaitrume. Atumsha nu yurumtaijiaī méteketrume. Pátatek pénker túrarme. Tura atumí enentáinkia kasamkatniusha tura yajauchia nusha piakuiti. <sup>40</sup> ¡Enentáimcha! Warí, ashí pátatek wáiniaj̄i nuna Yus najanachmakia; tura init paantcha ana nunasha Yúsak najanachmakia. <sup>41-42</sup> Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti táturmek. Tura antsu nu túratin iniaitsuk pénker wekasatniusha, Yus anenmarmena nusha pénker enentáimsatniuitrume. Wats inít, enentáimin ana nútiksarmek jusam susarta. Nuiñkia ashí chamir átatui.’

<sup>43</sup> “Tura aneartarum Pariséutirmesha. Yus áujtaī jeanam pen̄kerī pujutainium pujustin wakerarme. Tura jintiá aents ímiainiamunam ti shiir̄ áujtusarat tusarum wakerarme.’

<sup>44</sup> ‘Jintinniutirmesha, Pariséutirmesha mái-metek aneartarum. ¡Antar shiir̄ chicham-tinia! Iwiarsamu paantcha núniniaitrume. Shuar nu nan̄kaamaksha nájamiat nékatsui. Núnisan̄ shuar atumī chichamē antukar yajauchia nuna nekartamtsurme.”

<sup>45</sup> Nuikia Israer-shuara jintinniurī chikichik Jesusan chicharuk tímiayi “Uuntá, nu tákum incha yajauch chichareame.”

<sup>46</sup> Tutai Jesus tímiayi “Atumsha jintinniutiram aneartarum. Atumī akupkamurijiaī káarak ti kijin entsakchamnia súarme. Tura átumka yáintaj̄ tusarum atumí uwejejaisha pen̄ké ántiatsrume.’

<sup>47</sup> ‘Aneartarum tájarme. Yaunchu atumí uuntrī Yúsnan étserniun máawarmia nuna iwiarsamurī átum jeamniuitrume nu etserin ti pénker ásarmataī kajinmatkishtin.

<sup>48</sup> Nu túrakrum atumí uuntrī túrawarmia nu, “yajauchichuiti” tarume. Warí, niisha máawarmiayi, tura atumsha máawaraī táyatrum niijiaī méteketrume. Warí, Yúsnan etserniun iwiarsamurīn jeamkuram atumek sumamarme.’

<sup>49</sup> ‘Atumí túramurin nekáa Yus juna yaunchu tímiayi: “Winia etserturniun tura winia akatramurnasha nin akuptukartatjai. Túramtai chikichnaka máawartatui, tura chikichnaka pataatukartatui.” <sup>50</sup> Tuma asamtai ashí ni etserniurin maamu ainia nuna, yamaiya áentstirmin Yus sumamtikramattarme. Nunka najanamunmaya júkí <sup>51</sup> yamáí ímiajai maamu ainia nuna, kame Apir maamunmaya júkí yamáí Sakarías maamua tímiajai anintrustatui. Naman maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniuri maantamnewarmia nuna yamáí matsatrumna nútirmin aninmasartatui.’

<sup>52</sup> ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

<sup>53-54</sup> Jesus nuna takui Pariséusha, jintinniusa ti kajerkarmiayi. Tura nii tana nujai “yajauch túrame” titiai tusar wakeruiniak untsurí anintriarmiayi.

## 12

<sup>1</sup> Nu tumaj shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniaturin tútan juarkimiayi. “Pariséu ántar chichamtin ániawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamniaiti. <sup>2</sup> Núnisañ ashí paantcha ana nu iwiainiakma átatui. Uukma ana nusha nekaamu átatui. <sup>3</sup> Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktatui.’

### *Yusak ashamkatniuiti (Mateu 10.28-31)*

<sup>4</sup> ‘Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui. <sup>5</sup> Tura ya nekas ashamkatniuitrum, nuna paant jintintiattajrume. Ame ayashmi maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.’

<sup>6</sup> ‘Jimiará chiniki ishitiúpchich ishichik kuitjai surukchatniukait. Túrasha Yussha nu chinikin penké kajinmatkishtatui. <sup>7</sup> Wats, ashamkairap. Untsurí chinikijai nankaamas Yuska atumin enentáimturmarme. Warí, ame intiashmin mash Yus nekapmaruiti.’

### *(Mateu 10.32-33; 12.32; 10.19-20)*

<sup>8</sup> ‘Ashí shuar ashí ímiainiamunam Winia Aents Ajasu tutain, Winia natsantruiniatsna núnaka, Wisha Yusa suntari ímiainiamunam natsantrashtatjai; <sup>9</sup> antsu shuar ímiainiamunam Winia natsantrana núnaka Wisha Yusa suntari ímiainiamunam natsantrattajai.’

<sup>10</sup> ‘Winia, Aents Ajasu tutain, shuar yajauch chichartakuinkia nusha tsankuramniaiti, tura Yusa Wakanincha yajauch chicharkuinkia nuka penké tsankurachminiaiti.’

<sup>11</sup> ‘Wats, Israer-shuar iruntai jeanmasha, tura Israer-shuar kapitánniumsha, uuntnumsha juramainiakui, aninmainiakuisa warintiajak tusam ti enentáimsáip. <sup>12</sup> Ame áimkiatin jeamtai, Yusa Wakaní ame títiatmena nuna jintinramattawai,” tu timiayi.

### *Kuítiak enentáimtuschatniuitji*

<sup>13</sup> Chikich áishman Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, titia” tímiayi.

<sup>14</sup> Tutai Jesus tímiayi “Áishmanka, atumin nu túratin anaikiamukaitiaj.”

<sup>15</sup> Nuyá tímiayi “Pénker enentáimsatarum. Nii takakna nújain shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

<sup>16</sup> Nuyá juna métek-taku chichaman unuiniak tímiayi:

“Kuítrintin áishman ni ajaríyan arakan ti nukap juukmai. <sup>17</sup> Tura “¿Ti nukap asamtai tuin ikiustaj. Itiurkatjak?” tu enentáimsamiai. <sup>18</sup> Wats, wi nékajai. Winia ikiutái-jea run



ashiran nú nan̄kaamas úuntan najanatjai. Tura nuī ashí ikiustajai. <sup>19</sup> Nuīnkia untsurí uwitin shiir pujustinian ikiusman takustatjai. Tuma asantai, ayampran, yurumán, umaran shiir pujustatjai” timiai.’

<sup>20</sup> “Tura Yus nin chicharuk timiai “Netse. Yamái kashi jakattame. Nuīnkia imiá núkap ikiusumna nusha ¿yana átata?” timiai” tímiayi.

<sup>21</sup> Nuyá Jesus tímiayi “Shuar niñki kuítr̄in ikiauntumna nu, núnisaiti. Túrasha Yusj̄ai íismaka kuítr̄inchaiti.”

*Yus ni uchir̄in péñker wáinkiaiti*

*(Mateu 6.25-34)*

<sup>22</sup> Nuyá ni unuiniamur̄in Jesus juna tímiayi: “Warí yuarik pujustaj̄i tura warin̄ entsar-taj̄i tusarum nuke ti enentáimsairap. <sup>23</sup> Yus iwiaaku átinian amasu asa yurumkancha amastatui. Tura jū ayashniasha najana asa entsataincha amastatui. <sup>24</sup> Chínkisha enentáimsatarum. Niisha arakmainiatsui. Juuk yurumkan ikiuiniatsui. Tuma aiñ Yuska ni yurumátniur̄in tuke súawai. Atumsha chin̄kia nú nan̄kaamaschakaitrum. <sup>25</sup> Tura ya shuarak, ti enentáimtana nuj̄ai nú naya ajasminiait. <sup>26</sup> Kame yúpichuch ana nusha túrachminiaiatrumsha, ¿urukamtai chíkich ainia nusha ti enentáimtarum?”

<sup>27</sup> ‘Íistá, kukujsha takaachitiat tura nájanchitiat ti shíirmach áiniawai. Yaunchu akupin Sarumún̄ ti shiir iwiarmamniutiat kukujia tímianchayayi. <sup>28</sup> Iis, nupa yamá tsakaawai tura kashin aents tsupikiar jinium apeánáwai. Tuma aiñ Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtai Yus nekas enentáimtatsrum? <sup>29-30</sup> Jū nun̄kanam ana nu ti pachirap. Chíkich shuar, Yúsan nékainiatsna nu, warin̄ yuataj̄i, warin̄ umartaj̄i nuna ti pachiniawai. Tura atumsha tu enentáimsairap. Urukatjak, tiirap. Ame Apa nayaimpiniam pujana nu, ashí atsumarmena nuna nékawai. <sup>31</sup> Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

*Kuítian pachis Jesus unuiniamiania nu*

*(Mateu 6.19-21)*

<sup>32</sup> ‘Winia murikrutiram ashankairap. Untsuríchuitrume. Túrasha atumí Aparī ni akuptair̄in pachitmarktasa ti wakerutmarme. <sup>33-34</sup> Kuítrum tuī aa, nuī tuke enentáimtittirme. Tume asantai takakrumna nu surukrum atsumainia nu susatarum. Nuka en̄ketai arut ajatsna nuī en̄keatniua núniskete. Túrakrum nayaimpinmayā kuit amuatsna nu íkiāuwearme. Nuīsha kasa nu kuitian kasamkataj tusa wayachminiaiti, tura kayaasha nu kuitian yúatniun tujintiawai.’

*Anearar wekasatniuitji*

<sup>35-36</sup> ‘Jū enentáimsatarum. Ni uuntrī nuatnaikiatin námpernumiá taa, “uraitia” takui, takarniur̄i jinia ekeemakar wárik urattiai tusar nakáa pujuiniawai. Atumsha núnisrumek Wi atum̄i Uuntrī támatai, shiir itiaatai tusarum anearum wekasatarum. <sup>37</sup> Ni uuntrī taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarniur̄in títiatui tura yurumkan sústartatui. <sup>38</sup> Kashi ajapén taaksha tura tsawaanā ai taaksha ni takarniur̄in iwiáa pujuinian wáinkiuñka, nu takar̄in shiir pujuiniawai. <sup>39</sup> Tura jusha nekaatarum. Jeennua nu, kasa tátinian nékaitkiun̄ka, iwiáa pujusāayi. Kasa wayá kasamkatniun suritkiāayi. <sup>40</sup> Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

*Pénker takarin yajauch takarniuj̄ai*

*(Mateu 24.45-51)*

<sup>41</sup> Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?’ tímiayi.

<sup>42</sup> Tutai Jesus tímiayi “Atumsha péñker takatan wáinnia núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura péñker enentáimtana nu. <sup>43</sup> Ni uuntri taa, takatrin tímiatrusan túran wáinkiuñkia nu wáinniusha shiir enentáimsamniaiti. <sup>44</sup> Umirin asamtai, ni uuntri ashí ni warirín wáitrukat tusa apujsattawai. Nuna paant tájarme. <sup>45</sup> Tura nu takatan wáinniusha “úuntur wau táchattawai” tu enentáimias, ni uuntri takarniurín yajauch awajeakuñkia tura niniki ti yurumá, ti umar nampeakuñkia, <sup>46</sup> nuñkia ni uuntri ni nákachmanum aya aneachma taa ti asutiáttawai. Umichu pujuinia nu akupkattawai.’

<sup>47</sup> “Takarín ni uuntri wakerá nuna nékayat, iwiartsuk umitsuk pujakka ti awatramu átatui. <sup>48</sup> Túrasha takarín nékachú asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

*Jesusjai shuar akannartatui*  
(Mateu 10.34-36)

<sup>49</sup> ‘Jijjai nekapsatniua nútiksanak nuñkanam jinia ikiapartaj tusan tamajai. Tura túrunat tusan ti wakerajai. <sup>50</sup> Imiantinia núnisan itiurchat ukatruktatui. Nusha wárik amuukat tusan ti wakerajai. <sup>51</sup> “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai. <sup>52</sup> Yamái jukimiutak chikichik shuarnum senku ainia nu akannakartatui; menaintiu shuar ni shuarín jímieran nakitrartatui. Jímiarsha ni shuarín menaintiun nakitrartatui. <sup>53</sup> Apasha ni uchirín nakitrattawai. Núnisan uchisha ni aparín nakitrattawai. Nukusha ni nawantrin nakitrattawai, nawantrisha nukurín nakitrattawai. Tsatsarisha ni najatín nakitrat-tawai; najatisha tsatsarín nakitrattawai.”

(Mateu 16.1-4; Márkus 8.11-13)

<sup>54</sup> Jesus áentsun chicharuk junasha tímiayi “Atumsha nantu akaatainmaani kjar matai “yutuktatui” tátsurmek. Nusha nekas tárume. <sup>55</sup> Tura anaaraniá nase násenkamtai “séejik átatui” tárume. Tura nekas tárume. <sup>56</sup> Yuranminmasha nuñkanmasha túruna nu nékarme. Túmaitatrumsha ju tsawantai túrunattana nusha ¿itiura nékatsrum? ¡Maaj, ántraitrume!”

*Nemasrumjaisha nawamnaikiata*  
(Mateu 5.25-26)

<sup>57</sup> ‘Túrasha péñker ana nusha ¿urukamtai atumek enentáimsarum wáintsuram? <sup>58</sup> Irutramuram úuntnum júramkuñkia jintia wésamek “nuamtak iwiarartai” titiá. Túrachkumñkia akupniunam juramkittieme. Tura niisha suntarnum akuptamkattame. Tura niisha sepunam enketmattawai. <sup>59</sup> Tura nekas tajai, nuñ enkemamka ashí rearchisha akikmachkumka jíinkishtatme” tímiayi.

## 13

*Ii enentái yapajiátniuitji*

<sup>1</sup> Nu tsawantin chícham ujaktai tusar Jesusan tariarmiayi. Kariréa nuñkanam Israer-shuar ni waakarín máawar Yus susatai tusar pujuiniaj, Piratu nin maa, nuna numpen waaka numpejai pachimpramun ujakarmiayi. <sup>2</sup> Tura Jesus tímiayi “¿Warí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai ¿tu enentáimprumek? <sup>3</sup> Atsá; atumí enentái yapajiáchkurmeka núnisrumek atumsha jakattarme. Nuna paant tájarme, tímiayi. <sup>4</sup> Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíkich Jerusarénumia shuarjai nankaamas tunáa ásar túrunawarai ¿tu enentáimprumek? <sup>5</sup> Atsá, tájarme. Atumí enentái yapajiáchkurmeka núnisrumek atumsha jakattarme.”

*Ikiu numi nereatsna nu*

<sup>6</sup>Junasha Jesus métek-taku chichaman tímiauyi. Júiti:

Shuar ni ajarin íkiu numin araamun takakuyi. Nerekchiash tusa iyumai. Túrasha nere atsumai. <sup>7</sup>Nuinka ni ajarin wáinniun timiai “Antukta, maintiú uwitin juna nere átai tusan waketrú pujajai; túrasha penké wáinkiachjai. Ajakta. ¿Urukamtai átrash wajastata?”

<sup>8</sup>Tutai ajá wáinin timiai “Atsá, uuntá; ju uwitin wajastí. Wajamurin takarsatjai tura penker nunkan matsatkatjai. <sup>9</sup>Nujai nerekchampiash. Tura tuke nereachkuinka nuinka ajakta” timiai”, tímiayi.

### *Nuwan punuá kaarun Jesus tsuármiania nu*

<sup>10</sup>Ayampratin tsawantai Israer-shuar iruntai jeanam Jesus unuiniak pujumiayi.

<sup>11</sup>Nuisha nuwa pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pankái nakuenkataj tukamá penké tujinmiayi. <sup>12</sup>Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

<sup>13</sup>Nuna tinia ni uwejejai antinmiayi. Tura nú chichamaik nuwasha pankái nakuenkamiayi. Tura Yusa náarin uunt awajsamiayi. <sup>14</sup>Tura Jesus ayampratin tsawantai tsuaru asamtai, iruntai jea uuntri kajek iruntrarmia nuna tímiayi “Sais tsawantin takaschatniukait; ayampratin tsawantai tsuámartaj tusarum táchatniuitrume. Sais tsawant ana nuí tátiniaitrume.”

<sup>15</sup>Tura Jesus tímiayi, “¿Ántar chichamtinia! ¿atumí waakarisha atumí umpuururisha yumi aartai tusarum ayampratin tsawantin atíarum júatsrumek? <sup>16</sup>Tura ju nuwasha, atumí shuari Apraám shuarnumiá akiiniaiti. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant ain yajauch awajsamunmaya atíachminkiait” tímiayi.

<sup>17</sup>Jesus nuna takui ni nemasrisha natsaararmiayi. Tura penké shuar ni penker túramurin wáinkiar warasarmiayi.

### *Mustasa jinkiaí*

*(Mateu 13.31-32; Márkus 4.30-32)*

<sup>18</sup>Nuyá Jesus tímiayi “¿Yusa akupeamuri warijiaín métek-takuit? <sup>19</sup>Mustasa jinkiaíjjai métek-takuiti. Mustasa jinkiaíncha shuar ni ajarin araamiayi. Tsapá, tsakaak, uunt numi ajasmiayi. Ti uunt asamtai chiniki ni kanawen pasunmarmiayi.”

*(Mateu 13.33)*

<sup>20</sup>Tura junasha tímiayi: “¿Yusa akupeamuri warijiaín métek-takuit? <sup>21</sup>Tanta wakapru-taia métek-takuiti. Arinia núkap ana nuí nuwa wakaprutain ishichik enkeámiayi. Túram ashí wakapruamiayi.” Tu tímiayi.

### *Yupikiach waiti*

*(Mateu 7.13-14, 21-23)*

<sup>22</sup>Jesus Jerusarénum jeattsá weak untsurí peprunam wayá unuiniarkutak wémiayi.

<sup>23</sup>Weai chíkich shuar aniasmiayi “Uuntá, ¿uwemainia nu ishichkikiai?”

<sup>24</sup>Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiertatui, tájarme. <sup>25</sup>Jeá nérenniuri wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarme. ¿Tuyantskaitrum?” turamtatrume. <sup>26</sup>Nuyá átum títiatrume “Túrasha, uuntá, iisha ámijiai yurumámji, ámijiai umarmaji. Tura ii pépruríncha unuiniamame.” <sup>27</sup>Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyanka kanaktiarum.”

<sup>28</sup>Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura aa ajapam pujusrum ti útkuram naim tásarara ajat-tarme. <sup>29</sup>Tura Yus akupeana nuí, nantu tatainmaaniyasha nantu akaatainmaaniyasha,

arakiasha, nunkaaniasha taar, imia Israer-shuarchaitiat yurumátaí tusar pujusartatui. Tura atumsha, “Apraám shuáraitjai” táyatrum, wayashtatrome. <sup>30</sup> Nuisha yamáí ukunmaani ainia nusha emka ártatui; tura yamáí emka ainia nusha nuisha ukunmaani ártatui.”

*Jerusarénumaani Jesus wémiayi  
(Mateu 23.37-39)*

<sup>31</sup> Nu tsawantai Pariséu aents Jesusan tariar tiarmiayi “Erutis mantamattsa wakerutmawai. Tuma asantai juyanka wetá.”

<sup>32</sup> Tutai Jesus tímiayi “Werum nu kujancham ju titiarum: “Íistá. Yamaisha ishichik tsawant iwianchin jíikin akupkartajai; túran jaancha tsuárartajai. Tura ukunam amuktatjai.” <sup>33</sup> Tura Jerusarénumaani ishichik tsawant tuke wétiniaitjai. Yúsnan etserin aya Jerusarénuman jákatniuiti.’

<sup>34</sup> ‘Jerusarénumiatiram, Yúsnan etserin máiniaitrome; tura Yus akatar akupturmakmania nusha kayajai tukurum máiniaitrome! Tuma aín atash ni shiamprin etektana núnisnak Wisha weaktasan wakerimjarme, túrasha nakitramarme. <sup>35</sup> Iistarum. Atumniasha Yus ajapramaitrome. Tura “Yusa náarijn winiana nu, shiir atí” títiatrumna nú tsawant jeatsain penké wáitkiashtatrome. Nuna tájarme” tímiayi Jesus.

## 14

*Áishman eaak-jaan Jesus tsuármiania nu*

<sup>1</sup> Ayampratin tsawantai Pariséu uuntri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi. <sup>2</sup> Nuí áishman eaak-jaan Jesus pujamunam naka pujumiayi. <sup>3</sup> Jintinniuncha Pariséuncha Jesus aniasmiayi “¿Warí tárur? ¿Ayampratin tsawantai jaan tsuárminkiait. Tsuárchamniakait?” tímiayi.

<sup>4</sup> Tura niisha áimtsuk pujuarmiayi. Nuínkia jaan antin tsuármiai. Tura “shiir wetá” tímiayi. <sup>5</sup> Nuyá Pariséun chicharuk, “Atumí umpuurarisha, waakarisha waá táurmanum akaiki iniamtai, ayampratin tsawant aín nu chichamaik júatsrumek” tímiayi.

<sup>6</sup> Takui áimkiatniun penké tujinkiarmiayi.

*Nuátnaikiatin nampernum ipiaamu ármia nu*

<sup>7</sup> Ipiaamusha penkeri pujutainium pujustaitsar ti wakeruiniakui, Jesus nuna wáiniak juna jintintramiayi:

<sup>8</sup> “Nuátnaikiatin nampernum penkeri pujutainium pujusaip. Nuí pujakminkia, chíkich ámijiai nankaamas penkeri táchatpiash.’

<sup>9</sup> “Tura ipiatmania nu chichartamuk “Chíkich iiktusta” turamchatpiash. Nuínkia chíkich nánkatkamu pujutainium wéakum natsartatme. <sup>10</sup> Antsu ipiatmakmin, nánkatkamu pujutainium pujustá. Nuínkia ipiatmamma nu chichartamuk “Amikru, ámeke juí penkeri pujutainium pujustá” turamtatui. Nujai chíkich ipiaamu ainia nu, “nekas penkerinti” turamartatui. <sup>11</sup> Iimiata, “penkerintjai” tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniaiti.”

<sup>12</sup> Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtat-uak. Nujai akikma átatme. <sup>13</sup> Antsu yurumáití tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta. <sup>14</sup> Niisha akirmaktinian tujintiainiawai. Péñker shuar nantakiartatna nuí akinkiattame. Nu tuma asantai warastatme” tímiayi.

*Uunt namperan Jesus nekapmá chichasmiania nu*

<sup>15</sup> Nu misanam pujuarmia nuya, chikichik Jesus chichaamun antuk, Jesusan tímiayi “Yus akupeamunam pachiiniak, yurumkun̄ka ti shiir ainti.”

<sup>16</sup> Nuna takui Jesus juna jintintiamiayi: “Áishman̄ namperan nájanuk, untsurí shuaran taartí tusa akatar akupkamai. <sup>17</sup> Yurumátin jeamtai “Winitiarum, yurumátin jeayi” tu tiarta tusa ni takarniur̄in akupkamai. <sup>18</sup> Tura winichminiaitji tusar ashí ujakar-mai. Chíkich timiai “Nun̄kan yamáí sumarmakjai. Iyutaj tusa wéakun winishtatjai. Tsan̄kurturti” timiai. <sup>19</sup> Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsan̄kurturti” timiai. <sup>20</sup> Tura chíkich chichaak “Yamáí nuatnaikiai. Tuma asan winishtatjai” timiai. <sup>21</sup> Takarin wakетки ni úntr̄in ashí nuna ujakmai. Nuna antuk niisha kajekmiayi. Tura ni takarniur̄in timiai “Ju péprunam péñker jintianmasha tura uchich jintiachinmasha weme, kuítr̄incha tura wekaichasha, shutuapsha, kusurusha itiaarta.” <sup>22</sup> Nuyá ukunam ni takarniur̄i taa chicharuk “Uuntá, ame turutmiamna nútiksanak túramjai; túrasha tuke an̄kant awai” timiai.’

<sup>23</sup> “Tutai ni uuntr̄i chichaak “Jintianam weme, chíkich jintiachiniam weme, wáinmena nu ashí awayawarta. Winia jearūi piakat tusan wakerajai. <sup>24</sup> Emka ipiaawarmajnia nuka péñké chikichkíksha winiñkia yurumáchartatui, tajarme’ tímiayi.”

### *Kristu nemarsatin yúpichuchichuiti*

<sup>25</sup> Untsurí aents Jesusjai irunki wearmiayi. Niisha nuna apajas iis juna tímiayi:

<sup>26</sup> “Shuar ni apar̄incha, ni nukur̄incha, nuar̄incha uchir̄incha, yach̄incha, umaincha Wijjai nan̄kaamas enentáimtakka, tura shiir pujustinian wakerak Winí winitniun naki-tiakka winia unuiniamur ajaschamniaiti. <sup>27</sup> Ni wakeramur̄in ajakeak ni krusr̄i yanaki nemartatsna nu winia unuiniamur ajaschamniaiti.’

<sup>28</sup> ‘Jeā yakí jeamtaj tusam wakerakmeka, kuítian urutmak ajapawaintiaj tusam tura urutmajain̄k’ amukaintiaj tusam emka enentáimsashtatmek. <sup>29</sup> Túrutsuk aya ukura iniaisam amuktin tujinkiakm̄ñkia, nuna wáiniainia nu, wishikiainiak juna tiartatui: <sup>30</sup> “Iiskua. Nu shuar jeamtinian nan̄kamamiayi. Túrasha amuktinian tujinkiamiayi.”’

<sup>31</sup> ‘Tura uunt kapitíán chíkich kapitíánjai mesetan najanatin áchatpiash. Emka, ni-isha pujus, tias mir (10.000) suntarjai painti mir (20.000) suntar winiana nuna nu-petkaintjash tusa enentáimsashtatuak. <sup>32</sup> Tujintiakka, chíkich kapitíán jeachat pujaanak, nawamnaikiatai tusa akatar akupkashtatuak. <sup>33</sup> Wats, “Kristu unuiniamur̄i ajastinjai, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarne.’

### *Wee michumarka yajauchiiti*

*(Mateu 5.13; Márkus 9.50)*

<sup>34</sup> ‘Weeka jeaku péñkeraiti. Tura michumarka çitiurak atak péñker ati? <sup>35</sup> Wee michumarka araakmatniunmasha yayaatsui. Tura tsuatnum ikiusmasha ántraiti. Aya ajapatniukete. Kuishim ákuñkia antuktarum” tímiayi.

## 15

### *Jesus murik men̄kakamu chichaman unuiniamiania nu*

*(Mateu 18.10-14)*

<sup>1</sup> Akupniu kuítr̄in-juu tura yajauch shuarsha Jesusan anturkatai tusar tarú wearmi-ayi. <sup>2</sup> Tuma asamtai Pariséusha, Israer-shuara jintinniur̄isha Jesusan áujmatainiak “Jusha tunáa shuaran itiaawai tura niijjai yurumáiniawai” tiarmiayi.

<sup>3</sup> Nuna tuiniakui Jesus ju métek-taku chichaman jintintiaiwarmiayi:

<sup>4</sup> “Shuar sian̄ (100) murikiun takuschampiash. Nu siánnumiã chikichik men̄kakamtai nuwintia nuíwinkia ni matsatmariin̄ ikiuak, men̄kaka nuna ti eakchattawak. Wáintsuk iniaisashtatui. <sup>5</sup> Tura wáiniak yakainium awan̄kek waras jeen wáketui. <sup>6</sup> Tura jeen

jeá ni amikrín, írutramuríncha ikiaanak “Wijjái warastarum. Murikiur menkaka nuna wáinkiajai” tawai. <sup>7</sup> Wats, nuwintia nuiwi péñker shuar akui nayaimpiniam warastin awai. Tura antsu chikichík yajauch shuar ni enentáin yapajíamtainkia, nú nankaamas warastin átatui, tájarne’ tímiayi.

*Kuit emenkakman Jesus unuiniamiania nu*

<sup>8</sup> ‘Nuyá chíkich enentáimsatai. Nuwa tias kuítian takakna nuna chikichik menkakamtai, wáinkiatat tusa jinia ekeemak, jean japimiak émamkes eakchattawak. <sup>9</sup> Tura wáiniak ni amikrín, írutramuríncha ikiaanak, “Wijjái warastarum. Kuit menkakamia nuna wáinkiajai” tawai. <sup>10</sup> Núnisan yajauch shuar ni enentáin yapajíamtai, Yusa suntari matsatmanum ti warastin awai” tímiayi.

*Uchi ni aparín waketitniun Jesus unuiniamiania nu*

<sup>11</sup> Nuyá Jesus juna unuiniamiayi:

“Áishman jimiará uchin takakuyi. <sup>12</sup> Tura pátatka uchi ni aparín timiai “Apawá, surustiniatmena nu yamá surusta.”

‘Tutai ni aparí ni kuítrín jímiapetek nakak mai uchin susamai. <sup>13</sup> Ishichik tsawant nankaamasai pátatka uchi ni warirín irur jukí jeachat chíkich núnkanam wémai. Nuisha nánkamas yajauchin túrak kuítrín ashí ajapamai. <sup>14</sup> Ni kuitri ashí amuuka aín nu nunkanam ti tsuka ámai. Niisha núnisan tsukarijn wáitsamai. <sup>15</sup> Túmak takatan eaktajtsa nu nunkanmayá apachijn werimiai. Nu áishmansha kuchirín wáitrukta tusa akupkamai. <sup>16</sup> Uchi ti tsukamak kuchi ukatramun niisha yuátajtsa ti wakerimiai. Túrasha penké súcharmai. <sup>17</sup> Tumáa pujus nuínkia enentáimpramai. “Winia aparuí takau shuar péñkeran ti yurumáiniawai. Tura wikia juí tsukarui wáitiajai. <sup>18</sup> Wats, aparuí waketitjai. Tura aparun chicharkun “Apawá Yúsjaisha ámijiaisha tunaan túrajai, titiajai. <sup>19</sup> Ame uchiram áchamniaitjai yamaikia. Ame takarniurmea áantsanak átaj tusan wakerajai” titiajai” tu enentáimsamai. <sup>20</sup> Tura wajaki ni aparín waketikimiai’ tímiayi.

‘Tura ni aparísha jeachat winian wáiniak waitnentramai. Aparí tsékenki inkiun miniakak mukunámai. <sup>21</sup> Nuínkia uchirísha timiai “Apawá, Yúsjaisha ámijiaisha tunáan túrajai. Ame uchiram áchamniaitjai.”’

<sup>22</sup> ‘Túrasha ni aparínkia ni takarniurín chicharuk “Ti penker pushí itiarum áentsratarum, timiai. Tura uwejnun aweetaisha aweemtikiatarum. Tura sapatcha aweemtikiatarum. <sup>23</sup> Túrarum waaka nueram ana nu maatarum. Námper nájankur shiir enentáimsar yurumámi. <sup>24</sup> Warí, ju winia uchir jakaapitia tu enentáimsamjai. Túrasha iwiaakui. Menkakama nuna wáinkiajai.” Nuínkia ti warasarmai’ tímiayi.

<sup>25</sup> ‘Tumaj iwiái úchikia takatnum pujumai. Tura wáketuk, jeá nuntumas jantsemáiniak túntuiyamun antukmai. <sup>26</sup> Nuínkia yaintri matsatun chikichkiniak untsuk “¿Warimpait?” timiai.’

<sup>27</sup> ‘Tura nii chichaak “Ame yátsum tayi. Túramtai ame apa waaka nueram maatai tawai, ame yatsum péñker tau asantai” timiai.’

<sup>28</sup> ‘Tura iwiaí uchi kajak wayatniun nakitramai.’

‘Tuma asantai ni aparí jiintiuki “wayata” timiai.’

<sup>29</sup> ‘Tura uchisha aparín chicharuk “Wisha ámin umirkun untsurí uwitin ame takatramin túraitjai. Nu nékame. Túrasha winia amikrujai námper najanatin chiipiuksha penké surichuitme. <sup>30</sup> Tura ju ame uchiram nuwajai yajauchin túrak ame kuítrumin wasurkania nu támatai, waaka nueram máachumek” timiai.’

<sup>31</sup> ‘Takui aparí chicharuk “Uchirú, ámeke wijjái tuke pujame. Tura wi takakjana nusha ashí áminuiti. <sup>32</sup> Tura ame yatsum jákaiti tu enentáimsamjai nu iwiaakuiti. Menkaka nu yamaikia wáinkiajai. Tuma asantai námper najanar waraschatniukaitiaji” timiai’ tímiayi.

## 16

### *Takatan wáinin*

<sup>1</sup> Ju métek-taku chichamnasha Jesus ni unuiniamu<sup>7</sup> ‘Tura nii chichaak “Ame yátsrín unuiniamiayi.

“Kuítrintin áishmaṅka takatrín wáinniurí ámai. Tura nérenniun ujainiak “Ame wáinniuram ame kuítumin náṅkamas ajapeawai” tiarmai.’

<sup>2</sup> ‘Nuna antuk ni wáinniurín untsuk “¿Warinia jusha turamainia? timiai. Yamaikia winia wáinniur áchattame. Tuma asamtai winia kuítrujai itiurkamea nu iniaktursata” timiai.’

<sup>3</sup> ‘Tutai takatan wáinin enentáimsamai. “Maaj, wisha itiurkatjak, timiai. Nunka táurtinniasha jeatsjai. “Kuit surusta” títinniasha natsamajai. <sup>4</sup> Winia takatur atsakui yurumkan ajamprusarat tusan túratajna nuna nekajai” tu enentáimsamai. <sup>5</sup> Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

<sup>6</sup> ‘Niisha áimiuk “Asuitin sian taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta” timiai.’

<sup>7</sup> ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana sian taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

<sup>8</sup> ‘Nuyá takata wáinniu uuntrí nuna nekáa “Nii yajauch túriniatit imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nankaamas Yus-shuarcha aijjai ni túratniuriniak takainiak imiá enentáimkia áiniawai.’

<sup>9</sup> ‘Ju nunkanam anankatin átsuk. Tura kuitsha aya ju nunkanmayankete. Tuma asamtai atumsha kuitrumjai “shuaran yaintaj” tu enentáimsatarum. Kuitjai yaintin amuukamtai atumsha amuicha jeanam ipiaamu átaj tusarum túratarum.”

<sup>10</sup> ‘Shuar ishichik takakna nujai péñker túrakka, núkap takakna nujaisha péñker túrattawai. Tura ishichik takakna nujai péñker túrachkunka, núkap takakna nujaisha péñker túrashtatui. <sup>11</sup> Tuma asamtai ju nunkanmaya anankartin kuitjai péñker túrachkurmeka, tuke átin ana nujai takastincha ¿itiur takastarumek? <sup>12</sup> Takakme nuna Yus ikiatmasuiti. Nujai péñker túrachkurminkia, atumnia átinia nuna ¿itiurak suramsat?’

<sup>13</sup> ‘Takarniurí jimiará úntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya senkuentachik aarta” timiaituak. Chikichan umiruk chikichnaka umirkashtatui. Yussha kuitcha máimetek enentáimtuschnaiitume” tímiayi Jesus.

<sup>14</sup> Pariséusha kuítian anen armia nu, ashí ni táman antukar Jesusan wishikrarmiayi.

<sup>15</sup> Túmakui Jesus nin tímiayi “Atumsha aents íimmianum péñker awajmamprume. Túrasha atumí enentáincha Yus péñker nékawai. Kame winia “nankaamantuiti” turutit tusa wakera nuna Yuska nakitiawai.’

### *Yaunchu etserkamu, yamá etserkamu*

<sup>16</sup> ‘Juan étsertsain Muisáis aar akupkamia nunasha tura Yúsnan etserin unuiniarmia nunasha antuktin árimiayi. Tura yamaisha tímianiaí ti shiir chicham awai. Yus akupeana nuí urukukit nuka paant etserkamuiti. Tura ashí shuar nuí pachiinkiataj tusar ni kakarmarjiaín ti takainiawai.’

<sup>17</sup> ‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nunkasha amukatniujai nankaamas itiurchataiti.’ \*

\* **16:17** Mateu 19.1 ya senkuentachik aarta” timiai-12; Márkus 10.1-12

18 ‘Áishman nuarín ajapa chikichan nuátkunka tsanirmawai. Tura nuwa ajapamu niiniurtakka nusha núnisan tsanirmawai.’

*Kuítrintin áishman Rásarujai*

19 ‘Áishman kuítrintin ámai. Niisha imiá shiir pushin ti kuit ainia nujai iwiarmamniuyi. Tura tuke tsawant yurumak ti kuit amia nujai namperan najanniuyi. 20 Tura kuítrincha ámai ni naarj Rásaru. Niisha kuchapruku tunamaruyi. Tuke tsawant kuítrinniu wáitiriin pujuyi. 21 Ti tsukamak kuítrinniu misarinia kakekan yuattsá wakerimiai. Tura yawasha ni kuchaprín nukatiarmai. 22 Kuítrincha jakamai. Jakamtai jaka shiir pujutainium, Apraám pujumia nuj nayaimpinmaya suntar júkiarmai. Kuítrinniusha jakamai. Jakamtai iwiarsarmai. 23 Jaka pujutainium wáitias pujus, pankáí íimias, Rásarun Apraámjai pujuinian wáinkiamai. 24 Wáiniak untsumuk “Apawá Apraamá wáitnentrurta, timiai. Rásaruka tsara uwejejai entsan uchupir winia iniáirun imichturat akupturkata. Wisha juj jinium pujusan ti waitiajai” timiai.’

25 ‘Tutai Apraám timiai “Uchirú enentáimpratá. Ame nunká iwiaaku pujusam ti shiir pujumame. Antsu Rásaruka nuj ti yajauch pujumai. Tura niisha yamaikia juj áyamui tura ámeká wáitiamé. 26 Tura nú arant nánata ti uunt awai. Tuma asamtai juyá aj wétinian wakeruiniayat tujintiainiawai. Tura aiyá juj tátinian wakeruinia nusha tujintiainiawai.”’

27 ‘Nuinkia kuítrintin timiai “Nuinkia apawá Apraamá, juna seajme. Winia aparú jeen Rásaru akupturkata. 28 Nuisha winia yatsur senku matsatainiawai. Niisha ju wáitsatniunam tácharat tusa ujákartí, tájame” timiai.’

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

30 ‘Tutai kuítrintin áimkiamai “Túrasha apawa Apraamá, antsu jakamunmaya nantaki, shuar we ujakam enentáin yapajáwarainti.”’

31 ‘Tura Apraám timiai “Muisáis áarman tura Yúsnan etserin áarman anturainiachkunka jaka nantaki we ujakmasha antukchartatui” timiai.” Tu áujmatsamiayi Jesus.

## 17

*Yajauch túrumtikiatin ti tsúumainti*  
(Mateu 18.6-7, 21-22; Márkus 9.42)

1 Jesus ni unuiniamurín juna tímiayi, “Aentsun yajauchin túrumtikiattana nu tuke átatui. Tura shuar ni ain tunaan wakerumtikna nu aneartí. 2 Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsain uunt kayajai kuntujnum jiníkiá nayaantsanam ajunkam maak ainti. 3 Túrasha atumek ímiastarum. Ame yatsum ámin tunáa túrutmamtainkia chicharkata; tura niisha “tsankurturta” túramkuinkia tsankurata. 4 Chikichík tsawantinín siati túrutmamtai, tura “tsankurturta, atakka túrashtatjai,” siati túramkuinkia, tuke tsankurata.”

*Yus nekas enentáimtakrikia tujinkiashtatji*

5 Jesusa unuiniamurí Nin chicharuk “Yus enentáimtajnia nú nankaamas enentáimtustin yáinmaktá” tiarmiayi.

6 Tutai Jesus tímiayi “Mustasa jinkíai ti ishitiúpchich ana núnisan ishichkisha Yus enentáimtaikurmeka, sikiumuru numi wajana nu, “Wajamurmijanka ukuiniakam nayaantsanam wajasta” tákurmin nú numi umirtamkainti.’

*Yusa takatri takasar “ti penker túraitji” tíchatniuitji*

7 ‘Atumí takarniurí arakmasua amik, waakancha iis támatai, ¿nú chichamaik amesha, “Winitíá, yurumáitiá” tíintmek? 8 Atsá. Antsu, “yurumak iwiarturata. Wi yurumáin tura umartincha surusminiam iwiarnarta. Nuyá ame yurumátá.” Nu tíchaintmek. 9 Nii túratin ana nunak túratsuk. Tuma asamtai yuminsashtatme. 10 Atumsha núnisrumek Yus



túramna nu ashí umikiam “ti penker túraitjai” tíchatniuitme. Antsu “aya ii túratniuri ana nuke tura asar iikia ántraitji” títiniaitme.” Tu tímiayi Jesus.

*Tias áishman kan tunamarun Jesus tsuáarmiania nu*

<sup>11</sup> Jesus Jerusarénum wesa Kariréa nunka ikiuki Samaria nunkanam nan kaamakmiayi. <sup>12</sup> Tura péprunam jeamtai, tias áishman ripra sunkurjai tunamaru armia nu, arant wajasarmiayi. <sup>13</sup> Tura untsumainiak “Uunt Jesusá, waitnentrurta” tiarmiayi.

<sup>14</sup> Jesus nin wáiniak, “Pátrij werirum iniaktumastarum” tímiayi.

Tura wésar penker ajasarmiayi. <sup>15</sup> Nuyá chikichik ni tsuamarman nekáa kakantar chichaki Yusa náarin uunt awajki waketki Jesusan tarimiayi. <sup>16</sup> Yumiñsataj tusa Jesusan tikishmatar piniakumar tepesmiayi. Nu áishman ka Samarianmayayuyayi.

<sup>17</sup> Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia? <sup>18</sup> ¿Ju yajaya áishman nínikik Yusa naari uunt awajsataj tusa waketki tai?” <sup>19</sup> Nuyá áishman kan tímiayi, “Winia nekas enentáimtursa asam penker ajasume. Wajakim shiir weta” tímiayi Jesus.

*¿Yusa akupeamuri urutaik ati?*

*(Mateu 24.23-28, 36-41)*

<sup>20</sup> Pariséu aents Jesusan aniak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiati. “Yamá nan kamnaya” tichamniati. <sup>21</sup> “Jui awai, nuisha awai” tíchamniati. Warí, Yusa akupeamurinkia atumiin pujawai” tímiayi.

<sup>22</sup> Nuyá ni unuiniamurin chicharuk juna tímiayi: “Tsawant jeattawai atumsha Winia Aents Ajasu tutain “aya chikichik tsawantkesha Nii wáinkiarkea mak” turuttiatrume. Túrasha tujinkiattarme. <sup>23</sup> Aents Ajasu tutai “juj pujawai, nuisha pujawai” tuíniakui werirap. Tana nu nemariirap. <sup>24</sup> Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui. <sup>25</sup> Tura nu túruntsain yamai pujuinia nu Winia nakitruiniakui ti wáitsatniuitjai. <sup>26</sup> Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai. <sup>27</sup> Yurumáwarmiayi, umararmiayi, nuatnaikiarmiayi, ni nawantri nu-atnakat tusa surukarmiayi. Tumáa pujuinia Nuái uunt kanunam enkemprantai, amarak nu aentsnasha mash amuukarmiayi. <sup>28</sup> Tura Sutuma péprunmasha Rauta írutramurisha núnisan Yusa asutiátniuri enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajamarmiayi, jeancha jeam-marmiayi. <sup>29</sup> Tura Raut Sutuma péprunmaya jinkimtai asupri tutai kaya keek yútana áintsan nayaimpinmaya kakeetuk nu áentsun mash máawarmiayi. <sup>30</sup> Núnisan winia atak tátiniur jeamtai enentáimtsuk pujusartatui.’

<sup>31</sup> ‘Nu tsawant jeamtai jea yakiini pujana nú shuar ni waririn achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti. <sup>32</sup> Rauta nuari túrunamu enentáimpratarum. <sup>33</sup> Aya ju nunkanmayan enentáimias “iwiaaku átaj” tana nu ni iwiaakmarin emenkáktatui. Tura ju nunkanam ni iwiaakmarin emenkana nu nekas iwiaakma ana nuna wáinkíattawai. <sup>34</sup> Paant tájarme. Nú káshitin jimiará áishman nuu peaknuman kanúu tepeartatui. Chikichik junaktiatui, chíkichkia ikiunkittiawai. <sup>35</sup> Jimiará nuwá máí-metek nekée pujuartatui. Chikichik junaktiatui, chíkichkia ikiunkittiawai. <sup>36</sup> Jimiará áishman kampuniunam wekainiartatui. Chikichik junaktiatui, chíkichkia ikiunkittiawai.” Tu tímiayi.

<sup>37</sup> Nuna antukar “Uunta ¿tui túrunatta?” tiarmiayi.

Tutai ni chichaak “Jaka tepana nui chuan káutkartatui.”

## 18

### *Shuar yawetsuk Yúsan tuke áujsatniuiti*

<sup>1</sup> Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

<sup>2</sup> “Chíkich péprunam shuaran akupin amai. Nú áishman Yúsnasha ashamchauyi; shuárnasha péñker enentáimtichuyi. <sup>3</sup> Tura nú péprunam waje amai. Niisha shuáran akupniun chicharuk “Áishman winia yajauch awajtusmania nu írtusta” tusa tuke waketrú pujuyi. <sup>4</sup> Yámankamtaikkia nin anturkatniun nakitmiai. Tura ukunam enentáimias “Wisha Yúsan ashamachiatnak shuárnasha péñker enentáimtichuitiatnak ju waje tana nuna túrattajai. <sup>5</sup> Warí niisha tuke taa itit awajtatsuk. Tuma asamtai nin kajerkañ tusan wárik túrattajai” timiai” tímiayi.

<sup>6</sup> Nuyá uunt Jesus tímiayi “Shuaran akupin yajauchiitiat nuna timiai. <sup>7</sup> Tura Yus ti péñker asa, ni achikmarin tsawajsha, káshisha untsuamka nú nankaamas anturkash-tatuak. ¿Yáitsuk menkakatuak? <sup>8</sup> Atsá, wárik yáinkiertatui, tájarme. Tura Wi Aents Aja-suitjiana ju atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

### *Pariséusha, kuítian-juuncha Yúsan áujsarmia nu*

<sup>9</sup> “Péñkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

<sup>10</sup> “Jimiará áishman Yusa Uunt Jeen Yus áujsatat tusar wearmai. Chíkichkia Pariséuuyi, chíkichkia kuítian-juuyi. <sup>11</sup> Pariséusha wajaki Yúsan áujuk júnis tímiayi: “Yusrú, chíkich áishman kasa, yajauch, tsanirmau ainia nujai métekcha asan yuminsajme. Tura ju kuítian-juu wajana jújaisha métekchaitjai. <sup>12</sup> Warí, Ame akupkamna nuna iniankasan wisha chikichík semanatinin jimiará tsawant ijiarman áujeajai; tura wi achiajna nuna tiásnumia chikichkiniak Yúsnaiti tusan akankan súajai.” Tu timiai.’

<sup>13</sup> ‘Tura kuítian-juusha arant wajas, nayaimpinmaan pankái ímsatniunkesha natsaamak, tsunsuma, ni netsepen awatí “Yusá, ti tunaitjai. Waitnétrurtá” timiai.’

<sup>14</sup> ‘Wats tájarme, nu kuítian-juu shuar Yus ímmianum ni enentái péñker awajnas ni jeen waketkimiai. Tura Pariséuka tamia núnisan waketkimiai. Nekaatarum. Shuar nankaamantu enentáimtumana nuka péechach awajnastatui. Tura antsu péechach enentáimtumana nu, nankaamantu awajnastatui” tímiayi Jesus.

### *Uchisha Jesusna áminiaiti*

*(Mateu 19.13-15; Márkus 10.13-16)*

<sup>15</sup> Jesus antinkiarat tusar uchin itiararmiayi. Tura Jesusa unuiniamurisha nuna wáinkiar suritkiarmiayi. <sup>16</sup> Tura Jesus nin untsukar tímiayi “Uchi Winí winitin tsankamkatarum, surimkiairap. Enentáimsatarum. Uchichia áintsan enentáimtumana nú shuáarak Yus ni enentáin akupin ajasminiaiti. <sup>17</sup> Uchi ni úntrin umira núnisan shuar Yúsan umíachkunka Yus ni enentáin akupin ajaschamniaiti.” Tu tímiayi Jesus.

### *Kútrintin áishman Jesusjai áujmatsamiania nu*

*(Mateu 19.16-30; Márkus 10.17-31)*

<sup>18</sup> Shuara uuntri Jesusan tarí áujsamiaiyi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

<sup>19</sup> Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti. <sup>20</sup> Tura Yus akupkamu ana nu péñker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

<sup>21</sup> Tutai áishman tímiayi “Uuntá, úchichik mash umiki tsakaruitjai.”

<sup>22</sup> Jesus nuna antuk “Chikichik taatramsai, tímiayi. Ame takakmena nu ashí surukam kuítríncha ainia nu susarta. Nuiñkia nayaimpiniam kuítrum átatui. Túram nemartustaj tusam winitia.”

<sup>23</sup> Tura nuna antuk, nu áishman ti kuítrintin asa ti kuntuts enentáimpramiayi. <sup>24</sup> Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi. <sup>25</sup> Kamiriuka, uunt ana nu, auja jiiin wayatin itiurchataiti. Tura shuar kuítrin ti enentáimtana nu Yus akupeamunam pachiinkiatin nú nankaamas itiurchataiti.” Tu tímiayi.

<sup>26</sup> Tura nuna antukarmia nu tiarmiayi “¿Nuiñkia yaki uwempramniait?”

<sup>27</sup> Tutai Jesus tímiayi “Aents tujintiania nuna Yuska páchitsuk túramniaiti.”

<sup>28</sup> Nuyá Pítur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

<sup>29-30</sup> Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisan ni aparíncha, nukuríncha, yachínkisha, nuwenkesha, uchirínkisha ikiuakka ju nunkanmasha núkap wáinkiatatawai nu shuar. Tura tuke iwiaaku pujustinniasha wáinkiatatawai.”

### *Ataksha ni jákatniurín Jesus ujakmiania nu*

*(Mateu 20.17-19; Márkus 10.32-34)*

<sup>31</sup> Jesus ni tuse unuiniamurín akanki ikiaanak juna tímiayi:

“Jerusarénum jeatemaji. Juisha Jerusarénum Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiatatawai. <sup>32</sup> Apachnium surutkartatui. Túrawar wishikrurar, katsekrukar usukruawartatui. <sup>33</sup> Awatiar mantuáwartatui. Túramaitatnak menaintiú tsawantaj nantaktiatjai” tímiayi.

<sup>34</sup> Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

### *Jirikiúnmaya áishmankan Jesus ímtikmiania nu*

*(Mateu 20.29-34; Márkus 10.46-52)*

<sup>35</sup> Jesus Jirikiú péprunam nuntumsaj, nuí áishman jii kusuru, kuítian surusarat tusa jintiá pujumiayi. <sup>36</sup> Untsurí aents nankaamainian antuk “¿warínkit?” tímiayi.

<sup>37</sup> Tutai, “Nasarénumia Jesus nankaamawai” tiarmiayi.

<sup>38</sup> Kusurusha nuna antuk untsumuk “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

<sup>39</sup> Eemak wearmiania nu chicharainiak “takamatsata” tiarmiayi.

Tutaisha nú arant untsumuk “Tawit weeachukaitiam; winiaja waitnentrurta” tímiayi.

<sup>40</sup> Nuiñkia Jesus wajas “itiatarum” tímiayi. Tura nii támatai, <sup>41</sup> “¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

<sup>42</sup> Tutai Jesus chichaak “Ímtia. Winia nekas enentáimtursa asam péñker ajasume” tímiayi.

<sup>43</sup> Nu chichamaik kusuru ímmiayi. Tura Yusa naari uunt awajki Jesusan nemarmiayi. Tura ashí aents nuna wáinkiamia nusha Yusa náarin uunt awajsarmiayi.

## 19

### *Sakíu Jesusjai*

<sup>1</sup> Nuyá Jirikiú péprunam wayá nuí wekaikini ajamiayi. <sup>2</sup> Nuí kuítrintin áishman ni naari Sakíu pujumiayi. Nu Sakíu kuítian-juu úntriyayi. <sup>3</sup> Aents ti káunkámtai, Sakíu ti sútarach asa, Jesusan íistaj tukamá tujinkiamiayi. <sup>4</sup> Tuma asa Jesus nuke nankaamakitin asamtai, eemki tsékinki sikiumuru numi wajamunam wakamiayi íistaj tusa. <sup>5</sup> Jesus

nui nan̄kaamak paṅkái íimias chicharuk “Sakú wárik akáikitiá. Ame jeemiin yamá kanartiniaitjai” tímiayi.

<sup>6</sup> Tutai Sakíusha wárik akaiki, shiir enentáimias Jesusan itiaamiayi. <sup>7</sup> Ashí aents nuna wáinkiar “Maaj, Jesus tunáa áishmaṅka jeen pujawai” tusa mai tunaim ajarmiayi.

<sup>8</sup> Nuyá Sakú wajakí Jesusan chicharuk “Íistá Uuntá, wi takakjana juna jímiapetek nakakan kuítríncha ainia nuna susartatjai. Tura wáitruan chikichan kasarkaitkiuncha menaintiu patatsan awaiṅkittiajai” tímiayi.

<sup>9</sup> Tutai Jesus tímiayi “Ju áishmaṅ Apraáma shuárintiat yamá niisha níniuajai uwempra asa nekas Apraáma shuari ajasuiti. <sup>10</sup> Wisha Aents Ajasu asan men̄kakarú ainia nuna eakan uwemtikrartaj tusan táwitjai.” Tu tímiayi.

### *Kuítian nekapmá chichasmiayi*

<sup>11</sup> Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asantai wésar Jerusarénum nuntumsarai, nuna enentáimsaraiṅ tusa Jesus juna métek-takun chichasmiayi:

<sup>12</sup> “Áishmaṅ peṅkeri amai. Nu áishmaṅsha jeachat chíkich núṅkanam kapitián náamkan tátaj tusa wemai. <sup>13</sup> Tura wétsuk ni takarniurin tias armia nuna untsukarmai. Tura aṅkant aṅkant kuit kurijjai nan̄kaamas péṅker armia nuna suíniak “Ju kuitjai wi táatsaiṅ takakmá ajatarum” timiai.’

<sup>14</sup> “Tura ni nun̄kénia shuarka nakitiarmai. Túmainiak “nu áishmaṅ ii kapitiántri ajasain tusar nakitiaji” nu titiá tusar áishmaṅkan akatrar akuptukarmai.’

<sup>15</sup> “Tuma aṅ kapitián náamak ni nun̄kén waketki tamai. Taa “winia kuítrujai warí túrarum” títiáj tusa ni takarniurin kuitia súsarmia nuna untsukarmai.’

<sup>16</sup> “Ni takarniuri emka chikichik taa “ame kuítrumjai takakmasan tias patasan achikmajai” timiai.’

<sup>17</sup> “Tutai kapitián chichaak “Péṅker túrame. Ishichik susamjamna nújain̄k wi tímiajna tímiatrusmek túrame. Tuma asakmin tias péprun akupin awajsattajme” timiai.’

<sup>18</sup> “Chíkich taa “Íistá Uuntá, ame kuítrumjai takakmasan sen̄ku patasan achikjai” timiai.’

<sup>19</sup> “Nunasha chicharuk “Amincha sen̄ku péprun akupin awajsattajme” timiai.’

<sup>20</sup> “Nuyá chíkich taa “Uuntá, ame kuítrumin panijjai ijian ikiusmajai. <sup>21</sup> Amesha kakaram chichau asakmin, ikiuschiatam achin asakmin tura arakmachiatam juu asakmin ashamkamjame” timiai.’

<sup>22</sup> “Tutai kapitián timiai “Maaj, amesha ti yajauchiitme. Ame támena nuke makur-mawai. Wi kakaram chichau aisha, ikiuschiatan achin aisha tura araknasha arakmachiatan juu aisha, <sup>23</sup> nuin̄kia ¿urukamtia kuit-ikiutainiam ikiuschamam? Nuin̄kia wi atak táakun patasan achikiāajna” timiai. <sup>24</sup> Tura nui wajarmia nuna chicharuk “Kuítian takakmarj juruktiarum; túrarum tias takakna nú shuar susatarum” timiai.’

<sup>25</sup> “Tura niisha chichainiak “túrasha Uuntá, tias takakja” tiarmai.’

<sup>26</sup> “Tutai kapitián chichaak “Takakna nujai takaakuin̄kia patatnastatui tájarme. Tura takakna nujai takaachkuin̄kia ishichik takakkuisha jurunkittiwai. <sup>27</sup> Tura winia nemasur kapitián ajasain̄ tusar nakitrurarmania nu itiatarum. Tura wisha íimiaín máatárum” timiai.” Tu tímiayi Jesus.

### *Jerusarénum Jesus wayamiayi*

*(Mateu 21.1-11; Márkus 11.1-11; Juan 12.12-19)*

<sup>28</sup> Nuna tuasua amik Jesus Jerusarénumaan̄i wémiayi. <sup>29</sup> Petpajái pepru tura Petania péprusha Uriwiu náinnium tíjiuchiya; nui jeastatuk ajatemas ni unuiniamurin jímiaran chicharuk, <sup>30</sup> “Tíjiuch péprunam wetarum. Túrarum nui umpuuruch ekemtukchamu jin̄kiamu waja wáinkiatarme. Nu atiarum itiatarum. <sup>31</sup> Tura “¿urukamtai atiarum?” turamainiakui sha, “ii uuntri wakerawai” títiarum” tímiayi.

<sup>32</sup> Tutai unuiniamurí wear, Jesus timia ímiatrusan wáinkiarmaiya <sup>33</sup> Tura umpuuruchin atíakui nérentin chichainiak “¿Urukantai umpuuruchsha atíarum?” tiarmiayi.

<sup>34</sup> Tutai unuiniamusha “Ti uuntri wakerawai” tiarmiayi.

<sup>35</sup> Tura umpuuruchin Jesusan itiarmaiya. Túrawar ni pushirin umpuuruchiniam awantkar Jesusan ekenkarmiaiya. <sup>36</sup> Tura Jesus wétinnium ni pushirin jintianam ayaparar áintrarmiaiya. <sup>37</sup> Tura Uriwiu naint awan\_kénamunam tíjiuch ajasarmatai untsurí aents Jesusan nemariarmia nu warainiak kakantar unsumainiak aents tujintiamun untsurí túran wáinkiaru ásar Yusa náarin uunt awajsarmiaiya. <sup>38</sup> “Yusa náarín winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarin uunt awajsarti” tiarmiayi.

<sup>39</sup> Tura Pariséu aents nuj páchitra pujuarmia nu Jesusan chicharainiak “Uuntá, nemarkamainia nu “takamatsata” tiarta” tiarmiayi.

<sup>40</sup> Tutai Jesus tímiayi “Nuiñkia ju takamatsarmataiñkia, kayasha unsumkarainti. Nuna paant tájarne” tímiayi. <sup>41</sup> Jerusarénum tíjiuch ajatemas péprun wáiniak útuk júnis tímiayi: <sup>42</sup> “Jerusarénumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nankaamasai. <sup>43</sup> Kame ti ititurchat tsawant jeartamtatrume. Atumí nemasri nun\_kajai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrume. <sup>44</sup> Túrutma nun\_ká ajuñmartatrume. Tura atumiñ pujuinia nuna máawartatui. Tura ashí emesrarmatai ishichkisha kaya irumpramusha pen\_ké atsuttawai. Wi Yusa anaikiamurín tarijrumna nu nekaachu asakrumin túrutmattarme.” Tu tímiayi.

*Yusa Uunt Jeen suruktinian Jesus surinkiamiania nu  
(Mateu 21.12-17; Márkus 11.15-19; Juan 2.13-22)*

<sup>45</sup> Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha jiki awemarmiaiya. <sup>46</sup> Túrak juña tímiayi:

“Yús-Papinium yaunchu aarma awai: “Winia jearka Yus áujsatin jeaiti” tu áarmaiti. Túrasha átumka kasáa matsamtaiya nútikiarme” tímiayi.

<sup>47</sup> Tuke tsawantin Yusa Uunt Jeen Jesus uwempratin chichaman unuiniak pujai Israer-patri úuntrisha, Israer-shuara jintinniurisha, Israer-shuara úuntrisha tarmiayi. <sup>2</sup> Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi. <sup>3</sup> Tutai Jesus tímiayi “Wisha aniastajrum tusan wakerajrume. <sup>4</sup> ¿Ya Juáñnasha imiakrattia tusa akupkama? ¿Yusak? ¿Aentsuk? Turuttiarum” tímiayi.

<sup>5</sup> Tútaisha niisha nuamtak warintiajik mai tunai ajarmiayi. ““Yus akupkaiti” tákurniñkia, “¿urukantai enentáimtuscharum?” turamtatji. <sup>6</sup> Túrasha “aents akupkaiti” tákurnisha ashí aents kayajai tukurmar mantamattaji. Warí “Juan Yúsnan etserniuiti” tuíniatsuk” tiarmiayi. <sup>7</sup> Nuiñkia Jesusan áiniak “Iisha nékatsji, Juan imiakratinniasha yátsuk akupkama” tiarmiayi.

## 20

*Yusa kakarmarijai Jesus takasmiania nu  
(Mateu 21.23-27; Márkus 11.27-33)*

<sup>1</sup> Yusa Uunt Jeen Jesus uwempratin chichaman unuiniak pujai Israer-patri úuntrisha, Israer-shuara jintinniurisha, Israer-shuara úuntrisha tarmiayi. <sup>2</sup> Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

<sup>3</sup> Tutai Jesus tímiayi “Wisha aniastajrum tusan wakerajrume. <sup>4</sup> ¿Ya Juáñnasha imiakrattia tusa akupkama? ¿Yusak? ¿Aentsuk? Turuttiarum” tímiayi.

<sup>5</sup> Tútaisha niisha nuamtak warintiajik mai tunai ajarmiayi. ““Yus akupkaiti” tákurniñkia, “¿urukantai enentáimtuscharum?” turamtatji. <sup>6</sup> Túrasha “aents akupkaiti” tákurnisha ashí aents kayajai tukurmar mantamattaji. Warí “Juan Yúsnan etserniuiti” tuíniatsuk” tiarmiayi. <sup>7</sup> Nuiñkia Jesusan áiniak “Iisha nékatsji, Juan imiakratinniasha yátsuk akupkama” tiarmiayi.

<sup>8</sup> Tutai Jesus tímiayi “Wisha núnisnak winia akuptukua nuna tíchattajrume” tímiayi.

*Pénker-takachu armia nu  
(Mateu 21.33-44; Márkus 12.1-11)*

<sup>9</sup> Nuyá Jesus ju métek-taku chichamjai aentsun jintintiamiayi:

“Áishman̄ ni ajarin̄ uwa araa amuk, shuaran takartusti tusa ikiukmiai. Tura nin̄kia wau táchataj tusa jeachat wémai. <sup>10</sup> Tura júuktin tsawant jeamtai juukman akanak jurumkit tusa takarniur̄in takau shuarīn akuptukmai. Tura takarniur̄incha katsumkar áyatik awain̄kiarmai. <sup>11</sup> Nuyá nérentin chíkich takarniur̄in akupkamai; tura nunasha núnisan̄ katsekkar, awatiar, sútsuk akupkarmai. <sup>12</sup> Nuyá ataksha chikichan akupkamai. Tura nunasha takau shuar katsumkar akupkarmai.’

<sup>13</sup> ‘Nuyá ukunam ajá nérenniuri “Itiurkatjak, timiai. Winia aneamu uchirun akupkat-tajai. Nin wáinkiar shiir enentáimtuschartimpiash” timiai.’

<sup>14</sup> ‘Túrasha takau shuar nuna wáinkiar, nuamtak chichainiak “Juka ajá nérenniuri ajastatui. Maatai. Nuikia aja iiniu átatui” tiarmai. <sup>15</sup> Nuna tuíniak ajanmayā j̄iki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniuri itiurkattawa? <sup>16</sup> Niisha taa, nu takau shuaran máawartatui. Tura núnkanka chikichan susattawai” tímiayi.

Nuna anturkar “Yus núnaka tsan̄katkashti” tiarmiayi.

<sup>17</sup> Tura Jesus nin émamkes ísar tímiayi “¿Nuikia Yus-Papinium áarma nu warintuia? Ju áarmaiti:

Kayan péñkernak jeā jeamin “yajauchiiti” tusar ajapawarmia nu ashí kayajai nan̄kaamas péñker apujsamuiti. <sup>18</sup> Nu kayan tukumainia nuka kupintrattawai. Tura nu kaya shuarum iniarka nu shuaran tsai tsai awajsattawai. Tu áarmaiti.

*Pariséu achiktai tusar wakeriarmiania nu  
(Mateu 21.45-46; 22.15-22; Márkus 12.12-17)*

<sup>19</sup> Israer-patri uuntri tura Israer-shuara jintinniur̄isha “nu métek-taku chichamjai in túramji” tu nekaawar nuik’ Jesusan achikiar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi. <sup>20</sup> Tura Kapitiánnium suruktai tusar wakeruiniak mamikmau shuaran Jesusan akuptukarmiayi. Nu shuar péñker shuara núnisan̄ jeariar, Jesus nékatsuk yajauch chichakat tusar, aniaataj tusar wearmi-ayi. Ni chichakmarij̄ij̄ai uuntnum suruktai tusar túrawarmiayi. <sup>21</sup> Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íiyatsme, antsu nekas Yusa jintī jintintiame. <sup>22</sup> Wats turuttia, ¿Rúmanmayā uunt akupin ii kuitrī akiktin péñkerkai? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

<sup>23</sup> Tura Jesuska ni yajauch enentáimsamur̄in nekáa chicharainiak, <sup>24</sup> “Kuit itiatarum. ¿Yana yapí tura yana naarī juī áarmait?” tímiayi.

Tutai nii tiarmiayi “uunt akupniunu.”

<sup>25</sup> Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

<sup>26</sup> Aents ántamunam ni chichakmarij̄ij̄ai achiktinian pen̄ké tujinkiararmiayi. Antsu aya ímprarmiayi tura takamtak pujusarmiayi.

*Satuséusha achiktai tusar wakeriarmiania nu  
(Mateu 22.23-33; Márkus 12.18-27)*

<sup>27</sup> Nuyá Satuséu “jakamunmayā pen̄ké nantakchamniaiti” tuinia nu, Jesusan aniaatai tusar tariarmiayi. <sup>28</sup> Aniniak tiarmiayi “Uuntá, Muisáis juna áartampramij̄ai: “Áishman̄ ni nuarí júreatsain̄ jakamtain̄kia ni yachī nu wajen nuátkatí, yachin̄ yajutmatratsa.” Tu áarmaiti, tiarmiayi. <sup>29</sup> Wats, siati yachī ármai, tiarmiayi. Iwiajri nuwan̄ nuatak yajutmatsuk jakamai. <sup>30</sup> Ni yachī wajen akintiak, nuátak, niisha yajutmatsuk jakamai. <sup>31</sup> Nuna yachisha núnisan̄ nu wajen nuátkamai; tura núnisan̄ ashí siati nuna patain̄k’ nuátkarmai. Yajutmatsuk yajutmatsuk kajin̄kiarmai. <sup>32</sup> Tura ukunam nuwasha jakamai. <sup>33</sup> Nantaktin tsawantai, nantakiarmatai, ¿yana nuar̄in̄ ati? Ashí siati nuátkacharmaka” tiarmiayi.

<sup>34</sup> Tutai Jesus tímiayi “Ju nunkanman nuatnaikiatin awai. <sup>35</sup> Tura nantakiar atak iwiaaku ámin ainia nuka nuatnaikiachartatui. <sup>36</sup> Warí, jákashtin ániatsuk. Nayaimp-inmaya suntara áintsan ajasartatui. Tura nantakiaru ásar Yusa uchiri ajasartatui. <sup>37</sup> Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus niijjai chichaamun, Yus-Papinium Muisaiska áarmiayi. Nú áarmanum Uunt Yus Apraáma, Isaka tura Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintíamiayi. <sup>38</sup> Kame jaka menkakatniunam pujuinia nuna Yúsrinchuiti. Tuma asamtai jakáa Yúsrinti tíchamniaiti. Antsu iwiaaku ainia nuna Yúsrinti. Ashi Niiniun iwiaarkainiawai” tímiayi.

<sup>39</sup> Nuna antukar Israer-shuara jintinniuri “pénker tame, Uuntá” tiarmiayi.

<sup>40</sup> Tura nuyánka aniastinian arantukarmiayi.

*¿Kristu tutai yana uchirimpiait?*

*(Mateu 22.41-46; Márkus 12.35-37)*

<sup>41</sup> Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárúm?

<sup>42</sup> Warí, Sarmu papinium Tawit niñki juna tátsuk:

“Uunt winia Úntrun “Akupin pujutainium Winia untsuuruini pujustá, tímiayi. <sup>43</sup> Ame nemasrumin núpeteatsain nui pujustá” tímiayi.” Tú áarmaiti.

<sup>44</sup> Kame Tawitkia, Krístun chicharuk, “winia Úuntur” tajsha, ¿itiurak Kristu tutai Tawitia pampanmarí átink’?” Tú tímiayi Jesus.

*Israer-shuaran jintintin ainia nuyá aneartarum*

*(Mateu 23.1-36; Márkus 12.38-40; Rúkas 11.37-54)*

<sup>45</sup> Ashí aents Nin anturkatasa pujuiniaj ni unuiniamurin Jesus juna tímiayi:

<sup>46</sup> “Israer-shuaran jintintin ainia nuyá aneartarum. Niisha esaram pushin entsarar wekasataisar wakeruiniawai. Tura jintiá ti shiir áujtusarat tusar wakeruiniawai; tura iruntai jeenam penkeri pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. <sup>47</sup> Túrasha wajé jeencha atantainiawai. Túrawar aents nekaracharat tusar ti esaram chichamjai Yúsan áujainiawai. Nincha chíchichjai nankaamas Yus asutiáwartatui.”

## 21

*Wajé ni kuítrin susamia nu*

*(Márkus 12.41-44)*

<sup>1</sup> Yusa Uunt Jeen kuítrintin kuit enketainiam kuítian enkeenan Jesus wáinkiamiayi.

<sup>2</sup> Tura wajé kuítrincha jimiará uchich kuítian, reara áaniun, enkean wáinkiamiayi.

<sup>3</sup> Wáiniak tímiayi “Nekas tájarme, ju wajé kuítrinchaitiat, ashí enkeena nú nankaamas núkap enkeayi. <sup>4</sup> Warí, chíchichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

*Yusa Uunt Jeen saanaktinian Jesus ujakmiania nu*

*(Mateu 24.1-2; Márkus 13.1-2)*

<sup>5</sup> Yusa Uunt Jeen kaya shírmach armia nuna tura chíchich shírmach susamu armia nunasha chíchich shuar áujmatuk pujuarmiayi. Nuyá Jesus tímiayi:

<sup>6</sup> “Átum yamá shiir wáintrumna nu ashí emesnartatui. Kaya ekentramusha mash yumpuntrartatui” tímiayi.

*Amuukatin tsawantin uruku átata nu nekaatin*

*(Mateu 24.3-28; Márkus 13.3-23)*

<sup>7</sup> Nuyá Jesusan chicharainiak “Uuntá, nusha ¿urutaik túrunat’? ¿Kame ju túrunatin jeatemamtaisha warijiajn nekaattaj’?” tiarmiayi.

<sup>8</sup> Tutai Jesus tímiayi “Aneartarum; ananawairap. Nekaatarum. Winia náarun pachisar, “wi Krístuitjai” tau ti untsurí jíinrtartatui. “Nuńka amuukatin jeayi” tu etserkartatui. Tuńiakui anturkarum nemariirap. <sup>9</sup> Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

<sup>10</sup> Nuyá tuke chicharuk tímiayi ‘Shuar chíkich nuńkanmaya shuarjai mesetnum ti nekas maaniawartatui. <sup>11</sup> Ti uurkattawai; untsurí nuńkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujai Yus ni kakarmarın iniakmastatui.’

<sup>12</sup> ‘Tura ju túruntsaiń atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. <sup>13</sup> Nuńkia atumin túrutmakrumin wi túramu etserkatin arutmattarme. <sup>14-15</sup> Tura atumi nemasri nakitramainiak “wáitaiiti” títinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

<sup>16</sup> ‘Tura imia atumí aparisha surutmakartatui. Atumí yachisha, atumí shuarisha amikrumsha núnisanu surutmakartatui. Tura máamunka máawartatui. <sup>17</sup> Tura Winia ajasaru asakrumin ashí aents nakitramprartatui. <sup>18</sup> Tura penké ishichkisha yajauch awajtamsachartatui. <sup>19</sup> Katsuntrarmeka iwiaaku átin wáinkiattarme.’

<sup>20</sup> ‘Ju pepru Jerusarenka aa tanishriin suntar téntakar matsatu wáinkiurmeka, emesratin jeá nekaattarme. <sup>21</sup> Nuikia jui Jutía nuńkanam pujuinia nu, náinnium pisartin áiniawai; tura jui Jerusarennum pujuinia nusha juyanka jiinki wétin ainiawai. Tura ajanam pujuinia nusha, péprunam waketkishtin áiniawai. <sup>22</sup> Nu tsawantincha Yus asutiámun wáinkiartatui. Yús-Papinium nu túrunatin yaunchu aarma nu uminkiattawai nu tsawantin. <sup>23</sup> Nuńkanam ti wáitsatin átatui. Tura ju aents ti asutniawartatui. Tuma asamtai nuwa ajamtin ainia nusha, tura uchi kuirchin takakainia nusha imiá itiurchatan wáinkiartatui. <sup>24</sup> Tura juyá aents mesetnum jákartatui. Tura chikichnaka ashí nuńkanam misaawar júkiartatui; tura yajaya apach, Yúsnan enentáimtuiniatsna nu, jui Jerusarennum wayawar najakartatui. Nu túratniunka Yus tsanatkana nuin túrawartatui.’

### *Aents Ajasu tutai tátintri*

*(Mateu 24.29-35, 42-44; Márkus 13.24-37)*

<sup>25</sup> ‘Nuńkia etsanmasha, nantunmasha, yáanmasha Yuska ni kakarmarın iniakmak nusháa túrattawai. Nuńkanmasha ashí aents páchim enentáimprartatui. Tura nayaantsanam chíchimi ti aku tantáa jakui ti ashamkartatui. <sup>26</sup> Tura túrunatin ana nuna enentáimsar mayaj ashinkiertatui. Warí, nayaimpiniam kakaram ainia nusha peantrartatui. <sup>27</sup> Nuyá Winia, Aents Ajasu tutain, yuranminiam ti shiir ajasan winiaj wáitkiartatui. <sup>28</sup> Nu túrunatin nánkamkui uwempratin jeatemayi tusarum kakaarum shiir enentáimsatarum.’

<sup>29</sup> Tura ju chichamnasha nekapmamiayi. ‘Ikiu numi tura nánkamas numisha enentáimsatarum. <sup>30</sup> Ju nuńkanam ni nuké yama punkakmatai “esat jeatemayi” tátsurmek. <sup>31</sup> Núnisanu Wi tájana nu wáinkiurmeka, Wi ju nuńkanam akupin ajastin jeatema nu nekaatarum.’

<sup>32</sup> ‘Tura aents yamaí pujuinia nu jáatsaiń nusha ashí túrunattawai. Núnaka paant tájarme. <sup>33</sup> Nayaimpisha nuńkasha amuukartatui. Tura winia chichampruka amuukachminiati. <sup>34-35</sup> Nu tsawant aya aneachma jeattawai. Ashí aents ju nuńkanam pujuinia nu, nuna enentáimtsuk pujuiniaj jeattawai. Tuma asamtai atumsha anearum wekasatarum. Yajauchiniam emetnarum, aya yurumátniuk, aya umartiniak enentáimtusurum, ju nuńkanam ana nu ti wakerakrumnińkia péńker enentáimsatin tujinkiattarme. Nu atsutí tusarum tura nu tsawant aya áwaktamkajj tusarum péńker



wekasatarum. <sup>36</sup> Anearum wekasatarum. Túrunattana nuĭ katsuntrataj tusarum Yus aujsa pujustarum. Túrarum Aents Ajasu tutai ímmianum péñker átaj tusarum túratarum.”

<sup>37</sup> Tuke tsawant tsawajsha Yusa Uunt Jeeñ Jesus unuiniamiayi. Tura káshikia Uriwiu náinnium we-wémiayi. <sup>38</sup> Tura tuke tsawant Yusa Uunt Jeeñ Jesus chichaamun anturkatai tusar káshik tariarmiayi.

## 22

### *Jesus achiktin chichaman jurusarmiania nu*

*(Mateu 26.1-5, 14-16; Márkus 14.1-2, 10-11; Juan 11.45-53)*

<sup>1</sup> Wakaprutai enġketaachma tanta yuatin námper, paskua tutai, jeatemamiayi. <sup>2</sup> Israer-shuara Pátririsha Israer-shuara jintinniurisha áentsun ashamainia ásar, itiurak máawaintiaji tusar ti enentáimsarmiayi.

<sup>3</sup> Nuñkia Iskariúti Jútasan enentáin íwianch wáintiamiayi. Nú Jútaska Jesusa unuini-amuriin páchitkiauyayi. <sup>4</sup> Israer-patri úntrin tura Yusa Uunt Jee kapitián pujuarmia nuna werimiayi. Tura Jesusan tu surukminiaiti tusa niijjai chichasarmiayi. <sup>5</sup> Niisha nuna antukar warasar “kuit amastatji” Jútasan tiarmiayi. <sup>6</sup> Niisha “ayu” tinia, aents nékachmanum suruktaj tu enentáimsamiayi.

### *Kristu jakamu enentáimtustin námper*

*(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)*

<sup>7</sup> Wats, wakaprutai enġketaachma tanta yúatin námper jeamiayi. Paskua tutainium murikchin máatin ármiai. <sup>8</sup> Tura Jesus Pitruncha, Juáñnasha akupeak “Paskua tutai námper iwiaratarum” tímiayi.

<sup>9</sup> Tutai niisha chichainiak “¿Tuĭ iwiarat tusamea wakeram?” tiarmiayi.

<sup>10</sup> Tutai Jesus juna tímiayi “Péprunam wetarum. Jearum áishman yumín takaku wekáa wáinkiatarme. Nú áishman nemarsatarum. Tura jeá wayaakui, <sup>11</sup> nú jea nérenniurĭ chichareakrum “Uunt chichartamuk unuiniamurjai paskua yurumátin ¿tuĭ aa? tura-mui” titiarum, tímiayi. <sup>12</sup> Tákurmin nu nérentin yakí písunam uunt kuártun ashí iwiaramun iniakturmastatrum. Nuĭ ii yurumátin iwiaratarum” tímiayi.

<sup>13</sup> Tutai niisha wear Jesus tímiania tímatrusan wáinkiarumiayi. Tura paskua namperan nuĭ iwiararmiayi.

<sup>14</sup> Yurumátin jeamtai ni unuiniamurijjai Jesus misanam pujusarmiayi.

<sup>15</sup> Pujusarmatai, Jesus chichaak “Wisha játsuk atumjai ju paskua najanatniun ti wakerinjai, <sup>16</sup> atakka ju nunġkanam atumjai najanashtin asan. Tura antsu Yus akupeana nuĭ jear atak najanattaji” tímiayi.

<sup>17</sup> Nuyá pinġkian achik, Yúsan yumġnkias, ni unuiniamurin tímiayi “Ju pinġ achikrum sunaisatarum. <sup>18</sup> Atakka ju nunġkanam uwa yumirĭn atumjai umarchattajai, tajarme. Tura antsu Yus akupin ajastin jeamtai atak iijjai umartatji” tímiayi.

<sup>19</sup> Nuyasha yurumkan achik, Yúsan yumġnkias puuk susarmiayi. Tura chicharainiak “Juka winia ayashruiti. Winia ayashur atum péñker pujustinnium surunkattana núiti. Winia enentáimtursarum yuatarum” tímiayi.

<sup>20</sup> Tura yurumsua amikiarmatai pinġkian achik, “Ju pinġ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai” tímiayi.

<sup>21</sup> “Túrasha winia surutkattana nu Wijjai métek ju misanam pujawai. <sup>22</sup> Kame Wi, Aents Ajasuitjiana ju, Yus iwiaramua nútiksanak jakattajai. Túrasha Winia surutkana nu nekaatí. Ti asutniattawai” tímiayi. <sup>23</sup> Nuna antukar “Wíashitaj, yákit” tunaim ajarmiayi.

### *Nanġkaamantu ana nu*

<sup>24</sup> “¿Iijjai yakí imiá nanġkaamantu aint?” tunaim ajarmiayi. <sup>25</sup> Tura Jesus tímiayi “Ju nunġkanam akupin ainia nu, waantu enentáimtumasar akupenawai. Tura akupenakuĭ

“pénker túrin áiniawai” tuíniawai. <sup>26</sup> Tura atumjainkia nuka atsutí. Antsu nan̄kaamantu ana nu, uchichia núnik ajastiniaiti; akupeana nusha takarniua núnik ajastiniaiti. <sup>27</sup> Enentáimsatarum. Misanam pujus yurumna nu, yurumkan ajamana nujai ¿tuá imiá nekas nan̄kaamantuit? ¿Yurumna nu nekas nan̄kaamantuchukait? Tura Wisha atumin yurumkan ajamna núnisnak pujajai.’

<sup>28</sup> ‘Winia itiurchatrun wáinmiaj nuí atumsha Wijiai tuke pujumarme. <sup>29</sup> Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuí atumsha Wijiai yurumáttarme, tura Wijiai umartatrume, tájarme. <sup>30</sup> Tura akupin pujutainium pujusrum, Israer-shuar tuse írutkamu akupkat-tarme tajai.” Tu tímiayi.

*Pítiur “atsá nékatsjai” títinian Jesus ujakmiania nu  
(Mateu 26.31-35; Márkus 14.27-31; Juan 13.36-38)*

<sup>31</sup> Nuyá Uunt Jesus tímiayi, “Nekaata, Semun̄ká. Trikiu neré tsatsamátniua áintsan Satanás atumi enentáin páchim enentáimtikramprataj tusa seayi. <sup>32</sup> Tuma aiñ Yus enentáimtustinian kajinmatkiin̄ tusan Wisha Yúsan seamjai. Tura Yúsnum waketkim ame yatsum ikiakárarta” tímiayi.

<sup>33</sup> Tutai Semun̄ tímiayi “Uuntá, sepunam en̄ketmainiakuisha wissha nemarsatajme. Tura mantamainiakuisha métek jakatjai” tímiayi.

<sup>34</sup> Tutai Jesus tímiayi “Pitrú, nekas tájame, yamaik atash shiniatsain̄ ame menaintiú natsantrurtatme” tímiayi.

*Itiurchat winiawai*

<sup>35</sup> Nuyá Jesus tímiayi “Wisha yurumkajain̄chu, kuítjain̄chu, sapatjain̄chu akupkamjar-mena nuí ¿táatramsamkarum?”

Niisha “Atsá pen̄ké táatramsachmaji” tiarmiayi.

<sup>36</sup> Tutai Nii tímiayi “Antsu yamaikia yurumkan takakkun̄ka takustí, kuítniasha núnisan̄; tura puniancha takakchakka ni pushirin̄ suruk punian sumakti. <sup>37</sup> Nekaatarum. Yus-Papinium yaunchu aarma ana nu wi túrunamujai uminkiatawai. Juiti aarma: Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatniuiti.”

<sup>38</sup> Tutai ni unuiniamur̄i tiarmiayi “Uuntá, juí jimiara puniá awai.”

Tutai Niisha “Asati” tímiayi.

*Jitsemaní ajanam Jesus Yúsan áujsamiania nu  
(Mateu 26.36-46; Márkus 14.32-42)*

<sup>39</sup> Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuinia-mur̄isha nemariarmiayi.

<sup>40</sup> Ai jeá nin chicharuk “Itiurchat winiakui iniaraj̄j tusarum Yus áujsataram” tímiayi.

<sup>41</sup> Tuasua amik arantach, kaya nankimiam jeana núnik Jesus wémiayi. Tura Yúsan áujsat̄aj tusa tikishmarmiayi. <sup>42</sup> Tikishmar juna tímiayi “Apawá, piniñnum yapá umartinia ántsan̄ Wi wáitsattajna nu wakerakmek̄a jurutkitia. Tura Wi wakerajna nucha antsu Ame wakeramna nu atí, tajai” tímiayi.

<sup>43</sup> Nuyá, ikiakártaj tusa Yusa suntarī nayaimpinmaya tarimiayi. <sup>44</sup> Tura Jesus imiá wáitias pujak nú kakaram Yúsan áujsamiai. Tura ni searmar̄isha numpá ántsan̄ nun̄ká kitiawarmiayi.

<sup>45</sup> Yúsan aujsua amik wajaki ni unuiniamur̄in werimiayi. Tura kúntuts enentáimmiarij̄jai ti pimpiki kanúu tepenan tarimiayi. <sup>46</sup> Nuiñkia chicharainiak “¿Urukamtai kanúu teparum? Itiurchat winiakui iniaraj̄j tusarum nantakrum Yus áujsataram’ tímiayi.

### *Jesusan achikiarmiania nu*

*(Mateu 26.47-56; Márkus 14.43-50; Juan 18.2-11)*

<sup>47</sup> Jesus tuke chichaa pujaj, untsurj shuar táarmiayi. Tura nuní eemka Jesusa unuiniamurj Jútas naartin winimiayi. Tura Jesusan mukunatajtsa tarunmiayi. <sup>48</sup> Támatai Jesus chicharuk “Jútasá, ¿Aents Ajasu tutai mukunamek surutkattam?” tímiayi.

<sup>49</sup> Jesusjaj pujuarmia nu, túmamun wáinkiar “¿Uunt puniajaj íjuartatjik?” tiarmiayi.

<sup>50</sup> Tura chikichik Patri uuntri takarniurj kuishin untsuurin tsupirkamiayi.

<sup>51</sup> Tura Jesus tímiayi “Iniaisatarum.” Nuna tinia ni kuishin antin tsuarmiayi. <sup>52</sup> Nuyá Israer-patri úuntrin, Yus-jea úuntrincha, tura pepru úuntrincha, Nin achiktaj tusa tariarmia nuna chicharuk “¿Wisha kasakaitiaj. Urukamtai puniajaisha numijaisha tarutniuram? <sup>53</sup> Nuik Yusa Uunt Jeen tuke tsawant atumjaj pujumaj nuí achirkachmarme. Túrasha átum kiritniumia kakarmajaj nupetkatin yamá tsawantin tsankatkamuitrume” tímiayi Jesus.

### *Pítiur “Jesuskana nékatsjai” tímiania nu*

*(Mateu 26.57-58, 69-75; Márkus 14.53-54, 66-72; Juan 18.12-18, 25-27)*

<sup>54</sup> Nuinkia Jesusan achikiar emetawar Israer-patri uuntri jeen júkiarmiayi. Tura Pítrusha íkian nemarki wémiayi. <sup>55</sup> Tura aach jinia ikiapáramiayi. Túrawar anamuk pujuarmiayi. Pítrusha niijjaj pujusmiayi. <sup>56</sup> Tura nuwa, Patri takarniurj amia nu, Pítiur jinia anamuk pujan wániak “Ju áishmansha Niijjaj pujumiayi” tímiayi.

<sup>57</sup> Tutai Pítiur chichaak “Nuwá, Nin nékatsjai” tímiayi.

<sup>58</sup> Tura árusan chikich nin wániak “Amesha Niin páchitkaiatme” tímiayi.

Tutai Pítiur tímiayi “Atsá. Wikia áinkia páchitkiatsjai” tímiayi.

<sup>59</sup> Chikichik ura nankaamasmatai chikich apach chichaak “Nekas ju áishmansha Niijjaj pujumiayi. Warí, niisha Kariréanmayanchakait” tímiayi.

<sup>60</sup> Tutai Pítiur chichaak “Ame támena núnaka nékatsjai” tímiayi. Nú chichamaik Pítiur chicháa pujaink' atash shiniukmiayi. <sup>61</sup> Tura nuinkia Uunt Jesus Pítrun apajas íismiayi. Túra “atash shiniatsain ame menaintiu natsantrurtatme” Uunt Jesus timia nuna enentáimpramiayi. <sup>62</sup> Nuyá Pítiur jiinki ti útmiayi.

### *Jesusan wishikrarmiayi*

*(Mateu 26.67-68; Márkus 14.65)*

<sup>63</sup> Áishman Jesusan wániarmiania nu ti wishikiainiak awattiararmiayi. <sup>64</sup> Jiin epetkar yapiniam awattiar chicharainiak “Nekamata, ya awatama” tiarmiayi. <sup>65</sup> Tura katsekainiak ti untsurj chikichnasha nánkamas tiarmiayi.

### *Uunt Iruntainiam Jesusan ejeniarmiania nu*

*(Mateu 26.59-66; Márkus 14.55-64; Juan 18.19-24)*

<sup>66</sup> Tsawarmatai, Israer-shuara úuntriasha, Israer-patri úuntriasha, Israer-shuara jintiniurisha iruntrar ni iruntairin ejeniarmiayi. Nuí chicharainiak <sup>67</sup> “Paant titiá. ¿Yus anaikiamu Kristu tutaia nukaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. <sup>68</sup> Tura Wi aníamsha áirkashtatrume, túrasha akuptukchattarme. <sup>69</sup> Tura wárik Wisha Aents Ajasuitjiana nu, ashí nankaamaku ajasan, Yusa untsuurin pujustatjai” tímiayi.

<sup>70</sup> Tutai niisha tiarmiayi “¿Nuinkia amesha Yusa Uchirin kaitiam?”

Tutai Jesus tímiayi “Ee, Wítjai, átum Winia túrutrum núnisnak.”

<sup>71</sup> Tutai niisha tiarmiayi “Warí, ¿iisha chikich ujatkat tusar atsumajik? Imia niniki chichaamu antukchajik” tiarmiayi.

## 23

### *Piratuí Jesusan júkiarmiania nu*

*(Mateu 27.1-2, 11-14; Márkus 15.1-5; Juan 18.28-38)*

<sup>1</sup> Nuyá ashí Uunt iruntrarmia nu wajatkiar Rúmanmaya akupin Piratuí Jesusan júkiarmiayi. <sup>2</sup> Nui jeawar, Piratun chicharainiak “Ju áishman íi shuaran awajimtikiar enentáimtikiainia nu nekaamji. Rúmanmaya uunt akupin Sésaran kuit akiktinian suritramaji. Tura nu arant Niñki, akupin Kristu tutaintjai, tawai” tiarmiayi.

<sup>3</sup> Tutai Piratu Jesusan chicharuk “¿Ame Israer-shuara akupniurinkáitiam?” tímiayi.

Tutai Jesus tímiayi “Ee, núitjai, ame támena núnisnak.”

<sup>4</sup> Nuyá Israer-patri úntrincha tura aents nui iruntrarmia nunasha Piratu chicharainiak “Ju áishman tunaan túran penké wáinkichuitjai, tajai” tímiayi.

<sup>5</sup> Túrasa niisha nú kakantar chicharainiak “Antsu nekas ashí Jutía nunkanmaya aentsun ni unuiniana nujai akajenawai. Kariréa nunkanmaya nankaamas ímiajajisha tayi” tímiayi.

<sup>6</sup> Piratusha nuna antuk “Nu áishman ¿Kariréanmayankáit?” tímiayi.

<sup>7</sup> “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

<sup>8</sup> Erutiska Jesusan ístaj tusa ti wakerimiayi. Jesusa túramurín áujmatman ti antukmiayi. Tuma asa, “Wi ímiai aents tujintiamun túrashtimpiash” tusa Jesusan wáiniak warasmiayi.

<sup>9</sup> Jesusan ti nukap aniasmiayi; túramsha penké áimkiachmiayi. <sup>10</sup> Nuisha Israer-patri úntrisha, tura Israer-shuara jintinniurisha yajauchiiti tusar charaatum awajarmiayi.

<sup>11</sup> Tura Erutissha ni suntaríjjai Jesusan yajauch enentáimtuiniak Nin wishikiainiak ti penker pushin, akupniu entsatairiya ánniun, áentsrarmiayi. Nuyasha Erutis ataksha Piratúin akupkamiayi. <sup>12</sup> Túram nu tsawant Piratu Erutisjai nawamnaikiarmiayi. Kame yáunchuka nemasnaikiau ármiai.

### *Jesusan “mantamnati” tiarmiania nu*

*(Mateu 27.15-26; Márkus 15.6-15; Juan 18.39-19.16)*

<sup>13</sup> Nuyá Israer-patri úntrin aentsu úntríjjai tura penké aentsjai Piratu ikiaanak tímiayi <sup>14</sup> “Ju áishman aentsu awajimtikuii tusarum itiartintrume. Túrasa átum ímprumnin anintrusan yajauch átum tárugna nuna penké nekarachjai. <sup>15</sup> Erutissha núnisan yajauchin nekaachai. Warí, juí awainkichmaka. Nuikia páantchakait jú aishman jakamnia tunaanka túrichuiti” tímiayi.

<sup>16-17</sup> Túraitiat tuke túrutai asamtai, jísat jeakui sepunmaya chikichík áishmankan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

<sup>18</sup> Tura aencha iruntrar ti unsumainiak “Atsá; jucha. Ju nakitiaji. Antsu Parapás akupkata” tiarmiayi. <sup>19</sup> Nu Parapássha akupniun nakitiak mesetan najana asa tura mankartin asa sepunam enkeamuyayi.

<sup>20</sup> Piratuka Jesusan akupkattsa wakerak ataksha aentsun áujarmiayi. <sup>21</sup> Túrasa nú arant unsumainiak “Atsá. Krúsnum mantamnati” tiarmiayi.

<sup>22</sup> Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachiashtusan, aniasan penké nekarachjai. Asutián akupkatjai” tímiayi.

<sup>23</sup> Tura niisha kakaram unsumainiak “Jesus mantamnati” tiarmiayi. Kame aencha tura Patri úntrisha ti unsumaina ásarmatai ni wakeramurí tsankatnakarmiayi. <sup>24</sup> Nii wakeriarmia nuna Piratu “túratjai” tímiayi. <sup>25</sup> Tuma asa Parapásan, mesetan najanin tura mankartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

### *Jesusan krúsnum ajintrurarmiania nu*

*(Mateu 27.32-44; Márkus 15.21-32; Juan 19.17-27)*

<sup>26</sup> Jesusan jukitiasa pujuiniaj Serini nunkanmaya Semun ni pépruriya Jerusarénum yama jeamiayi. Nin achikiar, Jesusa krusri ayantkar “ni ukuri wetá” tiarmiayi.

<sup>27</sup> Untsurí aents Jesusan nemariarmiayi. Tura untsurí nuwasha ti kuntuts enentáimiainiak útkiar tura wa-wa ajakiar wearmiayi. <sup>28</sup> Túmainiakui Jesus nin iis, “Jerusarénumia nuwatiram Winia enentáimtursarum úttiirap. Antsu atumniak tura atumi uchiri enentáimtusurum úttiarum. <sup>29</sup> Warí, ti iturchat tsawant jeawartatui. Tuma asantai “Uchirtichu ainia nu, ajaprukchana nu tura amuntsachu ainia nu, chíkich aentsjai nankaamas péñker pujuiniawai” tiartatui. <sup>30</sup> Nu tsawantaj aents chicharainiak “Náint in nekentmak yuturmaartai” tiartatui. <sup>31</sup> Warí, numi sameka áinis yajauch aya nánkamna aijnsha ju iturchat átsuk. Tura numi kukaru ainkiamtai itiurak nú yajauch túrunachat.” Tu timiayi Jesus.

<sup>32</sup> Tura Jesusjai krúsnum maatai tusar jímiar yajauch áishmankan júkiarmiayi. <sup>33</sup> Karawír nain tutainium jeawar Jesusan krúsnum ajintrurarmiayi. Tura Jesusa untsurini chikichík yajauch áishmankan tura ni menarini chíkich yajauch áishmankan núnisan krúsnum ajintrurarmiayi.

<sup>34</sup> Tura Jesus krúsnum ajintraku pujuram, chichaak “Apawá, tsankurarta. Nii áitkainia nuna nékainiatsui” tímiayi.

Tura suntar pujuarmiania nu, yaki Jesusa pushiri jukit tusar nakurusarmiayi. <sup>35</sup> Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamá nekas Yusa anaikiamuri Kristu tútainkiunka imia Niñki uwémpratí” tiarmiayi.

<sup>36</sup> Suntarsha Nin wishikrarmiayi. Tariar churuńian aartai tusar awajiararmiayi. <sup>37</sup> Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. <sup>38</sup> Tura muuknumaani, Kriaku chichamjai, Rúmanmaya apach chichamjaisha tura Israer chichamjaisha ju árar anujkamu ámiayi: *JÚITI ISRAER-SHUARA UUNT AKUPIN*

<sup>39</sup> Chikichík yajauch áishman nuj ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwemtikramprata” tímiayi. <sup>40</sup> Tura chíkich ni tsaniakmarin kakantar chicharuk “¿Amesha Nijjai métek asutniátasa pujayatam, Yus ashamatsmek? tímiayi. <sup>41</sup> Iikia yajauch asar wáitsatniuitji; ii tunaari akikmakur wáitiaji. Antsu ju áishmanka yajauchin túrichuiti” tímiayi.

<sup>42</sup> Nuyá Jesusan chicharuk “Amesha akupin ajasam winiasha enentáimtursata” tímiayi.

<sup>43</sup> Tutai Jesus chicharuk “Nekas tájame, jakar shiir pujutainium yamá tsawant Wijjai pujustatme” tímiayi.

### *Jesusa jakamuri*

*(Mateu 27.45-56; Márkus 15.33-41; Juan 19.28-30)*

<sup>44</sup> Tutupin aj ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassa tuke kirit ámiayi. <sup>45</sup> Tsawái nantusha mushatmarmiayi. Tura Jerusarénum Yusa Uunt Jeencha tarach ajamu aa jímapetek nakaakamiayi. <sup>46</sup> Nuyá Jesus untsukum “Apawá, winia wakantrun Amijn ikiuajai” tímiayi. Nuna tinia jakamiayi.

<sup>47</sup> Suntara kapitiantri nu túrunamun wáiniak, Yusa náarin shiir awajeak “Jusha imiá nekas péñker áishmankuyi” tímiayi.

<sup>48</sup> Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi. <sup>49</sup> Tura Jesusa amikriisha tura nuwa Kariréanmaya Nin nemariarmia nusha íkian wajasar ii wajarmiayi.

### *Jesusan iwiarsarmiania nu*

*(Mateu 27.57-61; Márkus 15.42-47; Juan 19.38-42)*

<sup>50</sup> Naka enentáimin pé<sup>n</sup>ker áishma<sup>n</sup> ámiayi ni naari Jusé. Arimatéa pepru Jutía nú<sup>n</sup>kanam ana nuyauyayi. Israer-shuara Uunt Iruntairin páchitkiauyayi. <sup>51</sup> Yus ju nú<sup>n</sup>kanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi. <sup>52</sup> Tuma asamtai Piratu<sup>j</sup> we Jesusa ayashin seamiayi. <sup>53</sup> Piratu “ayu” takui, Jesusa ayashin krúsnumiá jusa tarachjái penuar kaya táurmanum iwiarsamiayi. Nu táurmanum chíkich iwiarsachmauyayi. <sup>54</sup> Iwiaratin tsawantái, ayampratin tsawantái tsawastatuk ajasmatai túrunamiayi.

<sup>55</sup> Tura nuwá Kariréanmaya jukiniutak Jesusan nemarsarmia nusha iwiarsamunam weriar, Jesusa ayashí itiur ikiusmait nuna iisarmiyayi. <sup>56</sup> Iisar ikiuak ni jeen waketkiarmiyayi. Tura Jesusa ayashí mejeenin<sup>n</sup> tusar kun<sup>n</sup>kuinian iwiararmiyayi. Tura ayampratin tsawantái, Israer-shuar akupkamun umikiar ayamprarmiyayi.

## 24

### *Jesus nantakmiania nu*

*(Mateu 28.1-10; Márkus 16.1-8; Juan 20.1-10)*

<sup>1</sup> Tumintin káshik kun<sup>n</sup>kuinian iwiaramun júkiar nu nuwá Jesus iwiarsamunam weriarmiyayi. Tura chíkich nuwásha atampriarmiyayi. <sup>2</sup> Tura iwiarsamu kaya atutkamun urani aan wáinkiararmiyayi. <sup>3</sup> Tura wayawar uunt Jesusa ayashin wáinkiacharmiyayi. <sup>4</sup> Wáinkiachu ásar ashamkarmiyayi. Tura “ítiurkatjik” tiarmiayi. Tumaj jimiara áishma<sup>n</sup>kan pushin wincharpatniun entsaru nin ayaamach wajainian wáinkiararmiyayi. <sup>5</sup> Nuna wáinkiar ti sapijmiainiak tsunsumawarmiyayi. Túmakui nu áishma<sup>n</sup> chicharainiak “¿Iwiaakusha urukamtai jakaanumsha earum? tiarmiayi. <sup>6</sup> Jui pujatsui. Antsu nantakni. Nékatsumek. Niisha Kariréanam tuke pujus <sup>7</sup> “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantái nantaktiatjai” turamchamkarum” tímiayi.

<sup>8</sup> Nuna takui Jesus timian enentáimprarmiyayi. <sup>9</sup> Tura iwiarsamunmayá waketki taar, Jesusa unuiniamur<sup>n</sup>in auntse armia nuna tura chikichnasha ashí nu túrunamun ujakarmiyayi. <sup>10</sup> Jesusa unuiniamur<sup>n</sup>in ujakarmia nu ju áiniawai: Maktaranmayá Marí, Juánasha, Jakupu nukurí Marisha, tura chíkich nuwájai. <sup>11</sup> Tura Jesusa unuiniamur<sup>n</sup>isha nuwá tuíniakuisha nekasaiti tu enentáimtsuk “wáuruk tuíniawai” tiarmiayi.

<sup>12</sup> Túrasa Pítrusha jiinki Jesus iwiarsamunam tsékenki werimiyayi. Jeá, init iis, aya tarachik tepenan wáinkiamiyayi. Tura túrunamia nuna ti enentáimiar ni jeen waketkimiyayi.

### *Emaús wetai jintianmaani túrunamia nu*

*(Márkus 16.12-13)*

<sup>13</sup> Nu tsawantáik Jesusa nemarniur<sup>n</sup> jímia Emaús péprunam wéarmiyayi. Emaúska Jerusaré<sup>n</sup>numiá auntse kirumitru jeá pujawai. <sup>14</sup> Túrunamia nuna chichaki weararmiyayi. <sup>15</sup> “Itiurkit” tu aujmatki weenai imia Jesus taa nu<sup>n</sup> páchiniak niijiai weararmiyayi. <sup>16</sup> Tura wáinkiarat nekaashtin asamtai yait nekaacharmiyayi.

<sup>17</sup> We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

<sup>18</sup> Chikichik, Kreupas náartin chicharuk “Jerusaré<sup>n</sup>num túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

<sup>19</sup> Tutai Jesus tímiayi “¿Warí urukait?”

Tutai tiarmiayi “Entá, Nasaré<sup>n</sup>numiá Jesusa túrunamur<sup>n</sup> taji. Niisha Yúsnan etserin asa Yusa kakarmarijiai chichasmiayi tura nuna kakarmarijiai takasmiayi. Núnaka ashí aents nékainiawai. <sup>20</sup> Tura ii Pátrir<sup>n</sup> uuntri tura ii péprur<sup>n</sup> uuntri “tunáa jakamnia túrayi” tusar “krúsnum mantamnati” tiarmiayi. <sup>21</sup> Tura ii Israer-aentstin uwemtikrampratin tu enentáimsamji. Tura ni maamusha menaintiú tsawant nan<sup>n</sup>kaamasai. <sup>22-23</sup> Túrasa ii nuwá ni iwiarsamunam yamaí káshik weriar ni ayashin wáinkiacharmai. Tura

“Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji. <sup>24</sup> Nuyá íi shuar iwiansamun weriar, nuwá tiarmia tímiatrusan wáinkiarmai. Tura Jesusnaka wáinkiacharmai.” Tu ujakarmai Jesusan.

<sup>25</sup> Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume. <sup>26</sup> ¿Yusa anaikiamuri, Kristu tutai, shiir awajnatsuk ti wáitsashtinkiait?” tímiayi.

<sup>27</sup> Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nanċkamamiayi.

<sup>28</sup> Ayu, nii wearmia nú peprunam jeawarmiayi. Tura Jesuska nui nanċkaamaki wétaj tau ajamiayi. <sup>29</sup> Tura niisha chicharainiak “Weep. Iijjai pujustá. Warí, nantu akaikiyi, kirit ajatemsai” tiarmiayi.

Tutai Jesus niijjai pujustaj tusa wayamiayi. <sup>30</sup> Tura niijjai irunar misanam pujus, yurumkan achik, Yúsán yuminkias nincha puuk súsarmiayi. <sup>31</sup> Nu chichamaik, ni jii uran-niua núnikiarmatai Jesusan nekaawarmiayi. Tura Niisha nú chichamaik menċkakamiayi. <sup>32</sup> Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaj” tiarmiayi.

<sup>33</sup> Nuyá, Emaúsnumia wárik jíinkiar Jerusarénnum waketkiarmiayi. Nui Jesusa unuini-amurin auntse armia nuna tura chíkich shuar Jesusan nemariarmia nunasha iruntrar pujuinian wáinkiarmai. <sup>34</sup> Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

<sup>35</sup> Tutai niisha jintiá túrunamun ujakarmiayi. “Jesus yurumkan ajaamakui nui nekaamji” tiarmiayi.

*Ni unuiniampurin Jesus wantintiukmiania nu  
(Mateu 28.16-20; Márkus 16.14-18; Juan 20.19-23)*

<sup>36</sup> Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

<sup>37</sup> Nuna antukar, ti sapijmiakar, wakanchashit, enentáimsarmiayi. <sup>38</sup> Tura Jesus chicharainiak “¿Urukantai sapijmiakrum wakanchashit, tu enentáimsarum? <sup>39</sup> Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

<sup>40</sup> Nuna tinia ni uwejencha nawencha iniaktusarmiayi. <sup>41</sup> Warainiayat sapijmiainia ásar, Niimpiashit tu enentáimtusarmiayi. Tuma asantai, nin chicharainiak “¿yurumak takakrume?” tímiayi. <sup>42</sup> Takui, namaknasha, míshkincha súsarmiayi. <sup>43</sup> Tura Jesus nuna achik niisha ímiainiamunman yuamiayi. <sup>44</sup> Tura nin tiarmiayi “Winia túrutawarma nuna, Wi atumjai nuik pujusan tímiajume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

<sup>45</sup> Nuyá Yus-Papinium aarman jintintiawarmiayi. <sup>46</sup> Jintintiuk juna tímiayi: “Yusa anaikiamuri Kristu tutai jaka menaintiú tsawantaj jakamunmaya nantaktinia nu yáunchuk áarmauyayi. Tura Wi nú Krístuchukaitiaj. <sup>47</sup> Winia náarun pachisar, Jerusarénnumia nanċkama ashí nunċkanam nu chicham etsernaktinia nu áarmauyayi. Shuar ni tunaari tsanċkurnarat tusar enentáin yapajjáníuiti. Tura tu etserkatniua nusha yaunchu áarmauyayi. <sup>48</sup> Tura wi túrunamu neka asarum etserkatniuitrume, tímiayi. <sup>49</sup> Tura winia Apar, winia Wakantrun susartatjai, turammarumna nuna akuptuktatjarne. Tura nayaimpinmaya táatsain jui Jerusarén péprunam pujústárum. Taa ni kakarmarin suramsattarme.” Tu tímiayi.

*Jesus nayaimpiniam wakamiania nu  
(Márkus 16.19-20)*

<sup>50</sup> Nuyá Jesus Jerusarén péprunmaya júkiar Petania péprunam ejeniarmiayi. Tura nui ni uweje takuí, “Yus yáinmakarti” tímiayi. <sup>51</sup> Nuna tu pujus, niyya kanakmiayi. Tura nayaimpiniam junakmiayi. <sup>52</sup> Ni unuiniamurisha Nin imiá shiir enentáimtusarmiayi. Tura nuyá ti warasar Jerusarénnum waketkiarmiayi. <sup>53</sup> Tura Yusa Uunt Jeeñ pujusar Yusa náarín shiir awajú pujuarmiayi. Áukete.



## Yúsan Shiir Chichamen JUAN aarmia nu

### *Chícham aents ajasmiania nu*

<sup>1</sup> Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tíminiati. Chichamsha Yusjaj̄ pujuyayi. Chichamsha Yúsauyayi. <sup>2</sup> Yáman̄kamtaik Niisha pujuyayi Yusjaj̄. <sup>3</sup> Ashí najanamu ainia nu Niijjaj̄ najanamuiti. Nii najanachmaka pen̄ké atsawai. <sup>4</sup> Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniati. <sup>5</sup> Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

<sup>6</sup> Áishman̄ ámiayi, Yus akupkamu, ni naarj̄ Juan̄. <sup>7</sup> Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. <sup>8</sup> Juan̄sha nu tsáapninchauryayi. Áyatik akupkamuyayi tsáapnin chichaman etserkat tusa. <sup>9</sup> Nu tsáapninkia nekas tsaapniati. Ju nun̄kanam taa ashí shuaran enentáin tsáapniartiniati.

<sup>10</sup> Chichamsha tamiayi ju nun̄kanam. Tura nun̄kasha ni najanamu ain̄, nun̄kaya aents Nin nekaacharmiayi. <sup>11</sup> Támiayi ni nun̄kén tura ni shuarsha ni enentáin itiaacharmiayi. <sup>12</sup> Tuma ain̄ chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi. <sup>13</sup> Niisha Yusa uchirí ajarar ataksha númpentin ayashímkiacharmai. Áentsnúmiã akiiniachu áiniawai niisha. Áishman̄ wakera-mujaj̄sha akiiniacharmai. Antsu Yúsnumiã akiiniawaru ásar Yusa uchirí áiniawai.

<sup>14</sup> Nú Chichamsha ayashtin ajas iijjaj̄ núkap tsawant pujumiayi. Yusa anen̄kratairijjaj̄ piakuyi. Aya nekasa nunak chichaamiayi. Núnisan̄ ni pen̄kerin̄, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji. <sup>15</sup> Juan̄sha Nin neka asa, étseruk tímiayi “Júiti wi tímiay nu: “Winia ukuruin̄ winittiana nu wíjjain̄kia émkaiti. Maa, wi atsaj̄sha tuke pujuyayi” tiniujaj̄.” Tu etserkamiayi.

<sup>16</sup> Chichamsha ti anen̄kartin̄ asa ashí pen̄ker ana nuna iniaitsuk súrampi. <sup>17</sup> Yusa akupeamurin̄ Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti. <sup>18</sup> Chikichkisha Yúsan pen̄ké wáinkiachuiti. Tura ni Uchirí chikichkia nu tuke Niijjaj̄ tsaníaku asa Yúsan paant awajturmasuitji.

### *Imiakratin Juan̄ Jesukrístunun etserkamiania nu*

*(Mateu 3.11-12; Márkus 1.7-8; Rúkas 3.15-17)*

<sup>19</sup> Jerusarénnumiã Israer-shuar ni Pátririn̄cha Riwi-shuarjaj̄ Juan̄kaj̄ akupkarmiayi yákit tusar.

<sup>20</sup> Inintruiniakui paant ujakmiayi. “Wikia Krístuchitjai” tímiayi.

<sup>21</sup> Takui ataksha aniasarmiayi “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juan̄sha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

<sup>22</sup> Takui “¿Nu arantcha yáitiam. In akuptamkajnia nusha warí títiataj̄. Warintia enentáimiam?” tiarmiayi.

<sup>23</sup> Juan̄sha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nun̄kanam shuar untsumui “Ii uuntrj̄ jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiayi.

<sup>24</sup> Juan̄jaj̄ chichainiakka Pariséu akupkarma áarmiayi.

<sup>25</sup> Niisha tiarmiayi “Nuikia Krístuchuitatmesha, Eríaschaitiatmesha, Yúsnan etserin tátinia núchaitiatmesha ¿urukamtai imiakratam?” tiarmiayi.

<sup>26</sup> Juansha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai. <sup>27</sup> Niisha winia ukuruñi winiyat wíjñiñkia ti nankaamantuiti. Nii ti péñker asamtai wisha ni sapatrì jñkiamurìncha atitrachmini-aitjai” tímiayi.

<sup>28</sup> Nuka Petapara peprunam túrunamiayi. Petaparasha Juan imiakratmia nuí Jurtañ entsa amain amai.

### *Jesus Yusa Murikrinti*

<sup>29</sup> Nuyá kashin Juan Jesusan winian wáiniak tímiayi “Iistarum. Núiti Yusa Murikrì ashí aentsu tunaarìn júana nu. <sup>30</sup> Núiti wi timiaj nu, “Winia ukuruñi winiana nu wíjñiñkia nankaamantuiti. Tura wi atsaisha tuke pujuyayi” tímiajai. <sup>31</sup> Wisha Nin nekaachmajai. Tura ashí Israer-shuar Nin nekaawarat tusan imiakrín tamajai” tímiayi.

<sup>32</sup> Nuyá tímiayi “Yusa Wakanin yámpitsa núnin nayaimpinmayan táarun wáinkiamjai. Tura ekemsamai. <sup>33</sup> Nu túruntsañ tuke Nin nekaachmajai. Tura Yuska winia imiakrat-tinian akuptak turutmiai “Chikichik shuarnum Yusa Wakaní tara ekemsa wáinkiam, nujai nekaattame. Yusa Péñker Wakaníññi imiakratniua núiti” túrutmiayi. Tura nujai Nin nekaamjai. <sup>34</sup> Yamaikia wainkia asan ti paant nékajai tí nekas Yusa Uchirínti” tímiayi Juan.

### *Jesusa unuiniamurì emka armia nu*

<sup>35</sup> Kashincha ataksha Juan nuí wajasmiayi ni unuiniamurì jímiarjai. <sup>36</sup> Jesussha nuí nankaamakui Juan tímiayi “Iistarum, Yusa Murikrì áuwiti.”

<sup>37</sup> Juanka unuiniamurì nuna antukar mai Jesusan pataatukarmiayi. <sup>38</sup> Jesussha úkumur ímias nu jímiaran wininian wáinkiamiai.

Tura tímiayi “¿Ya eñrum?”

Niisha “Uuntá, ¿tui pujam?” tiarmiayi.

<sup>39</sup> Jesussha tímiayi “Wats, iitiarum.”

Niisha wear ni pujutairìn wáinkiararmiayi. Tura áankú ajasmatai nu tsawantai nuí kintiamprarmiayi.

<sup>40</sup> Juanka chichamen antukar Jesusan pataatukaruka jímiar áarmiayi. Chikichik Antresauyayi. Niisha Semun Pitru yachíiyayi. <sup>41</sup> Antressha wárik ni yachí Semunkan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yañkiarat tusa Yus anaikiamuiti.

<sup>42</sup> Nuyá Antres ni yachí Semunkan Jesus pujamunam jukimiayi. Jesussha wáiniak tímiayi “Ámetme Semun, Junasa uchirí. Túrasha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

### *Jesus Jiripíññi tura Natanaérññi chichasmiania nu*

<sup>43</sup> Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

<sup>44</sup> Jiripisha Petsaitia péprunmayayuyayi. Antressha Pítrusha nu péprunmayayuyayi.

<sup>45</sup> Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

<sup>46</sup> Natanaérsha tímiayi “¿Nasarétnumiñ péñker shuar áminkiait?”

Jiripisha “Winim ítiá” tímiayi.

<sup>47</sup> Jesussha Natanaéran tíññuch winian wáiniak tímiayi “Ju shuar iistarum. Ti péñker Israer-shuaraiti. Penké anankartichuiti.”

<sup>48</sup> Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkíájme ikiu numirín ejamkam wajamin.”

<sup>49</sup> Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

<sup>50</sup> Tura Jesus tímiayi “¿Aya wi “Ikiu numirín ajamkam wajamin wáinkíájme” takui Winia enentáimturamek? Antsu nuna nankaamas nekaachmin ana nusha wáinkíáttame” tímiayi. <sup>51</sup> Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntari Winin tara waka ajainia wáinkíáttarme.” Tu tímiayi.

## 2

### *Nuatnaikiatin jísat Kaná péprunam ámiania nu*

<sup>1</sup> Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmauyayi. Jesusa nukurísha nuí pujumiayi. <sup>2</sup> Jesussha ni unuiniamurísha nu nuatnaiyamunam ípiaamu ármiayi.

<sup>3</sup> Umutai amuukamtaí Jesusa nukurí tímiayi “Umutai amuukai. Penké takakainiatsui.”

<sup>4</sup> Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastin jeatsui.”

<sup>5</sup> Nuyá umutain wáinmainia nuna ni nukurí tímiayi “Ashí ni tana nu umiktárum.”

<sup>6</sup> Nuí kayajai najanamu yumi-yaraatai sais (6) ámiayi. Nu yaraatainmaya Israer-shuar ni ewejéncha ni nawéncha nijiamau ármiayi Yus shiir enentáimtursatí tusar. Chíkich chíkich yaraatainiam uchenta (80) rítrusha, sian (100) rítrusha yumi wayamniauyayi.

<sup>7</sup> Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiai. <sup>8</sup> Áimprarmataí Jesus tímiayi “Pai, ishichik shikikrum námper chicharu suutarum.” Tutai nútiksan túrawarmiayi.

<sup>9</sup> Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untsuk <sup>10</sup> tímiayi “Jístanmanka péñker umutain emka suíniatsuk. Tura jémararmatainkia tímianchan suíniatsuk. Túrasha ámeke péñker umutai ikiusam yamáí jíkchamek” tímiayi.

<sup>11</sup> Jesus túramu Kananum Kariréa nunkanam túrunamiayi. Nújainkia Jesus emka ni kakarmarín paant iniaktusmiayi. Nuna íisar ni unuiniamurísha Nin enentáimtusarmiayi.

<sup>12</sup> Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiayi. Nuísha untsurí tsawant pujusarmiayi.

### *Yusa Uunt Jeen suruktinian Jesus surimkiamiania nu*

*(Mateu 21.12-13; Márkus 11.15-18; Rúkas 19.45-46)*

<sup>13</sup> Israer-shuara namperí, paskua tutai, ishichik ajasmataí Jesus Jerusarénum wémiayi. <sup>14</sup> Nuí jeá Yusa Uunt Jeen súruinian wáinkíámiayi. Turuncha murikniasha yampitsnasha súrin ármiayi. Chíkichcha ni misarín pujusar kuítian yapajíniancha wáinkíámiayi.

<sup>15</sup> Nuna wáiniak yaranken chapikmar asutkiartutain najana nujai ashí waakartiuk murikrintiuk aa jíirmiayi. Kuítian yapajniu misaríncha ayantar ni kuítrin nunká utsankarmiayi. <sup>16</sup> Yampitsan súrinniasha tímiayi “Nuka juyá jíitiarum. Winia Aparu Jeen surutai jea najanawairap” tímiayi.

<sup>17</sup> Nuna íisar ni unuiniamurí yaunchu Yus-Papinium áarman enentáimprarmiai. Ju áarmaiti: “Ame Jeem shiir atí tusan ti wakerukuitjai.”

<sup>18</sup> Nuikia Israer-shuara uuntri Jesusan aniasarmiayi “Juna túramniaitjai tusam ¿warí kakarmak iniakmastatam?”

<sup>19</sup> Jesussha tímiayi “Ju Jeá sáakiakrumin menaintiú tsawantaí iniantaittiai Wikia.”

<sup>20</sup> Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantai jeamtámeash.” <sup>21</sup> Kame Jesus “Jea” chichayat ni ayashin tímiayi. <sup>22</sup> Tuma asantai Jesus ukunam jakamunmaya nantakmiatai ni unuiniamurí ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

### *Jesus ashí shuara enentáin nékawai*

<sup>23</sup> Paskua námpertin ti untsurí Jerusarénum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi. <sup>24</sup> Tuma ain Jesus ashí neka asa ninkia enentáimtuscharmíayi. <sup>25</sup> Niní ashí shuara enentáin neka asa chíkich ujatkat tusa atsumchamiayi.

## 3

### *Jesus Nikiutémujaí*

<sup>1</sup> Shuar ámiayi ní naari Nikiutému. Niisha Pariséu asa níi tuinia áintsan Yúsna takauyayi. Niisha Israer-shuara uuntriyaí. <sup>2</sup> Niisha kashi Jesusaí irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

<sup>3</sup> Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

<sup>4</sup> Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

<sup>5</sup> Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui. <sup>6</sup> Ayashniumiá akiinia nuka ayashchakait. Núnisan Wakanniúmiá akiinia nuka wakanchakait. <sup>7</sup> Wi “atak yamaram akiiniatniuiti” takui itiurchat enentáimpraip. <sup>8</sup> Nase enentáimpratá. Nase nánkamsan umpúawai. Amesha ántame tura tuyan winiá túrasha tuin weti nékatsme. Núniskete ashí Wakanniúmiá akiinia nu.”

<sup>9</sup> Tuma asantai Nikiutému sha atak anias “¿Jusha itiurak áminiat?” tímiayi.

<sup>10</sup> Jesus áikmiayi “Ame Israer-shuara jintinniurintiatmesha ¿itiura nékatsmea? <sup>11</sup> Ti nekasán tájame. Nekas nékakur chichajai. Íismajnia nusha ujaaji. Tuma ain ii chichame ántatsrume. <sup>12</sup> Aya ju nunkanmaya túramu ujaam ántachkurmeka ¿itiurak nayaimpinmaya túramusha antuktaram?”

<sup>13</sup> Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai. <sup>14</sup> Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijiaí ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai. <sup>15</sup> Nújainkia ashí Winia enentáimturna nuka jinium wétsuk Yusai tuke iwiaaku pujustatui.”

### *Yuska ashí shuaran ti aneawai*

<sup>16</sup> Yuska ashí shuaran ti anea asa, ni Uchirín chikichik ana nuna shuáran uwentikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi. <sup>17</sup> Yus áentsun kajerak jinium surukat tusa ni Uchirín akupkachmiayi. Antsu uwentikrarat tusa akupkamiayi.

<sup>18</sup> Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti. <sup>19</sup> Yusa Uchirí tsáapninia áintsan ii tunaari paant awajurmaji. Nu tsáapnisha ju nunkanam taraiti. Shuar tunáa ti tura ásar tsáapninian nakitrar kiritniun wakeriarmái. Nuna tura ásar jinium surunkaruiti. <sup>20</sup> Ashí tunaan túruinia nuka

tsáapninan muǰjainiawai. Túrawar yupitiainiawai ni tunáa túramu paant ajasai tusa. <sup>21</sup>Antsu ashí nekas túratniun umiiniana nuka tsáapninan weantainiawai. Yus ni enentái pujuram tsáapninium takainiawai. Nuka ti paantaiti.

### *Imiakratin Juan ataksha Jesusnan chichasmiana nu*

<sup>22</sup>Nuyá Jesussha ni unuiniamurijjaisha Jutía nunkanam wear nuǰ pujusar imiakratiarmiayi. <sup>23</sup>Juansha Enun nunkanam, Sarim tíjiuchia nuǰ, imiakratuk pujumiayi entsa nuǰ núkap aa asamtai. Tura aents táarmatai imiainiarmiayi. <sup>24</sup>Nusha Juánkan sepunam enkenatsain túrunamiayi.

<sup>25</sup>Tura Juanka unuiniamurí Israer-shuarjai jianaiktinian nan kamawarmiayi. “¿Ya imiakratma imiá péñkerait?” tusar áujmatiarmiayi. <sup>26</sup>Juánkai initrustai tusar wéarmiayi. “Uunta, ame nuik Jurtañ entsa amain pujakum shuar nuǰ pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

<sup>27</sup>Tutai Juan tímiayi “Ashí kakarmaka aya Yúsaiyañchakait. <sup>28</sup>Wisha paant tímiajai “Wikia Krístuchuitjai antsu ni jintin iwiarat tusan emka akupkamuitjai.” Nusha antukmarme. <sup>29</sup>Kame shuar nuwan nuatna nuna áishrinti. Nuatnaiyak áishman nuwejai áujnainiakui, ni amikriisha nuna antuk ti waraatsuk. Wisha núnisnak aents Jesusai wénakui ti waraajai. <sup>30</sup>Niisha tuke nan kaamaku uunt ajastiniaiti antsu wikia tuke tímiancha ajastiniaitjai.” Juan tu chichasmiai.

### *Nayaimpinmaya tara nu*

<sup>31</sup>Nayaimpinmaya tara nuka ashí nan kaamakuiti. Nun kaya nuka, nun kaya asa juǰ nunkanmayanak áujmatui. Nayaimpinmaya tara nuka ashí nan kaamakuiti <sup>32</sup>tura nuǰ antukmancha ísmancha áujmatui. Túrashá ni chichamen ántuiniatsui. <sup>33</sup>Antsu ni chichamen ántana nuka “Yusa chichame imiá nekasaiti” tawai. <sup>34</sup>Yus akupkamuka Yusa chichamen étserui. Yuska ni Wakanin ementutsuk susa asamtai tu étserui. <sup>35</sup>Yus Apa ni Uchirin anea asa ashí ana nuna iistí tusa ataksaiti. <sup>36</sup>Shuar Yusa Uchirin enentáimta nuka yamaram iwiaakmanum akiinia asa tuke Yusai shiir pujustiniaiti. Antsu Yusa Uchirin enentáimtatsna nuka nu iwiaakmanum akiiniachuiti antsu Yus tuke nin kajerkaiti.

## 4

### *Jesus Samaria nunkanmaya nuwajai chichasmiana nu*

<sup>1</sup>“Jesus untsurí shuaran ni nemanin awajeawai; kame Juanjai nan kaamas untsurí imiaawai” taman Pariseu shuar antukarmiayi. <sup>2</sup>Nekaska Jesus imiakratchamiayi, antsu ni unuiniamurí túrawarmiayi. <sup>3</sup>Pariséu nu chichaman antukarman Jesussha nekáa Jutía nunkanmaya jiinki Kariréa nunkanam waketkimiayi.

<sup>4</sup>Wáketuk Samaria nunkanmaaní nan kaamaktiniuyayi. <sup>5</sup>Samaria nunkanam wéak Sekar péprunam jeamiayi. Nu pepru jeastatuk Jakupa nunke ámiayi. Jakupsha nu nunkan ni uchirin Jusén tí yaunchu susamiayi. <sup>6</sup>Nuisha yumirmat ámiayi. Jakup taurma asamtai “Jakupa yumirmatri” tiarmiayi. Tutupin jeamtai Jesussha pimpiki winis yumirmat ayamach pujusmiayi. <sup>7</sup>Nuǰ pujai Samarianmaya nuwá yumí shikiktajtsa támiayi. Tura Jesus “Entsa surusta” tímiayi. <sup>8</sup>Jesusa unuiniamurísha yurumkan péprunam sumaktajtsa wéaru asamtai aya Jesusak pujumiayi.

<sup>9</sup>Samarianmaya nuwá Jesusan tímiayi “¿Itiura Israer-shuaraitatmesha Samarianmaya nuwá aisha entsa seatam?” Kame Israer-shuar Samarianmaya shuarjainkia penké chichachu ásar nuna tímiayi.

<sup>10</sup>Jesussha tímiayi “Yus súamu nékameka tura entsa surusta tájam nusha nékameka ame antsu seattínme tura Wikia iwiaaku entsan amasaintjai.”

<sup>11</sup>Nuwasha tímiayi “Uunta, entsasha ti initiaiti tura shikiktincha takaktsume. ¿Tuyan iwiaaku entsasha surustam? <sup>12</sup>Ii uuntri Jakup juǰ yumirmatan taur juyanak niisha

ni uchirísha ni waakarísha umararmiayi. Nuyá ikiurtamkimiaji. ¿Amesha Jakupjai nankaamas kakarmakaitiam?”

<sup>13</sup> Jesussha tímiayi “Ashí shuar ju entsan umarka ataksha kitiamtiatui. <sup>14</sup> Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

<sup>15</sup> Tutai nuwa tímiayi “Uuntá, winiasha nu entsa surusta. Wisha kitiamcha átaj. Tura ju entsancha shikiktinian táchataj” tímiayi.

<sup>16</sup> Nuyasha Jesus tímiayi “Áishrum untsukam utitia, turam jui tatá.”

<sup>17</sup> Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. <sup>18</sup> Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

<sup>19</sup> Nuna antuk nuwasha tímiayi “Uunta, ame Yúsnan etserniuchukaitiam. <sup>20</sup> Ii úuntrin<sup>h</sup>kia tuke Samaritanam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarénnum Yus tikishmátratniuiti tárume.”

<sup>21</sup> Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénnumsha wétsuk Yus Apa tikishmatratin. <sup>22</sup> Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwemtikkiartin winiakui nékaji. <sup>23</sup> Tsawant winittiana nu yamáí jeayi. Ashí shuar Yus Apan nekas tikishmatainiakka tuke wakanjai tuke enentáijiaisha awajitsuk tikishmatrartatui. Núnisan tikishmatrurat tusa wakerawai Yus Apa. <sup>24</sup> Yuska Wakaniiti tura ashí Nin tikishmatainia nuka tuke wakaníjiaí tura tuke enentáijiaí awajitsuk tikishmatratin áiniawai.”

<sup>25</sup> Nuwasha tímiayi “Anaikiamua nu tátiniaiti. Nusha Krístiti. Niisha taa ashí jintintra-mattaji.”

<sup>26</sup> Jesus tímiayi “Wiitjai. Ámin chichaaajmena nú Krístitjai.”

<sup>27</sup> Nuiñ ni unuiniamurí táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaa?” títinian arantukarmiayi. <sup>28</sup> Nuyanka nuwa ni yumirín ikiuki péprunam we ashí áentsun tímiayi <sup>29</sup> “Winiirum ítiarum, shuar ashí wi túramun túruta nu. ¿Juka Krístitiya?” <sup>30</sup> Tutai péprunmayá jíinkiar Jesus pujamunam weararmiayi.

<sup>31</sup> Jeainiatsain ni unuiniamurí seak tiarmiayi “Uunta, yurumáta.”

<sup>32</sup> Tura Jesus tímiayi “Wi yúatniunka takakjai átum nékachman.”

<sup>33</sup> Ni uniuniamurísha nuámtak anniasarmiayi “¿Chíkich shuar yurumak itiarím tátsuash?” tiarmiayi.

<sup>34</sup> Tura Jesus tímiayi “Winia akuptukua nuna wakeramurí túrakun tura ni takatrin takaakun Wíjiaí<sup>h</sup>nia yurumátniua áintsan ikiakáatui. <sup>35</sup> Átumka “Tuke kuaru nantu árak júuktin taasai” tátsurmek. Túrasha Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. <sup>36</sup> Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui. <sup>37</sup> Tiniu armia nuka nekasaiti: “Chíkichik araawai chíkichcha júawai.” <sup>38</sup> Iis, chíkich arakmamu júuktinian akupkaitjarme. Átum araachiatrumek chíkich takasmanum atumsha pachiiintiukuitrume” tímiayi.

<sup>39</sup> Tura núwaka péprunam jeá “Ashí wi túramun ujat<sup>h</sup>kayi” takui untsurí shuar Jesusan ti shiir enentáimtusarmiayi. Niisha Samaritanmayá shuar áarmiayi. <sup>40</sup> Nu asamtai ashí Jesusai taar níijiaí pujusát tusa seawarmiayi. Tutai Jesus jimiará tsawant nui pujusmiayi. <sup>41</sup> Nú shuar untsurí ni chichamen antukar Jesusan ti shiir enentáimturarmiayi. <sup>42</sup> Nuyá nuwan tiarmiayi “Yamaikia aya ame chichammijiaí<sup>h</sup> Jesus enentáimtatsji antsu imia iisha ni chichamen anturkaji. Tura nékaji nekas Krístiti, ashí shuaran Uwemtikin.”

*Jesus akupniu takarniuri uchirín tsuármiania nu*

<sup>43</sup> Jimiará tsawant nan̄kaasmatai Jesus Samaria nun̄kanmayā jiinki Kariréa nun̄kanam wémiayi. <sup>44</sup> Kariréasha Jesusa nun̄ke asamtai, āinsha Jesus timia áintsan̄ ámiayi: “Yúsnan etserniun ashí shuar pé̄nker anturainiawai antsu nuna nun̄keyan̄ka nin anturainiatsui.” <sup>45</sup> Tuma āin̄ Kariréa nun̄kanam jeamtai auyá shuarsha Jerusarén̄num paskua námpernum wearu ásar tura ashí ni túramun̄ nūi wainkia ásar ti shiir awajsarmiayi.

<sup>46</sup> Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nūi pujāi yajā péprunam Kapernáumnum akupniu takar̄in̄ ámiayi. Ni uchir̄isha jaa tepemiayi. <sup>47</sup> Niisha Jesus Jutíanmayā Kariréa nun̄kanam taman antuk Jesusāi wémiayi. Tura ni uchir̄ī jákatin tepakui ni jēen we ni uchir̄in̄ tsuarat tusa Jesusan seamiai.

<sup>48</sup> Jesussha tímiayi “Aya aents túrachminian túrakui ísrum aya nújain̄ Winia enentáimtarme.”

<sup>49</sup> Tura takar̄in̄ tímiayi “Uunta, winia uchir̄ī jáatsain̄ wari winitia.”

<sup>50</sup> Nuīnkia Jesus tímiayi “Jeemīin̄ waketkitia. Yamaikia ame uchiram pé̄nker ajasai.” Tutai nú aishman̄ Jesus táman antuk wémiayi.

<sup>51</sup> Ni jēen jeátémámtai ni takarniur̄ī in̄kiun̄ tiarmiayi “Yamaikia uchiram pé̄nker ajasai.”

<sup>52</sup> Apasha inintrusmiayi nantu urukaim pé̄nker ajasma.

Niisha tiarmiayi “Yau, nantu pukuntamtai, tsuemun̄ michatramai” tiarmiayi.

Nuna antuk uchí apar̄isha enentáimsamai. <sup>53</sup> Nantu pukunta āi Jesus “Ame uchiram pé̄nker ajasai” timia nuní āin̄ michatrait̄i. Tuma asamtai niisha ashí ni shuar̄isha Jesusan nekas enentáimturarmiayi.

<sup>54</sup> Jesus nūi túramujaī ni kakarmar̄in̄ jimiará iniakmasmiayi. Nunasha Jutíanmayā jiinki Kariréa nun̄kanam jeá túramiayi.

## 5

### *Petesta amia nūi tampemarūn̄ Jesus tsuármania nu*

<sup>1</sup> Nu nan̄kaasmatai, Israer-shuar namperan najanainiakui Jesus ataksha Jerusarén̄num waketskimiayi. <sup>2</sup> Jerusarén̄ yama wayámunam murik wayátin̄ waiti tíjiuch̄ amia nūi entsa pajamtai jeammauyayi. Nu pajamtain̄ Petesta tiarmiayi. Nuna wáitir̄isha sen̄ku (5) ármiai. <sup>3</sup> Nūi untsur̄ī jáiniak nun̄kanam tepear̄miayi. Kusurusha shutuapsha tampemakusha tepesar entsa miartukat tusa nákasarmiayi. <sup>4</sup> Kame ni tátaj taku Yusa suntar̄ī táuyayi entsan̄ umuchkiat̄sa. Nuyá̄n̄ka emka shuar entsá wayá nūi ní jáamuriyá tsuáarmiai. <sup>5</sup> Áishman̄ traintiúchu (38) uwi jaa tepá nūi ámiayi.

<sup>6</sup> Jesussha nu shuaran nūi tepan wáinkíamiayi. Tura untsur̄ī uwitin̄ jaa tepan nekáa aniasmiayi “¿Shiir ajastiniak wakeram?”

<sup>7</sup> Tutai jaasha tímiayi “Uunta, entsa muchitkiui ¿winia yaki en̄kétát? Kame wi en̄kemátaj tai chíkich emka en̄kemáiniawai.”

<sup>8</sup> Nuyá Jesus tímiayi “Nantaktia. Ame peakrum jukim wetá.”

<sup>9</sup> Nu chichamtaik áishman̄ shiir ajasmiayi. Tura ni peakr̄in̄ jukí wémiayi. Nusha ayampratin tsawantaī túrunamiayi. <sup>10</sup> Tuma asamtai Israer-shuar shiir ajasun̄ tiarmiayi “Yamá̄i ayampratin tsawantaiti. Peakrum júkishtiniat̄me” tiarmiayi.

<sup>11</sup> Áishman̄sha tímiayi “Winia tsuara nu “Peakrum jukim wetá” turutni” tímiayi.

<sup>12</sup> Nuīnkia aniasarmiayi “¿Ya “Peakrum jukim wetá” túramam?” tiarmiayi. <sup>13</sup> Tura áishman̄sha Nin tsuárun̄ nékachmiayi. Untsur̄ī shuar nūi aa asamtai tura Jesus weu asamtai nin nekaachmiayi.

<sup>14</sup> Atak Jesus Yusa Uunt Jēen áishman̄kan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi. <sup>15</sup> Nuīnkia áishman̄ Jesus

nin tsuárman nekáa Israer-shuaran ujakmiayi. <sup>16</sup> Tuma asamtai ayampratin tsawantai túramtai Israer-shuar Jesusan maatai tusar áintrarmiyai. <sup>17</sup> Tura Jesus tímiayi “Wina Apar tuke yamaisha takawiti. Núnisnak Wisha takaajai.” <sup>18</sup> Tutai Israer-shuar nuna nankaamas maatai tusa wakeriarmiyai. Ayampratin tsawantai takaakui kajerkarmiayi. Tura nu arantcha “Yus winia Aparuiti” takui Yusjai métek enentáimtumawai tusar nu arant kajerkarmiayi.

### *Yusa Uchirí túramnia nu*

<sup>19</sup> Nuyá Jesus tímiayi “Ti nekas tájarme, Yusa Uchirínkia ni enentájjiajn takaatsui. Antsu aya winia Apar takaana nuna ísan métek takaajai. Ashí winia Apar túramun Wisha ni Uchirí asan métek takaajai. <sup>20</sup> Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wisha túratniun. Tura nuna túrakui ashamkattarme. <sup>21</sup> Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai. <sup>22</sup> Winia Aparka súmamtiktsui antsu shuar súmamtikiatniun ni Uchirín súsaiti. <sup>23</sup> Tuma asamtai ashí shuar Yus Apan shiir awajainia áintsan ni Uchiríncha métek shiir awajsatin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

<sup>24</sup> “Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin tuke amuukashtinian takakui. Nu shuarsha ayashí iwiaakuítat jákauyi antsu yamá nekas iwiaakuítat. Tuma asa sumamashtatui. <sup>25</sup> Ti nekasaiti. Tsawant winittiana nu jeayi. Nu tsawant jaka ainia nu Wi unsumman antukar umirkarka iwiaaku ajasartatui. <sup>26</sup> Iis, winia Apar iwiaaku awajsatniun takakui. Tura Winiasha, ni Uchirí asamtai, iwiaaku awajsatniun surusuiti. <sup>27</sup> Nu arantcha wi Aents Ajasu asamtai, shuaran súmamtikiatniun surusuiti. <sup>28</sup> “Ju chicham iturchataiti” enentáimprairap. Atak tsawantai wi unsumman ashí jákaru ainia nu antukartatui. <sup>29</sup> Tura ashí iwiansamunmaya jínkiartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

### *“Jesus nekas Yúsaiyáiti” tu áujmatania nu*

<sup>30</sup> ‘Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai. <sup>31</sup> Aya Wiki “Yúsaiyáitjai” tákunka winia chichamur ántar ainti. <sup>32</sup> Chikichcha awai. Niisha “Yúsaiyáiti” túrutui. Ni chichamesha imiá nekasaiti. <sup>33</sup> Atumsha Juankaj wi túramu inintrusmarme tura nii timia nu nekasaiti. <sup>34</sup> Tuma aiñ aents táman atsumatsjai. Antsu Juanka chichame enentáimkiuram uwempratarum tusan tájarme. <sup>35</sup> Juansha jiya núnis keemai. Atumsha ishichik tsawantin nú tsáapninnium warastin enentáimpramarme. <sup>36</sup> Tura Winia “Yúsaiyáiti” túrutna nu, Juanjai nankaamas péñkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupkamuitjai. <sup>37</sup> Winia Aparsha, akuptuku asa, ayamprutui. Túrasha átumka ni chichamesha antukchaitrume tura wáintiash wáinkiachuitrume. <sup>38</sup> Yus Apa akuptukuítat. Tuma asamtai Winia enentáimturchakrum winia Aparu chichamesha atumi enentáin wayachuiti. <sup>39</sup> Átumka Yus-Chicham yaunchu aarma nuj iwiaaku átinian wáinkiatat tusarum ti unuimiaruitrume. Nu chichamsha Wínian áujmatui. <sup>40</sup> Tuma aiñ nekas iwiaaku átaj tusarum Winí tátin nakitiarme” tímiayi.

<sup>41</sup> “Shuar Winia “shíiraiti” túrutainiakuisa nuna páchiatsjai. <sup>42</sup> Maa, Wi nékajrume. Átumka Yus aneatsrume. <sup>43</sup> Winia Apar akuptukmatai táwitjai túrasha nakitrarme. Antsu chikichka ní enentájjiajn jeartamkuínkia nuka átum wakerarme. <sup>44</sup> Átumka nuámtak “Shiir enentáimtursatí” tu enentáimtunaiyarne. Tura Yus enentáimturma nuka



páchiatsrume. Nújainkia çitiurak Yus enentáimtustam? <sup>45</sup> “Ii tunaarín Yusai etserturmaktatji” turutiirap. “Muisais akupkamun umirkan uwemprattajai” táturmek. Antsu Muisais aarma nujai atumí tunaari etsernaktatui. <sup>46</sup> Iis, Muisais Winia áatrurmiayi. Atumsha ni timia enentáimtakrumka Winiasha enentáimturaintrume. <sup>47</sup> Tura ni aarma enentáimtachkurmeka çitiurak wi tama enentáimtustarum?” tímiayi Jesus.

## 6

*Jesus senku mir (5.000) áishman kan ayurawarmiania nu*  
(Mateu 14.13-21; Márkus 6.30-44; Rúkas 9.10-17)

<sup>1</sup> Nu nan kaasmatai Jesus Kariréa antumiannum amain katiñmiayi. Nu antumiansha Tipirias antumian tuiniawai. Jimiará náartiniaiti. <sup>2</sup> Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. <sup>3-4</sup> Israer-shuara paskuanamperi ishichik ajasmatai Jesussha ni unuiniamurijiai náinnium waka nuj pujusmiayi. <sup>5</sup> Jesussha untsurí aents wininian wáiniak Jiripin tímiayi “Timiá untsurí shuar ayuratiñusha çituyan yurumak sumaktaj?” tímiayi. <sup>6</sup> Kame Jesuska Nii túrattana nuna neka asa Jiripi warittiñ tusa tímiayi.

<sup>7</sup> Jiripisha nuyá tímiayi “Timiá nukap kuitjai tanta sumakmesha ashí ishichik susamsha jeachaintjia” tímiayi.

<sup>8</sup> Nuyá chíkich unuiniamuri Antres, Pitru yachi, tímiayi <sup>9</sup> “Uchi juí senku (5) tantan jimiará namakjai takakui. Ausha timiá untsurínmasha jeatpiash” tímiayi.

<sup>10</sup> Nuyañka ““Ashí pujustarum” titiarum” tímiayi Jesus.

Áishman sha nuwasha uchisha irunmiayi. Tura chírichri núkap aa asamtai nuísha senku mir (5.000) áishman pujusarmiayi. <sup>11</sup> Jesussha nu tantan achik Yúsan yumíñkias ni unuiniamurín susamiayi. Niísha ashí nuj pujuinian súsararmiayi. Namaknasha núnisan ashí ni wakeriarmiania nuna súsararmiayi.

<sup>12</sup> Jémararmataisha Jesus ni unuiniamurín tímiayi “Ampirma júukrum chan kinnium chumpiatarum. Wasúrnákain.” <sup>13</sup> Niísha senku (5) tantanmaya ampirman júukar tuse (12) chan kinnium áimkiarmiayi.

<sup>14</sup> Nu shuarsha Jesus túramun ísar tiarmiayi “Ju nekas Yúsnan etserin tátinia núchakait.”

<sup>15</sup> Shuar Jesusan uunt akupin awajsataj tutai Jesus nekáa Niñki náinnium wémiayi.

*Jesus entsá pátatek nanamas wekasamiania nu*  
(Mateu 14.22-27; Márkus 6.45-52)

<sup>16</sup> Kíakui Jesusa unuiniamurí antumiannum wearmiayi. <sup>17</sup> Káshisha Jesus tuke táchamtai uunt kanunam enkemáwar Kapernáum péprunam wéenak jíinkiararmiayi. <sup>18</sup> Tura nase ti umpúakui chíchimi ti wajaimiayi. <sup>19</sup> Ajapén ajaras Jesus entsá pátatek nanamas tíjiuch winian wáinkiar ashamkarmiayi. <sup>20</sup> Tura Jesus “Wiitjai. Ashamprukairap” tímiayi. <sup>21</sup> Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

*Shuar Jesusan eak wekainiawai*

<sup>22</sup> Kashincha chíkich shuar amain ayuramunam kanararu nekaawarmai. Jesusa unuiniamurí Jesusjainchu chikichik kanu amia nujai wéarun nekaawarmai. <sup>23</sup> Nuj chichak matsatai Tipirias péprunmaya chíkich kanu táarmiayi. Yau Jesus Yúsan yumíñkias tantan ayuramunam tíjiuch táarmatai <sup>24</sup> nu shuar, Jesussha ni unuiniamurísha nuj atsuiniakui, nu kanunam enkemáwar Kapernáum péprunam Jesusan eaktajtsa wearmiayi.

*Jesus apatkua áintsankete*

<sup>25</sup> Entsa amain Jesusan wáinkiar aniasarmiayi “Uunta, çurutía juísha támam?”

<sup>26</sup> Jesussha tímiayi “Ti nekas tájarne. Aents tujintiamu nekáa asarum éatsurme. Antsu tanta yuarum jémaru asarum éatrume. <sup>27</sup> Juyá yurumak amuukatin asamtai

ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkíartiniaiti” túrutui” tímiayi.

<sup>28</sup> Tutai inintrusarmiayi “¿Warí túratniuitiaji Yus wakerana nu umiktin?”

<sup>29</sup> Jesussha tímiayi “Yus akupta asa Winia enentáimtursarat tusa wakerawai.”

<sup>30</sup> Tutai aniasarmiayi “¿Aentsti tujintiamuka warí túrattam ii ísar Ámin nekas enentáimtustin? Chikichcha túratá. <sup>31</sup> Yaunchu ii uuntrj aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

<sup>32</sup> Jesussha tímiayi “Wi tájana nu nekasaiti. Muisais atumí úuntrjn nayaimpinmaya yurumkan súdachmiayi. Antsu winia Apar yamá nekas apatkun nayaimpinmaya súramui.

<sup>33</sup> Iis, Yusajya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

<sup>34</sup> Tutai “Uunta, nu apatuk tuke amasta” tiarmiayi.

<sup>35</sup> Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai.

<sup>36</sup> Túrasha wí túramu wáinkiumesha winia chichamur enentáimtatsrume. <sup>37</sup> Ashí shuaran winia Apar tsankatrukarmiania nu, Wí shuar ajasartatui. Winin winiana núnaka penké nakitrashtatjai. <sup>38</sup> Wi wakeraj nuna túratniun táchaitjai antsu Winia akuptukmia nuna umirkatniun táwitjai. <sup>39</sup> Winia Apar akuptukuiti tura juna wakerawai. Ashí winia tsankatrukman emenkátsuk amuukatin tsawantaj iniantkiarat tusa wakerawai. <sup>40</sup> Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

<sup>41</sup> Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiararmiayi.

<sup>42</sup> Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya taraitjai” ta?” tiarmiayi.

<sup>43</sup> Jesussha tímiayi “Tu áujmatrukairap. <sup>44</sup> Shuáran winia Apar akúpturkachuitkiuinikia penké weanturkachainti. Tura Winia akupturna nuna amuukatin tsawantaj iniántkittiajai. <sup>45</sup> Yúsnan etserniu áarmarjn tawai “Ashí Yus jintintiamu ártatui”. Núnisan ashí Yusa chichamen antukar unuimiatainiakka Winí tániawai’ tímiayi.

<sup>46</sup> ‘Aya Wiki Yúsajya tau asan Yúsan wáinkiaitjai. Chíkichka penké wáinkiachuiti. <sup>47</sup> Ti nekas tájarme. Winia enentáimturna nú shuarka yamaram iwiaakman amuukashtinian takakui. <sup>48</sup> Wikia iwiaakman súana nú apatkuitjai. <sup>49</sup> Iis, atumí uuntrj aents atsamunam maná yurumkan yúawariatcha ashí jákarmiayi. <sup>50</sup> Antsu Wi tájana nú apatkun shuar yúakka jákachartatui. <sup>51</sup> Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashrui. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

<sup>52</sup> Nuyá nuántak áujmattsar tiarmiayi “¿Itiurak ni ayashinkesha ayurtamattaj?” tiarmiayi.

<sup>53</sup> Jesussha tímiayi “Ti nekas tájarme, Wi Aents Ajasu asantai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume. <sup>54</sup> Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniántkittiajai. <sup>55</sup> Winia ayashruka nekas yurumkaiti tura winia numparsha nekas umutainti. <sup>56</sup> Winia ayashruncha yúaka tura winia numparnasha úmaka Wijjai tsanin pujawai tura Wisha nu shuarjai tsaninkian pujajai. <sup>57</sup> Yus Apa, Winia akuptukuka, nu iwiaakma nérenniuiti. Tuma asantai ni iwiaakmarin iwiaaku pujajai. Núnisan Winia yurakka winia iwiaakmaruj iwiaaku pujustatui. <sup>58</sup> Nayaimpinmaya apatkun

tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. <sup>59</sup> Núnaka Jesus Israer-shuar iruntainiam unuiniarmiayi.

### *Iwiaaku chicham*

<sup>60</sup> Nu chichaman antukar Jesusa unuiniamuri chicharainiak “Nii tana nu ti itiurchat asantai ¿yaki antukminiait?” tiarmiayi.

<sup>61</sup> Jesussha ni áujmatman nekáa tímiayi “Átum “ju chicham itiurchataiti” tárumek. <sup>62</sup> Wátsek, Wi nayaimpiniam pujumiaj nuí waketkimtaisha ¿urukawaintrumek? <sup>63</sup> Warí, aya wakanik iwiaakman súwaiti. Ayashkia penké áantraiti nekas iwiaaku awajsatniun. Wi tájana nujaj imiá nekas wakankia iwiaaku awajsamniaiti” tímiayi Jesus. <sup>64</sup> Tura Jesus Nin enentáimtachun tura Nin suruktatna nunasha yaunchu neka asa ni unuiniamuriñ tímiayi “Atumíincha winia chichamprun enentáimtachu tuke awai. <sup>65</sup> Nu asantai tímiajrume “Shuáran winia Apar akupturkachmaitkiuinikia penké weanturkachainti” tímiajai” tímiayi Jesus.

<sup>66</sup> Nuyasha ni nemarniuri untsurí armia nu Jesusan ikiukiar atakka Niiijai wekasacharmiayi. <sup>67</sup> Nuyá Jesus ni tuse (12) unuiniamuriñ chicharainiak “¿Atumsha wétin wakerarmek?” tímiayi.

<sup>68</sup> Semuñ Pítrusha áikmiayi “Uunta, ¿yáiniñ wetaj? Ame chichammijiañ nekas iwiaaku áminiaiti. <sup>69</sup> Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

<sup>70</sup> Jesussha tímiayi “Ashí tuse (12) árumna nu achikiuitjiarme nekas Wíi shuar ajastin. Tuma ain atumíin chikichik iwianchiiti” tímiayi. <sup>71</sup> Nuna taku Jútas Iskariútin, Semuñka uchirín, enentáimtus tímiayi. Jútassha ni unuiniamuriñtiat Jesusan ukunam surukmiayi.

## 7

### *Jesusa yachisha Nin enentáimtuscharmiaiyi*

<sup>1</sup> Nu nankaasmatai Jesus Kariréa nunkanam wekaimiayi. Jutía nunkanam wéchamiayi Israer-shuara uuntri nuí máataj tutai. <sup>2</sup> Tura Israer-shuar aak aakmatai namperi jeatemamtai <sup>3</sup> Jesusa yachí wishikiainiak tiarmiayi “¿Urukamtai juisha pujam? Jutía nunkanam wetá, aisha ame unuiniamuram túram nuna ísarat. <sup>4</sup> Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar íimmianum túratá” tiarmiayi. <sup>5</sup> Ni yachisha ishichkisha Nin enentáimtachu ásar tiarmiayi.

<sup>6</sup> Tura Jesus tímiayi “Winia tsawantur nampernum wétin jeatsui. Atumjainkia nánkamas tsawant wétin péñkeraiti. <sup>7</sup> Ju nunkanmaya aents atumniaka kajertamat-srume. Antsu ni tunaarñ etsertin asantai Wíniaka kajertuiniawai. <sup>8</sup> Átumka nampernum wetarum. Wikia tsawantur jeachkui wéatsjai.” <sup>9</sup> Juna tinia Jesuska Kariréa nunkanam juákmiayi.

### *Aak aakmatai nampernum Jesus timia nu*

<sup>10</sup> Ni yachí wearmatai Jesussha nampernum wémiayi. Tura nekarawarain tusa úumak wémiayi. <sup>11</sup> Israer-shuara úuntrisha námper irunturmanum eakar “Nu aishmansha ¿tuñ pujá?” tiarmiayi. <sup>12</sup> Ashí shuarsha Nin áujmatiararmiayi. Chíkich “pénkeraiti” tiarmiayi. Tura chikichcha “Pénkerchaiti. Aya anankartawai” tiarmiayi. <sup>13</sup> Tura Israer-shuara úuntriñ ashamainiak uuk áujmatiararmiayi.

<sup>14</sup> Nampersha ajapén ajasmatai Jesus Yusa Uunt Jeen wayá shuáran unuiniamiayi. <sup>15</sup> Israer-shuara úuntrisha nuna ísar ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

<sup>16</sup> Jesussha tímiayi “Wi unuiniaina nu winia chichampruchuiti antsu Winia akup-tukua Núnan unuiniajai. <sup>17</sup> Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiñkia, nuna nekaattawai. Aya wi

enentáimmiajajin chichaakuisha, nuna nekaattawai. <sup>18</sup> Ni enentáimmiajai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. <sup>19</sup> Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

<sup>20</sup> Nu shuarsha tiarmiayi “Wáurtsumek. ¿Ya mantamataj tusa wakera?”

<sup>21</sup> Jesussha tímiayi “Ayampratin tsawantaj chikichkí túramtai ti enentáimtsurmek. <sup>22</sup> Muisais ashí tsupirnaktinian akupkachmiayi. Antsu ni uuntrinikia nuna akupka ániawai. Tuma ain átumka Muisais akupkamu umiktai tusarum ayampratin tsawantajsha uchi áishman tsúpirnaitrume. <sup>23</sup> Wátsek, Muisais akupkamu uminkiatu tusarum ayampratin tsawantajsha uchi áishman tsúpirkurmekaka ¿urukamtai Wi ayampratin tsawantaj áishmanka ayashí takamtsuk tsuármatai kajertarum? <sup>24</sup> Shuar túrana nu ísam wárik súmamtikiawaip. Antsu inintrúsam paant nekaam, nekasa nu enentáimtusta” tímiayi Jesus.

### *Jesus Yúsnumia akupkamuiti*

<sup>25</sup> Nuyá Jerusarénumia shuar tiarmiayi “Maatai tuinia núchakait. <sup>26</sup> Tura nuí ashí ántamunam étserui tura suntar páchiniatsui. ¿Ii uuntrisha “Nekas Krístuiti” tu enentáimtuiniawash? <sup>27</sup> Antsu nekas Kristu taa tuyan winiá nekanashtatui tura ju pujamuka ashí nékaji” tiarmiayi.

<sup>28</sup> Jesus nuna antuk, Yusa Uunt Jeen waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas akupniusha átumka nékatsrume. <sup>29</sup> Antsu Winia akuptukuitkiui aiyá tau asan Wikia nékajai” tímiayi. <sup>30</sup> Nuyá sepunam enkeataj táyat achikcharmiayi ni tsawantri jeachu asamtai. <sup>31</sup> Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

### *“Éátkáttarme tura wáitkiashtatrume” tímiayi Jesus*

<sup>32</sup> Pariséusha Israer-patri úuntrisha Jesusnan timian antukar suntaran akupkarmiayi Jesusan achikiar sepunam enkeawarat tusar. <sup>33</sup> Nuyá Jesussha tímiayi “Aya ishichik tsawant atumjai pujustajai. Nuyá ataksha Winia akuptuku pujana nuí waketkittajai. <sup>34</sup> Átumka éátkáttarme tura Wi wéajna nuí wéchamniaitkiuram wáitkiashtatrume.”

<sup>35</sup> Israer-shuarsha nuamtak aniniaisarmiayi “¿Jusha tui wéakuin iisha wáinkiashtataji. Israer-shuar apachnium pujuinia nuí we apachin unuiniartatuak. <sup>36</sup> Nii timia nu ititurkit. “Átumka éátkáttarme tura Wi wéajna nuí wéchamniaitkiuram wáitkiashtatrume” tana nu ititurkit?” tiarmiayi.

### *Yamaram iwiaakman súana nú entsa*

<sup>37</sup> Jista amúamunam ti shiir najanawarmia nu tsawantaj Jesus wajak kakaram chichaak tímiayi “Shuar ni enentáin kitiamakka Winin taa umar kitiakén imíkráti. <sup>38</sup> Winia enentáimturna nuka ni enentáiyá entsa wa áintsan yamaram iwiaakman súana nú entsa jinkittiawai.”

<sup>39</sup> Nuna taku Jesus “Ashí Yusan enentáimtusarun Yusa Shiir Wakaní súsatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakaní shuar súsachmauyayi.

### *Shuarsha niisháa niisháa enentáimprarmiania nu*

<sup>40</sup> Chikich shuarsha nuna antukar “Ju nekas Yúsnan etserin tátinia núiti” tiarmiayi. <sup>41</sup> Chikichcha “Ju nekas Krístuiti” tiarmiayi. Tura chikichkia Jesus Kariréanmayaiti tu enentáimiainiak tiarmiayi “Wari, ¿Kariréa nunkanmaya Kristu áminkiait? <sup>42</sup> Yus-Papinium paant tawai “Krístuka yaunchu uunt akupin Tawit weeanmaya akiiniatniuiti, tawai. Tura Tawitia pépruriya Pirinnumia átiniaiti” tawai” tiarmiayi. <sup>43</sup> Tuma asamtai shuar

niisháa niisháa enentáimprar kanakiarmiayi. <sup>44</sup> Chíkich aiyá nuka “sepunam enkeatai” tiarmiayi túrasha túracharmiayi.

*Israer-shuara uuntri Jesusan enentáimtuscharmiania nu*

<sup>45</sup> Suntarsha wakеткиarmiayi. Tura Pariséusha Israer-patri uuntrisha “¿Urukamtai itiachuram?” tiarmiayi.

<sup>46</sup> Suntarsha tiarmiayi “Chikichkisha ju áishman chichaa áanis chichaschaiti” tiarmiayi.

<sup>47</sup> Nuyá Pariséu tiarmiayi “Atumsha anannarume. <sup>48</sup> Pariséutisha uuntcha nuna enentáimtuiniawash. <sup>49</sup> Penké shuarka yaunchu akupkamun nékachua nuka yajau-chiniam yuminkramu áiniawai” tiarmiayi.

<sup>50</sup> Nikiuté musha, kashi Jesusan tarimia nu, Pariséuitiat tímiayi <sup>51</sup> “Ii shuartikia, shuar ni túramun etserkamu ántutsuk súmamtikiachminiaiiti” tímiayi.

<sup>52</sup> Nuiñkia niisha tiarmiayi “Wats, amesha Kariréanmayanchuashitiam. Yus-Chicham áuj sam nekaattame. Kariréanmayá Yúsnan etserin penké tániatsui” tiarmiayi.

*Nuwá wáinmakman Jesusan itiararmiiania nu*

<sup>53</sup> Nuyá ashí ni jeen wakеткиarmiayi.

## 8

<sup>1</sup> Tura Jesuska Uriwiu náinnium wémiayi. <sup>2</sup> Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi. <sup>3</sup> Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi. <sup>4</sup> Tura Jesusan tiarmiayi “Uunta, ju nuwá tsanirma pujá achinkiayi. <sup>5</sup> Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi. <sup>6</sup> Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsunsumá ni uwejéjai nunká áarmiayi. <sup>7</sup> Tura tuke iníam wajaki tímiayi “Ayu, atumíyya tunáa túrichu ákunka kayan achik nin emka tukuti” tímiayi. <sup>8</sup> Tura nuna ti, ataksha tsunsumá nunká áimiayi.

<sup>9</sup> Tura ni chichamen antukar ni enentáin sumamawar úuntnumiá jukí chikichik chikichik jiinki wéarmiayi.

Ashí wéarmatai Jesus Niñki nuwájai juákmiayi. <sup>10</sup> Jesussha wajaki aya nuwanak wáiniak tímiayi “¿Ámin súmamtikramainia nusha tuiñ pujuinia. Chikichkisha áwak?” tímiayi.

<sup>11</sup> Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia weme atakka tunáa túrawaip” tímiayi.

*Jesus tsáapninia áintsankete*

<sup>12</sup> Ataksha Jesus Yusa Uunt Jeen iruntrarun tímiayi “Ju nunkanam Wi tsáapninia áintsan shuara enentáin tsáapnijai. Ashí Wijjai tsanin wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

<sup>13</sup> Pariséu nuikia tiarmiayi “Ame péñkerum tau asam támerna nu áantraiiti.”

<sup>14</sup> Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia péñkerun táyatnak tájana nu péñkeraiti. <sup>15</sup> Ju nunkanmaya aents enentáimmijai enentáimtakrum ti súmamtikrume. Tura Wikia chikichkinkesha súmamtiksujai. <sup>16</sup> Tura súmamtikkiunka awajitsuk túrajai. Iis, Wiki shuar túramun péñkerashit tusan enentáimtsujai antsu winia Apar Winia akuptukua nusha Wijjai métek shuar túramun nékawai. <sup>17</sup> Atumí akupkamuriin áarmaiti: “Jimiará shuar mai nú chichamnak tákuñkia nu chicham nekasaiti.” <sup>18</sup> Wátsek Wisha winia Aparsha mai métek taji. Winia Aparsha akuptukuiti” tímiayi.

<sup>19</sup> Tutai “¿Ame apasha tui pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” <sup>20</sup> Nuna Yusa Uunt Jeen Yusa kuítr̄in suinia nui tímiayi. Tuma aĩn sepunam en̄keatniun achikcharmiayi ni tsawantri jeachu asamtai.

*“Wi wéajna nui wéchamniaitrume’ tímiayi Jesus*

<sup>21</sup> Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaar̄ij̄iain̄ jakattarme.”

<sup>22</sup> Israer-shuarsha tiarmiayi “Wi wéamunam wéchamniaitrume” tutai, nuĩkia máamatpiash” tiarmiayi.

<sup>23</sup> Nuĩkia Jesus tímiayi “Átumka nun̄kayaitrume antsu Wikia nayaimpinmayaitjai. Ju nun̄kayaitrume tura Wikia juyanchuitjai. <sup>24</sup> Tuma asamtai tájarme “Atumi tunaar̄ij̄iain̄ jakattarme.” Nekas Wi tájana núitjai. Tura nu enentáimtachkurmeka atumi tunaar̄ij̄iain̄ jakattarme” tímiayi.

<sup>25</sup> Niisha aniasarmiayi “¿Amesha yáitiam?”

Jesussha tímiayi “Yaunchu tájarme. <sup>26</sup> Nu arantcha atumin súmamtikiatjarum tusan ti tím̄inaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. <sup>27</sup> Tuma aĩn ni Apar̄in̄ áujmatman pen̄ké nekaacharmiayi. <sup>28</sup> Tuma asamtai tímiayi “Aents Ajasuitjiana ju, numiniam ajintruarum yakí takuriakrumin núj̄ain̄kia nekarattarme. Wi tájana núitjai tura winia enentáir̄j̄ain̄ takatsuk aya winia Apar unuitiurmanak tájai. <sup>29</sup> Winia akuptukua nuka tuke W̄ij̄iain̄ pujawai. Winia Apar wakeramun tuke shiir túrakui ikiurkichuiti” tímiayi. <sup>30</sup> Tutai untsur̄i shuar Nin nekas enentáimtusarmiayi.

*Yus-shuarsha tura tunaanum emetamusha*

<sup>31</sup> Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átrume. <sup>32</sup> Núj̄aish̄a timiá nekas ana nu nekaattarme tura nekas an̄kant ajastatrume” tímiayi.

<sup>33</sup> Niisha tiarmiayi “Iisha Apraám weeitji. Chikicha takarniur átai tusar pen̄ké emetachmaitji. ¿Urukamtai “An̄kant ajastatrume” tame?” tiarmiayi.

<sup>34</sup> Jesus tímiayi “Timiá nekasaiti, ashí shuar tunaan túruinia nuka nu tunaaj̄ai emetamuiti. Tuma asa takarniua núnisañ ajasuiti. <sup>35</sup> Takarniusha ajapnamnia asamtai Yus atumin ajapramamniaitrume. Tura Akupniu Uchir̄in̄kia ni Apar̄ij̄iain̄ tuke pujawai. <sup>36</sup> Tuma asamtai Akupniu Uchir̄i an̄kant awajtamsamtain̄kia imiá nekas an̄kant pujustatrume. <sup>37</sup> Átum Apraám weeitrume nékajai. Túmaitiatrum winia chichamur ántachu asarum mantuataj tárume. <sup>38</sup> Winia Apar iniaktursamun áujmatjai. Átumka atumí uuntri timia túrarme” tímiayi.

<sup>39</sup> Tutai niisha tiarmiayi “Iikia Israer-shuar asakrin ii úuntriñkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeka níya núnis túrawaintrume. <sup>40</sup> Nekas ana nuna Yus iniaktursamtai nuna ujakjarme, tuma aĩn̄ mantuataj tarume. Apraámka nuní túrachmiayi. <sup>41</sup> Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiã akiiniachuitji. Ii uuntri Yúskete. Niisha ii Apar̄inti.”

<sup>42</sup> Tura Jesus tímiayi “Yus nekas atumi Apar̄intkiuin̄kia Winiasha anentíntrume Yúsnumiã tau asamtai. Wisha winia enentáimmiar̄j̄ai jui táchaitjai antsu Yus akuptukuiti. <sup>43</sup> ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. <sup>44</sup> Atumí apar̄in̄kia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianch̄kia tuke man̄kartiniaiti. Nekas ana nunasha

nakitiawai tuke wáitrin asa. Wáitraksha níniunak chichaawai. Iis, waitia uuntri asa tuke wáitriniaiti. <sup>45</sup> Tura Wikia nekas takui átum enentáimturtsurme. <sup>46</sup> ¿Yaki chikichkí tunaajai súmamtikruamniait? Nuikia Wi nekas nuna tau aisha ¿urukantai enentáimturtsuram? <sup>47</sup> Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

### *Apraám akiintsain Jesus pujumiayi*

<sup>48</sup> Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

<sup>49</sup> Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. <sup>50</sup> Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai. <sup>51</sup> Ti nekasaiti. Wi tájana nuna enentáimta nú shuarka penké jákashtiniaiti” tímiayi.

<sup>52</sup> Nuinkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi. <sup>53</sup> ¿Nuinkia ii uuntri Apraám nankaamaskaitiam. Niisha tura Yúsnan etserniusha jákacharuk áinia. Itiurak imiá nankaamantu enentáimtumam?” tiarmiayi.

<sup>54</sup> Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsruti” tárumna núiti. <sup>55</sup> Nusha táyatrum Nin nékatsrume. Wikia Nin nékajai. “Nin nékatsjai” tákunka atumjai métek wáitrin áintjai. Tura Nin neka asan Nii tana nuna tuke túriniaitjai. <sup>56</sup> Apraámka, atumí uuntri, imiá yaunchu jákaitiat Wi ju nunkanam tátinian wararas nákasmiayi. Tura wáitiak ti shiir warartusmiayi” tímiayi.

<sup>57</sup> Nuyá Israer-shuar Jesusan tiarmiayi “Warí, senkuenta (50) uwí takaktsume túmaitiatam Apraáman wáinkiamjai tame.”

<sup>58</sup> Jesussha tímiayi “Ti nekas tájarne, Apraámka pujatsain Wikia pujajai” tímiayi Jesus.

<sup>59</sup> Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapeniñ weak Yusa Uunt Jeeniá jiinki wémiayi.

## 9

### *Kusuru akiinian Jesus tsuármiania nu*

<sup>1</sup> Jesus ni unuiniamurijiai wesa áishmankan kusuru akiinian wáinkiamiayi. <sup>2</sup> Ni unuini-amurisha aniasarmiayi “Uunta, jusha ¿urukantai kusuru akiiniawit. Yana tunaarjiajin kusuru akiiniait. Niiniujaimpiash, aparíniujaimpiash túrunawit?” tiarmiayi.

<sup>3</sup> Jesus tímiayi “Ni tunaarjiainchusha ni aparíniujainchusha túrunaiti. Antsu Yus ni ayashín túratniua nu paant atí tusa túrunaiti. <sup>4</sup> Tsawajikia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai. <sup>5</sup> Jú nunkanam pujakun shuara enentáin tsáapnimitkratniuitjai” tímiayi. <sup>6</sup> Nuna chichas nunká usukmi nunkejai pachimiar kusuru jin yakarmiayi. <sup>7</sup> Nuyá chichaak “Siruí pajamta entsanam nijiamauta” tímiayi. Siruísha nu chichamnum “akupkamu” tawai. Kusurusha we nijiamar penker ímiar támiayi.

<sup>8</sup> Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.” <sup>9</sup> Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niniki “Ee, wiitjai” tímiayi.

<sup>10</sup> Tutai aniiniak “¿Itiurak yamaikia ímiam?” tiarmiayi.

11 Niisha tímiayi “Áishman Jesusa nu tsakusan jírún yakartur “Siruí pajamtaí entsanam nijiamauta” turutmiai. Takui wena nijiamaran paant iimpramjai” tímiayi.

12 Tutai “Nu áishmansha tuin pujá” tiarmiayi.

Niisha “Cha, nékatsjai” tímiayi.

### *Pariséu kusuru tsuárman inintrusarmiania nu*

13 Nuyá kusuru tsuárman Pariséunam júkiarmiayi. 14 Kame Jesus kusurun tsuarmia nui ayampratin tsawantaúyayi. 15 Tuma asamtaí Pariséusha itiurak ímniun tusar aniasarmiayi.

Niisha tímiayi “Jiiruin tsakusan yakaarámtai, nijiamaran paant iimjiai.”

16 Nuyá chíkich Pariséu shuarnumiá nuamtak tunaiyar “Juna tsuárúka Yúsaiyanchuítí. Kame ayampratin tsawantaí túraití” tiarmiayi.

Tura chikichcha “Tunáa shuaraitkiuin<sub>nkia</sub> júnisan<sub>n</sub> túratniun tujinkia<sub>ayí</sub>” tiarmiayi. Nujai akannaikiarmiayi.

17 Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniúiti” tajai” tímiayi.

18 Tura Israer-shuar nekas kusurúitiat yamáí íimiui tu enentáimtuscharmiayi Pariseu. Tuma ásar ni aparíncha untsukar 19 inintrusarmiayi “¿Ame uchiram kusuru akiinia tárúmna nukait. Itiurak yamaikia iimia?” tiarmiayi.

20 Ni aparísha tiarmiayi “Ii uchirín<sub>nkia</sub> kusuru akiiniama nu nékaji. 21 Tura iisha nékatsji itiurak yamaikia iimia. ¿Yátsuk pé<sub>nk</sub>er tsuárúit? Niisha úuntchakait, nii aniastarum. Ni<sub>nk</sub>i ujatmakarti” tiarmiayi. 22 Sapijmiak tiarmiayi. Israer-shuara ún<sub>trín</sub>nkia “Jesus Yus akupkamu asa nekas Krístuítí” tuinia núnaka Israer-shuara iruntainmaya<sub>n</sub> jii<sub>nk</sub>i akupnakti tiniu ásarmatai tsuarma aparí ashamkarmiayi. 23 Nu asamtaí ni aparí “Niisha úuntchakait, nii aniastarum” tiarmiayi.

24 Nuín<sub>nkia</sub> Israer-shuara uun<sub>trí</sub> kusuru tsuárman ataksha untsuk tiarmiayi “Yus íimmianum nekasa nu titiá, ju áishman<sub>nkka</sub> tunaarinniúiti nékaji” tiarmiayi.

25 Tutai tímiayi “Kame tunaarinchashit. Né<sub>nk</sub>atsjai. Antsu junak nékajai. Yaunchu kusurúitiatan yamaikia íimjiai.”

26 Ataksha aniiniak “¿Itiurtámkama. Itiur íimtikrammia?” tiarmiayi.

27 Niisha tímiayi “Yaunchu tájar<sub>me</sub> tura anturtatsrume. ¿Urukamtaí ataksha titi tusa wakerarum. Niiniu ajastin enentáimprurmek?” tímiayi.

28 Nuín<sub>nkia</sub> katsek<sub>kar</sub> “Áme<sub>ka</sub> ní shuarín<sub>me</sub>. Tura iikia Muisaisa shuarín<sub>tji</sub>, tiarmiayi.

29 Yus Muisaisan akupkaiti iikia nékaji antsu nu áishman<sub>n</sub> nékatsji. ¿Tuyá<sub>ntskait</sub>?” tiarmiayi.

30 Áishman<sub>n</sub> tsuarma tímiayi “¿A<sub>usha</sub> itiurtsuk áminiait? Winia íimtikrur<sub>ma</sub> nu átumka nékatsrume tuyá<sub>nk</sub>it. 31 Paant nékaji tunaarinniun Yus anturtsui. Tikishmatar ni wakerarumun túruinia nunak anturui. 32 Yáunchusha kusuru akiinian tsuárúka tuke atsuwaiti. 33 Ju áishman<sub>n</sub> Yúsaiyanchuít<sub>kiun</sub>ka pen<sub>nké</sub> túrachá<sub>ayí</sub>” tímiayi.

34 Nuín<sub>nkia</sub> tiarmiayi “Áme<sub>ka</sub> tunaarintin akiiniaiatmesha ¿in jintintin átaj tamek?” Nuna tiar jii<sub>nk</sub>i awemarmiayi.

### *Wakaníin kusurua nu*

35 Kusuru tsuárman jii<sub>nk</sub>i awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

36 Tsuarma tímiayi “Uunta, turuttia wisha nekaan enentáimtustaj.”

37 Jesussha tímiayi “Wain<sub>me</sub>. Wiitjai ámijia<sub>i</sub> chichaajna nu.”

38 Tutai, tikishmatar “Uunta, enentáimtaj<sub>me</sub>” Jesusan tímiayi.



<sup>39</sup> Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru aín iimtiktinian tura ananmamuk “Yusnan nekaan paant iimjiai” tana nuna ukusturtinian táwitjai” tímiayi.

<sup>40</sup> Tutai Pariséu shuar nuj pujuarmia nu nuna antukar “¿Nuinkia iikia kusurukaitiaji?” tiarmiayi.

<sup>41</sup> Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjiai” tau asarum sumamaitrume” tímiayi.

## 10

### *Iikia murikiua áintsar aji*

<sup>1</sup> Jesus tímiayi “Wi tájana nu ti nekasaiti. Shuar murikiun takakna nu ni murikrín wenuimiunam kashi ikiuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti. <sup>2</sup> Antsu murikiu wáinniuka wáitiniam wayaawai. <sup>3</sup> Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Ni-isha ashí ni murikrín chikichik chikichik náarin anaitius untsúawai. Tura tsawáikia ni murikrín jiki ayurtainiam yarumui. <sup>4</sup> Tura ashí ni murikrín jiiir émtuki wéawai. Muriksha ni chichamen ántuiniak untsuam nemarainiawai. <sup>5</sup> Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai.” <sup>6</sup> Nu métek-taku chichamnaka Jesus áujmatsamiayi tura shuar antukar nekaacharmiayi.

### *Pénker wáinniuka Jesusaiti*

<sup>7</sup> Nuyá Jesus tímiayi “Ti nekasan tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayamin áiniawai. <sup>8</sup> Wi táatsain ashí táaruka kasa ániak winia shuarun kasamkatai tusa wakeriarmiayi. Tura winia murikiur Wí shuar ániak nu shuaran anturkacharmiayi. <sup>9</sup> Wikia wáititjai. Ashí Winin wayaaka uwemprattawai. Tura murikiua áintsan wenuimiunmaya jinki pénger yurumáttawai tura atak wayá ayamprattawai’ tímiayi.

<sup>10</sup> ‘Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. <sup>11</sup> Wikia pénger wáinniuitjai. Pénger wáinniuka ni murikrín uwemtikrartaj tusa jakattawai. <sup>12</sup> Antsu aya kuitjai takauka ni murikrichu ániakui tura nekas wáinniuchu asa pénger wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai. <sup>13</sup> Nu shuarsha akikiam takáa asa murikiun enentáimtsatsui. Nu asamtai aya pisaawai’ tímiayi.

<sup>14-15</sup> ‘Wikia pénger wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrataj tusan jakattajai. <sup>16</sup> Chíkich muriknasha takakjai. Nusha ju wenuimiunmayanchu áiniawai. Nunasha itiattajai. Nu muriksha Winia umirtukar ashí métek matsamsar chikichik wenuimiunmaya ajasartatui tura chikichik wáinin átatui’ tímiayi.

<sup>17</sup> ‘Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui. <sup>18</sup> Wi wakerakun jakattajai. Wi wakerachkuinkia chikichkia mantuachminiati. Jákatniuncha tura nantaktinniasha winia Apar surusuiti” tímiayi Jesus.

<sup>19</sup> Israer-shuarsha nuna antukar niisháa enentáimprar kanakiarmiayi. <sup>20</sup> Untsurí tiarmiayi “¿Urukamtai ántarum wáuruk tausha. Yajauch wakanin takaktsuk?” <sup>21</sup> Tura chikichcha tiarmiayi “¿Yajauch wakantrinniusha núnisan chichasminkiait. Yajauch wakantrinniusha kusurun ímtikramniashit?” tiarmiayi.

### *Israer-shuarka Jesusan nakitiarmiania nu*

<sup>22</sup> Micha nantutin Israer-shuar Jerusarénum namperan najanainiawai. Nu nampernumsha Yusa Uunt Jee atak jeamman enentáimtuiniawai. <sup>23</sup> Jesussha Yusa Uunt Jee áachiniam wekasamiayi Sarumúnka wáitiría nui.

<sup>24</sup> Israer-shuarsha Nin téntakar tiarmiayi “¿Ame nekas Krístukaitiam? Ju chichamaik etserkata. ¿Urukamtia nekas paant tátsum?” tiarmiayi.

<sup>25</sup> Tutai Jesus tímiayi “Yaunchu tiniu aín enentáimturachmarme. Winia Apar akupkamun takaajna nu ti paant awajtawai. <sup>26</sup> Tura átumka winia murikruchu asarum enentáimturtsurme. <sup>27</sup> Wisha winia murikrun untsuam anturtuiniak nemartuiniawai. Wisha wíniak mash nékajai. <sup>28</sup> Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? <sup>29</sup> Winia Apar murikiun surusuiti. Niisha ashí nankaamas kakaram asamtai ¿yaki uwejéyan atankit? <sup>30</sup> Wisha winia Aparjai iisha aya chikichkiitji” tímiayi Jesus.

<sup>31</sup> Tutai Israer-shuarsha atak kayan achikiar tukutaj tiarmiayi.

<sup>32</sup> Jesussha tímiayi “Winia Aparu kakarmarijiai ti untsurí péñkera nuna takasuitjai. ¿Tújaimpia mantuattarum?”

<sup>33</sup> Israer-shuarsha Nin tiarmiayi “Péñker túra asakmin máataj tátsum antsu Yus yajauch chicharkumin túrattaji. Ámeka shuáraitatam Yusa nuke enentáimtumame” tiarmiayi.

<sup>34</sup> Nuyá Jesussha tímiayi “Atumí akupeamurijn Yus timia nu áarmaiti: “Átum yúsaitrume” tawai. <sup>35</sup> Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait. <sup>36</sup> Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitiaj. Nújainkia wi “Yusa Uchirintjai” takui ¿itiurak “Yusan yajauch chicharui” túrutrum? <sup>37</sup> Winia Apar túramu túrachkuinikia enentáimtursairap. <sup>38</sup> Tura nekas túrakuinikia enentáimtursatarum. Tura Winia nakitrakrumsha nuikia wi túramu enentáimtustarum. Nujainkia winia Apar Winin pujamu ashí nekaattarme. Núnisnak Wisha Niin pujajai. Iisha chikichkiitji.” <sup>39</sup> Tutai ataksha sepunam enkeatai tiarmiayi. Túrashá Jesus uwempramiayi.

<sup>40</sup> Nuyá Jesus Jurtañ entsa amain wé yaunchu Juan imiakrattainium pujusmiayi.

<sup>41</sup> Ti untsurí shuar iyuwar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi. <sup>42</sup> Nuisha untsurí Jesusan enentáimtusarmiayi.

## 11

### *Rásaru jakamu*

<sup>1</sup> Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártajai pujumiayi. <sup>2</sup> Niisha Rásaru umai ármiai. Nu Marisha ukunmanka kunkuinian sumak Jesusan kuer ni intiashíjjai japirmiayi. <sup>3</sup> Tura Rásaru jaakui ni umaj Jesusan chichaman akuptuiniak tiarmiayi “Uunta, ame amikrum jaawai.”

<sup>4</sup> Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sunkur tsuármanum paant atí tusa jaawai.” <sup>5</sup> Jesus Mártaña ni kaincha tura ni umaj Rásaruncha nekas aneemiayi. <sup>6</sup> Túmaitiat Rásaru jaawai taman antukiat ni pujamunam jimiará tsawant pujusmiayi. <sup>7</sup> Nuyá ni unuiniamurijn “Ataksha Jutía nunkanam wetái” tímiayi.

<sup>8</sup> Tura ni unuiniamurisha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nuj ataksha wétai támek?”

<sup>9</sup> Jesussha ju métek-taku chichaman tímiayi “Tsawaikia páantchakait. Tsawaj wekaana nu paant asamtai tukumkashtatui. <sup>10</sup> Tura kashi wekaana nusha kirit asamtai tukumkátawai. Núnisañ Wíi tuke pujakun winia takatrun takastiniaitjai. Túraknasha itiurchatan wáinkiashtatjai.” <sup>11</sup> Nuyásha Jesus atak tímiayi “Ii amikri Rásaru kanarai. Wi ishintiartatjai.”

<sup>12</sup> Tutai ni unuiniamuri tiarmiayi “Uunta, aya kanarka nuin<sub>nk</sub>ia p<sub>nk</sub>er ajastatui.”  
<sup>13</sup> Jesuska Rásaru jakamu nékayat “kanarai” tímiayi. Tura ni unuiniamuri Rásaru kajinmakua áintsan kanarai enentáimprarmiayi.

<sup>14</sup> Jesus nuikia ti paant tímiayi “Rásaru yamaikia jakayi. <sup>15</sup> Tura nu<sub>i</sub> pujuscha asan kúntuts pujatsjai. Jean túrattajna nu ísrum ti nekas enentáimtursattarme. Nuna nekaan shiir enentáimjai. Wátsek, iyutai.” <sup>16</sup> Nuyá Jimiampramu Tumas chíkich unuiniamuri nu<sub>i</sub> armia nuna “Iisha weri Niijia<sub>i</sub> métek jakatai” tímiayi.

### *Iwiaaku átinniasha jaka nantaktinniasha Jesus nérenniuiti*

<sup>17</sup> Nu<sub>i</sub> taa, Rásarun kuaru tsawant ikiusman wáinkiamiayi. <sup>18</sup> Petania pépruka Jerusar<sub>nk</sub>numia menaintiú kirumitru áinis tíjiuch<sub>i</sub>ti. <sup>19</sup> Tuma asamtai untsuri Israer-shuar Márta<sub>nk</sub>sha Marísha, ni umai jakamta<sub>i</sub> uutkui atsan<sub>nk</sub>krataj tusa weriarmiayi. <sup>20</sup> Márta<sub>nk</sub>sha Jesus tíjiuch<sub>i</sub> ajasun nekáa in<sub>nk</sub>kiuntajtsa wémiayi. Antsu Marikia jeá pujumiayi. <sup>21</sup> Tura Marta Jesusan in<sub>nk</sub>kiun<sub>nk</sub> tímiayi “Uunta, Ame pujakminkia winia umar jákacha<sub>nk</sub>ayi. <sup>22</sup> Tura tuke nékajai ashí Yus seamna nuna súramui.”

<sup>23</sup> Jesussha tímiayi “Ame umaimisha nantaktiatui.”

<sup>24</sup> Márta<sub>nk</sub>sha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

<sup>25</sup> Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui. <sup>26</sup> Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

<sup>27</sup> Niisha “Ee, Uunta, ame Yusa Uchirin<sub>nk</sub>me. Krístuitme, uwemtikkiartin jú nun<sub>nk</sub>kanam tátinia nu” tímiayi.

### *Jesus Rásaru iwiarsamunam taa útmania nu*

<sup>28</sup> Márta<sub>nk</sub>sha nuna ti, ni kai Marin untsuk úukan<sub>nk</sub> tímiayi “Uunt ju<sub>i</sub> taa untsurmawai.”  
<sup>29</sup> Marisha nuna antuk wárik wajaki Jesusa iyuttsa wémiayi. <sup>30</sup> Jesussha péprunam jeatsuk Marta in<sub>nk</sub>kiun<sub>nk</sub>manum pujumiayi. <sup>31</sup> Marí wari wajaki wématai Israer-shuar nu jeanam atsan<sub>nk</sub>krattsa pujuiniasha nuna ísar weriarmiayi. Iwiarsamunam úuttiasa wéatsush tusa weriarmiayi. <sup>32</sup> Marisha Jesus pujamunam jeá tikishmatar tímiayi “Uunta, Ame pujakminkia winia umar jákacha<sub>nk</sub>ayi.”

<sup>33</sup> Jesussha Marinha tura niijia<sub>i</sub> útuncha wáiniak wáitnentaimta asa ti kúntuts pujusmiayi. <sup>34</sup> Tura “Tuj iwiarsamarum” tímiayi.

Niisha “Uunta, iitia” tiarmiayi.

<sup>35</sup> Jesussha útmiayi. <sup>36</sup> Israer-shuarsha “Ti aneatsuk” tiarmiayi. <sup>37</sup> Tura chíkich “Kusuru tsuáruchukait. Nii pujakuisha Rásaru jáka<sub>nk</sub>ampiash” tiarmiayi.

### *Rásaru iniantkimiu*

<sup>38</sup> Jesussha ti kuntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi. <sup>39</sup> Tura Jesus “Kaya jurustarum” tímiayi.

Rásaru umai Marta tímiayi “Uunta, kuaru tsawant jákaiti. Mejeatsuk’ tímiayi.

<sup>40</sup> Tura Jesus tímiayi “Yus enentáimtakme<sub>nk</sub>ka Yusa kakarmari wáinkiattame tíchamkajam.”  
<sup>41</sup> Nuikia kayarin uratiarmatai Jesus nayaimpin iis tímiayi “Aparu, Winia anturtakmin yuminsajme. <sup>42</sup> Winiasha tuke anturtame tura ju<sub>i</sub> shuaran p<sub>nk</sub>er enentáimtikrataj tusan tajai. Ame akuptukuitmena nuna nekarmawarti.” <sup>43</sup> Nuna tinia kakaram untsuak “Rásaru jíinkitia” tímiayi. <sup>44</sup> Nujain<sub>nk</sub>kia penuarmartiuk jiinkimiayi. Yapinmasha ja<sub>nk</sub>anchjia<sub>i</sub> ijiamuyayi. Tura Jesus “Atirtarum. Wéti” tímiayi.

### *Jesusan achiktin chichaman jurusarmiania nu*

*(Mateu 26.1-5; Márkus 14.1-2; Rúkas 22.1-2)*

<sup>45</sup> Untsur<sub>i</sub> Israer-shuar Marin nemariaru Jesus túramun ísar enentáimtusarmiayi. <sup>46</sup> Tura chíkichkia Pariséunam wear Jesus túramun ujakarmiayi. <sup>47</sup> Nuna antukar

Pariséusha Israer-patri úuntrisha ashí naamka uunt armia nujai iruntrar tiarmiayi “¿Warí itiurkamniait? Nu shuarka aentsti tujintiamun ti túratsuk. <sup>48</sup> Aya júnik ini-aiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

<sup>49</sup> Nu uwitin Kaipias Israer-patri uuntriya. Niisha tímiayi “Átumka nékatsrume. <sup>50</sup> ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi. <sup>51</sup> Kaipiaska aya ni enentáimmiajaiñ tichamiayi. Antsu nu uwitin Israer-patri uuntri asamtai Yus nuna enentáimtikramiayi. Nújainkia Israer-shuar Jesus jaruktinian ujakmiayi. <sup>52</sup> Tura aya Israer-shuarnakcha antsu niijiaisha ashí nunkanam Yus-shuar ajarun irurtajtsa jákatniuyi. <sup>53</sup> Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

<sup>54</sup> Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jiinki atsamu nunkanam Eprain pepru tíjiuch wémiayi. Tura nui pujumiayi ni unuiniamurijjai.

<sup>55</sup> Israer-shuara namperi paskua ishichik jatemsamtai untsurí shuar yaja péprunmaya Jerusaréñnum káunkarmiayi. Kame paskua jeatsaiñ Muisais timia núnisañ ni ayashísha enentáisha iwiarnarat tusa wakeriarmiayi. <sup>56</sup> Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi. <sup>57</sup> Pariséusha Israer-patri uuntrisha akupainiak “Jesus pujá nekaamka ujakkata” tiarmiayi. Jesusan sepunam enkeatai tusar tiarmiayi.

## 12

### *Marí Jesusan kunkuinian kuérmiania nu* (Mateu 26.6-13; Márkus 14.3-9)

<sup>1</sup> Paskua jisat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuiñ pujumiayi. <sup>2</sup> Jesus jeamtai ayurawarmiayi. Rásarusha niijjai yurumámiayi. Mártasha yurumkan iwiasmakmiayi. <sup>3</sup> Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijjai japirmiayi. Jeasha nu kunkuinjai ti shiir kunkunmiayi. <sup>4</sup> Jútas Iskariúti, Semunka uchirí, nui pujumiayi. Niisha Jesusa unuiniamurintiat ukunam Jesusan surukmiayi máawarat tusa. Niisha tímiayi <sup>5</sup> “¿Urukamtai nu kunkuinian ti kuitjai surukchama kuítrinchan súsatniun?” <sup>6</sup> Kame kuítrinchan enentáimtak tichamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

<sup>7</sup> Tura Jesus tímiayi “Iniaisata. Wi iwiarnakui kuératniun sumak ikiurtusuiti. <sup>8</sup> Kuítrincha tuke atumjai iruntsuk. Antsu Wikia atumjai tuke pujuschattajai” tímiayi.

### *Rásaruncha máataj tiarmiania nu*

<sup>9</sup> Israer-shuarsha Jesus Petania péprunam pujan antukar Jesus ístaitisar weriarmiayi. Rásaruncha Jesus jakamunmaya iniantkimia nusha iyutai tusar wearmiayi. <sup>10</sup> Túramtai Israer-patri uuntrinikia chichaman jurusarmiayi Rásaru maatai tusar. <sup>11</sup> Untsurí Israer-shuar Rásaru iniantkimia nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

### *Jesus Jerusaréñnum shiir wayamiania nu* (Mateu 21.1-11; Márkus 11.1-11; Rúkas 19.28-40)

<sup>12</sup> Paskua namperan pachiiintuktajtsa ti untsurí shuar Jerusaréñnum wearmiayi. Kashin tsawar Jesus nú péprunam tátinian nekaawarmiayi. <sup>13</sup> Niisha tintiuki nuké áinis nukan júurar Jesusan inkiuntai tusar jíinkarmiayi. Túrawar unsumainiak “Shiir tati, tiarmiayi. Yusa kakarmarijjai winiana nu tí péñkeraiti. Israer-shuara uuntri asa shiir atí” tu unsumiarmiayi. <sup>14</sup> Jesussha umpuurun wáiniak entsamkamai. Núnisañ áarmaiti Yus-Chichamnum:

15 “Seun péprunmaya shuara, ashamkairap. Atumí Akupniuri umpuurunam entsamak winiawai.”

16 Nu chichamaik Jesusa unuiniamuri nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan túrunamiayi.

17 Jesus Rásarun iwiarsamunmaya iniantkimiun wáinkiarua nú shuar nuna áujmatiararmiayi. 18 Tuma asamtai shuar Jesus nu tujintiamun túramtai nekaawar Jesusan inkiunktaj tusar jíinkiararmiayi. 19 Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

### *Kriaku apach Jesusjaj chichastinian wakeriarmiania nu*

20 Paskua nampernum Yus shiir awajsatniun Jerusarénnum weriaruka untsurí nunkanmaya shuar ármiai. Kriaku apachcha ármiai. 21 Niisha Jiripin weantukarmiayi. Kame nu Jiripi Petsaitia péprunmaya uyayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjaj chichastaisar wakeraji” tiarmiayi. 22 Jiripisha Antresan werí ujakmiayi. Nuyá niijjaj métek tsaninkiar Jesusan weriar ujakarmiayi.

23 Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástatjai. 24 Wi tájana nu ti nekasaiti. Jinkiaia ántsanketjai. Araachmaka ninki pujatsuk. Antsu araamka tsapain jinkiaichiri kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui. 25 Shuarsha jinkiaia nuke aya ju nunkanam péker pujustinian enentáimkiunka ántar pujak nekas iwiaakmarin emenkaktatui. Tura ju nunkanam péker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui. 26 Shuar winia átaj takunka nemartusti. Túranka Wi pujajna nu Wíi shuar tuke átatui. Núnisan Wíi shuar winia takatrun takáa nuna winia Aparsha shiir enentáimtustatui’ tímiayi.

### *Jesus ni jákatniun étserui*

27 ‘Yamaikia enentáirui ti itiurchat pujajai. ¿Warittiajak. “Aparu, ju túrunatniunmaya uwentikrurta” titiajash? Antsu ju túrunatniun táwitjai. 28 Aparu, wi túramujaj ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsaitjai tura ataksha shiir awajstattajai” tímiayi.

29 Shuarsha nui pujuinia “ipiamtachuashit” tiarmiayi. Tura chikichcha “Nayaimpinmaya suntar Nin chichasai” tiarmiayi.

30 Jesussha tímiayi “Wi antuktinian chichaschayi antsu átum nekaatarum tusa chichasai. 31 Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. 32 Tura numiniam awajnaintai ashí nunkanmaya nka shuar enentáimturartatui” tímiayi. 33 Juna taku krúsnum jákatniun ujakmiayi.

34 Shuarsha awajjar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnaitniuiti” tame? Aents Ajasuka Krístuchukait, Yus anaikiamu. Núchaitkiuinikia Aents Ajasuka yait?” tiarmiayi.

35 Nuinkia Jesus tímiayi “Wi tsáapninia áintsanketjai. Tsáapnisha atumín aya ishichik tsawantin tsáapniartatui. Tsáapin ana juik wekasatarum kirit ajatsain. Kame kiritniunam wekaana nusha nékatsui itiuranimpia wea. 36 Tsáapnin wáinkieuram nin enentáimtustarum. Túrakrum winia tsáapninruj wekasattarme.” Jesussha nuna ti wémiayi uumak pujustaj tusa.

### *Untsurí Israer-shuar Jesusan enentáimtuscharmiania nu*

<sup>37</sup> Jesus aentsti tujintiamun ti untsurí túramtaisha Nin enentáimtuscharmiayi. <sup>38</sup> Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniaktusuit?” tu áarmaiti.

<sup>39</sup> Nuna uminiak Jesusan enentáimtuscharmiayi. Tura nu arantcha Isayas áarmiai:

<sup>40</sup> “Yus nin kusuru awajsaiti tura ni enentáincha kátsuram awajsaiti. Ni jiiijiai íimsain tusa tura ni enentáijiai nekaawain tusa túrait. Kame ni tunaari iisar enentáimtuiniakui Yus nin tsuáraini” tu áarmaiti.

<sup>41</sup> Isayas yaunchu Jesusan nayaimpiniam ti shiir pujan wáiniak nuna tímiayi.

<sup>42</sup> Tuma ain untsurí Israer-shuarsha tura ni uuntrinmayasha Jesusan nekas enentáimtusarmiai. Tura niisha Pariséun ashamainiak paant tícharmiayi. Israer-shuara iruntairiya jiki awetamaj tusa ashammiarmiayi. <sup>43</sup> Yus shiir enentáimtursati tutsuk antsu shuar shiir enentáimtursati tusar túrawarmiayi.

### *Shuaran sumantikiatniun táchaitjai antsu uwentikratniun táwitjai, timiania nu*

<sup>44</sup> Jesus kakantar untsukum tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. <sup>45</sup> Winia wáitkiusha Winia Aparnasha wáinui. <sup>46</sup> Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai. <sup>47</sup> Shuaran sumantikiatniun táchaitjai antsu uwentikratniun táwitjai. Tuma asantai shuar winia chichamprun antuk umíachkunka sumamaiti. Tura Wikia sumantikiachuitjai. <sup>48</sup> Winia nakitrur chichampruncha enentáimtachuka sumantikiamuiti. Wi timiaj nuka amuukatin tsawantaj nin sumantikiattawai. <sup>49</sup> Wi enentáimmiajain chichaatsjai. Winia Apar akattur akuptukuiti. Tura chichastinia nuna surusuiti. <sup>50</sup> Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asantai winia Apar túrutmia núnisnak tajai” tímiayi Jesus.

## 13

### *Jesus ni unuiniamuri nawen nijiatramiania nu*

<sup>1</sup> Paskua jisat jeatin chikichik tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi. <sup>2</sup> Nu tsawantajsha murikiun yúatin ármiai. Tura yurumáin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiai. <sup>3</sup> Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa <sup>4</sup> chikich yurumuk pujuiniaj wajakmiayi. Tura pushirin ámiak awankéman emenmamamiayi. <sup>5</sup> Nuyá nijiaamatainiam entsan yará ni unuiniamuri nawen nijiatramiai. Tura awankémjai japirmiayi. <sup>6</sup> Semun Pítrunam jeamtai Pítiur tímiayi “Uunta, ¿Winia nawer nijiatraj tamek?”

<sup>7</sup> Jesussha tímiayi “Wi túrajna nu yamá nékatsme tura ukunam nekaattame.”

<sup>8</sup> Tura Pítiur tímiayi “Penké winia nawer nijiarhattame.”

Jesussha tímiayi “Wi nijiaachkuinkia Wijiai tsaninkia pujuschamniaitme.”

<sup>9</sup> Tutai Semun Pítiur tímiayi “Nuinkia, Uunta, aya nawerkechu antsu uwejrusha tura muukarsha nijiatrurta.”

<sup>10</sup> Tura Jesus tímiayi “Yamá mainkia ayashí shiir asantai aya nawenin nijiamártiniaiti. Atumí enentáin ashí péñkeraitrume. Túrasha ashí shuarcha” tímiayi. <sup>11</sup> Kame Jútas Nin suruktinian nekáa “ashí shuarcha” tímiayi.

<sup>12</sup> Jesussha nijiar umik ni pushirin entsarmiayi. Tura atak pujus tímiayi “¿Atumsha Wi túrajna nu nekaarmek? <sup>13</sup> Wi atumí Uuntri asantai nekas “Uunta” túrutrume. Nusha péñkeraiti. <sup>14</sup> Tura Jintinniuítian tura Úuntaitian atumí nawen nijiarhachak. Atumsha núnisrumek nuamtak náwem nijiatnairatarum. <sup>15</sup> Atumin nekapruatsan

túramjai. Atumsha núnisrumek túratarum. <sup>16</sup> Ti nekasen tajai. Takarniuka ni uuntri nan̄kaamaschaiti. Akupkamusha akupea nuna nan̄kaamaschaiti. <sup>17</sup> Nu nekaarum túrakrumka shiir átatrume.

<sup>18</sup> Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijjaj yurumna nu winia nemasur ajasai.”

<sup>19</sup> Nuka túmatsain̄ ujaajrume. Nuyá túrunamtai Yusa Uchiríntjai nusha paant nekaatarme. <sup>20</sup> Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

### *Jesus Jútas Nin suruktinian étserui*

*(Mateu 26.20-25; Márkus 14.17-21; Rúkas 22.21-23)*

<sup>21</sup> Nuna tí, Jesus ni enentáin̄ ti itiurchat enentáimpramiayi. Tura paant tímiayi “Nekas tajai, chikichik̄ juí atumjai pujana nu Winia surutkattawai.”

<sup>22</sup> Tutai ni unuiniamur̄ nuamtak íniaisar “¿Yanak ta?” tiarmiayi. <sup>23</sup> Chikichik̄ unuiniamur̄, Jesus ti aneamu, Niijjaj̄ tsan̄in̄ yurumuk̄ pujumiayi.

<sup>24</sup> Tuma asamtai Semun̄ Pítiur ni uwejéjaj̄ iniakmas “Aniasta, ¿yanak áujmata?” tímiayi.

<sup>25</sup> Tutai Jesusan̄ áyanmatsan̄ aniasmiayi. “¿Yait, Uunta?” tímiayi.

<sup>26</sup> Jesussha ayak̄ “Tantan túumnium̄ ajun̄kan̄ susattaj̄ núiti” tímiayi. Nújain̄ tantan túumnium̄ ajun̄ Semun̄ka uchirín̄ Jútas Iskariútin̄ susamiayi. <sup>27</sup> Tura wárik̄ Jútas tantan achikmatai íwianch̄ ní enentáin̄ wayamiayi. Nuyá Jesus tímiayi “Túrattamna nu wárik̄ túrata.”

<sup>28</sup> Tura ashí nuí yurumainiak̄ pujuarmia nusha wariniak̄ ta tusa nekaacharmiayi.

<sup>29</sup> “Kuítincha kuit̄ súserta” tátsuash tu enentáimprarmiayi. Tura chikichcha “nampernum̄ yurumátin̄ atsumajnia nu sumakta” tátsuash, tu enentáimprarmiayi. Jútas kuítian̄ wáinin̄ asamtai tu enentáimprarmiayi. <sup>30</sup> Jútas tantan yua kashi ajasmanum̄ jíinkimiayi.

### *Yamaram akupkamu*

<sup>31</sup> Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaj̄ Yusa kakarmar̄isha ti paant átatui. <sup>32</sup> Wi Yusa kakarmar̄in̄ paant awajeakui Wissha ní Uchirí asamtai winia kakarmarnasha Yuska wárik̄ paant awajsattawai. <sup>33</sup> Uchichiru, atumjaī ti untsurí tsawant̄ pujuschattajai yamaikia. Wi Israer-shuaran̄ tímiaj̄ nútiksanak̄ atumin̄ tájarne. Atumsha Winia eátkáttarme tura wi wéamunam̄ winishtatrume. <sup>34</sup> Ju yamaram̄ akupeamun̄ amaajai nuamtak̄ mai anenaī ajatarum̄ tusan. Wi atumin̄ aneajrumna núnisrumek̄ atumsha nuamtak̄ mai anenaī ajatniuitrume. <sup>35</sup> Anenaiyakrumniñkia nujaj̄ ashí shuar “Kristu unuiniamur̄í áiniawai” túramartatui.

### *Pítiur Nin natsantratniun Jesus ujakmiania nu*

*(Mateu 26.31-35; Márkus 14.27-31; Rúkas 22.33-34)*

<sup>36</sup> Semun̄ Pítiur Jesusan̄ aniasmiayi “Uunta, ¿tua wéam?”

Jesussha tímiayi “Wi wéajna nuí yamaikia winichminiaitrume. Tura ukunam̄ winitiarne.”

<sup>37</sup> Nuyá Pítiur tímiayi “Uunta, ¿urukamtai yamaikia winichminiaitiaj? Ámin̄ yáintajtsan̄ jakataj̄ tajai.”

<sup>38</sup> Jesussha tímiayi “¿Nekasmek̄ táme? Ti nekas tájame, atash shiniatsain̄ Winia menáintiú natsantrurtatme” tímiayi.

## 14

### *Jesus Yus-jintiaiti*

<sup>1</sup> “Kúntuts̄ pujusairap. Yus enentáimtustarum, Winiasha enentáimtursatarum. <sup>2</sup> Winia Aparuí̄ átum̄ pujustin̄ ti an̄kant̄ awai. Tura nuna iwiarataj̄ tusan Aparuí̄ wéajai, nekasaiti.

Nekaschaitkiuinkia ¿itiurak ujakaajrum? <sup>3</sup> Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan. <sup>4</sup> Wi wéaj nu nékarme tura jintiasha nékarme” tímiayi Jesus.

<sup>5</sup> Tumas tímiayi “Uunta, Ame weam nu nékatsji. ¿Jintiasha itiurak nekaattaj’?”

<sup>6</sup> Jesussha tímiayi “Wi nekas jintiaitjai. Wíjiaínchu wekaana nuka winia Aparuí jeatniun penké tujintiawai. Tura Wissha tuke nekas tiniu asan nekas ana nuna shuáran nékamtikiajai. Wissha shuáran yamaram iwiaakman tuke amuukashtinian súwitjai. <sup>7</sup> Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

<sup>8</sup> Nuinkia Jiripisha tímiayi “Uunta, Apasha wáinkiaraka maak.”

<sup>9</sup> Jesussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiaraka maak” tame? <sup>10</sup> Winia Aparjai tsaninkian pujakun tura winia Aparsha Wijiaí pujakui tuke chikichki-itji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. <sup>11</sup> Nekaatarum. Wissha winia Aparjai tsaninkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinya nu páantchakait. <sup>12</sup> Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuí wéakui nuna nankaamas tujintiamun túrattawai. <sup>13</sup> Ashí Winia enentáimtursarum seatrumna nuna amastatjai. Nújainkia winia Apar shiir awajnastatui. <sup>14</sup> Winia enentáimtursarum seakrumninkia ashí túrattajai’ tímiayi.

### *Jesus Yusa Wakanín akupkattawai*

<sup>15</sup> ‘Atumsha anentkurmeka winia chichamur umiktarum. <sup>16</sup> Tura wéakun winia Aparun chikichan akupturmakti tusan seattajai. Niisha atumjai tuke pujak at-santamprartatui. <sup>17</sup> Nusha Yusa Wakaníinti. Yus-shuaracha Nin nekaachmin ániawai. Tuma asantai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui. <sup>18</sup> Mitiaikia áitkiasnak ikiukchattajrume. Atumíin atak tátatjai. <sup>19</sup> Ishichik tsawant nankaasmatai chikich shuar irunna nu wáitkiachartatui. Tura Wi iwiaaku asantai átumka nu iwiaakmajai pujustatrum. Tuma asarum wáitkiattarme. <sup>20</sup> Tura nu tsawantaj ju nekaattarme. Wissha winia Aparjai tsaninkia pujakur chikichkiitji. Núnisnak Wissha atumjai tsaninkian pujajai. Tura atumsha Wijiaí tsaninkia pujarme. <sup>21</sup> Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wissha nin aneajai tura nekarati tusan iniaktustatjai.” Jesus nuna tímiayi.

<sup>22</sup> Chikich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

<sup>23</sup> Jesus tímiayi “Winia anentuka tájana nuna enentáimtawai. Winia Aparsha nu shuaran aneattawai. Tura Wissha winia Aparnum nu shuarjai tsaninkia pujustatji. <sup>24</sup> Antsu Winia anentchaka tájana nuna enentáimtatsui. Átum ántarmena nú chichamka wániachuiti, antsu Yus Apa Winia akuptukua Núnaiti’ tímiayi.

<sup>25</sup> ‘Atumjai tuke pujakun nuna tájarme. <sup>26</sup> Yus Apa ni Shiir Wakanín atumin yáinmak at-santamprarat tusa akupturmaktatrum. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

<sup>27</sup> ‘Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkanmanka warastin wáinkiashtatrum. Antsu itiurchatnum pujay-atrumkesha Wijiaí imiatkinchanum pujustatrum. Ashamtsuk pujustarum. Itiurchat enentáimprairap. <sup>28</sup> Nuik timiaj nu antukmarme. Aparuí wena atak atumíin tátatjai. Winia Aparka Wijiaí nankaamas úuntaiti. Tuma asantai ti nekas anentkurmeka



“Aparuí wéajai” takui ashí warasaarme. <sup>29</sup> Nuka túmatsain ujaajrume. Túrunamtai nuyá Winia enentáimtursattarme” tímiayi.

<sup>30</sup> Jú nunkanmayan akupin winiakui atumjai núkap chichaschattajai yamaikia. Winiaka nupettukchamniaiti. <sup>31</sup> Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

## 15

### *Numi arakma áintsanketjai*

<sup>1</sup> ‘Winia iwiaakmarun amaakun numi arakma áintsanketjai. Wikia kampuintjai atumsha kanawentrume. Winia Aparsha arakan wáiniua núnisaiti. <sup>2</sup> Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. <sup>3</sup> Wi ujakjarmena nujai puruarmaitrume. <sup>4</sup> Numi kanawesha kampuin áchitkiachkunka niniki nerechamniaiti. Núnisrumek atumsha Winí áchitkiachkurmeka nerechamniaitrume. Wi atumjai áchitkij núnisrumek atumsha Winí tuke áchitkia atarum’ tímiayi.

<sup>5</sup> ‘Wikia kampuintjai atumsha kanawentrume. Kampuinia kanawen áchitkia núnisnak achiakjarme. Tura kanawe ni kampuinin áchitkia núnisrum Winí áchitkia atarum. Túrakrumka núkap nerektatrume. Antsu Wíjiainchuka penker túratin penké tujintiarume. <sup>6</sup> Winí áchitkiachuka ajapam kukartatui. Kanawesha kukarmatai shuar irumkar áesawartatui’ tímiayi.

<sup>7</sup> ‘Tuke Winí áchitkiaiitkurmeka tura winia chichamprusha kajinmattsuk emetarmeka átum wakerarmena nu seakrumin amastatjai. <sup>8</sup> Átum núkap nereakrumninkia ashí shuar “Nekas Jesusa unuiniamurinti” túramartatui tura winia Aparnasha shiir awajsartatui. <sup>9</sup> Winia Apar anenna nútiksanak Wisha atumin aneajrume. Winia aneamur tuke atarum. <sup>10</sup> Winia Aparu akupkamurin umiakun tuke ni aneamurintjai. Núnisrumek winia akupkamur umiakrumka tuke winia aneamur átatrume’ tímiayi.

<sup>11</sup> ‘Wi waraajna áintsarmek warastarum tusan nuna tájarme. Tura ti shiir warastatrume. <sup>12</sup> Wi akupkamu júiti: “Wi aneajrumna nútiksarmek ashí anenaitiarum.” <sup>13</sup> Shuar ni amikrin yáintaj tusa jakaŋka ti anenkartichukait. <sup>14</sup> Wi akupeamu takaakrumka atumsha winia amikruitrume. <sup>15</sup> Takarniuka ni uuntri takaana nuna nékatsui. Tuma asamtai “winia takarniuruitrume” tátsujrume. Antsu ashí winia Apar táman ujaku asan “winia amikruitrume” tájarme. <sup>16</sup> Aya atumí enentáimsamurijain Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum penker túratniuitrume nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui. <sup>17</sup> Júnaka akupeajrume: Nuamtak mai anenai ajatarum’ tímiayi.

### *Yus-shuarcha Jesusnasha Níniuncha nakitiainiawai*

<sup>18</sup> ‘Ju nunkanmaya shuar Winia emka nakitrurar atumniasha nakitramarme. <sup>19</sup> Atumsha ju nunkanmaya shuaraitkiurminkia niiniua nútiksān anenmaintrume. Antsu Wíi shuar ajastarum tusan ju nunkanmaya achikmajrume. Túramtai nekas ju nunkanmayanchuitrume yamaikia. Nu asamtai nu shuar nakitramainiawai. <sup>20</sup> “Takarniuka ni uuntri nankaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. <sup>21</sup> Winia Akuptukun nékachu ásar Winia enentáimturkurmin yajauch awajtamsartatui’ tímiayi.

<sup>22</sup> ‘Wi tana Yus-Chichaman nin ujakchamtainkia tunaanum sumamacharaayi. Antsu ujakma ásar “Nékachkun túraitjai” tíchamin áiniawai. <sup>23</sup> Winia nakitruinia nuka winia

Aparnasha nakitiainiawai. <sup>24</sup> Aents penké túrachman túrachuitkiuin<sup>h</sup>ia tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai. <sup>25</sup> Yaunchu Yus akupkamunam áarmaiti:

“Penké ántar nakitrurarmai.”

Nu chicham uminkiat<sup>i</sup> tusa túrunaiti’ tímiayi.

<sup>26</sup> “Tura atsañtamprattsa yáinmana nuna winia Aparu<sup>h</sup>iyá akuptuktatjarme. Niisha tuke nekas tiniu Wakaniiti. Niisha Yusaj<sup>h</sup>yá taa atumin nekamtikramprattarme.

<sup>27</sup> Atumsha yaunchu Wij<sup>h</sup>ijai pujusu asarum nekamtikiattarme’ tímiayi.

## 16

<sup>1</sup> ‘Átum kanartukaj<sup>h</sup>irum tusan júnaka tájarme. <sup>2</sup> Israer-shuar iruntainiumiá j<sup>h</sup>iiki akuptamkattarme. Nu arantcha mantamainiaksha “Yúsan shiir awajsattsan túrajai” tiártatui. <sup>3</sup> Nu shuar Winiasha tura winia Aparnasha nékach<sup>h</sup>u ásar túrutmawartatui. <sup>4</sup> Núnaka yamá<sup>h</sup>i tájame. Tura túrunamtai “núnisañ átiniaiti” timiaj nu nekaarum itiurchat enentáimprairap’ tímiayi.

### *Yusa Wakaní túrana nu*

‘Atumj<sup>h</sup>ai tuke pujá asan núnaka yaunchu ujakchamajrume. <sup>5</sup> Antsu yamaikia wáketjai winia Akuptukmia nuj<sup>h</sup>ai pujustaj tusan. Tuma á<sup>h</sup>in wéajna nu inintratsrume. <sup>6</sup> Antsu nuna takui ti kuntuts enentáimprarme. <sup>7</sup> Tura Wi wématai atumj<sup>h</sup>ain<sup>h</sup>ia nuna nan<sup>h</sup>kaamas pé<sup>h</sup>ñker átatui. Iis, Wi wéaknaka atumin yainmaktinia nuna akupkattajai tura wéachkuin<sup>h</sup>ia táchattawai. Nuka ti nekasaiti. <sup>8</sup> Yusa Wakaní taa ashí j<sup>h</sup>ú nun<sup>h</sup>kanmayá aentsun j<sup>h</sup>ú menaintiun nekamtikiattawai. Ni tunaari<sup>h</sup> aan nekamtikiattawai. Pé<sup>h</sup>ñker tunaaj<sup>h</sup>ain<sup>h</sup>chu wekasamniana nunasha nekamtikiattawai. Tura Yus tunaanum s<sup>h</sup>úmamtikiamniana nunasha nekamtikiattawai. <sup>9</sup> Winia enentáimturainiachu tunáarintin áiniawai. <sup>10</sup> Winia Aparu<sup>h</sup>i wáketkui wáitkiashtatrume. Tuma asamtai ashí shuar wi pé<sup>h</sup>ñker tunaaj<sup>h</sup>ain<sup>h</sup>chu wekaamun nekaawartatui. <sup>11</sup> Tura j<sup>h</sup>ú nun<sup>h</sup>kanam akupniunka Yus tunaanum s<sup>h</sup>úmamtikia asa shuarnasha s<sup>h</sup>úmamtikiamn<sup>h</sup>iaiti. Nuna paant nekaawartatui’ tímiayi.

<sup>12</sup> ‘Nu arantcha núkap tíntjarme túrasha átumka nekaachaintrume. <sup>13</sup> Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiajai<sup>h</sup> tíchattawai antsu winia Aparu<sup>h</sup>i antukma nuna ujatmaktatui. Ukunam átatna nunasha ujatmaktatui. <sup>14</sup> Ashí Wí<sup>h</sup>nian ujatmak Winia shiir awajtustatui. <sup>15</sup> Ashí winia Apar takakna nusha Wí<sup>h</sup>niaiti. Nu asamtai “ashí Wí<sup>h</sup>nian ujatmaktatui” tajai’ tímiayi.

### *Kúntuts pujuiniayat ukunam warasartatui*

<sup>16</sup> ‘Ishichik pujusrum Winia wáitkiashtatrume. Nuyá ataksha ishichik pujusrum ataksha wáitkiattarme. Wisha winia Aparu<sup>h</sup>i wéajai” tímiayi.

<sup>17</sup> Nuyá ni unuiniamuri<sup>h</sup> nuamtak aniniaisarmiayi “¿J<sup>h</sup>ú chichamsha warimpait? “Ishichik pujusrum wáitkiashtatrume tura ataksha ishichik pujusrum wáitkiattarme tura Aparu<sup>h</sup>i wéajai” tátsuk. <sup>18</sup> “Ishichik pujusrum” tana nusha ¿warimpait? Nii tana nu ántatsji” tiarmiayi.

<sup>19</sup> Jesussha nin aniaistai táman nekáa tímiayi “Ishichik pujusrum wáitkiashtatrume nuyá ataksha ishichik pujusrum wáitkiattarme” tímiajai. ¿Núchakait átum inintrustin wakerarmena nu? <sup>20</sup> Ti nekas tájarme: Átumka kúntuts pujusrum úttiatrume tura Yusshuarcha warásártatui. Tuma a<sup>h</sup>in<sup>h</sup>k<sup>i</sup> átum kúntuts pujayatrume<sup>h</sup> ukunam warasatrume. <sup>21</sup> Iis, nuwásha jurertin tsawant<sup>h</sup> jeamtai najaimiak wáitiatsuk. Tura uchin jurerka ti waraak wáitsamunka enentáimtsui. <sup>22</sup> Atumsha núnisrumek yamaik kúntuts pujarme. Tura atak í<sup>h</sup>tjarum tusan winiakui ti shiir atumí enentáin warasatrume. Nu warastinian jurutramkichminia áiniawai.’

<sup>23</sup> ‘Nu tsawantinkia penké ininsashtatrumé. Ti nekas tájarme Winia enentáimtursarum winia Apar searum nuna ashí amastatui. <sup>24</sup> Yamaisha Winia enentáimtursarum winia Apar seachurme. Seakrumniñkia amastatui ti shiir warasaruk tusa’ tímiayi.

### *Jesus jú nunkanmayan nupetkaiti*

<sup>25</sup> ‘Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujaktatjarme. <sup>26-27</sup> Nu tsawantaj átumka Winia enentáimtursarum winia Apar seattarme. Winia Aparsha atumin anea asamtai Wi Nin áuj satin atsumashtatrumé. Winia anentu asarum tura winia Aparuýya taman enentáimtakrumin Niisha anenmawai. <sup>28</sup> Winia Aparuýya jíinkin jú nunkanam táwitjai. Yamaikia jú nunkanmaya jíinkin ataksha Aparuí wáketjai” tímiayi.

<sup>29</sup> Nuyá ni unuiniamurj tiarmiayi “Yamaikia métek-taku chichamjainchu chichaame. <sup>30</sup> Mash nékaitme. Shuar Ámin ininmatsain péñker áimkiatin nékame. Nu nekaar Ame nekas Yúsnumiáitme tu enentáimtaji” tiarmiayi.

<sup>31</sup> Tura Jesus tímiayi “¿Nekasash enentáimtarum? <sup>32</sup> Ti warik átumka ashamkarum niisháa tsakinmaktatrumé tura Winiak ikiurkittiarne. Antsu winia Apar pujakui Wiki pujatsjai. <sup>33</sup> Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

## 17

### *Jesus ni unuiniamurjín Yúsan áujtawai*

<sup>1</sup> Nuna tj Jesus nayaimpinmaaní íimias tímiayi “Aparu, yamáí jeayi ame Uchiram shiir awajsatin. Núnisan ame Uchirmisha péñker awajtamsattawai. <sup>2</sup> Ashí shuara Akupniurj najataitme. Nujainkia Winia surusumna nú shuaran yamaram iwiaakman tuke amuukashtinian súsaitjai. <sup>3</sup> Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.’

<sup>4</sup> ‘Ashí túratniun akuptukmamna nuna amukuitjai. Túran ju nunkanam shiir awajsaitjame. <sup>5</sup> Nuna túramtai, Aparu, ti yaunchu jú nunka atsaisha Ámijjai pujakui shiir awajtusmamna núnismek yamaisha shiir awajtusta.’

<sup>6</sup> ‘Ashí jú nunkanmaya surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti. <sup>7</sup> Ashí Wi takaajna nu Amek surusuitme. Niisha nuna nékainiawai. <sup>8</sup> Ame chichamem surusmam nuna ujakam niisha umirtámkaruiti. Ame akuptukakmin Amjiniya táwitjai. Nu nekasaiti tu enentáimtuiniawai.’

<sup>9</sup> ‘Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme. <sup>10</sup> Ashí Winia ainia nuka Áminiuíti. Tura ashí Áminiu ainia nuka Winia áiniawai. Winia péñkerusha ni túramunam paant awajsaiti.’

<sup>11</sup> ‘Wikia yamaikia jú nunkanam pujuschattajai. Tura nu shuarka juí pujuartatui. Antsu Ámijjai pujustajtsan winiakui ashí surusumna nuka, Aparu, ti shiir asam ame kakarmarmijjai wáinkiaata. Wisha Ámijjai chikichik ájinia núnisan niisha ashí iruntrar chikichik ajasarti. <sup>12</sup> Juí niijjai pujakun ame kakarmarmijjai ti péñker wáinkiamjai. Antsu Yus-Chichamnum aarma uminkiatu tusa aya chikichik menkakaiti. Niisha tuke emesnartinia núiti.’

<sup>13</sup> ‘Yamaikia Amjini winiajai. Tura juí tuke pujakun juna tájame. Niisha Wi waraajna núnisar ti shiir warasarat tusan tajai. <sup>14</sup> Wi jú nunkanmayanchuitjai. Niisha núnisan jú nunkanmayanchu áiniawai. Tuma asamtai ame chichammin Wi susamtai

jú nuṅkanmaya shuarka nin nakitiainiawai. <sup>15</sup> Jú nuṅkanmaya jíiki tusan seatsjame. Antsu íwianch nin nupetkain tusan seajme. <sup>16</sup> Wi juyanchuitiaj áintsan niisha juyanchu áiniawai. <sup>17</sup> Ame chichammin ti nekasa nuna ántuiniakui péñker awajsata. <sup>18</sup> Juyá shuarnum akuptukmam áintsan Wisha nin chíkich shuarnum akupeajai. <sup>19</sup> Aya Áminiunak takastaj tusan enentáimtimjai. Túra asamtai niisha aya Áminiunak takastinian enentáimpratin áiniawai' áujtak tímiayi.

<sup>20</sup> 'Aya níiniunkeka seatsjame antsu ashí ni chichamen antukar Winia enentáimtursartatna nusha ame yáin kiarta tusan seajme. <sup>21</sup> Ashí niisha chikichiniak enentáimtusarti tusan seajme. Wisha Amesha, Aparu, chikichik ájinia núnisan niisha Iijai iruntrar chikichik ajastai tusar seajme. Wíi shuar chikichik najanata tusan seajme. Nuyá jú nuṅkanmaya shuar akuptukuitmena nuna nekaawartatui. <sup>22</sup> Ame shiir awajtursamna núnisnak Wisha nin shiir awajsaitjai. Iikia chikichik ájinia núnisan niisha chikichik ajasarti tusan túraitjai. <sup>23</sup> Wi ni enentáin pujakui Amesha Winin pujakmin penké chikichik ajasarti. Túramtai ashí shuar júna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.'

<sup>24</sup> 'Aparu, shuar surusmam nu, Wi pujustajana nuí pujusarti tusan seajme. Tura ti shiir awajtusmamna nuna ísarti tusan nuna seajme. Jú nuṅka najanchamunman tuke anentin asam ti shiir awajtusuitme. <sup>25</sup> Aparu, ti péñker áminin jú nuṅkanmaya shuar nekarmainiatsui. Antsu Wi nékajme. Jú shuarsha ame akuptukman nékainiawai. <sup>26</sup> Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui" áujtak tímiayi Jesus.

## 18

### *Suntar Jesusan achikiarmiania nu*

*(Mateu 26.47-56; Márkus 14.43-50; Rúkas 22.47-53)*

<sup>1</sup> Jesussha nuna tinia amuk ni unuiniamurijjai Setrun entsá katiñ numi arakmanum wémiayi. <sup>2</sup> Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijjai nuí iruntramtai Jútas Jesusan nuí wáinkiatniun enentáimpramiayi. <sup>3</sup> Tura untsurí suntarjajisha Jesusan tariarmiayi. Pariséusha Israer-shuar Patri uuntrisha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi. <sup>4</sup> Jesussha ashí átinia nuna neka asa jiintiuki "¿Ya eaarum?" tímiayi.

<sup>5</sup> Niisha "Nasarénumia Jesus" tiarmiayi.

Jesussha "Wiitjai" tímiayi.

Jútassha Jesusan surukua nu niijjai pujuarmiayi. <sup>6</sup> Tura Jesus "Wiitjai" takui ti ashamkar úkumur waketainiak iniaararmiayi.

<sup>7</sup> Ataksha Jesus "¿Ya eaarum?" tímiayi.

Niisha "Nasarénumia Jesus" tiarmiayi.

<sup>8</sup> Nuinikia Jesus tímiayi "Wiitjai, tájarme. Winia eatkurmeka Wíi shuar ainia júka waketkiarti" tímiayi. <sup>9</sup> Jesus nuik aujuk "Winia Apar surusma nu menkakacharai" timia nu uminkiat tusa Jesus "waketkiarti" tímiayi. <sup>10</sup> Nuyá Semun Pítiur machitian jusa Marku kuishin untsuurnumaani tsupirkamiayi. Markusha Israer-patri uuntri takarniuriyayi. <sup>11</sup> Túramtai Jesus Pítrun tímiayi "Machitrumka awainki ikiusta. Winia Apar wáitsatniun surakuinikia ¿wáitsashtinkaitiaj?"

### *Israer-patri úuntriniam júkiarmiania nu*

*(Mateu 26.57-58; Márkus 14.53-54; Rúkas 22.54)*

<sup>12</sup> Nuin<sub>ki</sub> apach suntarsha ni kapitián<sub>tr</sub>isha Yusa Jeen wainniusha Jesusan achikiar jin<sub>ki</sub>warmiayi. <sup>13</sup> Nuyá Anasa jeen júkiarmiayi. Anassa Kaipiasa weariyayi. Tura Kaipias nu uwitin Israer-patri uuntri<sub>y</sub>ayi. <sup>14</sup> Kaipiasa nuik “¿Ashí Israer-shuar mesertin pen<sub>ker</sub>kait. Antsu aya chikichik shuar jákatin pen<sub>ker</sub>chakait?” timia núiti.

*Pítiur Jesusan natsantramiania nu*

*(Mateu 26.69-70; Márkus 14.66-68; Rúkas 22.55-57)*

<sup>15</sup> Semun<sub>u</sub> Pítiur chikich unuiniamujai Jesusa uku weriarmiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi. <sup>16</sup> Tura Pítiur aa wáitiniam wajaamiayi. Túramtai chikich unuiniamu jiinki wáitin wáinia nú nuwajai chichas Pítrun awayamiayi. Nuí nékanu asa yúpichuch awayamiayi. <sup>17</sup> Waiti wáinniusha Pítrun aniasmiai “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi. <sup>18</sup> Tsetsek asamtai suntarsha tura nuí takarniusha jinia ikiapárar ni nawen anaak pujuarmiayi. Pítrusha nuí pachiiniak anamuk pujumiayi.

*Kaipias Jesusan aniasmiania nu*

*(Mateu 26.59-66; Márkus 14.55-64; Rúkas 22.66-71)*

<sup>19</sup> Israer-patri uuntri Jesusan aniasmiai “Ame unuiniamurmesha ¿ya ainia. Tura warí nin jintintiaitiam?”

<sup>20</sup> Jesussha tímiayi “Ashí íimiainia<sub>in</sub> tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuí arantutsuk tuke etserkaitjai. <sup>21</sup> ¿Urukamtai Winia inintiam? Winia chichamprun antukua nu aniastarum. Wi timian nii ujatmakarti. Wi timiancha niisha nékainiatsuk.”

<sup>22</sup> Jesus nuna takui Yusa Jeen wáiniua nu nuí pujá Jesusan yapiniam awati tímiayi “¿Núnisa<sub>n</sub> nekas úuntnum chichastinkait?”

<sup>23</sup> Jesussha tímiayi “¿Warinmampa yajauch aa? Turuttia. Tura tájana nu pen<sub>ker</sub>eraitkiuin<sub>ki</sub>a ¿urukamtai awattiniam?” <sup>24</sup> Nuyá Anas Jesusan jinkia Kaipias takaamunam akupkamiayi Kaipias Patri uuntri asamtai.

*Pítiur ataksha Jesusan natsantramiania nu*

*(Mateu 26.71-75; Márkus 14.69-72; Rúkas 22.58-62)*

<sup>25</sup> Tuke Anasa jeen chichainiai Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

<sup>26</sup> Chikich takarin, Marku shuari, nuí pujumiayi. Pítiur Marku kuíshin tsupirkamia nuna shuari asa tímiayi “¿Ajanam Jesusjai wekaamin wáinkiachmakajam?”

<sup>27</sup> Pítrusha ataksha “atsá” tai<sub>n</sub> atash shiniukmiayi.

*Piratu Jesusan aniasmiania nu*

*(Mateu 27.1-2, 11-14; Márkus 15.1-5; Rúkas 23.1-5)*

<sup>28</sup> Nuyá Kaipiasaiya Jesusan júkiar tsawant tsawaamunam apach kapitián Piratu takatai jeenam ejeniarmiayi. Israer-shuarsha ni uuntri akupkama nunisar wapik ajasaj tusar nu jeenam wayacharmiayi. Wayawarka paskua nampernum yurumáchmin ármiai. <sup>29</sup> Nu asamtai Piratu niijiai chichastaj tusa jiinki tímiayi “¿Jú áishmansha warí tunáa túrait?”

<sup>30</sup> Niisha “Tunaarinchaitkiuin<sub>ki</sub>a am<sub>i</sub>ini itiachaaji” tiarmiayi.

<sup>31</sup> Tutai Piratu tímiayi “Atumek júkirum atumí akuptammarijiai ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” <sup>32</sup> Yaunchu Jesus ni jákatniur<sub>in</sub> enentáimtus “Wi awajnaitniuitjai” tímiayi. Niisha krúsnum awajnain asamtai apach máataijiai Nii timia nu uminkiamiayi.

<sup>33</sup> Piratusha atak jeá wayá Jesusan untsuk “¿Ámeke Israera Uunt Akupniurinkaitiam?” tímiayi.

<sup>34</sup> Jesussha tímiayi “¿Amekek nu inintram. Kame chíkich túramainiatsuash?”

<sup>35</sup> Piratusha tímiayi “¿Wi Israer-shuarkaitiaj? Ameer shuarak Israer-patri uuntriijai winin itiarmarai. ¿Warí tunáa túraitiam?”

<sup>36</sup> Nuinkia Jesus tímiayi “Wi jú nuñkanam akupniuchuitjai. Juyaitkiuinikia Winia nemartuiniana nu máanaikiaraayi. Túrawarmatai Israer-shuarnum surutkacharaayi. Antsu juyan akupniuchuitjai.”

<sup>37</sup> Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nuñkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

<sup>38</sup> Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu  
(Mateu 27.15-31; Márkus 15.6-20; Rúkas 23.13-25)*

Piratusha nuna ti, atak Israer-shuarjai chichastajtsa jiinki tímiayi “Jú aishmanka tunaarín penké wáittsujai. <sup>39</sup> Tura ashí uwitin paskua nampernum sepunmaya shuar ankant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurín ankant akupkattajak?” tímiayi.

<sup>40</sup> Nuinkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

## 19

<sup>1</sup> Nuyá Piratu suntaran akupkamiayi Jesusan asutiáwarat tusa. <sup>2</sup> Suntarsha Jesusan wishikrar tawasap janke najanamun etsenkrumtikiarmiayi. Yamakai pushincha uunt akupniua áintsan áentsrarmiayi. <sup>3</sup> Nuyá “Israera Uuntria, kakaram ajasta” tiar yapiniam awatiarmiayi. <sup>4</sup> Nuyá Piratu atak jiinki tímiayi “Átum wáinkiarum nekaatarum tusan Jesusan jíiktatjai. Wikia tunaarinkia penké wáittsujai.” <sup>5</sup> Tímiatai Jesussha janke etsenkroku tura pushin yamakairman entsaru jíinkimiayi. Tura Piratu nuí káunkarun tiarmiayi “Pai juíti, íistarum.”

<sup>6</sup> Israer-patri uuntriisha suntarsha Jesusan íisar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarín penké wáittsujai” tímiayi.

<sup>7</sup> Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nuí núniskete” tiarmiayi. <sup>8</sup> Nuna antuk Piratusha nu nankaamas ashankamiayi. <sup>9</sup> Ataksha init wayá Jesusan aniasmiai “¿Tuyampaitiam?” Tura Jesussha penké áikchamiayi. <sup>10</sup> Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

<sup>11</sup> Tutai Jesussha tímiayi “Yus nuna amaschaitkiuinikia penké tujinkiaintme. Nu asamtai amiin surutka nu ámin nankaamas tunaarinniuiti.”

<sup>12</sup> Piratusha nú chichamtaik Jesusan ankant akupkattsa wakerimiayi. Antsu Israer-shuar untsumainiak tiarmiayi “Ju ankant iníakmeke ame úunt akupniui amikrínchuitme. Juka “úunt akupniuitjai” taku atumí uunt akupniurí nemasrinti” tu untsumkarmiayi.

<sup>13</sup> Piratusha taman antuk akupin pujutainium pujus Jesusan untsukmiayi. Nuí kaya ukatkamu asamtai Israer-shuara chichamen Kapata anaikiarmiayi. <sup>14</sup> Paskua jisat jeatsain nantu tutupin ajatsain Piratu Israer-shuaran tímiayi “Uunt akupniuram íistarum.”

<sup>15</sup> Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurín krúsnum máattajak?” tímiayi.

Tura Israer-patri uuntri tiarmiayi “Atumí uunt kapitiántrumek in akuptamji. Chíkichka atsawai.”

<sup>16</sup> Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

*Jesusan krúsnum máawarmiania nu*

*(Mateu 27.32-34; Márkus 15.21-32; Rúkas 23.26-43)*

<sup>17</sup> Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai. <sup>18</sup> Nui krúsnum ajintrurar awajainiarmiayi. Tura mai pae jimiara shuaran chikichik chikichik awajainiarmiayi. Tura Jesus ajapén ámiayi. <sup>19</sup> Piratusha Jesusa krúsrin uunt áarman anujkamiayi. *NASARETNUMIA JESUS, ISRAERA UUNT AKUPNIURI*

Tu áarmauyayi. <sup>20</sup> Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tíjiuch asamtai Israer-shuar ti untsurí áujiarmiayi. <sup>21</sup> Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

<sup>22</sup> Tura Piratu nincha áikiar “Wi áaraj nuke átatui” tímiayi.

<sup>23</sup> Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jáaktinian nakitrarmiayi. Kame yakíya nunkaaní apaiyiachma takamtsukuyi. <sup>24</sup> Tuma asamtai suntar tiarmiayi “Juka jáakchatai. Antsu nakurakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

<sup>25</sup> Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi. <sup>26</sup> Jesus ni nukuríncha tura ni ti aneamu unuiniamuríncha nui wajan wáiniak ni nukurín tímiayi “Nukuru, ju ame uchirmea áintsan atí.” <sup>27</sup> Nuyá ni unuiniamuríncha tímiayi “Ju ame nukua áintsan atí.” Nu tsawantaik nu unuiniamuri ni jeen júki awayámiayi.

*Jesusa jakamuri*

*(Mateu 27.45-56; Márkus 15.33-41; Rúkas 23.44-49)*

<sup>28</sup> Nuyá ashí uminkiamtai Jesus nuna nekáa yaunchu Yus-Papinium aarma uminkiat tusa “kitiamajai” tímiayi. <sup>29</sup> Nui sha pininnum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi. <sup>30</sup> Jesussha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

*Suntar Jesusan paenam nanjijai ijiumiania nu*

<sup>31</sup> Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nui paant ain tusa nakitrarmiayi. Nu asamtai Piratun seainiak “Krúsnum ajintrurma ainia nuna kankejain suntar kupirkarti. Nuyá wari jákarmatai krúsnumia júkiarti” tiarmiayi. <sup>32</sup> Nuyá suntarsha weriar emka krúsnum amia nuna kankejain kupirkarmiayi. Nuyá chikichnasha Jesusjai atsankiar ajintrurma nuna kankejaincha kupirkarmiayi. <sup>33</sup> Tura Jesusan weantuk yaunchu jákai tusa kankejain kupirtsuk <sup>34</sup> suntar aya paenam ijiumiayi. Ijiumtaisha nu chichamtaik numpa yumijjai puarmiayi. <sup>35</sup> Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai. <sup>36</sup> Yaunchu Yus-Chichamnum aarma uminkiat tusa túrunaiti:

“Ni ukunchin kupirkachartatui” tu áarmaiti.

<sup>37</sup> Tura chikichcha:

“Ijiuarmiania nuna wáinkiertatui” tu áarmaiti.

*Jesus iwiarsamu amiania nu**(Mateu 27.57-61; Márkus 15.42-47; Rúkas 23.50-56)*

<sup>38</sup> Nuyá Arimatéanmaya Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi. <sup>39</sup> Nikiutémusha Jesusjai chichastaj tusa kashi tarimia nu jimiará kunkuin pachimpramun ti nukap sumak itiamiayi. Mira kunkuinniasha aruí kunkuinniasha sumakmiayi. <sup>40</sup> Nuyá Jusé Nikiutémujai Jesusa ayashín júkiar kunkuinian kuérar jaanch esarmajai penuararmiayi. Israer-shuar tuke nunisar ikiúu ármiai. <sup>41</sup> Jesus krúsnum maamua nuí aja tíjiuch ámiayi. Nu ajanmasha waa náinnium paka taurma ámiayi. Nusha yama taurma asamtai jaka nuí ikiuschamuyayi. <sup>42</sup> Nu waaasha tíjiuch asamtai tura Israer-shuara ayampratin tsawantri jeatemantai Jesusa ayashín nuí iwiarsarmiayi.

**20***Jesus nantakmiania nu**(Mateu 28.1-10; Márkus 16.1-8; Rúkas 24.1-12)*

<sup>1</sup> Tumintincha káshik kirit ain Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjai waaan atutkarmiayi. Tura Marí nuí jeá nu kaya uraimiun wáinkiamiayi. <sup>2</sup> Nuna wáiniak Semun Pítiur pujamunam tsékenki wémiayi. Chíkich unuiniamurí Jesus ti anemia nusha nuísha pujumiayi. Tura Marí tímiayi “Iwiarsamunmaya ii Úuntrin júkiarai. Tura ¿tuíntsuk ikiusara?” <sup>3</sup> Pítrusha chíkich unuiniamuríjiai jíinkiar iwiarsamunam iyuwarmiayi. <sup>4</sup> Mai métek tsékenkiar Pítiur jeatsain chíkich unuiniamurí iwiarsamunam emka jeamiayi. <sup>5</sup> Niisha wayatsuk tsuntsumá iis penuarmarinikia nuí tepan wáinkiamiayi. <sup>6</sup> Nuyá Semun Pítiur ukunam jeá iwiarsamunam wayá penuarmari nuí tepan wáinkiamiayi. <sup>7</sup> Chíkich jaanchcha Jesusa muuken penuarma nusha nanerma niishaa tepan wáinkiamiayi. <sup>8</sup> Nuyá chíkich unuiniamurí emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi. <sup>9</sup> Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiayi. <sup>10</sup> Nuyá mai ni jeen wakеткиarmiayi.

*Máktaranmaya Marincha Jesus wantintiukmiania nu**(Márkus 16.9-11)*

<sup>11</sup> Tura Marikia iwiarsamunam juak úutu pujumiayi. Niisha úutiatañ tsuntsumá iwiarsamunam ímsamiayi. <sup>12</sup> Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chíkichik múuknumaaní tura chíkichka nawenmaaní pujumiayi. <sup>13</sup> Nayaimpinmaya suntarsha “¿Urukamtai úutam?” tiarmiayi.

Marísha tímiayi “Winia Úuntrin jurutkiarai tura ¿tuíntsuk ikiusara?” <sup>14</sup> Nuna tí ayanmar Jesusan wáiniak Nin nekaachmiayi.

<sup>15</sup> Jesus aniak “¿Urukamtai úutam. Ya eeam?” tímiayi.

Marisha ajan wáinnua nuiti tusa tímiayi “Uunta, ame ni ayashí jukimkia, tui ikiusmam ujakkata wi jurumkitiaj” tímiayi.

<sup>16</sup> Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

<sup>17</sup> Jesussha tímiayi “Emetruawaip. Winia Aparuí wáatsjai. Antsu weme Wíi shuar titiá “Winia Aparuí nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

<sup>18</sup> Nuyá Máktaranmaya Marisha Jesusa unuiniamurín wáiniak “Wi Úuntan wáinkiajai, tímiayi. Niisha juna mash túrutui” tu ujakarmiayi.

*Jesus ni unuiniamurín wantintiukmiania nu**(Mateu 28.16-20; Márkus 16.14-18; Rúkas 24.36-49)*



<sup>19</sup> Nu tsawantaj, tumintin, ni unuiniamurij Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiiir pujustarum” tímiayi. <sup>20</sup> Nuna ti, nuyá ni uwejeñ ajintruamuncha ni paen ijjiumuncha iniakmasmiayi. Ni unuiniamurisha Úuntrin wáinkiar shiir warasarmiayi. <sup>21</sup> Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. <sup>22</sup> Nuyá ni matsatmanumaani umpuú tímiayi “Yusa Shiir Wakaní atumí enentáin wayati. <sup>23</sup> Shuara tunaarinkia átum “asakártí” tákurminkia tsankurnartatui. Tura nu shuar “sumamati” tákurminkia tuke sumama pujawai” tímiayi Jesus.

### *Tumas Jesus nantakniun wáinkiamiania nu*

<sup>24</sup> Tura chikichik unuiniamu, Jímiampramu Tumas, Jesus tamia nuj pujuarmiayi. <sup>25</sup> Tura ukunam chikich unuiniamurij ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamurij wáinkian uwejrur awaintiuatniuitjai. Tura paenumsha awaintiuatniuitjai. Penké jaka asamtai aya nujai iniantkimium enentáimtustatjai” tímiayi.

<sup>26</sup> Chikich tumintin ataksha Jesusa unuiniamurij iruntrarmiayi. Nuinkia Tumassha niijjai pujuarmiayi. Tura waiti epenmianuman Jesus wayá ajapén wajas “Shiir pujustarum” tímiayi. <sup>27</sup> Nuyá Tumasán tímiayi “Winia uwejur ísam ame uwejem awaintiuata. Núnismek winia paerui uwejem awaintiuam ístá. Tura arantutsuk nekas enentáimtursata.”

<sup>28</sup> Nuyá Tumas “Winia Úuntruá, nekas winia Yúsruitme” tímiayi.

<sup>29</sup> Jesussha tímiayi “Winia wáitkiam nuin enentáimtursame. Antsu Winia wáittsuk enentáimturaru nekas shiir áiniawai” tímiayi.

### *Shuar Yusa Uchirín enentáimtusarti tusa ju papí áarmaiti*

<sup>30</sup> Aentsti tujintiamuncha Jesus túramu ti untsurij ju papinium áarchamu áiniawai. Tura ni unuiniamurij mash wáinkiarmai. <sup>31</sup> Antsu Jesuska Kristu asa Yusa Uchirinti tu enentáimtustarum tusan júnaka áarmajai. Tura enentáimtakmin Jesus ni iwiaakmarin yamarma nuna amastatui.

## 21

### *Entsá yantannum Jesus siati (7) unuiniamurin wantintiukmiania nu*

<sup>1</sup> Tipirias antumianka káanmatkarin Jesus ni unuiniamurin wantintiukmiayi. Júnisan ámiayi. <sup>2</sup> Semun Pítrusha Jímiampramu Tumassha Kananmaya Natanaérsha Sepetéu uchirisha tura chikich jímia unuiniamurisha métek iruntrar pujuarmiayi. <sup>3</sup> Semun Pítrusha “Namakan nekajai nankiattsan wéajai” tímiayi.

Chikich mash “Tisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. <sup>4</sup> Káshik ain Jesus entsá káanmatkarin wantinkiamiayi tura ni unuiniamurisha Jesusan nekaacharmiayi.

<sup>5</sup> Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

<sup>6</sup> Tutai Jesus tímiayi “Neka untsuurnumaani ajunkatarum. Nu achiktatrume.”

Nii timia núnisan túrawar namakan ti achikiar nekan júsatniun tujinkiararmiayi.

<sup>7</sup> Nújainkia Jesusa unuiniamurij Jesus ti aneemia nu Pítrun tímiayi “Ii Úuntrinti.” Takui Pítrusha áimiaku asa ni pushirin entsar entsá inianmiayi yukuak jeataj tusa. <sup>8</sup> Chikich unuiniamurisha jeachat pujuiniachuk nekan japiki kanujai káanmatkanam jeawarmiayi. <sup>9</sup> Káanmatkanam jeawar ji kaiir ámanum namakan jiámun wáinkiararmiayi. Tantanha wáinkiararmiayi. <sup>10</sup> Jesussha “Átum achikiurmena nuyá jiátin itiatarum” tímiayi. <sup>11</sup> Tutai

Semuñ Pítiur kanunam we nekan nekartiuk káanmatak japiki itiamiayi. Itiar namak-nasha siañtu señkuenta nuyá tres (153) nekapmararmiayi. Ti untsurí áyat nekasha jáankachmiayi. <sup>12</sup> Nuyá Jesussha “Yurumáitiarum” tímiayi. Ni unuiniamurísha “aya ii Untrí áminiaiti” tusar inintrustinian natsantiarmiayi. <sup>13</sup> Nuyá Jesus wajaki tantan jukí súsararmiayi. Núnisañ namaknasha súsararmiayi.

<sup>14</sup> Jesus jakamunmaya nantaki jujai menaintiu ni unuiniamurín wantintiukarmiayi.

#### *Jesus Semuñ Pítrujai chichasmiania nu*

<sup>15</sup> Nuyá yurumáwar Jesus Semuñ Pítrun aniasmiayi “Junasa uchirí Semuñka, ¿ju shuar nankaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesussha “Nuiñkia winia murikiur ayuratniua áintsam Winia enentáimturainia nu yaintá” tímiayi. <sup>16</sup> Ataksha aniasmiayi “Junasa uchirí Semuñka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. <sup>17</sup> Nú ataksha aniasmiayi “Junasa uchirí Semuñka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. <sup>18</sup> Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakin chíkich aentstampattawai tura ame wétin nakitiam nu juramkiartatui.”

<sup>19</sup> Jesus nújainkia Pítiur máatniun ujakmiayi. Tura núnisañ jakamtai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

#### *Juan túrunatniun Pítiur Jesusan aniasmiania nu*

<sup>20</sup> Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. <sup>21</sup> Nincha Pítiur wáiniak Jesusan aniasmiayi “Uunta, ¿jusha warí urukatniuit?”

<sup>22</sup> Jesussha ayak “Wi wakeraknaka iwiaaku pujain tátatjai tímianiaitjai. Nuna tákuisha ¿warí itiurtama? Ámeka nemartusta” tímiayi. <sup>23</sup> Nújainkia “Nu unuiniamurí jákashtatui’ tusa Yus-shuarnum áujmatiararmiayi. Túrasha Jesus “jákashtatui’ tíchamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. <sup>24</sup> Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisarañ tuíniawai.

<sup>25</sup> Nu arantcha juí áarchamusha ti awai. Kame ashí áamka ti untsurí papí asa ashí nunkanam ikiuschamnia ainti. Nuke atí.

## Jesusa Akatramurí Yusa Wakaníjjai TÚRAMU

### *Yusa Wakanín nákasarmiania nu*

<sup>1</sup> Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuiti-ampramiaj nunasha áatramiajme. Yámankamtaiknumia, <sup>2</sup> nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakaní kakarmarijjai túratniua nuna ni akatramurín jintintiawarmiayi. <sup>3</sup> Tura jaka nantaki, Jesus tímiajaik wantintiukmiayi ni akatramurín. Tura kuarenta (40) tsawant nin wantintiukarmiayi. Nuna tura nekas iwiaakjai tusa iniakmasmiayi, nekaawarat tusa. Tura Yusa akupea-murí urukukit nuna mash ujakmiayi.

<sup>4</sup> Jesuska ni akatramuríjjai tuke pujus, nin chicharuk “Jerusarénumia wéerap, tímiayi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiayi. <sup>5</sup> Tuke enentáimsatarum. Juan entsajai atumí ayashin imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantin áintsankete” tímiayi.

### *Jesus nayaimpiniam wakamiania nu*

<sup>6</sup> Tura Jesusjai irunar matsamas anintrarmiayi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiayi. <sup>7</sup> Jesus áimiuk tímiayi “Winia Apar túrattana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmarijjain túrattawai. <sup>8</sup> Tura atumsha Yusa Wakaní kakarmarín sunastatrume. Nii taa enkemprutmamtaí kakaram ajasrum, Wíi túramu etserkattarme. Emka juí Jerusarénum péprunam etserkattarme. Nuyá ashí Jútía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiayi Jesus.

<sup>9</sup> Nuyá chichas amir, ashí ni akatramurí ii wajainiaj, Jesus nayaimpinmaani junakmiayi. Wéa-wéakui yurankim mash Nin amuámiayi. Tuma asamtaí ni akatramurí Nin wáinkiacharmiaj. <sup>10</sup> Tura Jesus waakkui ni akatramurísha yakí ii wajainiaj, jimiara áishman puju entsaru nuí wantintiukarmiayi. Tura ayamach wajattsarmiayi. <sup>11</sup> Nu áishmansha Jesusa akatramurín tiarmiayi “Kariréanmaya áishmanka, ¿urukamtaí nayaimpinmaani imiá ímprum? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiayi.

### *Matíasan anaikiarmiania nu*

<sup>12</sup> Tuasua amikmataí Jesusa akatramurí Uriwiu náinniumia akaikiar Jerusarénum waketkiarmiayi. Uriwiu naincha Jerusarénumsha tíjiuchiiti, chikichík kirumitrua núnisan. <sup>13</sup> Tura Jerusarénum jeawarmiayi. Nuí jeawar, jeá wayawar yakí wákararmiayi. Nuí Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachí Jútassha, tímian wayawarmiayi. <sup>14</sup> Jusha mash tuke iruniarmiayi Jesusa yachíjjai. Tura Jesusa nukurí Marijjai, nuyá chíkích nuwajaisha tuke iruniarmiayi, Yus áujsatai tusar. <sup>15</sup> Nuí siántu painti (120) aents iruntrarmia nuí Pítiur chichastaj tusa wajakmiayi.

<sup>16</sup> Pítiur juna tímiayi “Yatsurtírmesha, umarutírmesha antuktarum. Yuska yaunchu ni Papiriin Jutasnan áamtikramiaj. Jútas akiintsain Tawitkia, Yusa Wakaní jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmarí Yus-Chicham asa tímianak uminkiatniuyi. <sup>17</sup> Nú Jutaska ii írutramuitiat, ii takaamurín páchitkiaitiat, <sup>18</sup> tunáa tura nujai kuítian achik nunkan sumakmiayi. Tura

piniakum iniaaṅ tantane páttimiayi. <sup>19</sup> Tuma asamtai ashí Jerusaréṅnum pujuarmia nu, nuna nekaawar nú nunṅkan “Numpa Nunṅka” anaikiarmiayi. <sup>20</sup> Kame Sarmu papinium Tawitkia juṅa áarchamkia:

“Ni jeesha itiarak atí.

Nu jeaṅmaṅka penṅké pujuschartí.” Tura

“Ni takatrí chíkich atankiti.”

Tu aarmaití’ tímiayi.

<sup>21</sup> “Tuma asamtai yamaikia chíkich anaikiatniuitji. Tura náṅkamas achikchatniuitji. Antsu ii nemartamkau atí. Uunt Jesus iijíai pujumia nuṅi tuke Nin nemarsamia nu atí.

<sup>22</sup> Juṅa Jesusan imiaimiania nú tsawantnumiaṅ jukí, Jesus nayaimpiniam wémiania nú tsawantan tímianu ejé tuke Niijíai wekaimia nu atí. Nu shuar enentáimtusar, chikichik achiktai. Iisha iruntrar Jesusa nantakmiariṅ etserkamí tusar túramí” tímiayi Pítíur.

<sup>23</sup> Tura nuyá jimiará shuaran anaikiarmiayi. Matíasan anaikiarmiayi. Tura chikich-nasha Jusen, ni chíkich naariṅ Parsapas, tura apach náarínkia Justu, nunasha anaikiarmi-ayi.

<sup>24-25</sup> Tura nuyá Yus-shuar Yúsan áujainiak juṅa tiarmiayi “Ii Uuntriṅ, Amesha ashí shuara enentáí nékame. Juṅi awai jimiará áishmaṅ. Jútas tunáa túrak jákatniunam wéak akatramu takatan ikiukmiayi. Yamaikia Jútas takatrí achikiat tusam, ¿tuá achikium, Uunta? Paant iniakmasta.” Tu aujsarmiayi.

<sup>26</sup> Tura Israer-shuara túrutairiṅ núnisan, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

## 2

### *Yusa Wakaní taramiania nu*

<sup>1</sup> Pintikiustís náartin jisat jeamtai, chikichík jeaṅmaṅ nuṅi Yus-shuar tuakarmiayi.

<sup>2</sup> Tumaiṅ aya aneachma nayaimpinmayaṅ nasea áintsanṅ téter ajaki winian antukarmiayi.

Ashí mash jeá pujuarmia nuka antukarmiayi. <sup>3</sup> Tura nuṅi pujuiniaṅ ji wajaṅ kea áaniun wáinkarmiayi. Túruna anṅkant anṅkant puunak tarurarmiayi. <sup>4</sup> Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairiṅ súsarmiayi. Tuma asamtai nujaiṅ niisha chíkich chichaman chichasarmiayi.

<sup>5</sup> Nuṅi Jerusaréṅnum Yus táman umirin Israer-aents ármiai. Ashí nunṅkanmayaṅ Jerusaréṅnum taar matsamarmiayi. <sup>6</sup> Tura túrunamia nuna antukar káunkarmiayi. Tura ashí shuar ni chichamejaṅ chichaamun antukarmiayi. Tuma ásar, warinkit, tu enentáimsarmiayi. <sup>7</sup> Nekaachar ashamkarmiayi. “Warínkit, tunaim ajarmai. Ju aents chíkich chíkich chichaman chichainia nu, ashí Kariréanmayanchukait, tiarmiayi.

<sup>8</sup> Tura iisha anṅkant anṅkant ii chichameṅka ántatsjik. Ausha urukainiakua, nunak chichainiawa, tiarmiayi. <sup>9</sup> Juṅi ashí nunṅkanmayaṅ aents pujuiniatsjik. Partianmayaṅ, Eramnumiaṅsha, Misiuputámianmayaṅsha, Puntanmayaṅsha, tura Asia nunṅkanmayaṅsha,

<sup>10</sup> Príjianmayaṅsha, Pampirianmayaṅsha, Ejiptunmayaṅ tura Áprikianmayaṅ Serinia nú naṅkaamasnumiaṅsha pujuiniatsjik, tiarmiayi. Nuyasha ii shuarsha Ruma péprunmayaṅ yaunchu taar juṅi matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairinṅ mash túruiniawai. <sup>11</sup> Kritianmayaṅsha Arapianmayaṅ pujuiniaji. Tura ashí mash ii chichamejaṅsha Yusa penṅker túramuriṅ ántaji” tiarmiayi.

<sup>12</sup> Ashí aents nuna nékachu ásar ashamkarmiayi. Tura nuámtak aniniaisarmiayi “¿Warinminiait ju?” <sup>13</sup> Tura chikichcha wishikiarmiayi. “Nampeku áiniatsuash” tiarmiayi.

<sup>14</sup> Nuiṅkia Pítíur, chíkich áuntse Jesusa akatramurijíaiṅ wajakí, kakantar chichasmiayi. Chichaak tímiayi “Jutíanmayaṅ shuartiram, Jerusaréṅnumiaṅtirmesha antuktaram. Wi

### *Pítíur ujakmia nu*

<sup>14</sup> Nuiṅkia Pítíur, chíkich áuntse Jesusa akatramurijíaiṅ wajakí, kakantar chichasmiayi. Chichaak tímiayi “Jutíanmayaṅ shuartiram, Jerusaréṅnumiaṅtirmesha antuktaram. Wi

títijatjana nu antukrum pénker enentáimpratarum. <sup>15</sup> Ju áishman, nampekarai, tárumna nu, nampekcharai. Warí, nantu imiá ishichik takuni. ¿Aisha itiurak? <sup>16</sup> Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

<sup>17</sup> Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmariatatui. Tura nátsaka íimiarartatui. Tura uunka mesekramiartatui. <sup>18</sup> Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmariatatui. <sup>19</sup> Yakí nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintiuncha yuranmia áintsan akupkattajai. <sup>20</sup> Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui. <sup>21</sup> Nuinkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

<sup>22</sup> Tuke chichaak: ‘Israernumia shuartiram, wi títijatjana nu antuktarum. Nasarénumia Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarın paant nekaatarum tusa, nú Jesusan ti ikiakármiayi. Tura Jesusjai aentsti túrachminian Yuska túramiayi, átum íimmianum. Nuka ti paant nékarme, tímiayi. <sup>23</sup> Tura Jesus surunkamia nuna Yuska yaunchu, túruntsain, paant nekaamiayi. Túrasa Yus enentáimmia nujai métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. <sup>24</sup> Túramunak Yus Jesusan jákatniun nupetmamtik iniantkimiayi, tuke jákachmin asamtai. <sup>25</sup> Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamu áchattajai.

<sup>26</sup> Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, anean-tiniapitjia tusan.

<sup>27</sup> Winia wakaniur, Yusru, jákatniunam ikiurtuschattame. Wi ame Uchirmetjai, Tunaar-incha. Túmaitkui anentu asam ayashur káurtin tsankatrukchattame.

<sup>28</sup> Tura iwiaaku átin jintia jintintrutamame. Tura tuke pujurtakum waramtikrustatme. Tu áarmiayi Tawit’ tímiayi.

<sup>29</sup> Pítiur tuke chichaak: ‘Páantchakait. Ii uuntri Tawit yaunchu jákai. Tura iwiarsamuiti. Ni iwiarsamuri iini pujatsuk. <sup>30</sup> Túrasa Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi “Ame akup-niuitme. Nekas tájame, ukunam ame iniañnamurminian Kristu akiiniattawai. Niisha Akupin anainiaktatui, amea áintsan.” Nuna Yus táman Tawit nekaamiayi. <sup>31</sup> Neka asa, túruntsain Tawit, wainkia nútiksān, Kristu nantaktintriñ áarmiayi. Kristu túrunatniuriñ chicharuk tímiayi “ni wakanincha jákatniunam ikiukchatniuyi. Ayashincha káurtinian tsankatkashtiniuyi.” <sup>32</sup> Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji. <sup>33</sup> Yuska, Jesus nankaamantuiti tusa ni untsuriñ apusaiti. Tura ni Wakanin Jesusan súsaiti, Nii yaunchu tímia nútiksān. Tuma asamtai jusha átum antukurmena nuna, tura ísurmena nunasha Yus suramsaiti. <sup>34</sup> Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

“Uunt Yus winia Úuntrun tímiayi “akupin pujutainium, winia untsuruñi pujustá.

<sup>35</sup> Ame nemasrumin nupetkattajai. Nu túruntsain jui pujustá’ tímiayi.”

Nuní áarmaiti Jesusnan, tímiayi. <sup>36</sup> Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasa Jesssha in uwentikkiartin Krístuiti. Ashí áentstíram nu pénker nekaatarum” tímiayi Pítiur.

<sup>37</sup> Nuna antukar wake mesekarmiayi. Tura Pitruncha chíkich akatramuncha anisarmiayi “Yatsuru, ¿nuin̄kia ititurkatjik?” tiarmiayi. <sup>38</sup> Tutai Pítrusha chichaak “Atumí tunaarī ikiuktiaj tusarum Yus nekas enentáimtustarum. Tura ashí shuartiram Jesukrístu naarī pachisrum imiantiarum. Nuīn̄kia atumí tunaarīn Yus tsan̄kurtamprattarme. Túrunawakrumin Yuska ni Wakan̄in suramsattarme, tímiayi. <sup>39</sup> Yus tímia nuka atumin túramprume. Atumí uchir̄incha tura ashí arant matsatainia nunasha tawai. Kame ii Yusrī áentsun untsuktaj tusa wakerana nuna tawai” tímiayi.

<sup>40</sup> Nú chichamjaī tura nuyasha Pítur tuke jintintiuk tímiayi “Yajauch shuara asutiátniurī átatna nuyá uwempratarum” tímiayi. <sup>41</sup> Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi. <sup>42</sup> Ashí nu shuar Jesusa akatramurī jintintiaromia nuna tímatrusan̄ antukarmiayi. Tura irunar shiir enentáimtunaisar yurumin ármiayi. Túrawar, Kristu enentáimtustin namper̄in najanin ármiayi. Túrawar Yúsan áujiarmiayi.

### *Yus-shuar pampararmiania nu*

<sup>43</sup> Tura Yuska aentsti túrachminian Jesusa akatramurijjaī túramiayi ni kakarmarīn iniakmastaj tusa. Tuma asamtai ashí aents nuna wáinkiar ashamkarmiayi. <sup>44</sup> Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi. <sup>45</sup> Ni nun̄ken surukar, ni takakmar̄incha surukar, atsumainia nuna súarmiayi. <sup>46</sup> Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin ármiayi. Tura nan̄kaamantu enentáimtumatsuk, yurumkan ajamnainiarmiayi. <sup>47</sup> Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwentikiar Yus-shuar írunmanum íkiaun̄ki wémiayi.

## 3

### *Wekaicha wekasamiania nu*

<sup>1</sup> Chíkich tsawantaj, nantu nun̄kaach ajasmatai, Pítur Juan̄jaī, Yusa Uunt Jeen Yus áujstai tusar wearmiayi, Israer-shuar tuke turin armia nútiksaran̄. <sup>2</sup> Tura áishman̄, ni akiiniamur̄iniā wekaicha amia nu, nūī aā wáitiniam tuke tsawant pujumiayi. Nu áishmannasha ni shuarī entsakí júkiar nú wáitiniam apujin ármiayi, nūī shuar wayan kuítian seat tusar. Nú wáitisha, Shiir Waiti, tutajiyayi. <sup>3</sup> Tura nú shutuapsha Pitrun Juan̄jaī wayan wáinkiamiayi. Wáiniak kuítian seamiai. <sup>4</sup> Tura Pítur Juan̄jaī apajas ísarmiayi. Tura nú áishmannasha chicharuk “Íirsata” tímiayi. <sup>5</sup> Aishman̄sha, surustatapi, tu enentáimias, ímsamiayi. <sup>6</sup> Nuyá Pítur chichaak “Kuítrusha atsawai, tímiayi. Kurisha atsawai. Antsu kuítjaī nan̄kaamas takakjana nuna amastajai. Wats, Nasarénumiā Jesukrístu kakarmarījjaī wajakim wekasata” tímiayi.

<sup>7</sup> Tinia iniais, Pítur ni untsur̄in̄i achik awajkimiai. Túram ni nawesha, wanusesha kakaram ajasmiai. <sup>8</sup> Tura niisha wajaki nantent ajakmiayi. Nuyasha wekasamiayi. Tura Pítrujaīsha Juán̄jaīsha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi. <sup>9</sup> Ashí aents pujuarmia nu, nin wekaan wáinkiarmai. Tura ni chichamen anturkarmiayi. <sup>10</sup> Tura chichainiak “Nuik Yusa Uunt Jeen wáitir̄in, Shiir Waiti tutainium, nu áishman̄ tuke pujuuya núchakait” tiarmiayi. Tura ni túrunamur̄in nekaawar, ti ashamkar nusháa enentáimsarmiayi.

### *Pítur ujakmiania nu*

<sup>11</sup> Shutuapka péñker ajasu asa Pítrujaī Juán̄jaīsha pen̄ké tsurachmiayi. Tura aents nūī pujuarmia nu, warinkit tusar, jeáshkirī tséken̄ki wearmiayi. Nuka Sarumún̄na tiniu ármiayi. <sup>12</sup> Aents káunkarun Pítur wáiniak, chicharuk “Israer-shuartiram, ¿urukamtai winiasha imiá írum? tiarmiayi. ¿lisha péñker asarik' tsuarmaji? ¿li kakarmarījjāin̄kik' ewekamsamaji? <sup>13</sup> Atsá. Antsu Yuska ni Uchir̄in Jesusan ashí nan̄kaamantu awajsaiti.

Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitián Piratuí surukmarme. Tura Piratu akupkataj tau atumsha suritkiamarme. <sup>14</sup> Jesus péñker nákkak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. <sup>15</sup> Túrarum iwiaaku átinian Amaana nu maamarme. Tuma ain Yuska Nin jakamunmaya iniantkimiayi. Nuka iisha neka asar étsereaji. <sup>16</sup> Tura ju aishman jui wajaana ju tura nékarmena ju, Yusa Uchiri naari enentáimta asa kakaram ajasuiti. Jesus enentáimtususa asa nekas péñker ajasuiti. Nusha wáinniu asarum nékarme’ tímiayi.

<sup>17</sup> ‘Wats, yatsurtiram, wi nékajai. Atumsha atumí úuntriijai Jesusan túramarmena nu nékatsuk túramarme. <sup>18</sup> Tura nu túramurmijiai Yus yaunchu tímia nu tímianak umikiurme. Ni Krísturi wáitsatniuya nuna Yuska ashí ni etserniurin áamtikramiayi. <sup>19-20</sup> Wats, yamaikia tunaaruminiá kanaktiarum. Túrarum Yúsnumaaní ayantártarum, tunaarun asakárat tusarum. Túrunawakrumniñkia, atumin uwentikramprarat tusa Yus yaunchu anaikiamia nuna akupturmaktatrume. Nusha Jesukristuítu. Tura Niiijai enentáimin ayampratin átatui. <sup>21</sup> Tura yamaikia Jesukrístu nayaimpiniam pujustiniaiti, ashí iwiarnatsain. Yuska ukunam ataksha nunkan shiir awajsattawai. Nuna ni etserniurin tsáapin enentái takaku armia nuna yaunchu áamtikramiayi. <sup>22</sup> Tuma asa Muisais ii aparin tímiayi:

“Atumi Uunt Yusri ukunam etserniun akupturmaktatrume, winia akuptukmia núnisan. Nuámtaktirminiá achik akupturmaktatrume. Tura nii títiatna nu umirkatarum” tímiayi. <sup>23</sup> Náñkamas aents nu etserniun chichamen umíachkunka emesnartatui. Tura Israer-shuarnum páchitkia áchattawai.

Núnisan áarmiayi Muisaisha’ tímiayi.

<sup>24</sup> Pítiur tuke chichaak ‘imiata, Yúsnan etserin Samuer ju tsawantin túratniuri etserkamiayi. Nuyá ashí Yúsnan etserniusha tuke nuna etseriarmiayi. <sup>25</sup> Etseriarmia nuka atumin túramprume. Tuma asa átum péñker pujustinian Yuska ii uuntri Apraáman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai’ tímiayi. Tura ii úuntrin tímia núnaka incha túramji, tímiayi. <sup>26</sup> Imiata, Yus ni Uchirin iniantkimia nuí, atumin emka akupturmakmiarme. Atumsha, atumí tunaariya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítiur.

## 4

### *Pitruncha Juáñnasha kakerkarmiania nu*

<sup>1-2</sup> Pítrusha Juanjai Yusa chichamen áentsun jintintiainiak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniái Israer-patri táarmiayi. Tura Yusa Uunt Jeen wainniu úuntrisha Satuséu aentcha táarmiayi. Taar Pitruncha Juáñnasha kakerkarmiayi, niisha Jesusa nantakmiari chichaman jintintinia asamtai. <sup>3</sup> Yamaikia kíawai, kashin iismí tusar achik sepunam enkea iniaisarmiayi. <sup>4</sup> Tura Pitrun nuik anturkarmia nú aents untsurí Yus-shuar ajasarmiayi. Nuik Yusshuaraim tura yamaiyaim iruram ti untsurí ajasarmiayi. Aya áishmankak, senku mir (5000) aents áarmiayi.

<sup>5</sup> Kashin tsawarmatai Israer-shuara akupniuri, ni úuntrisha, tura ni jintinniurisha Jerusarénum iruntrarmiayi. <sup>6</sup> Nuisha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitiántri shuarisha tímian iruntrarmiayi. <sup>7</sup> Iruntrar Pitruncha Juáñnasha utitiarum tusar akupkarmiayi. Tura itiarmatai, ajapén awajsarmiayi. Tura aniasarmiayi “Kame ¿yana kakarmariijai, yana chichamejai túrarum?” tiarmiayi. <sup>8</sup> Tutai nuyá Pítiur, ni enentáin Yusa Wakaní pimiutkamu asa tímiayi “Akupniutiram, tura úuntirmesha antukturum. <sup>9</sup> Ju áishman nuik shutuap amia nu péñker ajasmari anintrarme. Kame itiurak péñker ajasuit tátsurmek.

<sup>10</sup> Urukamtia úuktataj. Anintrakrumin iisha paant títiatji, Israernumiá shuar ashí nekaawarat tusar. Ju áishman Jesukrístu kakarmarijají pénker ajasuíti. Nasarénumiá Jesukrístun, átum máamurmena nuna, tura Yus jakamunmaya iniantkimiania nuna tajai, tímiayi. <sup>11</sup> Nú Jesuska kayaa áintsankete. Atumsha jeamniutiram, nú kaya yajauchiiti, tímiarme Jesusna. Túrasha túramaitiatan Niisha jeanam emka apujsamua núnisan ajasuíti, tímiayi. <sup>12</sup> Tura chíkichjai uwempratin penké atsawai. Ju nunkanam ii chikicha naari pachisar uwempratin atsaji. Jesuskete ii uwentikrampratniun Yus suramsamij nu” tímiayi Pítiur.

<sup>13</sup> Pítrusha Juansha nánkamas shuara áintsan ármiai. Núkap unuimiarcharu ármiai. Tura unuimiarchaitiat, arantutsuk etseriarmiayi. Aentsu uuntri núnaka nekaawar “Nékachuitiat, itiura sapijmiatskesha chichainia” tiarmiayi. Tura, ju sha Jesusa nemarkin ármia núiti tiar nekaawarmiayi. <sup>14</sup> Nuyasha áishman pénker ajasmia nu niijjai nuí wajamiayi. Tuma asamtai, niisha aj wajakui, Israer-shuara úuntriñkia, pénker ajaschaiti títiat tukamá tujinkiararmiayi. <sup>15</sup> Tuma ásar, iik nuamtak áujmatsatai tusar, Pítrusha Juansha shutuapsha aa awemartai, tiarmiayi. <sup>16</sup> Tura áujmatainiak tiarmiayi “Ju Pítrusha ju Juansha itiurkatjik. Ju uunt túrunamun Jerusarénum matsatainia nu ashí nékainiatsuk. Wáitiatititín tujintiaji, tiarmiayi. <sup>17</sup> Tura, ashí aents nekaawarain tusar yamaik jiaktai. “Ju Jesusa naari pachisrum penké jintintiawarairap,” titiat” tiarmiayi.

<sup>18</sup> Tura árusan Pitruncha Juánasha shutuapnasha ataksha untsukarmiayi. Tura chicharkarmiayi. “Jesusa naari penké áujmatsairap. Tura Jesusa túramuri penké jintintiairap” tiarmiayi. <sup>19</sup> Tutai Pítiur Juanjai áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaji? tiarmiayi. <sup>20</sup> Nekaatarum. Iisha íisjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

<sup>21-22</sup> Shutuap pénker ajasmia nu kuarenta (40) uwí nankaamas takakuyayi. Ni pénker ajasmarin aents nekaawar, “juka aentsti túrachminiatji” tusar Yusa naarin uunt awajsarmiayi. Tuma asamtai aentsu uuntri Pitruncha, Juánasha asutiátai tukamá aentsun ashamainiak áyatik chicharkar iniaisarmiayi.

### *Yus-shuar Yusa kakarmarin seawarmiania nu*

<sup>23</sup> Pítiur Juanjai ankant ajarar ni írutramurijn waketkiarmiayi. Tura jeawar Israer-patri uuntri tura aentsu úuntrisha nin tiarmia nuna mash etserkarmiayi. <sup>24</sup> Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nunkaasha najanaitme. Nayaantsasha tura juí írunna nusha najanamiamme, tiarmiayi.

<sup>25</sup> Tura Tawit ámin umirtamin amia nu ju áantikramiamme:

“¿Urukamtai ashí nunkanmaya aents charaatum ajainia? ¿Tura Israer-shuarsha urukamtai ántar chichaman enentáimiamia?”

<sup>26</sup> Uunt kapitían ármia nuka chichaman jurusarmiayi Uunt Yúsan.

Tura pepru úuntrisha iruntrar Uunt Yúsan kakerkarmiayi. Ni anaikiamurijn Krístun nútiksaj kakerkarmiayi.”

<sup>27</sup> Tu áarmaiti, Uunta, tura nekasaiti. Erutis apachi kapitíantri Punsu Piratujai jú péprunam iruntrararmiayi. Niisha yajaya shuarjai tura Israernumiá shuaraim nuim íruntrararmiayi. Ame Uchirmin Jesusan tunaarinchán kakerkarmiayi. Jesuska Ame anaikiamiamme, winia takatrun túrat tusam. <sup>28</sup> Tura ame enentáimjai iwiamamna nu uminkiatniuiti. Tura apachcha Jesusan kakerainia ásar, Ame iwiamamna tímianak umikiarmiayi. <sup>29</sup> Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamtsuk etserkatin ame kakarmaram amasta.

<sup>30</sup> Tura ame kakarmarmijjai jaasha tsuártin amasta. Ame Uchiram Jesus tunaarinchá nujai ii aentsti túrachmin túratniusha amasta. Aents Yusa kakarmarin nekaawarat tusam túrata” tiarmiayi.



<sup>31</sup> Tura Yúsán tú áujas umikmatai nuin irunar pujuiniain úurkamiayi. Túrunamtai ashí shuara enentáin Yusa Wakaní pimiutkarmiayi. Túmaitkiui ashamtsuk Yusa chichamen etserkarmiayi.

### *Wíniakete, tícharmiania nu*

<sup>32</sup> Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, júsha ashí iiniu ainiawai, tiarmiayi.

<sup>33</sup> Tura Jesusa akatramurísha, Yus ti yayamu ásar, Yusa kakarmaríjiai Uunt Jesusa nantakmiarín tuke etseras pujuarmiayi. <sup>34</sup> Tura ashí Yus-shuarka nunkan takakusha jeen takaku armia nusha, núnaka surukar kuítian itiararmiayi. <sup>35</sup> Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi. <sup>36</sup> Chikichík shuar, ni naari Jusé, nunkan takakuyayi. Jesusa akatramurísha Jusén chíkich náarín apujtusarmiayi, Pirnapín. Nu náarísha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamurí núnkenka Chípriiyayi. <sup>37</sup> Niisha ni nunken surukmiayi. Tura nu kuítian itia Jesusa akatramurín súarmiayi.

## 5

### *Ananíasa tunaari*

<sup>1</sup> Tura chíkich áishman, ni naari Ananías, ni nuwe Sapirjai ni nunken surukarmiayi. <sup>2</sup> Niisha nunkan suruk kuítian emeenak akanak júki Jesusa akatramurín werí takamt-sukea nútikias susamiayi. Ni nuwésha, Sapir, nuna túran nekaamiayi. <sup>3</sup> Túramtai Pítiur chichaak “Ananíasa, ¿urukamtai uunt iwianch enentáimin enketurmatai, Yusa Wakanín anañkataj tusam nunka surukam kuit achikumna nu akankam ikiurmasam? tímiayi. <sup>4</sup> Entá, nuñkia nunka áminiuchukait. Surukumna nu kuitcha áminiuchukait. Nusha, ¿urukataj tusamea tú enentaímprom? Amesha aya áentsnum wáitruachume. Antsu Yus-numsha wáitruame” tímiayi Pítiur. <sup>5</sup> Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashankarmiayi. <sup>6</sup> Nú turunamtai áishman tariar Ananías jakan penuararmiayi. Túrawar iwiarsatai tusar júkiarmiayi.

<sup>7</sup> Tura Ananíasa nuwe arur, menaintiú ura nankaamasai támiayi. Túrasha ni áishri jakanka nekaachmiayi. <sup>8</sup> Támatai Pítiur nuwan tímiayi “Turuttia. Átum nunka surukur-mena nuí, ¿kuit itiarumna núnikik surukuram?” tímiayi. Tutai nuwá tímiayi “Ee, núnik surukji.” <sup>9</sup> Tutai Pítiur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwiarsatai tusar júkiaria nu wininiawai. Tura yamaikia amincha juramkiartatui” tímiayi. <sup>10</sup> Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkarmiayi. Túramtai júkiar ni áishrinín ayamach iwiarsarmiayi. <sup>11</sup> Tura ashí Yus-shuar armia nu tura ashí aencha nuna antukarmia nu ti ashankarmiayi.

### *Yusa kakarmaríjiai túrawarmiania nu*

<sup>12-14</sup> Tura ashí Yus-shuar Yusa Uunt Jeen shikirijn irunin ármiai. Nu shikirísha, Sarumúna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti péñker áiniawai, tu wearmiayi. Tura Yus-shuar Yusa kakarmarín iniakmasarmiayi. Túra asamtai imiá untsurí aents Yus-shuar ajasarmiayi. <sup>15</sup> Tura chíkich aents ni shuari jainia nuna jintiá amamtikiarmiayi. Peakjai júkiar, tampun-masha enkeawar júkiar jintiá ayamach áepsarmiayi. Pítiur nankaamak ni wakanínsha enkemprutmawainti tusar nu shuar túrawarmiayi. <sup>16</sup> Núnisañ arantiá shuarsha ti untsurí ni shuari jáinian tura iwianchrunkuncha nuí Jerusarénum itiararmiayi. Tura ashí nuí táaruka tsuámararmiayi.

<sup>17</sup> Israer-patri uuntri, tura Satuséu aencha niijiai pujuarmia nu suuir iiniak <sup>18</sup> Jesusa akatramurin achikiar enkeawarmiayi. <sup>19</sup> Túrasha kashi Uunt Yusa suntari nayaimpinmaya tara sepú wáitirin uraimiayi. Tura Jesusa akatramurin aa júkiarmiayi. <sup>20</sup> Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

<sup>21</sup> Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiai Israer-patri uuntri, tura niijiai pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramuri sepunmaya itiatarum tusar.

<sup>22</sup> Tura suntarsha sepunam jeariar Jesusa akatramurin wáinkiacharmiayi. Atsawai tukam táarmiayi. <sup>23</sup> Taar chichainiak “Sepú waiti asakamua tímianisañ aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayají tukamar atsá wáinkiaji” tiarmiayi.

<sup>24</sup> Israer-patri uuntri, tura Yusa Uunt Jeen wainniu úuntrisha, nu chichaman antukar, “tsej ausha zurutiak nunasha iniaisarat?” tiarmiayi. <sup>25</sup> Nu chichamaik áishman taa tímiayi “Áishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

<sup>26</sup> Túrunamtai Yusa Uunt Jeen wainniu uuntri ni suntarjijai wear achik itiararmiayi. Túrasha penké aents kayajai tukurmarajj tusar, yajauch awajtsuk itiararmiayi. <sup>27</sup> Tura achik itiaar Israer-shuar naamka pujamunam naka awajsarmiayi. <sup>28</sup> Tura Israer-patri uuntri tímiayi “Iisha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarénnum átum etserkamu pampañkai. Jes, átum, Jesusan máawarai, in táturmek. Nusha in makuutai tusarum tárume” tiarmiayi.

<sup>29</sup> Nuyá tutai Pítiur chíkich Jesusa akatramurijjai chichainiak “Iikia aentsjainkia iniañkasar Yus emka umirkatniuitji, tiarmiayi. <sup>30</sup> Jesus atumek krúsnum máamurmena nuna ii iwiaaku Yusri Nin iniantkimiayi. <sup>31</sup> Yus ni kakarmarjijai Nin nañkaamantu awajsamiayi. Tura nekas Akupniuiti tusa ni untsuurini apujjamiayi. Tura áentsun Uwemtikniuiti. Israer-shuar enentái yapajjáwar tunaariniá uwemprarat tusa Yus túraiti. <sup>32</sup> Nu tuma asamtai iisha nu nekaar étsereaji. Tura Yusa Wakanísha nuna étsereawai. Túrasha aya Yusa umirkarua nunak ni Wakanín súsaruiti” tímiayi Pítiur.

<sup>33</sup> Tutai nuna antukar ti kajerarmiayi. Túrawar, maatai tusar wakeriarmiayi. <sup>34</sup> Tura nuí Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin árimiayi. Tura niisha wajaki tímiayi “Ju áishman aa ishichik wajasarti” tímiayi. <sup>35</sup> Nuyásha irunar matsamarmia nuna chicharuk “Israer shuartiram, ju áishman tú túratai tu enentáimsarumna nu aneartarum. <sup>36</sup> Enentáimsatarum. Nuik áishman Tiútas wantinkiachmakia. Niisha kapitániitjai takui, kuaru siántu (400) shuar nemarkarmiayi. Tura ukunam nin maawarmatai, ni némarkamurisha pisararmiayi. Túrunawar nuní amuukamiayi. <sup>37</sup> Ukunmasha, iruntrar nekapmartin tsawantincha Kariréanmaya Jútas wantinkiachmaka. Tura nincha nútiksañ ti untsurí nemarkarmiayi. Túman máawarmiayi. Nu túrunamtai nútiksañ ni némarkamurisha pisararmiayi. <sup>38</sup> Jes, tuma asamtai nu áishman aa wajainia nu iniaisatarum. Auka pachisairap. Au tumainia nu aya áentsnaketkuinkia amuukattawai. <sup>39</sup> Tura antsu Yúsnaikkuinkia atumsha amuktai tukamarum tujinkiatarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

<sup>40</sup> Tú tutai tímianak umikiarmiayi. Túrasha Jesusa akatramurin untsukar asutiáwarmiayi. Tura chicharuk “Jesusa naari pachisrum penké ishichkisha etserkairap” tiarmiayi. Tú tiar akupkarmiayi. <sup>41</sup> Jesusa akatramurisha Israer-shuara uuntri pujamunmaya jíinkiararmiayi. Tura wáitsamniaitrume tusa Yuska Jesusa naari pachia asakrin

ii natsantin wáitsatniun tsan̄katramkaitji tusar ti shiir enentáimsar wearmiayi. <sup>42</sup> Tura Jesukrístunun áujmatsatniun pen̄ké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

## 6

### *Yus-shuaran yainian siati anaikiarmiania nu*

<sup>1</sup> Nú tsawantin Yusan umirkaru ti kawenkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajeriarmiayi. “Tuke tsawantin yurumak súarmena nūi atumí waje ti nukap súarme. Tura íniuka ishichik súarme” tiarmiayi. <sup>2</sup> Túruinia Jesusa tuse akatramur̄i ashí Yus-shuaran irurar tiarmiayi “Iisha Yus-Chicham etserkatin iniaisar yurumak súsachminiaitji. <sup>3</sup> Tuma asamtai yatsurtiram, atum̄inīa siati áishman̄ eáktárum yurumkan súsarát tusarum. Pen̄ker wekainia nu, tura neka shuar, Yusa Wakan̄i pimiutkamu ainia nu achiktarum. <sup>4</sup> Iikia antsu Yus áujkir unuiniakratkir Yusa chichamē etserkir wétatji” tiarmiayi. <sup>5</sup> Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yusan tuke enentáimtiniuyayi. Tura Yusa Wakan̄isha pimiutkamuyayi. Chíkich áishman̄kan anaikiarmiayi, niisha Jiripi, tura nuyá Purukuru, Nikianúrsha, nuyá Temun̄, Parmenassha, Nikiurássha. Nikiurássha Antiukía nun̄kanmayaitiat Israernancha ashí umirniuyayi.

<sup>6</sup> Tura nu siati áishman̄kan Jesusa akatramur̄in itiarmiayi. Táarmatai, akatramusha, Yus áujtusar, anaikiaji tusar múuknumsha ni uwejen awantsarmiayi. <sup>7</sup> Túrasha Yusa chichamenka tuke pampan̄ki wémiayi. Nūi Jerusaré̄nnumsha Yus-shuar ti kawenkararmiayi. Tura imia Israer-patrisha untsur̄i Yus-Chichaman umiriarmiayi.

### *Estepañkan Israer-shuara uuntriin júkiarmiania nu*

<sup>8</sup> Estepañsha Yusa waitnenkartutair̄i pimiutkamuyayi. Tura Yusa kakarmar̄isha pim-iutkamuyayi. Tuma asa aentsti túrachminian shuar írunmanum túramiai. Nu shuar Yusa kakarmar̄in nekaawarat tusa túramiai. <sup>9</sup> Israer-shuar iruntai jea, ni naari An̄kantin, ámiayi. Nuyá áishman̄sha tura Serini nun̄kanmayá áishman̄sha, tura chíkich nun̄ka Arijiantrianmayasha, Serisianmayasha, Ásianmayasha, tímian Estepañjai áujmatsatai tusar káutkarmiayi. <sup>10</sup> Estepañ Yusa Wakan̄i nekatair̄ijjai tímianak chicháa asamtai, nu áishman̄ Estepañjai in̄kiunaikiar nupetkataj tukamá tujinkarmiayi. <sup>11</sup> Tuma asamtai suiir enentáimtuiniak chíkich áentsun Estepañkan tsanumprurarat tusar eákararmiayi. Estepañ Muisaisnasha Yúsnasha yajauch áujmatui, titiarum tusar akikiarmiayi. <sup>12</sup> Pen̄ké áentsun, tura uunt ainia nunasha, jintintin ármia nujaj̄isha chichaman júsar yajauch enentáimtikrarmiayi. Tura Estepañkan jintiá akirtuawar achikiarmiayi. Túrawar Israer-shuar naamka matsamarmia nūi júkiarmiayi. <sup>13</sup> Tura wait chichamtinian itiarmiayi. Niisha taar chicharainiak “Yusa Uunt Jeen ti pen̄ker ana nu, tura Yusa akupkamur̄incha jū Estepañ tuke yajauch chicharui, tiarmiayi. <sup>14</sup> Nú arantcha jū Estepañ tímia nu antukji, tiarmiayi. Estepañ chichaak “Nasaré̄numiā Jesuska Yusa Uunt Jeen sáaktiatui, tura nuyá Muisais in̄ ikiurtamkimiaj nunasha yapaj̄iáttawai” tímiayi. Nusha Estepañ tímia nu antukji” tiarmiayi. Tura nunasha pen̄ké ántar tsanumprurarmiayi.

<sup>15</sup> Nuyasha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmayá suntara yapiya nuní íran wáinkarmiayi.

## 7

### *Estepañ etserkamiania nu*

<sup>1</sup> Tuma wáiniak Israer-patri uuntri Estepañkan aniasmiayi “Jū tuinia nu nekaskait?” tímiayi. <sup>2</sup> Tutai niisha áimkiarmiayi “Winia úntrutirmesha, yatsurtirmesha anturtuktarum. Ii Waantu Yusr̄i ii úntr̄in Apráaman wantintiukmiayi. Apráamka Misiuputámia-Karteá

nun<sub>kanam</sub> pu<sub>jai</sub>, Aran nun<sub>kanam</sub> wéats<sub>ain</sub>, nu<sub>i</sub> wantintiukmiayi. <sup>3</sup> Tura wantintiuk tímiayi “Ame nun<sub>kemsha</sub> áminiurmesha ikiukim nun<sub>ka</sub> Wi iniaktustatjamena nu<sub>i</sub> wetá” tímiayi Yus. <sup>4</sup> Tutai Apraám Misiuputámia-Kartea nun<sub>kan</sub> ikiuki Aran nun<sub>kanam</sub> pujustaj tusa wémiayi. Nuyá ni aparí jakamtai “Arant wetá” tímiayi Yus. Nuna taku ju<sub>nun</sub>kan ii pu<sub>jajnia</sub> ju<sub>i</sub> pu<sub>jsamiayi</sub>. <sup>5</sup> Túrayat nun<sub>kan</sub> ishichkisha sú<sub>sachmiayi</sub> ju<sub>nun</sub>kanam. Antsu “Ukunam amastatjai. Ame jakakmin ame uchirmin susattajai” tímiayi. Tura Apraama uchirí penké atsan nuní tímiayi Yus. <sup>6</sup> Nuyasha Yus tímiayi “Ame uchirmesha írara núnisara<sub>n</sub> chíkich nun<sub>kanam</sub> pujusartatui. Nu<sub>isha</sub> emetamu itit awajtai pujuartatui. Kuaru siántu (400) uwí, tímianu uwí wáitsartatui, tímiayi. <sup>7</sup> Túrasha, Wi asutiáttajai ame shuárumin wáitkia núnaka, tímiayi. Túram nuyá nú nun<sub>kanmaya</sub> shiákartatui. Tura Winia enentáimtursartatui ju<sub>nun</sub>kanam’ tímiayi. <sup>8</sup> Yus tuke Apraámnasha chicharuk ‘Yamaikia Wíi-shuar asarum tsupirnaktiniaitrame. Tuma asam amesha uchiram áishman<sub>kach</sub> akiiniamtai, Wi tímiajna núnismek, sirkunsisiún<sub>n</sub> tutai, shunichirí nuape tsupirkata, tímiayi. Tura chícham Wi yamaikia ámijjai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirí Isak akiiniamtai, uchu tsawant nan<sub>ka</sub>asmatai, Apraám nin tsupirkamiayi. Tura Isaksha ukunam ni tuse (12) uchirín ii uuntri armia nunasha nútiks<sub>n</sub> túramiayi. <sup>9</sup> Tura niisha ni yachin Jusen suiir íyarmiayi. Túmainiak Ejiptu nun<sub>kanam</sub> júkiarat tusar surukarmiayi. Túrasha Yus némarkauyayi. <sup>10</sup> Tuma asa, ashí ni itiurchatri<sub>ni</sub>á uwemtikramiayi. Tura waitnenkartutairincha nekatairincha susamiayi. Tuma asamtai Ejiptunam uunt akupin Paraún Ejiptu nun<sub>kaa</sub> akupniuri ajasat tura ni jeen wáinniuri ajasat tusa anaikiamiayi.”

<sup>11</sup> “Tímiatam tsuka tura itiurchatcha ámiayi Ejiptu nún<sub>kanam</sub>. Tura ju<sub>i</sub> Kanaan nun<sub>kanmasha</sub> núnisa<sub>n</sub> ámiayi. Tuma asamtai ii uuntri yurumkan penké wáincharmiayi. <sup>12</sup> Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiayi. Wats, ii úuntri<sub>niun</sub> ujaajrume. <sup>13</sup> Tura ii uuntri atak Ejiptunam wéenak Jusesha, wíitjai takui ni yachi Jusen nekaawarmiayi. Tura José “Yatsur ániawai” takui Paraun, antuk “au shuarapitia” tímiayi. <sup>14</sup> Nuyanka José ni yachin chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsamarmiayi. <sup>15</sup> Nuní tutai Jakupsha ni shuarijjai Ejiptunam pujustai tusar wearmiayi. Tura ukunam nú nun<sub>kanman</sub> jakamiayi. Tura ni uchirisha ii uuntri ainia nu, núnisara<sub>n</sub> nú nun<sub>kanman</sub> jákarmiayi. <sup>16</sup> Tura atak ukunam ni shuari Sikiam nun<sub>kanam</sub> ni ukunchin júkiar iwiarsarmiayi. Kame Sikiam nun<sub>kanam</sub> Apraámka yaunchu játsuk Amura uchirí nun<sub>ken</sub> sumakmiayi. Túramtai nu<sub>i</sub> iwiarsarmiayi’ tímiayi.

<sup>17</sup> ‘Yus, Apraáman chicharuk “Nekas wi susattajme” tímiania nú tsawant jeatemantai, Ejiptu nun<sub>kanam</sub> Israer-aents pampanki ti kawen<sub>karmiayi</sub>. <sup>18</sup> Nu tsawantincha Ejiptunam chíkich akupin naamka ámiayi, tura Jusen nekaachmiayi nii. <sup>19</sup> Nu akupin ii yaunchu úuntrin ana<sub>n</sub>kawar yajauch awajjarmiayi. “Atumí uchirí kuírchich ana nu ajapa ikiuktiarum” tu wémiayi. Pampankarain tusa tímiayi. <sup>20</sup> Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. <sup>21</sup> Tura nuyá ajapa ikiuktin jeamtai entsá apujsamiayi. Uunt Paraunka nawantri Muisaisan wainiak jukimiayi. Achik, ni uchirinia tímiatrus<sub>n</sub> júki tsakatmarmiayi. <sup>22</sup> Tuma asa Muisais unuimiátrauyayi ashí Ejiptu aents nékarmia nuna. Túramurisha chichamesha kakarmauyayi.’

<sup>23</sup> Estepan tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuari asamtai. <sup>24</sup> Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishman<sub>kan</sub> máamiayi. <sup>25</sup> Wíi turamujai Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsara<sub>n</sub> nékainiawai tu enentáimsamiayi. Túrasha nin<sub>ka</sub> nekaacharmiayi. <sup>26</sup> Kashin tsawar Muisais ni shuari jímiar maani pujuinian wáinkiamiayi. Tura nawamnaikiarat tusa “¿Urukamtai

nuamtak yatsumjaisha yajauch awajniarum?” tímiayi. <sup>27</sup> Tutai emka nan̄kaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam? <sup>28</sup> ¿Winiasha maantuátaj tusam wakeramek, yaṽ Ejiptunmaya áishman̄ máamamna nútiksamkea?” tímiayi. <sup>29</sup> Nuna antuk Muisaiska Matian̄ nun̄kanam pisar, nú nun̄kanam kuarenta (40) uwí yajaya áintsan̄ pujumiayi. Nú nun̄kanam pujus, nuatak, jimiará uchin yajutmarmiayi.’

<sup>30</sup> ‘Kuarenta uwí nan̄kaamas, nu atsamu nun̄kanam Senai náinnium tíjjuṽch Yusa suntarī nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. <sup>31</sup> Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen̄ antukmiayi. <sup>32</sup> Yus tímiayi “Wiitjai Yus. Ame únuntrum̄ Apraáma Isaka, Jakupa Yúsrintjai” tímiayi. Tutai antuk Muisaiska ti kuraimiayi sapijin. Tura íistinian tujinmiayi. <sup>33</sup> Nuyá Uunt Yus tímiayi “Únuntrun shiir awajsataj tusam, ame sapatrum ukuñkiam ikiuktia, wajamna nuṽ Wi pujaku. <sup>34</sup> Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

<sup>35</sup> Estepañ tuke étseruk: ‘Ju Muisaisan ni shuarī “¿Ya amincha ii akuptamin tura ii chichartamin átinnisha anaitiamkamam?” tiarmia nuna Yuska akupniun anaik uwemtikrarat tusa awain̄ki akupkamiayi. Numiniam ni suntarī wantintiukmia nuna chichamejai Yuska Muisaisan akupkamiayi, tímiayi. <sup>36</sup> Muisaisaiti Israer-aentsun Ejiptunmayan̄ uwemtikramia nu. Yusa kakarmarin̄ nekaawarat tusa, aentsti túrachminian untsurín túramiayi Ejiptu nun̄kanam. Nuyá Kapaant̄in Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. <sup>37</sup> Jú Muisaisak Israer-shuaran chicharuk “Atum̄in̄ianak etserniun Yus ukunam anaikiattawai, winia anaitiukma áintsan̄. Tuma asamtai nu shuarsha umirkamniuram” tímiayi. <sup>38</sup> Jú Muisais Israer-aentsjai atsamunam pujumiayi. Senái nainnium Yusa suntarī níjjaisha pujumiayi. Tura Muisaiska ii únuntrijjaī pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiai.’

<sup>39</sup> ‘Túrasha ii yaunchu uuntrī Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi. <sup>40</sup> Túmainiak Muisais Yusjaī chichastajtsa murá wématai nu shuar Muisaisa yach̄in Arun̄kan tiarmiayi “Ii yusrī najanató, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi. <sup>41</sup> Nuyá wáakachia áaniun najanawarmiayi. Túrawar, júiti ii yusrī tusar, kuntinian maantuawarmiayi, nu susatai tusar. Tura ni uwejejaī najanamun íisar ti wararsarmiayi. <sup>42</sup> Nuna túruinian wáiniak Yus, iniaisajai taku, niiyā kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniurī juní áarmiayi:

“‘Israer-aentsu, kuarenta (40) uwitin atsamunam wekaimiarmena nuṽ, ¿Winiak kuntin maanturtuamarum? Winia surustai tusarum pen̄ké túrachurme, tímiayi Yus.

<sup>43</sup> Antsu, Muruk naartin̄ ántar-yusa pujamurīn jukimiarme. Tura chíkich ántar-yussha, ni naarī Rempañ, yaa áanin najanarum nusha jukimiarme. Júkin asakrumin atumí nun̄keyā jukin, tímiayī Papirúnia nun̄kan nan̄kaiki akupkatjarme” tímiayi Yus.”

Nuní áarmaiti’ tímiayi.

<sup>44</sup> Estepañ tuke étseruk: ‘Yus Muisaisan tímiayi “Wi akupeamu chicham ikiunsatin jeá áaniun Wi iniaktusjamna tímiatrusmek atsamunam najánató” tímiayi. Tutai Muisais Yus tímianak umikmiayi. Nu jeañ ii uuntrī yaunchu takaku áarmiayi. <sup>45</sup> Nu jeañ ni uchirī akintkiar akintkiar wearmiayi. Ukunam, jú nun̄ka achiktin jeamtai, Yuska kapitían Jusuejaī jú nun̄kanmayā aentsun̄ jikī akupkarmiayi. Tura ii uuntrī kapitían Jusuejaī

winiarmia nu, nu jeancha jú nunkanam itiarmiayi. Tura Tawit uunt akupin náamtsain, ii úntrisha nu jean takaku ármiai. <sup>46</sup> Kame Yus Tawitian yájau enentáimtiaarmiayi. Tuma asamtai Tawit Yus shiir pujustinian jean jeamtinian seamiayi. <sup>47</sup> Túrasha antsu Tawitia uchirí Sarumún Yusa jeen jeammiayi. <sup>48</sup> Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia. <sup>49</sup> Juna áarmiayi:

“Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusarme tarum? tímiayi Uunt Yus.

Tura Wi ayampratniusha, ¿tui aa?

<sup>50</sup> Wiki winia uwejruijain ashí najanachmakiaj” tímiayi.’

<sup>51</sup> Estepañ tuke étseruk: “Tura átumka Israer-shuartirmeka atumí enentáijiaj tuke umichuitrume. Atumí kuishisha weaktsui tura Yus nékachua núniniaitrame. Yusa Wakaníjiaisha tuke nemasnaikiaitrame. Tura atumí yaunchu úntrijiaj métek túrarme’ tímiayi.

<sup>52</sup> Tisia, atumí úntrisha Yusa etserniurin tuke kajerin ármiai, tímiayi. Tura nú arant atumí úntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anañkarum máachmakuram, tímiayi.

<sup>53</sup> Tura Yusa suntarij nayaimpinmaya Yusa chichamen susamuitiatrum atumsha penké umikchamarme” tímiayi Estepañ.

### *Estepañka jakamuri*

<sup>54</sup> Israer-aencha Estepañ tu chichaamu antukar imiá kajerkar nain kátetete awajarmiayi. <sup>55</sup> Tura Estepañsha imiá Yusa Wakaní pimiutkamuyayi. Tuma asa nayaimpinmaani ímias, Yusa wincharin, tura Yusa untsuurinini Jesusan wajan wáinkiamiayi.

<sup>56</sup> Tumá wáiniak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai” tímiayi. <sup>57</sup> Támaitiat niisha kuishin akiriarmiayi, tura achiktai tusar charáa tiar ashí wajatkiarmiayi.

<sup>58</sup> Túrawar, péprunmaya arant júkiarmiayi. Tura antuk etserkarmia nu pushirin ákiar, natsa Sauru wajamunam au iisti tusar áeprusarmiayi. Tura máawartai tusar kayajaj tukurarmiayi Estepañkan.

<sup>59</sup> Tura Estepañka tukamaitiat Yúsan áuj samiayi. Tura áujuk “Uuntru Jesúsá, winia wakantrusha jurutkitia” tímiayi. <sup>60</sup> Tura tikishmar áujuk “Uunta, ju winia túrutainiana ju makuip” tímiayi. Tura nuna ti iniais, jakamiayi.

## 8

### *Sauru Yus-shuaran kajerkarmiania nu*

<sup>1-2</sup> Estepañkan máawarmatai Sauru, péñkeraiti, tímiayi. Tura áishman Yúsan péñker enentáimtia armiania nu, Estepañka ayashincha iwiarsarmiayi, tura aneenak ti uutiarmiayi. Tura nú tsawantaj Yus-shuaran Jerusarénum pujuarmia nuna ti kajerkatinañkamniamiayi. <sup>3</sup> Sáuruka Yus-shuaran kajerak ti pataat wémiayi. Túmá nu jea wayá, nu wayá áishmannasha nuwancha wáinkianka japiki júki sepunam enkeataj tusa túrimiayi. Tumakui Yus-shuar Jerusarénumia pisarar Jutía nunkanam, tura Samaria nunkanmasha jeawarmiayi. Jesusa akatramurinkia antsu Jerusarénuman juakarmiayi.

### *Samaria nunkanam etserkarmiania nu*

<sup>4</sup> Túrasha Jerusarénumia aents pisararmia nu, arant wénaksha tuke Yusa chichamen etserkini yujarmiayi. <sup>5</sup> Tura Jiripi Jerusarénumia we tura chikich péprunam Samaria nunkanam ámiania nu jea, chichaak “Yus anaikiamu ana nu Jesusaiti” tu etsermiayi. <sup>6</sup> Túrakui aents iruntrar chikichik enentáijiaj Jiripi étseraemun titiú pujusar antukarmiayi. Yusa kakarmarin nekaawarat tusa aentsti túrachminian túrimia nunasha

wáiniarmiayi. <sup>7</sup> Ti untsurí aents iwianchruku ármia nuna Jiripi nu iwianchin jírki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péñker ajasarmiayi. <sup>8</sup> Tuma asamtai nú péprunmayan̄ka ashí shuar ti warasar pujuarmiayi.

<sup>9</sup> Tura nú nun̄kanam uwishin Semun̄ pujumiayi. Nuikkia wi ímianaitjai tusa Samarianmaya aentsun anan̄niuyayi. <sup>10</sup> Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semun̄sha Yusa kakarmaríjjai áitkiawai.”

<sup>11</sup> Tura ti untsurí uwí wawekratmaríjjai anan̄karta asamtai, umirkarmiayi nu aents. <sup>12</sup> Túrasha Jiripi Yusa akupeamur̄in, tura Jesukrístununcha shiir chichaman etserkamiayi. Tura, nuna antukar nuwasha áishman̄sha umikiar imian wearmiayi. <sup>13</sup> Semun̄sha imia uwishniuiat Yus-Chichaman enentáimtus imianmiayi. Tura Jiripíjjai tsan̄in wekaimiayi. Yusa kakarmar̄in shuar nekaawarat tusa Jiripikia aentsti túrachminian túrimiayi. Nuna wáiniak Semun̄ ti enentáimsamiayi.

<sup>14</sup> Tura Jesusa akatramur̄isha Jerusaréñnum pujuarmia nuí Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juán̄nasha nekáa ikiuutarum tusa akupkarmiayi. <sup>15-16</sup> Tura Samarianmaya Yus-shuarsha aya Uunt Jesusa náariñ imianiarmiayi. Yusa Wakan̄n̄kia tárachmiayi. Tuma asamtai Pítrusha Juan̄jai nuí jeawar Samarianmaya Yus-shuara enentáin̄ Yusa Wakan̄ pímiutkarat tusan Yusan áujtusarmiayi. <sup>17</sup> Tura áusua umikiar Pítíur Juan̄jai ni uwejen̄ nú Yus-shuaran awantsarmiayi. Nuñkia Yusa Wakan̄ taramiayi.

<sup>18</sup> Jesusa akatramur̄i uweje awasmanum Yusa Wakan̄ taramtai, Semun̄sha nuna wáiniak, kuitjai nu kakarman sumaktaj, tímiayi. <sup>19</sup> Tura Jesusa akatramur̄in chicharuk tímiayi “Winiasha kuitjai surustarum nu kakaram. Wisha nútiksanak nan̄kamas aentsnum winia uwejur awantsam Yusa Wakan̄ tarurat tusan tajai” tímiayi. <sup>20</sup> Tutai Pítíur tímiayi Semun̄kan “Ámeke kuítrumjai métek men̄kakatniuitme. Warí, Yus amaana nu ¿kuitjai sumaktinkiait? <sup>21</sup> Yus esetram enentáimtachu asam nu túramu pachistincha pen̄ké tujinkiaime, tímiayi. <sup>22</sup> Enentáimprata. Túram Yus seata. Enentáimtamna nuna Yus tsan̄kurtamprashtimpiash. <sup>23</sup> Nékaime, tsaan̄kea áintsan̄ yapá enentáimin̄ pímiutramkaiti. Tura tunaarmiñ̄ jinkíamua núniniaitme” tímiayi.

<sup>24</sup> Tutai Semun̄ áimkiamiayi “Uunt Yus aujtursatarum. Túrutrumna nuna túrunawaj̄ tusan tajai” tímiayi. <sup>25</sup> Nuyasha Jesusa akatramur̄i Jesusa túramur̄in nú áentsun ujakarmiayi. Tura wésar Samaria nun̄kanam pepru ámunman̄ka Yus-Chichaman nuí etserkiar, nuí etserkiar Jerusaréñnum wakеткиarmiayi.

### *Jiripi Yus-Chichaman etserkamiania nu*

<sup>26</sup> Tura Yus ni suntar̄in nayaimpinmayan̄ Jiripincha akuptukmiayi. Niisha chicharuk tímiayi “Wátskea. Juyá j̄iinkim Jerusaréñnumiá j̄intia En̄kasa péprunam wea nuní weme, anaraan̄i wetá. Nú j̄intiaka atsamu nun̄kanam nan̄kaamawai’ tímiayi. <sup>27</sup> Tutai Jiripisha wémiayi. Jintiá wesa Itiupianmaya áishman̄kan wáinkiamiayi. Nú áishman̄sha Itiupia nun̄ka akupniur̄in, ni naar̄i Kantasen takarniuyayi. Kantaseka núwauyayi. Tura nu áishman̄ ti neka asa nuna kuítr̄in írniuyayi. Nú áishman̄sha Yús̄an áuj̄sataj tusa Jerusaréñnum wéu wáketmiayi. <sup>28</sup> Karetanam en̄kemar wesa, Yusa etserniur̄i Isayas aarmia nuna aujki wémiayi. <sup>29</sup> Wats, Jiripi nú j̄intianam wéakui, Yusa Wakan̄ nin tímiayi “Nú kareta amayán̄ta.” <sup>30</sup> Tura Jiripisha amayán̄, Yusa etserniur̄i Isayasa áarmar̄in áujun antuk, chicharuk “¿Aujeamna nu nékamek?” tímiayi.

<sup>31</sup> Tutai nú áishman̄ tímiayi “¿Itiurak nekaataj? ¿Yaki j̄intintruat?” tímiayi. Tura antsu iij̄jai wetái tusa, Jiripincha en̄ker jukimiayi karetanam.

<sup>32</sup> Nu papí áarman áuj̄mia nu j̄úuyayi: “Murikiua áitkiasan̄ jákatniunam júkiarmiayi. Tura uchich murik, ure tsúpiram chichaatsna núnisan̄ niisha chichakchamiayi.

<sup>33</sup> Nincha iniatsárarmiayi. Túrasha pen̄ké chichamnaka tútsuk tsan̄kamakmiayi.

Niisha nunkanam iwiaaku pujá maamu asamtai, ¿yaki nuna áujmatkatí?” Nuní aarma ámiayi.

<sup>34</sup> Kantase takarniurí Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurí nínkik túmama? ¿Chikichnash ta?” tímiayi. <sup>35</sup> Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

<sup>36</sup> Nuyá entsa ámanum nankaamak áishman Jiripin chicharuk “Juí entsá jeaji. Wikia juí imianchamniakaitiaj” tímiayi.

<sup>37</sup> Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. <sup>38</sup> Tura, karetan awajas mai jíinkiar entsá wearmiayi. Nuí Jiripikia Kantase takarniurín imiaimiayi.

<sup>39</sup> Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniurísha Jiripin wáinkiachmiayi. Túrasha nínkia waras wémiayi. <sup>40</sup> Jiripisha jeachat Asutu péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

## 9

### *Sauru Jesusan umirkamiayi* (Túramurí 22.6-16; 26.12-18)

<sup>1</sup> Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi.

<sup>2</sup> Tura jearí tímiayi “Papí ame naarmíjjai áaram surusta. Wi nuna papí jukin timiaí Tamasku péprunam jean, Israer-shuar iruntainiam wayattajai. Túran nú papíjjai Jesusan umirkaru ainia nuna, nánkamsan achikiartatjai. Túran áishmannasha nuwancha achikian jinkian, juí Jerusarénum enkeataj tusan ikiaankattajai” tímiayi. <sup>3</sup> Tura papí susam Sauru jintiá wéai, Tamasku péprunam nuntumsai nuí aya aneachma nayaimpinmaya tsáapin jíitsumir téntakmiayi nin. <sup>4</sup> Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajustaj tusam imiá pataaturam?” tímiayi.

<sup>5</sup> Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuma núnismek” tímiayi.

<sup>6</sup> Nuyanka Sauru sapijin kuraníki tímiayi “Nuínkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

<sup>7</sup> Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashamkarmiayi. <sup>8</sup> Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejnum enkekiar júkiarmiayi Tamaskunam. <sup>9</sup> Nuí jeá menaintiu tsawant íimtsuk tura yurumtsuk penké úmutsuk pujumiayi.

<sup>10</sup> Nuí Tamaskunam Yus-shuar Ananíasa ámiayi. Nin mesekranam Uunt Jesus tímiayi “Ananíasa.”

Tutai “¿Warí wakeram, Uunta?” tímiayi.

<sup>11</sup> Nuyá Uunt Jesus tímiayi “Wajakim jintia, Naka tutaiya nuí wetá. Nuísha Jutasa jeen jeam, Társunmaya Sáurun eaktaj tusan winíjjai, titiá, tímiayi. Niisha Yúsan áujuk pujawai. <sup>12</sup> Tura juna mesekranam ipiatkamjai Sáurun. Aishman wayá ni uwejéjjai ántiawai, ataksha íimit tusa. Nú áishmanka ámetme, Ananíasa” tímiayi Jesus.



13 Táman antuk Ananías chichaak “Túrasha Uunta, ju áishman ame áentsrumin Jerusarénnum ti yajauch awajchakait. Ni yajauch túramurín ti untsurí aents ujatainiawai, tímiayi. 14 Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

15 Tutai Uunt Jesus tímiayi “Áankisha wetá. Ju áishman kan winia etserniur atí tusan achikjai Wi. Niisha Israer-shuarchancha tura kapitiánniasha tura Israer-shuarnasha wínian etserin átatui, tímiayi. 16 Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

17 Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantintiumakmamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

18 Nu chichamaik ni jiiya namaká saepeya áanin iniaarmiayi. Túrunamtai ataksha ímmiayi. Túruna wajaki we imianmiayi. 19 Nuyasha yurumámiayi. Tura yurumásha kakaram ajasmiayi. Tura Yus-shuarjai Tamaskunam wárumchik tsawant pujusmiayi.

#### *Sáuruka Tamasku péprunam Yus-Chichaman etserkamiania nu*

20 Nuyanka Sauru Israer-shuara iruntairín wayá Jesusa túramurín etserkamiayi. Etseluk tímiayi “Nekasaiti, ju Jesus Yusa Uchirínti” tímiayi.

21 Nuna ashí anturú pujuiniaka “¿Ausha urukakua aania? tiarmiayi. Entá ju áishman sha Jerusarénnum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniuriin jukitiaj tusa tamia núchakait” tiarmiayi.

22 Tura Sáurusha sapijmiatsuk etsermiayi. “Ju Jesus nekas áentsun Uwentikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarimiayi.

23 Tura ukunam, Israer-aents Sáurun maatai tusar chichaman jurusarmiayi. 24 Tura Sáurusha nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akirtiarimiayi. 25 Nuna antukar Yus-shuar Sáurun chiikniun kashi enkeawar itiararmiayi. Pepru tanishnum itiarar awemarmiayi.

#### *Sáuruka Tamaskunmaya Jerusarénnum wémiania nu*

26 Tura Sauru Jerusarénnum jeá Yus-shuarjai iruntratts wakerimiayi túrasha ninikia ashamiarmiayi. Sáurusha nekas Yus-shuar ajaschaiti tusar ashamiarmiayi.

27 Túmainiajn Pirnapí Jesusa akatramurí matsatmanum jukimiayi Sáurun. Tura nuí ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi. 28 Tura Sauru Jerusarénnum juákmiayi. Tura Yus-shuarjai irunar pujumiayi. 29 Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjai áujmatsarmiayi. Túrasha nu shuar Sáurun itiur máatjik tusar chichaman juriarmiayi. 30 Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

31 Tura Jutíanmaya, Kariréanmayasha, Samarianmayasha Yus-shuar shiir tímiajnisan ajarar kakaram ajasarmiayi. Yúsan ashamainia ásar, tura Yusa Wakaní yayamu ásar kawenki kawenki wearmiayi.

#### *Pítiur Eneasan yáimiania nu*

32 Tura Pítiur Yusaj yachi armiania nuí iráa wekaimiayi. Wekaak Yus-shuar Rítianam matsamarmia nuísha iraumiayi. 33 Nuísha Rítianam jeá áishman kan Eneas náartinian wáinkiamiayi. Niisha emearu asa wekaicha uchu uwí aya tépenuyayi. 34 Tura Pítiur

chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. <sup>35</sup> Nuna túman wáinkiar Rítianmaya aents tura Saruṇmaya aencha enentáimprar Uunt Yusan nemarsarmiyai.

### *Nuwa Túrkas nantakmiania nu*

<sup>36</sup> Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nuṇ pujus tuke péṅker túriniuyayi. Tura niisha nútiksanṇ yaṇ wémiayi. <sup>37</sup> Nu tsawantinik Túrkas suṅkuran jateemak jakamiayi. Túrunamtai ayashin nijiarar yakí tesaamunam áepsarmiyai. <sup>38</sup> Jupe péprusha Rítianmaya tíjūch ámiayi. Júpenmaya Yus-shuar Rítianam Pítur pujan nekaawar jimiará áishmaṅkan akatrar akupkarmiyai, Júpenam wari winití tusar. <sup>39</sup> Nuṇ tutai Pítur niijiai wémiayi. Tura támatai jaka tepemia nuṇ awayáwarmiyai. Nuṇ wayamtai waje pujuarmia nu úutkiar Pítrun téntakarmiyai. Túrawar pushirṇ, Túrkas iwiaaku pujus najankamia nuna iniaktusarmiyai.

<sup>40</sup> Nuyanka Pítur aa akupkarmiyai ashí. Tura niisha ninki tikishmar Yusan áujsamiyai. Nuyasha nuwanṇ jaka tepaan iis tímiayi “Tapitia nantaktia.” Tutai niisha ími Pítur wajaan wániak nantaki pujusmiayi. <sup>41</sup> Tura Pítrusha nuwanṇ uwejnum achik awajkimiyai. Tura iniais Yus-shuar ármia nuna tura wajencha untsukar Túrkas iwiaaku ajasun iniaktusarmiyai. <sup>42</sup> Nu túrunamun ashí aents Jupe péprunmaya nekaawarmiyai. Túrawar untsurí aents Uunt Jesusan umirkarmiyai. <sup>43</sup> Tura Pítruka Jupe péprunam untsurí tsawant nuapen-iwiarin Semuṅka jeen pujusmiayi.

## 10

### *Pítur Kurniriujai*

<sup>1</sup> Sesaria péprunam Kurniriu naartin suntara kapitiántri pujumiayi. Ni suntari Itiaria nuṅkanmaya ármiyai. <sup>2</sup> Nu kapitián Kurniriu ni shuarjijai, Yuska nankaamantuiti, tu enentáimtiarmiyai. Tuma ásar Yusan enentáimtin ármiyai. Tura nútiksanṇ kuítniasha takakchan yáinṭaj tusa Israer-shuaran súuyayi. Tura tuke tsawant Yusan áujtiniuyayi. <sup>3</sup> Chíkich tsawantaj, nantu aanṅku ajasaj Kurniriu ímiarmiyai. Yusa suntari Yus nayaimp-inmaya akupkamu, ni pujamunam utuá “Kurniriuá” tímiayi.

<sup>4</sup> Kurniriuá tutai, Yusa suntariṇ ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai” tímiayi. <sup>5</sup> Tura Yusa suntari Kurniriuun tuke chicharuk “Wats, áminiuram Júpenam akupkata. Semuṇ, chíkich naari Pítur, tatí tusam akuptukta, tímiayi. <sup>6</sup> Nu Semuṇsha chíkich Semuṇjai pujawai. Nuka nuapen-iwiarin Semuṅkaiti. Tura ni jeesha nayaantsanam ayaamach pujawai, tímiayi. Nuṇ jeawakmin, ame túratamna nuna Semuṇ Pítur turamtatui” tinia ikiukmiayi. <sup>7</sup> Tura Yusa suntari waketkintai, Kurniriuka ni takarniurṇ jimieran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yusan enentáimtiniuyayi. <sup>8</sup> Kurniriusha ni túrunamurṇ ashí ujáa-já awajas Jupe péprunam akupkarmiyai.

<sup>9</sup> Kashin tsawantaj Kurniriu suntari Júpenam nuntumsaraj, tutupin ai Pítur jea yakí wáakunam Yusan áujsatajtsa wakamiayi. <sup>10</sup> Pítrusha ti tsukamak yurumátaj tusa wakerimiayi. Túrasha yurumkan iniarainiaṇ Pítur íkiajtiusmak, <sup>11</sup> nayaimp uranmianum wanṅkaram tarachia áanin tura nuna tsakarṇ jinṅkiakman tárūn wáinkiamiayi. <sup>12</sup> Nu tarachnium yajasma irunmiayi. Wekainiusha, nanamtincha, tura napisha enṅkemiarmiyai. <sup>13</sup> Tumaj Yus Pitrun chicharuk “Pitru, wajakim maam yuata” tímiayi.

<sup>14</sup> Tutai Pítur tímiayi “Atsá Uunta. Ii Israer-shuartikia yajauch yajasma áinia nu tura yúatin surimkiamu ana nuka penṅké yúchaitji. Tuma asantai júnaka wikia yuashtajai” tímiayi.

<sup>15</sup> Túrasha Pitrun atak Yus chicharuk “Wi, péñkeraiti, tájana nu, yajauchiiti, tiip” tímiayi.

<sup>16</sup> Nuka menaintiú túrunamiayi. Tura nuyasha tarach ataksha nayaimpiniam wakamiayi. <sup>17</sup> Nuna túrunan wáiniak Pitiur wariniak ániuncha wáinkiaj tusa enentáimia pujaj kapitián Kurniriu ayakma armia nu, anintruiniak jeawariayi. <sup>18</sup> Tura jeawar kakantar untsummiar “¿Semun, Pítiur, juin pujá?” tiarmiayi.

<sup>19</sup> Tura Pítruka ímiarmarin tuke enentáimia pujaj Yusa Wakaní chichaak “Menaintiu áishman untsurmainiawai, tímiayi. <sup>20</sup> Wajakim akaikim arantutsuk au nemariarta, Wi akupkamu asamtai” tímiayi.

<sup>21</sup> Nuna antuk Pítiur taramiayi. Tura áishman kan Kurniriu akupkama nuna wajainian wáiniak “Wiitjai Pítiur. Átum eátrumna núitjai. ¿Warí tarintrum?” tímiayi.

<sup>22</sup> Tutai niisha tiarmiayi “Iisha kapitián Kurniriu akupkamu taji. Kurniriuka áishman péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Niija winiaji, tiarmiayi. Kame nuik, Yusa suntari, nayaimpinmaya akupkamu, ii kapitiántrin tímiayi “Pitrun untsukát akupkata. Nii tatí. Tura nii títiatna nu péñker anturkata” tímiayi. Nuna ii kapitiántrin takui iisha winiji” tiarmiayi.

<sup>23</sup> Tutai Pítiur jeá awayámiayi. Tura nu kashi nu kanararmiayi.

Kashin tsawarar Pítiur niijjai wearmiayi. Túrasha Júpenmaya Yus-shuarsha nin nemariarmiayi. <sup>24</sup> Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarin tura ni nekas amikrin, nekaatarum tusa untsuk ikiaankamiayi. <sup>25</sup> Tura Pítrusha jeamtai Kurniriu aa jiintiuki Pitrun tikishmatramiayi. <sup>26</sup> Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi. <sup>27</sup> Tura chichasar jeá wayawarmiayi. Tura wayá, untsurí aents matsatun wáinkiamiayi. <sup>28</sup> Nuyá Pítiur chichaak tímiayi “Amikrua, atumsha nékarme. In Israer áentstinkia, chikich áentsjai pachiniarchatniuitrume, tura ni jeencha wayashtiniaitrume in jintintramin turamainiaji, tímiayi. Túrasha Yuska ni enentáimsamurin wíniaka paant iniaktursayi. Túmaitkiui wikia nánkamas áentsun yajauchiiti, tura auka wapikiaiti, tíchamniaitjai, tímiayi. <sup>29</sup> Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

<sup>30</sup> Tutai Kurniriu tímiayi “Kuatru tsawant nankaamasaj tura nantusha juni aj, wikia yurumtsuk Yúsan áujsamjai, kiaraj áujsatin ana nuna. Túran chichaj, áishman, ni entsatairi wincharpatniun, naka wajatran wáinkiamjai, tímiayi. <sup>31</sup> Niisha chichartak turutmiayi “Kurniriu, Yus ame áujman anturtamkayi. Tura shuar atsumainia yáinmamna nunasha nekarmayi, turutmiai, tímiayi. <sup>32</sup> Tuma asamtai, Jupe péprunam akatramuram akupkata. Semun Pitrun itiatí. Nu Semun Pítrusha, chikich Semunjaj pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. <sup>33</sup> Túrutkui, wi umikian áentsun wárikmasan ámin akuptukjame utitia tusan. Tura nékaseñ taume. Tuma asamtai iisha juí Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

### *Kurniriu jeen Pítiur etserkama nu*

<sup>34</sup> Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiayi. <sup>35</sup> Antsu ashí nunkanam nánkamas aents Yúsan umirak péñker tura nuna, Yus nú aentsun shiir enentáimtawai, tímiayi. <sup>36</sup> Yuska shiir chichaman Israer-aentsun akuptukmiayi. Nu chichaak “shuar Jesukrístu naarin páchiakka, Yusjaj nawamnaikiatin átiniaiti, tímiayi. Nú Jesukristu ashí shuara Úntrinti’ tímiayi Yus. <sup>37</sup> Túrasha Kariréa nunkanam nankamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nankamamiayi. <sup>38</sup> Tura jusha nékatsrumek, tímiayi. Nasarénumia Jesus, Yus Anaikiamu asa, Yusa Wakaní kakarmarijjai péñker túriniuyayi. Iwianchruku wáitias pujuarmia nuna péñker awajsamiayi. Yus Niin

pujurma asa ashí nuna túriniuyayi. <sup>39</sup> Tura Israer-aents matsatkamunam tura imia Jerusarén péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. <sup>40</sup> Tura menainti tsawant jeamtai Yus Nin iniantkimiyai. Tura ataksha iwiaintiurtamkachmakaji, tímiayi. <sup>41</sup> Ashí áentsnumka wantinkiachmiyai. Antsu íniak nuik, etserin atarum tusa Yus achirmakmij nú áentstiniak wantinturmakmij, tímiayi. Au nekas jakamunmaya nantakmiatai iisha Niijjai tsaninkiar yurumámji, tímiayi. <sup>42</sup> Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títinaitjai. Kame ashí áentsun, jaka áinia nuna tura iwiaaku áinia nunasha, Wikiitjai nuna títinian” tímiayi Jesus. Nusha átum werum ujatruktarum, Jesus turammaji, tímiayi. <sup>43</sup> Ya shuarak Jesusa náarín pachia nú shuarnaka tunaarín tsanukurattawai, nuna ashí Yúsnan etserniusha yaunchu etseriarmiayi” tímiayi.

### *Israer-shuarchan Yusa Wakaní tarurarmiania nu*

<sup>44</sup> Tura Pítiur tuke chichaak pujai, tura chikichcha antúu pujuiniyai Yusa Wakaní tarurarmiayi. <sup>45-46</sup> Tuma ásar ankant ankant chíkich chichamjai chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi <sup>47</sup> Túmakui Pítiur chichaak “¿Yaki surimkiat jú aents imiantinian? Warí nincha ínia áintsan Yusa Wakaní tarurcharaik” tímiayi. <sup>48</sup> Nuyá Pítiur, Jesukrístu náarín imiantiarum tusa akupkarmiayi. Tura nuyasha Pitrunka, niijjai ishichik tsawant pujustinian seawarmiayi.

## 11

### *Ni túrunamurín Pítiur ujakmiania nu*

<sup>1</sup> Israer-shuarchasha Yusa chichamen umirkarai táman Jesusa akatramurísha tura Jutíanmaya Yus-shuarsha antukarmiayi. <sup>2</sup> Túmainiak Pítiur Jerusarénnum jeamtai, Israer-shuar Yus-shuar ármia nu chichainiak <sup>3</sup> “¿Urukamtia Israer-aents áiniachusha iyumam? ¿Tura aujai tsaninkiam urukamtai yurumámum?” tiarmiayi.

<sup>4</sup> Tutai Pítiur ashí yámankamtaiknumia túrunamun ujakmiayi. <sup>5</sup> Chichaak tímiayi “Wikia Jupe péprunam pujumjai. Tura nuí Yusan auju pujusan ímiarmajai. Tura wanakaram tarachia áanin kuaru tsakarín jinikiakma, nayaimpinmaya táarun wáinkiamjai. Tura wi pujamunam jeartimiai, tímiayi. <sup>6</sup> Tura nuí iyaj tukaman init yajasman, napincha, nanamtinnisha enketainian wáinkiamjai, tímiayi. <sup>7</sup> Tura chichaman antukmajai “Pítru wajakim maam yuata” túrutun antukmajai, tímiayi. <sup>8</sup> Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímiyai, tímiayi. <sup>9</sup> Atak nuyá túrutuk “Wi, péñkeraiti, tájana nu, ámeke, yajauchiiti, tiip” turutmiai, tímiayi. <sup>10</sup> Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. <sup>11</sup> Nuí túruna pujai menaintiú áishman Sesarianmaya akupkamu, winia eatainiak wi pujamunam tarutiarmiai, tímiayi. <sup>12</sup> Tura nuí Yusa Wakaní chichartak “Arantutsuk aujai wetá” túrutkui, wémajai. Tura jú sais Yus-shuarjai wi wémajai. Túrunar ashinkiar Kurniriu jeen wayamji, tímiayi. <sup>13</sup> Niisha chichaak “Jearuí Yusa suntari nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semun Pítiur tatí tusam áishman akatram akupkata. <sup>14</sup> Pítrusha taa, itiura amesha tura áminiurmesha tunaarminia uwemprattam nuna turamtatui.” Yusa suntari nuní turutmiai” tu ujatkamiayi Kurniriu’ tímiayi.

<sup>15</sup> ‘Wi chichastasan júarai, Yusa Wakaní tarurarmiayi, yámankamtaik in tarutrampramij nútiksán, tímiayi. <sup>16</sup> Nuinkia Uunt Jesus timian enentáimpramjai. Niisha tíchamka “Juan entsajain imiakratmiayi. Tura antsu Yusa Wakanínkia imiantinia áintsan atumí enentáin enkemprutmattarme.” Nu timian enentáimpramjai, tímiayi. <sup>17</sup> Atumsha

enentáimpratarum. Uunt Jesukrístu umirkamíaj nuí, incha Yuska ni Wakanín suram-samíaji. Tura in suramsamíaj núnisan Yus nincha ni Wakanín súsarmíayi. Nuna tura asamtai, wikia, túrashtiniaiti, Yúsan títinkiaitiaj” tímiayi Pítiur.

<sup>18</sup> Tura Pítiur taman antukar mitiat wáinkiar “Nekasaiti, Israer-shuarchancha ni enentáin yapajíawarmatai tuke iwiaaku átinian Yuska nin súsaruíti” tiarmiayi. Tusar Yusa náarín ti shiir awajsarmíayi.

### *Yus-Shuar Antiukía péprunam wearmania nu*

<sup>19</sup> Estepañkan máawarmia nuí, chíkich Yus-shuarnasha maatai tusar pataatiarmi-ayi. Túram chíkichkia pisarar Pinisia nunkanam, Chipri nunkanmasha, tura Antiukía péprunmasha wearmiayi. Tura nuí jeawar Yus-Chichaman chikichnaka ujatsuk aya Israer-aentsnak ujakarmiayi. <sup>20</sup> Tura níijiaí Chipri nunkanmaya pisararmia nu Serini nunkanmayasha Yus-shuar ármíayi. Nuka Antiukíanam jeawar Israer-shuarchan Uunt Jesusa túramurín ujakarmiayi. <sup>21</sup> Tura Uunt Jesus ikiakárma ásar, nú nunkanmaya aents ti untsurí yaunchu túrutairín iniaisar Jesusan enentáimtuiniak Yus-shuar ajasarmíayi.

<sup>22</sup> Tura nu chichaman antukar, Jerusarénumia Yus-shuar, ame iyutá tusar, Pirnapín Antiukíanam akupkarmiayi. <sup>23-24</sup> Pirnapísha jeá, Yus nú shuaran uwentikrarma nuna wáiniak warasmíayi. Pirnapísha péñker áishmankauyayi. Yusa Wakanísha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tuke enentáimjái umirkarum Yus nemarsatarum.” Tu chicharak ikiukmiayi. Tura nuísha nú arant untsurí aents Yusaj kawenkararmiayi.

<sup>25</sup> Nuna turasua amik Pirnapí Tarsu péprunam wémiayi Sáurun wáinkiatat tusa. Tura wáiniak Antiukía péprunam jukimiayi. <sup>26</sup> Tura nuí jeawar, nú péprunmaya Yus-shuarjái iruntrar chikichík uwí pujusarmíayi. Yus-Chichaman untsurí shuáran ujaak pujuarmi-ayi. Tura nuí Antiukía péprunmanka Yus-shuaran émkaka, Kristu shuari, tiarmiayi. <sup>27</sup> Nuyá Yusnan etserin Jerusarénumia táarmiayi Antiukíanam. <sup>28-30</sup> Túmainiaí chikichík etserin, ni naari Akaapu, Yus-shuar matsatmanum ajapén wajaki chichasmíayi. Tura Yusa Wakaní nekatairíjiaí chichaak “Ti tsuka ashí núnkanam átatui” tímiayi. Tuma asamtai Antiukíanmaya Yus-shuar chichainiak “Jutía nunkanmaya Yus-shuar ainia nu yáintai” tiarmiayi. Ankant ankant ni wakeriarmia núnik súsarmíayi. Tura nú kuítniasha Jutíanmaya Yus-shuara úntrin akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu pujái.

## 12

### *Pitrun sepunam enkeawarmiania nu*

<sup>1</sup> Nu tsawantái akupin Erutis Yus-shuaran máataj tusa chichaman jurus áentsrín ishiakmiayi. <sup>2</sup> Tura Juanka yachín Jakupun suen tsupirkar máawarmíayi. <sup>3</sup> Nuna tura máawarmatai Israer-aents wáinkiar “júka péñkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmíayi. <sup>4</sup> Pítruncha achik itiar matai, Erutis sepunam enkeata tusa akupkamiayi. Tura sepunam suntarsha ankant ankant, kuaru kuaru, ashikia tiasisáis (16) irunar Pitrun téntakarmiayi. Tura, ju jisat nankaasmatai, mantamnatí tusan jiktiaitjai aents iruntramunam, tu enentáimsamiayi Erutis. <sup>5</sup> Túramu asa Pítruka sepunam pujumiayi. Tura suntarsha mijiatrutsuk iiyarmiayi. Túramunak Yus-shuarka, Pitrun yáinkiat tusar iniaitsuk Yúsan ti áujiarmiayi.

### *Yusa suntari Pitrun uwentikramiania nu*

<sup>6</sup> Wats, Erutis, kashin jiktiajai takui, nú kashi Pítruka jimiará suntar wajamunam etema tepes kanarmiayi. Tura jimiará jirujai jinkiamuyayi. Tura chíkich suntarka jínmanum ii wajarmiayi. <sup>7</sup> Tumái aya aneachma Yusa suntari nayaimpinmaya taa ajapén wajasmíayi. Túrunamtai jeanmanka tsápin ajasmíayi. Tura Yusa suntarísha

Pitrun páenum antiñ ishintiarmiayi. Tura jirusha Pitru uweyéya sayat atiniamiayi. <sup>8</sup> Tura Yusa suntari tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemar-tusta” tímiayi. <sup>9</sup> Tutai Pítiur nemarsamiayi. Túrasha Pítruka, mesekranmaapi júniája, tu enentáimsamiayi. <sup>10</sup> Túrasha emka suntar íimia wajan nan̄kaikiarmiayi. Tura nuyasha chíkich suntar íimia wajan nunasha nan̄kaikiarmiayi. Tura nuyasha jíintiainium jiru waiti ámanum jeawarmatai, nú wáitisha ímia-nin̄ki kuat uranmiayi. Túrunamtai jíinkarmiayi. Tura jintiá ishichik wésan, Yusa suntari Pítrun níniak ikiukmiayi.

<sup>11</sup> Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntariñ nekas akupturkayi. Erutis mantuataj tusan pujurtana nuyá Yusa suntari winia uwemtikrurai. Tura Israer-aents túrutatajtsa wakermia nuyasha uwemtikrurai” tímiayi. <sup>12</sup> Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainaij Pítiur jeamiayi. <sup>13</sup> Tura jeá aa wáitin tuntuimiayi, wayataj tusa. Túmakui nuwá uchich, ni naari Ruti, yákit tusa iyumiayi. <sup>14</sup> Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

<sup>15</sup> Tutai “Wáursumek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

<sup>16</sup> Tu chichainiañ Pítruka tuke tuntuí wajamiayi. Tura wáitin uraj tukamá Pitrun wáinkiar ashamkarmiayi. <sup>17</sup> Ashamak chichainiakui Pítiur, uweje takuí itiat-mamtikiarmiayi. Tura nuyá Uunt Yus sepunmayan uwemtikramun ujakmiayi. Tura “Ju chicham Jakupu tura chíkich Yus-shuarsha ujaktarum” tímiayi. Nuna ti iniais jiinki arant wémiayi.

<sup>18</sup> Kashin tsawar suntarsha Pitrun atsá wáinkiar “Chuwa urukakua men̄kaka. Áyawa urukattajia” tiarmiayi. Pítiur túrunamun nékachu ásar nuna tiarmiayi. <sup>19-20</sup> Túrunamtai Erutis chichaak Pítiur eaktarum tusa akupkarmiayi, túrasha wáinkiacharmia. Túrunamtai Erutis suntaran untsukar, Pítrun ísarmia nuna aniasarmiayi “¿Pítiur itiura men̄kakama?” tímiayi. Niisha áimiainiachkui, nu suntaran mantámnatí tusa akupkamiayi.

### *Erutis jakamiania nu*

Erutissha Tirunmayá tura Setúnmayá áentsjaisha nemasnaikiarmiayi. Túmayatan Jutiá nun̄kan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmayá aents Tirunmayá áentsjai Erutisa nun̄keyan yurumkan súmainia ásar, Erutisjai nawamnaikiatniun wakermia. Tuma asamtai métekrak enentáimsar, Erutisa takarniuri pen̄keri, ni naari Parastu, niijjai emka amikmawar nuyá Erutisan weriar shiir matsamsatniun seawarmiayi. <sup>21</sup> Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaan̄ak áujmatmiayi. <sup>22</sup> Nuñ pujus chichaakui aents unsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi. <sup>23</sup> Tumaj nuyajk Yusa suntari nayaimpinmayá tarí Erutisan jaa awajsamiayi. Tuma asamtai nusha aka yuam jakamiayi. Erutissha Yusan waantu awajtsuk nin̄ki waantu enentáimtuma asa túruna jakamiayi. <sup>24</sup> Túrunamtaisha Yusa chichamenka nú arant pampan̄ki wémiayi. Túmakí ashí nun̄kanam anturamiayi.

<sup>25</sup> Tura Pirnapísha Sáurusha ni takatrñ amukar Jerusarénnumiá Antiukíanam wake-tainiak Juan Márkusan júkiarmiayi.

## 13

*Yus-Shuar Pirnapíncha Sáuruncha Yus-Chichaman etserkarat tusar akupkarmiania nu*

<sup>1</sup> Antiukíanmaya Yus-shuarnum Yusnan etserin páchitra ármiai. Nútiksān Yus-Chichaman jintinniurisha ármiai. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naari Manaen, Sáurusha tímianu ármiai. <sup>2</sup> Tura chíkich tsawantaj niisha yurumtsuk Yúsan áujeak pujuiniaj Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi. <sup>3</sup> Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiai. Túrawar Antiukíanmaya akupkarmiai.

### *Chipri nunkanam jeawarmiai*

<sup>4</sup> Tura nuyanka Yusa Wakaní akupkam Pirnapísha Sáurusha jíinkiar Serusia péprunam jeawarmiai. Tura nuyá uunt kanunam enkemprar Chipri nunkanam jeawarmiai. <sup>5</sup> Juansha yáintaj tusa némarkauyayi. Nuí Saraminia péprunam jeawar Israer-shuar iruntai jeanam wayawar Yus-Chichaman etseriarmiai. <sup>6</sup> Tura Chipri nunkanam pepru ainia nuí wáirkutak Papus péprunam jeawarmiai. Nuí jeawar Israer-aents uwishin ni naari Parjesúsan wáinkiarum. Ni chíkich náarinkia Erimiasauyayi. Niisha uwishniuiat, Yúsnan étsereajai, tíniuyayi. <sup>7</sup> Akupin Serjiu Páurujaj pujuyayi. Nu akupniusha ti péñker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi. <sup>8</sup> Tura uwishin Erimias nuna nakitiak “Auka péñkerchaiti” tímiayi. Akupniusha Yúsan umirkajin tusa nuna tímiayi. <sup>9</sup> Nuyanka Sauru, ni chíkich naari Papru, Yusa Wakaní pimiutkam asa, nu uwishniun úmamkemas iis tímiayi. <sup>10</sup> “Ámeke wáitaitme. Anankartiniatme. Yajauchiitme. Maaj, iwianchiitme. Tura ashí péñker ana nuka imiá nakitniuitme. Tsej, ¿urukamtai Yusa jinti naka ana nu emeskim weam? <sup>11</sup> Paij, yamaikia Uunt Yus asutiámattawai. Yamaikia amesha jjiimi kusurmatai untsurí tsawant tsáapnin penké íischattame” tímiayi. Tura nú chichamaik jji kusurmatai kirit íimiuk chikichan eamiayi enkeki jurukit tusa. <sup>12</sup> Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

### *Chíkich Antiukíanam etserkarmiania nu*

<sup>13</sup> Nuyá Juan waketki Jerusarénum wémiayi. Tura antsu Pápruka ni tsaniakmarijjai kanunam enkemprar Pápus péprunka ikiukiar Pirji péprunam jeawarmiai. Nusha amaini Pampiria nunkanam pujawai. <sup>14</sup> Nuyá Pirji péprun nankaikiar Antiukía péprunam jeawarmiai. Nú Antiukíasha Pisitia nunkanam pujawai. Nuí jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiai. <sup>15</sup> Tura nuí Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiai “Yatsuru, jintiatin chicham takakkurmeka yamaik titiarum. Antukarmí” tiarmiai.

<sup>16</sup> Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi. <sup>17</sup> Ii Yusri ii yaunchu uuntrin Israer-shuartin achikmiayi. Tura niisha írara núnik Ejiptunam matsatainijai Yuska nin páchiniak uunt awajsarmiai. Yus ni kakarmarijjai nú nunkanmaya ii yaunchu uuntrin uwentikrarmiai. <sup>18</sup> Túrasha atsamu nunkanam ii uuntrin kuarenta (40) uwitin Yuska aya kátsuntramiayi. <sup>19</sup> Tura nuyanka siati áentsun mátsatkainian, Kanaan nunkanam matsamarmia nuna amukarmiai. Nú nunkan ii yaunchu úuntrin susataj tusa Yus túramiai. <sup>20</sup> Nuyanka ii uuntri akupniurin, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuatru siántu senkuenta (450) uwí ejemiayi. Samuersha Yúsnan etserin náamtsáin nuna túrimiai Yus. <sup>21</sup> Tura nuyanka áencha juísan nakitiainiak, uunt akupin náamkat tusar Yúsan seawarmiai. Tuíniakui Yuska Sesa uchirín Saúran anaikiamiayi. Nú Saúra úuntrin kua Pinjamínkiauyayi. Tura Saúrsha kuarenta (40) uwí nú áentsun akupkat tusa Yus

tsankatkamiayi. <sup>22</sup> Tura Saúr náamkan ataksha Yus awainkimiayi. Tura nuyá iiksan nú nunkanam uunt akupin atí tusa Tawitian anaikiamiayi. Tura Yuska juna Tawitian tímiayi “Isaí uchirín Tawitian winia enentáir jeamtaí achirmakjai. Tura Winia umirtin átatui” tímiayi. <sup>23</sup> Wats, Tawit weeanmaya Jesusaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarin uminkiát tusa. <sup>24</sup> Jesuska táatsain Juan ashí Israer-shuaran tunaariniá enentáimtumar imiantinian ujakmiayi. <sup>25</sup> Tura Juansha ni jákatniuri jeatemamtaí, chichaak “Átum enentáimtarmena núchaitjai. Wikia Yusa anaikiamuri, Kristu tutai, nákarmena núchaitjai. Antsu Niñkia winia ukunmarui winittiwai. Tura Niisha wíjiainkia ti nankaamantu asamtaí wikia sapatrincha atitrataj tíchamniaitjai” tímiayi.

<sup>26</sup> ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktaram. Ju uwempratin chichamka íniuiti, tímiayi. <sup>27</sup> Iis, Jesusa túrunatniurin Yuska yaunchu ni etserniurin áamtikrachmakia. Tura ukunam Jerusarénnumiá shuar ni akupniurijiai tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirinti tícharmiayi. Tura, jakatí, tiarmia nui, Jesusa túrunatniurin, Yus yaunchu chichakmia nuna, tímiatrusaran umikiarmiayi, tímiayi. <sup>28</sup> Jesuska penké tunaamkachunak yamaikia mantamnatí tusar Piratun seawarmiayi, tímiayi. <sup>29</sup> Tura Yusa Papirín ashí Jesusnan tímia nuna tímiannak umikiarmiayi. Tura nuyá krúsnumiá itiarar iwiarsarmiayi. <sup>30</sup> Túramunak Yus jakamunmayan iniantkimiayi. <sup>31</sup> Jesuska jakamunmaya nantaki, yaunchu Kariréanmaya Jerusarénnum Niijiai irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurin etserainia nu’ tímiayi.

<sup>32</sup> ‘Iisha núnisrik shiir chichaman Yus yaunchu ii apachrin tiarmia nu étsereaji. <sup>33</sup> Iisha Israer-weeá asakrin, Yuska Jesusan iniantkimia nujai ii apachrin anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

<sup>34</sup> Tura Yuska Jesusa nantakmiarín jintintiak, tura ni ayashí káurchatniun jintintiak, chíkich Sarmu papinium juna áamtikramiayi:

“Nekas péñkeran Tawitian anajmatramaj nuna atumin amastatjai.”

<sup>35</sup> Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí káurtincha tsankatkashtatme.”

<sup>36</sup> ‘Nekaatarum, yatsurtiram, Yuska Tawitia ayashin tíchamiayi nuna. Tawitkia Yus tímian amuk jakamiayi. Túrasha ni ayashinkia káurmiayi. <sup>37</sup> Tura antsu Yus iniantkimia nuna ayashinkia penké káurchamiayi. <sup>38</sup> Tuma asamtaí, yatsurtiram nekaatarum. Jesusjainkete tunáa asakártin. <sup>39</sup> Tura Muisais yaunchu akupkama nujai tunáa tsankurnarchamnia nu, yamaikia Jesusjai tsankurnartiniaiti. <sup>40-41</sup> Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum.

Wi Yus asan, átum pujarmena nui, aents túrachminian túratajna nusha penkesh nekaashtatrume, chíkich ujatmainiakuisha.” Tu áarmaiti.

Tuma asamtaí yatsurtiram, aneartarum atumin nuna túrutmawairum, Yusnan etserin aarma tana nútiksan.” Nuna chichaak amukmiayi Papru.

<sup>42</sup> Tura nuyá Papru Pirnapíjiai jiinki wéenakui aents chichainiak “Chíkich sáwartincha jútiksarmek etserkatarum” tiarmiayi. <sup>43</sup> Tura nuyá iruntsua tseñkeenak Israer-shuarsha, tura chíkichkia Israer ajararusha, Yúsan umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairi enentáimtusum kakartarum” tiarmiayi.

<sup>44</sup> Tura chíkich sáwartinkia nu péprunmaya ti untsurí aents Yus-Chicham antuktai tusar tuakarmiayi. <sup>45</sup> Tura Israer-shuarka ti untsurí áentsun tuakarun wáinkiar, suir



iiniak, ti kajerkarmiayi. Tuma asamtai Páprun katsekkar “Ju chichaana júka ántar tawai” tiarmiayi. <sup>46</sup> Támaiat Pápruka Pirnapíjjai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaiatrum nakitramarme. Tura atumsha nakitia asarum, Yúsnum tuke iwiaaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi. <sup>47</sup> Nu túratarum tusa, Uunt Yus akuptamtsujik. Jes, ni Papiriin júna tawai: “Israer-shuarcha Winia nekarawarat tusan anaitiukjame. Tura ashí nunkanmaya aents uwemprarat tusan akuptajme.”

Tu áarmaiti” tímiayi. <sup>48</sup> Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi. <sup>49</sup> Tú tumaki Yus-Chicham nú nunkanam ashí jamarmiayi. <sup>50</sup> Túrasha nuwan, Yúsan péñker enentáimtuinian tura péñker wekainian, Israer-shuarka yajauch enentáimtikrarmiayi. Áishman penkeri ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ni nunkeya jiki awemarmiayi. <sup>51</sup> Túram Papru Pirnapíjjai, ju aentska yajauchiiti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmiayi. <sup>52</sup> Yusa Wakanísha pimiútkamu ásar Yus-shuarka ti warasarmiayi.

## 14

### *Ikiuniu Péprunam túrunamia nu*

<sup>1</sup> Ikiuniu péprunam Papru Pirnapíjjai jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsan umirkarmiayi. <sup>2</sup> Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi. <sup>3</sup> Tuma asamtai Papru Pirnapíjjai nú nunkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitneñkratairín etserkarmiayi. Tura, etserinia nu winia kakarmarjainti tusa, Yuska aents túrachminian najanmamtikiawarmiayi. <sup>4</sup> Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi. <sup>5</sup> Tura nuyá Israer-shuarchajai Israer-shuarka chichasar pepru uuntriijai chichasarmiayi. Tura Papru Pirnapíjjai katsekkar tura kayajai tukurar, yajauch awajsatniun nankamawarmiayi. <sup>6</sup> Túrasha Papru Pirnapíjjai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunkanam pujuiniawai. <sup>7</sup> Tura Yus-Chichaman etserkarmiayi.

### *Ristra péprunam Páprun kayajai tukurarmiania nu*

<sup>8</sup> Ristra péprunam tunamaru áishman pujumiayi. Ni akiiniamuriya tuke wekaichauyayi. <sup>9</sup> Nú áishman Papru chichaamun antúu pujumiayi. Túman Papru úmankemas nin íismiayi. Niisha, Yusa kakarmarijjai tsuamartatjai, tu enentáimiuun Papru nekaamiayi. <sup>10</sup> Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajaki wekaimiayi. <sup>11</sup> Papru túramia nuna aents wáinkiar Rikiaunia chichamjai unsumainiak “Yuska áishmanka áanin ajasaru in tarutramarji” tiarmiayi.

<sup>12</sup> Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. <sup>13</sup> Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsrijjai wáakan maatai tusar pujuarmiayi. Tura tikishmatrar ajamsatai, tiarmiayi. <sup>14</sup> Tura Jesusa akatramurí Pirnapísha Páprusha nuna nekaawar, auka nakitiaji tusar, ni pushirín jaararmiayi. Túrawar aents írunmanum

pachiniawarmiayi. <sup>15</sup> Tura tiarmiayi “Shuara, ¿urukamtai áitkiarum? Iisha yúschaitji. Atumea áankiitji, tiarmiayi. Penké ánrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsancha, tura ashí nui írúnna nunasha najanaiti, tiarmiayi. <sup>16</sup> Jes, aents ni enentáimmiarjijaij wekasarat tusa Yuska yaunchu tsankatkamiayi. <sup>17</sup> Tuma aiñ shuaran péñker awajsamujaj Wiitjai Nekas Yus tusa paant awajmamsamiayi. Kame yumi yutuktinian nayaimpinmaya aupturmaji. Tura ejemamar warasarmí tusa yurumak nerektinniasha súramji” tímiayi.

<sup>18</sup> Túrasha Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

<sup>19</sup> Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajaj tukurarmiayi. Tura jakayi tiar péprunmaya japiki júkiar arant áepsarmiayi. <sup>20</sup> Túrasha Yusshuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjjaj Tirpi péprunam wearmiayi.

<sup>21</sup> Tírpinium pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. <sup>22</sup> Waketainiak “ashí Yus tana nu tímiatrusrumek tuke umirkatarum” tuíniak Yus-shuaran ikiakárarmiayi. Tura nin tiarmiayi, “Yusa akupea-muriin pachiinkiatat takurkia ti wáitsatniuitji.” <sup>23</sup> Tura Yus-shuar írúnmanum Yus-shuaran wáinnium anaikiarmiayi. Yurumtsuk Yúsan áujсар chicharainiak, “umirkarumna nú Yus iirmasarti” tiar ikiukiarmiayi.

### *Yaunchu jíinkiarmla nú Antiukíanam waketkiarmiayi*

<sup>24</sup> Nuyá Pisitia nunkanam nankaamakiar Pampiria nunkanam jeawarmiayi. <sup>25</sup> Nui jeawar Pirji péprunam Yus-Chichaman etserkar nuyá Ataria péprunam wearmiayi. <sup>26</sup> Nui kanunam enkemprar, yaunchu jíinkiarmla nú Antiukía péprunam waketkiarmiayi. Páprusha Pirnapísha tuke jíintsain nú Antiukíanmaya Yus-shuar chichainiak, Yusa takatri túrattarmena nuna Yus waitnentramak yáinmakarti, tiar akupkarmiayi nuikí. <sup>27</sup> Nú Antiukíanam jeawar, Yus-shuaran irurar, ashí Yus nin yáinkiarmla nuna ujakarmiayi. Tura nútiksai Israer-shuarchan Uunt Yus uwemtikrataj tusa untsukmia nunasha ujakarmiayi. <sup>28</sup> Tura nuyá Yus-shuarjaj Papru Pirnapíjjaj núkap tsawant pujusarmiayi.

## 15

### *Jerusarénum Yus-shuara úuntrijaj iruntrarmiania nu*

<sup>1</sup> Nu tsawantin áishman Israer nunkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprash-tatrumé” tiarmiayi. <sup>2</sup> Tuma asamtai Papru Pirnapíjjaj, núchaiti tusar, nú áishmanjaj ti kakaram chicharnaikiarmiayi. Túrasha nuu enentáiniak enentáimsatniun tujinkiarmlai. Tuma asamtai Antiukíanmaya Yus-shuar Páprun Pirnapíncha, atumsha chíkich áentsjaj Jerusarénum wétarum tusar akupkarmiayi. “Tura nui Jesusa akatramurísha Yusshuaran wáinniusa iniasrum itiumainkit tusarum péñker nekaatarum” tiarmiayi. <sup>3</sup> Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

<sup>4</sup> Tura Páprusha Pirnapísha Jerusarénum jeawarmatai Jesusa akatramurísha Yusshuara wáinniurísha tura penké Yus-shuarsha itiwarmiayi. Tura niisha túrunamia nuna mash etserkarmiayi. <sup>5</sup> Túrasha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi. <sup>6</sup> Nuyasha Jesusa

akatramurisha Yus-shuaran wáinniusha nu chichaman nekaatai tusar iruntrarmiayi. <sup>7</sup>Chichasua umikiarmatai Pítiur wajaki tímiayi, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. <sup>8</sup>Tura Yus Niñki ashí aentsu enentáin neka asa, Wíi shuar ajasmin ániawai tusa, ni Wakanin Israer-shuarchan cha susamiayi, in suramsamij nútiksañ. <sup>9</sup>Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyān ni tunaarin japirarmaj, tímiayi. <sup>10-11</sup>Tura iikia nékaji niia áantsarik Jesukrístu waitnenkartutairijjiaí uwempraitji. Nuñkia çurukamtia Yus uwempraru ániawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsañchakait. Warí, ii úntrisha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiayi Pítiur.

<sup>12</sup>Pítiur nuna tutai Pirnapísha Páprusha chichainiak, “Israer-shuarchasha ni kakarmarin nekaawarat tusa aentsti túrachminian túratniun Yuska ti yáinmakmaji” tú ujuam miat wáinkiar antúu pujuarmiayi. <sup>13</sup>Nuna ujasua amikmatai, Jakupusha tímiayi “Yatsurú, antuktarum. <sup>14</sup>Nuik túrachman Yus túramia nuna ii yachi Semuñ Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi. <sup>15</sup>Jusha Yúsnan etserin yaunchu áarmia nu tímiatrusañ túrunayi. Júiti aarma:

<sup>16</sup>“Israer-aents meserar, jea sáanakniua áintsañ ániawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. <sup>17</sup>Ashí nunkanmaya aents, Israer-shuarcha ainia nu, winia náarun pachinia nu, Winia eñkarat tusan túrattajai. <sup>18</sup>Uunt Yus nuna yaunchu ujakmiayi.”

Tu áarmaiti’ tímiayi.

<sup>19</sup>“Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajsachmi. <sup>20-21</sup>Iimiatarum, ashí péprunam Israer-shuar iruntainiam yáunchuyān tuke sáwartin Muisaisa áarmarin jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai ya-jauchiiti. Tura tsanirmawairap. Tura kajentikramua nu yuawairap. Tura numpasha umarairap.” Tu áatratai’ tímiayi Jakupu.

<sup>22</sup>Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaí wéakui, shuar niijjiaí nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar ármiai. <sup>23</sup>Tura niijjiaí ju papin árman akupkarmiayi:

“Iisha Jesusa akatramurj tura Yus-shuara wainniurj tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. <sup>24</sup>Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyānka itiurkatjik” tárume. <sup>25</sup>Tuma asamtai nu nekaar, iisha métekrak enentáimsar, jimiará áishmañ akupkatin anaikiamji. Ju áishmañ ii aneamu yachi Páprujai Pirnapíjiaísha atumin írmasarat tusar akupeaji. <sup>26</sup>Papru tura Pirnapísha ii Uuntri Jesukrístunam surumakarmiayi, ni takatrisha tsuumai ain túrami tusar. <sup>27</sup>Niijjiaí Jútassha tura Sérassha akupeaji. Ii chichaajnia nuna niisha ni wenejai atumin ujatmakartatui. <sup>28-29</sup>Kame túratin asamtai iisha Yusa Wakaníjiaí ju áartin enentáimsaji. Namañ ántar-yus susamu ana nu yuawairap. Tura numpasha umarairap. Kajentikramu ana nusha yuawairap. Tura penké tsanirmawairap. Nuyasha chíkíckia nú nankaamas tíchattaji. Tura antsu nu iniaisarmeka, penker áatrume. Ayu, Yus wáitmakarti.” Tu árman akupkarmiayi.

<sup>30</sup> Tura Antiukíanam akupkam wearmiayi. Nui jeawar Yus-shuaran irurar, papin súarmiayi. <sup>31</sup> Tura Antiukíanmaya Yus-shuarsha nu papin áusar, pé<sub>n</sub>ker jintíamu chichaman áarman wáinkiar, ti shiir enentáimsarmiayi. <sup>32</sup> Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. <sup>33</sup> Tura nu<sub>i</sub> ishichik tsawant pujusarmatai, Yus-shuarka, pé<sub>n</sub>ker waketki-tiarum, tiar akupkarmiayi. <sup>34</sup> Tura Séras juáktinian wakerukmiayi. <sup>35</sup> Páprusha Pir-napíjia<sub>i</sub> juakarmiayi Antiukíanam. Niisha chíkich aentsja<sub>i</sub> Yus-Chichaman étseruk pu-juarmiayi.

*Papru atak Yus-Chichaman ipiampártasa wémiania nu*

<sup>36</sup> Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nu<sub>i</sub> Yusaj<sub>i</sub> ii yachi ainia nusha urukák pujuinia iyutai” tímiayi.

<sup>37</sup> Pirnapíkia Juan Márkusan iijia<sub>i</sub> winiti tusa wakerimiayi. <sup>38</sup> Tura Pampiria nun<sub>n</sub>kanam Juan Márkussha niisháa weu asamtai tura Yusa takatrín iniaisa asamtai, Pápruka ayatniun nakitramiayi. <sup>39</sup> Papru Pirnapíjia<sub>i</sub> ti kakannairar kanakarmiayi. Tura Pirnapíkia Márkusan ayaki Chípriniam wémiayi. <sup>40</sup> Pápruka Sérasan ayaki wéakui Yús-shuar Yus yáinmakarti tinia akupkarmiayi. <sup>41</sup> Tura Siria nun<sub>n</sub>kanmaani wekaráktak, Yus-shuaran ikiakárkutak Sirisianam jeamiayi.

## 16

*Páprusha Sérasja<sub>i</sub> Timiutéun júkiarmiania nu*

<sup>1</sup> Papru Sérasja<sub>i</sub> Tirpi pepru ír<sub>n</sub>kutak Ristra péprunam jeawarmiayi. Tura nu<sub>i</sub> Rístranam Yus-shuaran wáinkiar<sub>i</sub>miayi, ni naari<sub>i</sub> Timiutéu. Ni nukurí<sub>n</sub>kia Israer-shuar Yus-shuara<sub>y</sub>ayi. Tura ni aparí<sub>n</sub>kia Kriaku áentsuyayi. <sup>2</sup> Tura Ristra péprunmaya Ikiuniu péprunmayasha Yus-shuar ármia nu, Timiutéu pé<sub>n</sub>ker wekaawai, tiarmiayi. <sup>3</sup> Kame Pápruka Timiutéun uyuuntusat tusa wakera asa, Timiutéu aparí<sub>i</sub> Kriaku-apachin nekaawarmatai Israer-shuar nu<sub>i</sub> pujuarmia nu yajauch enentáimprara<sub>i</sub>n tusa tsupir-mamtikiamiayi. <sup>4</sup> Tura nuyá Papru Timiutéujai ashí péprunam nu<sub>i</sub> sétur nu<sub>i</sub> sétur wéenak Jesusa akatramurísha Yus-shuaran wáinniusha Jerusaré<sub>n</sub>num nuik jintintian umiktatum tusa ujarkutak wearmiayi. <sup>5</sup> Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawen<sub>n</sub>ki wearmiayi.

*Papru iimiarmia nu*

<sup>6</sup> Tura Yusa Wakaníkia Páprun Yus-Chichaman Asia nun<sub>n</sub>kanam ujaktinian tsan<sub>n</sub>katkachmiayi. Tuma asamtai Pirijia nun<sub>n</sub>kanam tura Karasea nun<sub>n</sub>kanam air<sub>n</sub>kutak, <sup>7</sup> Misia nun<sub>n</sub>ka jeatniunam jeawarmiayi. Túrunawar “Pitinia nun<sub>n</sub>kanam wetai” tiarmiayi. Túrasha Yusa Wakaní nu<sub>i</sub>sha wétinian suritkiarmiayi. <sup>8</sup> Tuma asamtai Misia nun<sub>n</sub>kanam menantki Truas péprunam pachiniawarmiayi. <sup>9</sup> Nu<sub>i</sub> jeawar Papru kashi iimiarmiayi. Masetúnia nun<sub>n</sub>kanmaya áishma<sub>n</sub>kan wajan wáinmiayi. Nu áishma<sub>n</sub> Páprun chicharuk “Winitritia. Yáin<sub>n</sub>tiamnium” tímiayi. <sup>10</sup> Nuyá<sub>n</sub>ka tu iimiarmatai, wisha Páprujai wetai tusar iwiarnarmiaji. Tura Yus incha nú nun<sub>n</sub>kanam ni chichame<sub>e</sub> etserkat tusa ti nekas untsurmakrin wéaji, tímiaji.

*Jiripius Péprunam túrunamia nu*

<sup>11</sup> Tura nuyá<sub>n</sub>ka kanunam en<sub>n</sub>kemprar Truas péprunmaya jíinkir Samutrásia nun<sub>n</sub>kanam jeamiaji. Tura kashin tsawar nuyá<sub>n</sub>ka katjarar Niápuris péprunam jeamiaji. <sup>12</sup> Tura Niápurisnumiá náwek Jiripiusnum jeamiaji. Nui Jiripius péprunmanka Rúmanmaya aents matsamsa ármiai. Tura nú péprusha Masetúnia nun<sub>n</sub>kanam nekas uunt pep<sub>r</sub>uyayi. Tura nu<sub>i</sub>sha seturmaji. <sup>13</sup> Nuyá sáwartin tsawarmatai pepru ikiukir entsá supichik wémiaji. Yus áusatniun iruntrarmia nu<sub>i</sub> pujusar, nuwá iruntrarmia nu Yus-Chicham ujakarmiaji. <sup>14</sup> Nu<sub>i</sub> Tiatira péprunmaya nuwá, ni naari<sub>i</sub> Ritia wáinkiamiaji. Niisha tarach yamakain

pénkeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha pé<sub>́</sub>ker anturkamiayi. Túman, Uunt Yus Papru chichaamun umirkat tusa ni enentáin takasmiayi. <sup>15</sup> Túruna nú nuwá níniurijjiaí imianmiayi. Tura nuyasha chichaak “Yus-shuar nekas ajasai túrutkurmeka winia je<sub>́</sub>aruí winitiarum” tímiayi. Tura nuí jeawakrin setumtikrampramijai.

<sup>16</sup> Tura nuyá ukunam Yus aujsatai tusar wekaamar nuwách nekaamin-iwianch en<sub>́</sub>kemtuumu in<sub>́</sub>kiummakmiayi. Nu nuwáchikia misatkauyayi. Niisha nékamkui nérenniurisha ti kuitriniawarmiayi. <sup>17</sup> Tura nú nuwách incha Pápruncha pataaturmami-aji. Tura kakantar untsumuk “Ju áishman<sub>́</sub>sha nekas Uunt Yúsan umirkaru áiniawai. Tuma asa niisha atumin uwempratin chichaman ujatmarme” tímiayi. <sup>18</sup> Tura nú nuwáchisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijiaí tájame: jíinkitiá ni enentáiyá” tímiayi. Tutai íwianchkia nú chichamaik jíinkimiayi.

<sup>19</sup> Tura nuwáchi nérenniurisha, íwianch jíiki awematniun nekaawar, Páprun Sérasnasha kajerak achikiar pepru uuntri íisarar tusar ajapén júkiarmiayi. <sup>20</sup> Tura pepru úuntriin ejeniar tiarmiayi “Ju áishman<sub>́</sub> Israer-shuar áiniawai. Tura in páchim enentáimtikramainijai. <sup>21</sup> Tura iisha Rúmanmayá aents árin, ii túrachminian, iikia asumprachman jintintramaini-aji” tiarmiayi. <sup>22</sup> Tura nuyánka ashí aents Páprun Sérasnasha kajerkarmiayi. Túramtai pepru uuntri chichainiak “Pushiri áitkiarum numijiaí asutiátarum” tiarmiayi. <sup>23</sup> Tura nuyá ti asutsua amikiar sepunam en<sub>́</sub>keawarmiayi. Tura sepú-iinian chicharuk “Ti pé<sub>́</sub>ker iistá pisararain<sub>́</sub>” tiarmiayi. <sup>24</sup> Nu chichaman antuk, sepú-iin ti init awayámiayi, tura nawen numi najanamujai tee chanuntamiayi. Tú tura ikiukmiayi. <sup>25</sup> Tura kashi ajapén Papru Sérasjai Yusan áujainiak kantampriarmiayi. Tura chíkich en<sub>́</sub>keamusha nuna antúu pujuarmiayi. <sup>26</sup> Tu pujuiniaí aya aneachma ti kakantar u<sub>́</sub>urkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujai en<sub>́</sub>kekar jin<sub>́</sub>kiamusha mash atiniakarmiayi. <sup>27</sup> Túrunamtai sepú-iin shintiarmiayi. Tura wáitisha mash uranar aan wáiniak, en<sub>́</sub>keamusha jíiniar shiákchariash tusa ni puniariniak ukuiniak máamattsa pujumiayi. <sup>28</sup> Tura Papru untsuak “Amek yajauch awajmamsaip. Ashí pujuiniaí” tímiayi.

<sup>29</sup> Tutai sepú-iincha jinia ekeemak tsékenki wayámiayi. Tura Papru Sérasjai pujamunam kuránki jearmiayi. <sup>30</sup> Tura aa jíiki aniasmiayi “Uunta, ¿warí iturkattaj uwemprataj tusana?” tímiayi. <sup>31</sup> Tutai niisha tiarmiayi “Uunt Jesukristu nekas enentáimtustá. Túrakmeka amesha, tura áiniurmesha uwemprattarme” tiarmiayi. <sup>32</sup> Tura nuyá ashí ni jeen pujuarmia nunasha Yus-Chichaman ujakarmiayi. <sup>33</sup> Tura tsawant iránkaí sepú-iincha Páprun Sérasjai numpamnamurin níjiararmiayi. Túramtai nuyasha sepú-iincha nuarijiaí uchirijiaí imianarmiayi. <sup>34</sup> Túramtai nuyasha ni jeen júkiarmiayi. Tura nuísha ayurawarmiayi. Tura sepú-iincha níniurijiaí Yus-shuar ajasu ásar ti shiir warasarmiayi.

<sup>35</sup> Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. <sup>36</sup> Tura nuyánka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia pé<sub>́</sub>kerak jíinkitiarum” tímiayi. <sup>37</sup> Túrasa Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar ímiainiain<sub>́</sub> asutiámamji. Túrawar sepunam en<sub>́</sub>ketmamji. Tura ¿urukamtai yamaikia u<sub>́</sub>uk akuptamkataj tusa wakeruinia? Atsá. Antsu uuntcha ní<sub>́</sub>nki taar jíirmaktiai” tímiayi.

<sup>38</sup> Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar. <sup>39</sup> Túmak ashamainiak Páprun Sérasan weriarmiayi tsan<sub>́</sub>kurturtarum titiai tusar. Nuyasha sepunmayá jíikiar “Yamaikia wáitneasrum wetarum” tiarmiayi. <sup>40</sup> Papru Sérasjai nuyá jíikiar Ritia jeen wearmiayi. Tura Yus-shuaran ikiakárar ikiukiarmiayi.

## 17

*Tisarúnikianam charaatum ajarmia nu*

<sup>1</sup> Papru Sérassa wéenak Ampipuris péprunam Apurunia péprunmasha nan̄kaamakutak Tisarúnikia péprunam jeawarmiayi. Nūi Israer-shuara iruntai jēe ámiayi. <sup>2</sup> Tura Pápruka nuna tuke túrin asa nu jēanam wémiayi. Tura nūisha menaintiu sáwartin Yus-Chichaman paant etsermiayi. <sup>3</sup> Tura Páprusha Yus-Chicham tana tímiatrusān jintintiarmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamur̄in Kristu tútain tájarne” tímiayi Papru.

<sup>4</sup> Nuna takui Israer-aents chikishtarchik umikiarmiayi. Túrawar Paprujaj Sérassaisha tsanīnkiarmiayi. Tura Kriaku aencha ti untsur̄i Yúsan umirkarmiayi. Tura nuwa pen̄kerī armia nusha nútiksarān umikiarmiayi. <sup>5</sup> Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman naki yujáu armia nujaj chichasar nu peprunam charáa charáa ajarmiayi. Tura Páprun Sérasnasha achikiar aentsu úntr̄in suruktai tusar Jasun̄ka jēen árenkarmiayi. <sup>6</sup> Túrasha Páprun Sérasnasha awetrar, Jasun̄kan tura chíkich Yus-shuarnasha achikiar japirkutak júkiarmiayi. Tura pepru úntr̄īn jūniak tiarmiayi “Jū áishman̄sha ashí nun̄kanam charaatum ajá wekarmia nu yamaikia tímiajaj tarutramarji. <sup>7</sup> Tura jū Jasun̄ ni jēen itiaarmiayi. Tura niisha ashí mash Rúmanmayā uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi. <sup>8</sup> Nu chichaman antukar, aents nūi pujuarmia nu, úntr̄imiak charaatum ajarmiayi. <sup>9</sup> Tura Jasun̄ chíkich Yus-shuarjaj Papru nekas awemattaji tusar, paj, kuit ikiuaji, tiarmiayi. Nuna takui pepru untr̄ī nin akupkarmiayi.

*Piríanam*

<sup>10</sup> Nūn̄kia nú kashi Yus-shuar Páprun Sérasnasha Piría péprunam akupkarmiayi. Tura nūi jeawar Israer-shuar iruntai jēanam wearmiayi. <sup>11</sup> Piríamayā aentska Tisarúnikianmayā áentsjain̄kia nan̄kaamas pen̄ker enentáimkia ármiai. Tuke enentáijaj Yus-Chichaman ántiarmiayi. Túrawar tuke tsawant imia nin̄kisha Papru tana nuna nekasashit tusar Yusa papir̄in ii wearmiayi. <sup>12</sup> Tuma ásar untsur̄i shuar Yus-shuar ajasarmiayi. Tura Kriaku aents nuwa pen̄kerī armia nusha áishman̄sha umikiarmiayi. <sup>13</sup> Túrasha Tisarúnikianmayā Israer-shuarka Papru Yus-Chichaman Piría péprunam étserun antukar nūi weriar charaatum awajiarmiayi. <sup>14</sup> Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujaj nūin Piríanam juakarmiayi. <sup>15</sup> Tura Páprun nemariarmia nu Atenas péprunam nin̄ ejeyarmiayi. Tura niisha waketainiakui, Papru chichaman akatar akupkamiayi, Sérassa Timiutéusha wárik winiartí tusa.

*Atenasnum*

<sup>16</sup> Tura Papru Atenas péprunam pujus Sérasnasha Timiutéuncha nákamiayi. Nūi nú péprunam ántar-yus ti írunkui Páprusha kúntuts enentáimmiayi. <sup>17</sup> Tuma asa Israer-shuar iruntai jēanam Israer-shuarjaj tura chíkich aents Yúsan enentáimtiarmia nujaj chichasmiayi. Tura tuke tsawant pepru ajapén aentsjaj in̄kiunaikiar chichasarmiayi. <sup>18</sup> Nuyá chichaman jintin chíkich naarī, ipikiuriu, armia nu, tura chikichcha, ni naarī, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha júsha waritramtajik.” Tura chikichcha tiarmiayi “Yajayā yusnan etserniuchuashit.” Páprusha Jesusa túrunamur̄in tura aents jakamunmayā nantaktinian étserkui nuna tiarmiayi. <sup>19</sup> Nuyanka aents iruntainiam, naarī Ariupaku támanum Páprun júkiarmiayi. Nūisha tuke irunin̄ ármiai. Nūi Páprun aniasarmiayi “Íisha ame yamaram támena nu nekaatai tusar wakeraji, tiarmiayi. <sup>20</sup> Amesha nusháa chicham jintiniaitme. Túmaitkiui jū chichamsha warintiuak tusar nekaatai tusar wakeraji” tiarmiayi.

21 (Atenasnumiã aencha tura chíkich nunkanmaya shuar nuĭ pujuarmia nusha aya yamaram chicham amia nunak ántiarmiayi. Tura aya nunak áujmatarmiayi.) 22 Nuyãnka Papru Ariupakunam ajapén wajaki tímiayi “Atenasnumiã áishmantiram, wi nékajai, atumsha atumi yusrĭ ainia nuyá tsurakchamniaitrum, tímiayi. 23 Kame wi nuik atumĭ yusrĭ enentáimtainiam listaj tukaman nuĭ jeachin iwiaramun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrume’ tímiayi.

24 ‘Nekaatarum, nu Uunt Yuska ashí nunkan tura nuĭ írúnna nuna najanaiti. Tura Niisha nayaimpin nunkancha nérenniurinti. Tura aents najanam nuĭ jeanam nú Yuska pujuchuiti. 25 Niisha aents yáinkiat tusa atsumatsui. Warí, imia-ninĭki Niisha ii iwiaakmarĭn, ii mayattairĭncha tura ashí írúnna nunasha súramtsujik, tímiayi. 26 Nekaatarum. Nuu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrĭn nekapmaiti; ii pujustinniaasha nútiksãñ nakakmiayi. 27 Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi. 28 Jes, iisha Yusjaj iwiaakji. Yusjaj muchitiaji. Tura Yusjaj ii kakarmarĭ takakji. Nútiksãñ atumĭ papĭ-aintrĭ tíchamka “Ashí incha Yus najatmaitji.” 29 Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi. 30 Aents Yúsan nékainiachuk túrawarmiana nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiã enentáimpratarum” túramji, tímiayi. 31 Yuska áishmanĭkan anaikiaiti. Nú áishmanĭ ashí aentsti, yáki pĕnkeran túriniait, yáki yajauchin túriniait núnaka nekarmattaji. Nú áishmanĭ Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Ninĭki achikiuiti. Túrasha nekas anaikiajai tusa, tura ashí áentstiram nekaatarum tusa nú áishmanĭkan jakamunmaya iniantkimiayi” tímiayi Papru.

32 Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmĭ” tiarmiayi. 33 Tutai Papru iniaisamiayi. 34 Tura chíkich aentska Papru táman umikiar nin nemarsarmiayi. Nuisha Tiunĭseu páchitkiauyayi. Niisha Ariupaku áentsuyayi. Tura nuyasha nuwã, ni naarĭ Tamaris, tura chíkich aencha nútiksarañ nemariarmiayi Páprun.

## 18

### *Kurintiu péprunam*

1 Nuyãnka Papru Atenas péprun ikiuki Kurintiu péprunam wémiayi. 2 Tura nuĭ Israer-shuaran ni naarĭ Akiran wáinkiamiayi. Akiraka Puntu nunkanam akiiniauyayi. Tura ukunam Itiaria nunkanam pujaj uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nunkanmaiti. Nuĭ awemamu ásar Akira Kurintiunam nuik támiayi nuwĕ Pirisirajaj. Tura Pápruka Akiran chichastaj tusa werimiayi. 3 Akirasha Páprusha mai juna takau ármiayi, tarach ti núparman jeã najantain najanin ármiayi. Tuma asamtai Papru Akiraj seturmiayi nu takat túrawartai tusa. 4 Tura tuke sáwartin Papru Israer-shuar íruntai jeã wéuyayi. Nuisha Israer-aentsun Kriaku-aentsnasha nútiksarañ Yus-Chichaman ujarar enentáimtikrarmiayi.

5 Tura nuyá Séras Timiutéujaj Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamurĭ Kristu, atum nákarmena nu Jesusaiti” tímiayi. 6 Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuinĭkia ikiuajrume tusa, ni pushirĭn pear tímiayi “Atumek maku-umarme. Tura wikia Yusaj makuumatsjai. Yamaikia Israer-shuaracha ainia nuna Yus-Chichaman ujarartaj tusan werajaj” tímiayi.

<sup>7</sup> Tura nuyanka Israer-shuar iruntai jeanmaya jinki, Yusan enentáimtin áishman Justu jeen wemiayi. Ni jeenka Israer-shuara iruntai jeen ayamach pujumiayi. <sup>8</sup> Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuarijjai uchirijjaisha Yusan umirkamiayi. Tura chíchich aencha Kurintiunmaya armia nu nútiksaran Yus-Chichaman antukar, Jesusan enentáimtusar imianiarumiayi.

<sup>9-10</sup> Nuyá Uunt Yus Páprun mesekran ipiatkamiayi. Chicharuk “Penké ímiatik awaj-tamsachartatui Wi ámijjai pujakui. Ju péprunmasha untsurí aents Winia ajasartin írunui. Tuma asantai ashamtsuk winia chichamur tuke etserkata” tímiayi Yus.

<sup>11</sup> Tura nuí Kurintiu peprunam jimiará uwí ejesattuk Yus-Chichaman étseruk pujumiayi. <sup>12</sup> Tura Kariun, Akaya nunka akupniuri anaikiamu ai, Israer-aents Páprun kajerkarmiayi. Tura kajerainiak akupniunam irunturarmiayi. Túrawar Páprun júkiar ejeniarumiayi. <sup>13</sup> Tu túrawar akupniun chicharainiak “Ju áishman Yusan umirkatniun Muisais akupkamia núnaka íikias ausháa jintíawai” tiarmiayi. <sup>14</sup> Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuinkia, tura akupniun umirchakuinkia, tárumna nuna anturkaintjarne. <sup>15</sup> Túrasha aya chichamnak tura aya náariniak atumí uuntri akupkamia nunak tau asantai, atumek nuámtak ístarum tájarne. Wikia nu chichamnum pachinkiatniun nakitiajai” tímiayi. <sup>16</sup> Taku aa júkmiayi. <sup>17</sup> Tura nuyanka Kriaku aents Israer-shuar iruntai jea úuntrin Sústinisian achikiar awatiarmiayi akupniusha íimmianuman. Túrasha akupin Kariunka túranak penké pachischamiayi.

*Papru Antiukíanam waketki, nuyá atak Yus-Chichaman ipiampartasa wémiania nu*

<sup>18</sup> Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusai yachi ármiania nuna áujas ikiuak Pírisírajai ni aishri Akirajai Senkrea péprunam wearumiayi. Nuí Israer-shuar túrutain umiak Papru ni intiashin awamprumiayi, nuik Yusan tímiaj nuna yamá umíajai tusa. Nuinkia kanunam enkemprarmiayi Siria nunkanam waketkitiai tusar. <sup>19</sup> Tura nuyá Ipiisu péprunam jeawar Pápruka Pírisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi. <sup>20</sup> Tura niisha Páprun juin pujustá tusar seawarmiayi. Túrasha támaitiat, tujintiajai, tímiayi. <sup>21</sup> Nuyanka áujas ikiuak “Wisha Jerusarénum námper átatna nuna pachíintiuktiniaitjai. Tura Yus akuptakuinkia atak tatajai atumin ístaj tusan” tímiayi. Tura kanunam enkemar Ipiisunmaya jínkimiai.

<sup>22</sup> Nuyá Pápruka Sesaria péprunam jeá, nuyanka Jerusarénum wemiayi, Yus-shuaran nuí áujataj tusa. Tura nuyá Antiukíanam wemiayi. <sup>23</sup> Tura Antiukíanam ishichik pujus ataksha weak Karasea nunkanam tura Pirijia nunkanmaani wekaráktak wemiayi. Tura weak Yus-shuar matsamarmia nuna chicharak ikiakáramiayi.

<sup>24</sup> Tumáa pujai Arijiántria péprunmaya Israer-aents Apurus Ipiisu péprunam jeamiayi. Niisha Yusa yaunchu papirin ti penker nekaamiayi. Etserkatniuncha ti nékauyayi. <sup>25</sup> Uunt Yus tímia nunasha unuimiátrauyayi. Tura tuke enentáijjai chichasmiayi. Jesusa túramurin penker jintinniuyayi. Túrasha aya Juan imiakratmanak nekaamiayi. <sup>26</sup> Ju Apurus arantutsuk Israer-shuar iruntai jeanam chichamiayi. Tura Pírisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

<sup>27</sup> Nuyá ukunam Apurus, Akaya nunkanam wétaj takui, Ipiisunmaya Yus-shuar yáinkiar papí áarar atakas akupkarmiayi. Nú áentsnum penkerak jeat tusar túrawarmiayi. Tura Akayanam jeá, nú áentsun Yusa waitnenkratairijjai uwempraru ármia nuna ti yáinkiarumiayi. <sup>28</sup> Tura Apurus Israer-aentsjai paant chichasmiayi. Túrasha Yusa Papirijjai, Jesussha nekas Yusa anaikiamurinti tusa paant jintiak nincha nupetkamiayi.



<sup>1</sup> Tura Apuruska Kurintiunam pujái Pápruka náinniumaani wekaráktak, Ipsiunam jeamiayi. Tura nuisha Yus-shuaran wáinkiamiayi. <sup>2</sup> Tura aniasmiayi “Atumsha Yus-shuar ajasmarmena nui, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

<sup>3</sup> Tutai Papru aniasmiayi “Entá, ¿nuikia atumsha warí enentáimsarme imianmiarum?” tímiayi.

Tutai niisha tiarmiayi “Juan jintinramamaj nu iisha enentáimsar imianmiaji” tiarmiayi.

<sup>4</sup> Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruí winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiayi Papru.

<sup>5</sup> Nuna antukar niisha Uunt Jesusa náarin enentáimtusar ataksháa imianiarmiayi.

<sup>6</sup> Tura Papru ni uwejejai nin antinmatai Yusa Wakaní tarurarmiayi. Túram chíkich chichamjai chichasarmiayi. Túrunawar Yus-Chichaman etseriarmiayi. <sup>7</sup> Nusha tuse (12) áishman ármiai.

<sup>8</sup> Tura nuisha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi. <sup>9</sup> Tura chíkichka ni enentáin ti ikiatsuárarmiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asantai Papru Yus-shuarnaka akanki yaruak Tiranu iskuirariin tuke tsawant Yus-Chichaman ujaarmiayi. <sup>10</sup> Nuna túruki jimiará uwí etserkamiayi. Túramu asantai ashí Asia nunkanmaya aents Israer-shuar tura Israer-shuarcha Uunt Jesusa túramurin antukarmiayi. <sup>11</sup> Tura aentsti túrachminian túrat tusa Yuska ni kakarmarin Páprun susamiayi. <sup>12</sup> Jáanchniasha pushincha Papru antinman júkiar, nánkamas jaa shuaran ejetim, nú jaa shuarsha nuna antinkiar pénger ajaarmiayi. Iwianchrukusha nuna antinkiar, iwianch jíinkimtai ankant ajaarmiayi.

<sup>13</sup> Tura chíkich Israer-aents uwishin ármiai. Tura niisha chíkich chíkich péprunam wear iwianchrukun iwianchrin jíirki akuptin ármiai. Tuma asa niisha Jesusa náarijiai iwianchin jíiktiai tusar, iwianchin chichartuiniak “Nu Jesus Papru ujaana nuna náarijiai jíinkitiarum tájarne” tiarmiayi. <sup>14</sup> Tura Israer Patri uuntri Esewia náartin, siati uchiri ármia nu, nuna túriarmiayi. <sup>15</sup> Túrasha Jesusa náarijiai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi. <sup>16</sup> Nuna tinia iwianchruku áishman tsékenki nú áishman kan kakaram katsumak nupetkarmiayi. Túram ti katsumam niisha misú tura numpamawar jíinkiar pisararmiayi. <sup>17</sup> Nusha Ipi-siu péprunam túrunamiayi. Túrunamtai Ipi-siu péprunmaya Israer-shuarsha tura Israer-shuarchasha nuna túrunamun nekaawar ti ashankarmiayi. Tura Uunt Jesusa náarin shiir awajsarmiayi.

<sup>18</sup> Túmainiai untsurí shuar Yúsan umirkaru Yus-shuar ajatsuk tunáa túrawarmia nuna paant ujakarmiayi. <sup>19</sup> Tura untsurí uwishnumawarmia nu, wawekratai papí ármia nuna itiararmiayi. Itiar, júka iniaiyaji tusar, ashí íimainiaín áesawarmiayi. Nú papí áesawarmia nuna kuítrisha senkuenta mir (50.000) nankaamasauyayi. <sup>20</sup> Tu túrunamtai Uunt Yusa chichame pampanki tura nupetmaki wémiayi.

<sup>21</sup> Tuma asantai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. <sup>22</sup> Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninikia Asia nunkanam seturmiayi.

*Ipsiunam ti charaatum ámiania nu*

<sup>23</sup> Pápruka tuke Ipisiunam pujái, nuyá aents Yus-Chichaman nakitiainiak charaatum ajarmiayi. <sup>24</sup> Iis, nuí Ipisiunam kaya-yusa jeé ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuyayi kuitjai. Tura niisha nú takatjai ti kuítrintin ajasmiayi. Tura chíkich áishman nú takatan takarmia nunasha ti kuítrintin awajsarmiayi. <sup>25</sup> Timitriusha niijjai takarmia nuna ikiaanak, chikichnasha niijjai métek-taku takarmia nunasha ikiaanak niijjai charaatum ajarmiayi. Timitriusha tímiayi “Winia írutramutiram antuktaram. Iisha ju takat takaajnia jujai ti kuit achíatsjik. <sup>26</sup> Tura atumsha ju Papru wáintrumna nu tura ántarmena nu chichaak “Ashí aents najanam yuska ántar áiniawai” tatsuk. Nuna tau asa, juí Ipisiunam, tura arant ashí Asia nunkanam, ni yúsrin iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk. <sup>27</sup> Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusrí Tiana jeen shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajíáwar aun nakitrachartatuak” tímiayi Timitriu.

<sup>28</sup> Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsummiarmiayi.

<sup>29</sup> Nuinkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiayi. <sup>30</sup> Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi. <sup>31</sup> Tura Asia nunkanmaya untri, Páprun amikri ásar, ainkia wayawain tusar chichaman akuptukarmiayi. <sup>32</sup> Túrasha irunar pujuarmia nu, páchim enentáimprar, chíkichka nusháa untsummiarmiayi. Tura chikichcha nútiksaran ausháa untsummiarmiayi. Tura chíkichka ti untsurí, nekaachar “wariniak irunturara” tiarmiayi. <sup>33</sup> Chíkich nuí wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwejen takuimiayi. <sup>34</sup> Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

<sup>35</sup> Ipisiu pepru papí-aintrisha áentsun itiatmamtik tímiayi “Ipisiu shuártiram antuktaram. Ii uunt yusrí Tiana jeé ístinia íchukaitiaji. Tura ni nakumkamurisha nayaimpinmaya iniarmania nusha íschatniukaitiaji. Tura nunasha ashí aents paant nékainiatsuk, tímiayi. <sup>36</sup> Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi. <sup>37</sup> Ímiatarum. Ju áishman átum itiarumna nu, ii yúsrin yajauch chicharkacharai. Tura ni jeen yajauch awajsacharai. <sup>38</sup> Wats, Timitriu tura niijjai takainiana nu tunáa túramun ujaktai tusar wakeruiniakka pepru penkerin werishtinkiait. Nuinkia máimtek iwiainiakartí. <sup>39</sup> Tura chíkich chicham ákuinkia penker iruntrarum iwiaratarum. <sup>40</sup> Kame ju yamá túrunamun nekaawar Rúmanmaya kapitíán “Ii uunt kapitíántri yajauch awajsatai tusarum túrachurmeash” turamchatjash. Warí, niisha “¿Urukantai charaatum ajarum?” takuisha, áimkiatin penké tujinkiattaji” tímiayi. <sup>41</sup> Tura papí-aint nuna tuasua amik “Áukete. Wétarum” tímiayi.

## 20

### *Papru Masetúnia nunkanam Krisia nunkanmasha wémiania nu*

<sup>1</sup> Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. <sup>2</sup> Nú nunkanam wekaráktak, Yus-shuaran jintintrar ikiakármiai. Tura nuyasha Krisia nunkanam jeamiayi. <sup>3</sup> Nuí menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaani

wetajai” tímiayi. <sup>4</sup> Tura Piríanmaya áishman Súpater naartin Páprun atamprimiayi. Tura Tisarúnikianmaya Aristárkusha Sekuntusha Tírpínmaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiayi. <sup>5</sup> Túrawar niisha emki wear Trúas péprunam jeawarmiayi. <sup>6</sup> Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyankarmiaji Trúasnum. Tura nuisha siati tsawant pujusarmiaji.

### *Trúas péprunam túrunamia nu*

<sup>7</sup> Tura tumintin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi. <sup>8</sup> Tura yakí menaintiu pátaranam, tesaamu ámia nuí iruntrarmiaji. Nuísha ji ekemarma untsurí irunmiayi. <sup>9</sup> Tura nuísha natsa Eutikiu, áankamunam ayamas pujusmiayi. Tura Papru ti esaram chichaakui nu nátsasha kari pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarmiayi. <sup>10</sup> Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. <sup>11</sup> Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru. <sup>12</sup> Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

### *Miritiunam wearmiayi*

<sup>13</sup> Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum. <sup>14</sup> Nuí Asunnum inkiunaikiar, Páprusha kanunam enkempramtai, Mitiríniniam jeamji. <sup>15</sup> Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. <sup>16</sup> Pápruka Jerusarénum wari wétajtsa wakerimiayi, pintikiustis naartin jístatin pachiinkiataj tusa. Tuma asamtai, Asia nunkanam ti núkap pujustinian nakitiak “Ipisiunam wéchattajai” tímiayi.

### *Papru Ipisiunmaya úuntrin újsamiania nu*

<sup>17</sup> Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi. <sup>18</sup> Ni taarmatai Papru tímiayi “Atumsha wi Asia nunkanam pujusan itiura túraj nu nékarme. <sup>19</sup> Atumjai tuke tsawant pujumaj nuí, nankaamantuchu enentáimtumasan, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiajn tuke takasmiajai. <sup>20</sup> Ashí pénger ana nu nekaatarum tusan mijiatrutsuk jintintiamjarme. Iruntramarmena nuí tura ankant ankant atumí jeen pujumarmena nuísha Yus-Chichaman ujakmajrume, tímiayi. <sup>21</sup> Tura Israer-shuarnasha Israer-shuarchancha nútiksanak, enentai yapajjárú Uunt Jesukrístu umirkatarum, tímiajrume. <sup>22</sup> Tura yamá Jerusarénum wéajai, Yusa Wakaní túrutkui. Nuísha túrunatana nunasha nekamatsuk wéajai. <sup>23</sup> Tura Yusa Wakaní iniakturkui juna nékajai, ashí pepru wi jeattajna nuí enketátai tusar nákarainiawai. Tura ti wáitsatniun nekapsattajai. <sup>24</sup> Kame wikia jákashtajash. Túrasha warí winia itiurtawa. Wikia Yusa jintiin warasan wekasataj tusan wakerajai. Yusaj wea-wéakuan jáakun iniaisataj tajai. Tura nuyá takatan Uunt Jesus surusmia nuna pénger amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

<sup>25</sup> “Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrume. <sup>26-27</sup> Nekaatarum, ashí Yusa wakeramurin wisha penké úurtsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia penké makuumashtatjai. <sup>28</sup> Tuma asamtai emka atumek ímiastarum. Túrarum nuyá chíkich Yus-shuar íistarum. Yus-shuaran wáinin ajastarum

tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. <sup>29</sup> Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. <sup>30</sup> Túrasha nemartusarat tusar wakeruiniak atumijnian wait chichaman unuikiartin wantinkiertatui. <sup>31</sup> Tuma asamtai yatsurtiram, aneartarum. Wisha menaintiú uwitin tsawaisha káshisha úutchim ankant ankant unuiniamajrumna nu kajinmatkiirap' tímiayi.

<sup>32</sup> 'Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuarar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nuji pachiinkiatarme. <sup>33</sup> Wats, wisha chikichkí shuara kuítrin waririncha wakerutkachuitjai. <sup>34</sup> Antsu winia uwejrui takasan wi atsummiaj nuna sumarmakmajai. Tura winia írutkamuru atsumamurincha wiki sumakmiajai. Nuka paant nékarme. <sup>35</sup> Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. "Achiana nujainkia nankaamas, súana nuka shiir waraawai" tíchamka" tímiayi.

<sup>36</sup> Nuna tuasua amik Papru tikishmarmiyai. Tura ashí niijiai iruntrarmia nú shuar Yúsan áujsarmiyai. <sup>37-38</sup> Tura Papru nuik chichaak "Atakka wáitkiashtatrume" tiniu asamtai, ti kúntuts pujuiniak, úutchim Páprun miniaksarmiyai. Túrawar kanunam ejeniarmiayi.

## 21

### *Papru Jerusarénum wémiania nu*

<sup>1</sup> Tura nuyá Yus-shuar aujsa ikiukir kanunam enkempramji. Tura inkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji. <sup>2</sup> Tura nuji Pataranam pujusar, chíkich kanu Pinisia péprunam wea wáinkiamji. Túmakui nuji enkemprar wémaji. <sup>3</sup> Nuji wésar Chipri nunakaka wáinkiamji. Chíprikia menanmaaní aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jíinkir péprunam wayamji. <sup>4</sup> Nuji Yus-shuar wáinkiar nuin siati tsawant pujusmaji. Tura Yus-shuaran Yusa Wakaní ujakam Páprun chicharainiak "Jerusarénumka wéchatniuitme" tiarmiayi. <sup>5</sup> Tura siati tsawant nankaasmatai jíinkimji. Ashí Yus-shuar ármia nu núwentuk uchirtiuk nemartamkamji, péprunam iniankatmaktiai tusar. Káanmatkanam jear tikishmarar Yus áujsamji. <sup>6</sup> Tura nu amikiar nuinkia áujnaisar ikiukiarmaji. Tura iikia kanunam enkemprakrin ninikia ni jeen waketkiarmiayi.

<sup>7</sup> Iisha Tirunmaya entsak wea-wéakuar Turumáitianam nuin jíinramji. Tura nuji jearsha Yusai yachi ármia nu chichasar nuin chikichkí tsawant pujusmaji. <sup>8</sup> Kashin tsawarar nuyá jíinkir nunkan weri Sesaria péprunam jeamji. Nuji Jiripi jeen jear pujusmaji. Jiripikia Yus-Chichaman etserniuyayi. Nuik Jerusarénum siati áishmankan Yusa takatrin wáinkiarat tusar anaikiarmia nú Jiripiiti. <sup>9</sup> Jiripisha kuaru nawantrin yarumkauyayi nuatnakchan. Niisha Yusa chichamen etserin ármiyai. <sup>10</sup> Tura iisha Jiripi jeen wárum tsawantak pujarin Jutía nunkanmaya aents Yusa etserniuri, Akapu náartin támiayi. <sup>11</sup> Niisha taa Papru emenmamkarin achikmiayi. Tura achik niniki ni nawen tura uwejencha jiniamamiayi. Nuna tura tímiayi "Yusa Wakaní tawai, juna emenmamka nérenniurin Israer-aents jútikia jinikiáwar Israer-shuarchanum surukartatui, tawai" tímiayi. <sup>12</sup> Iisha nu antukar Papru tímiayi "Jerusarénumka weep." Sesarianmaya Yus-shuarsha núnisan Páprun tiarmiayi. <sup>13</sup> Tutai Papru tímiayi "¿Urukamtai úutkuram winia enentáirui kúntuts awajtarum? tímiayi. Wi Jesusna asamtai Jerusarénum jinkiataniakuisha mántuiniakuisha ashamatsjai" tímiayi. <sup>14</sup> Tura iisha Papru emetatai tukamar tujinkiar "wats, nuinkia Uunt Yus wakera nu tímianak ati" tiarmaji.

<sup>15</sup> Nu tiri iniaisar iwiarnarar Jerusarénum wémaji. <sup>16</sup> Chíprinmayá yaunchu Yus-shuar Manasun ni jeen Jerusarénum takakuya nuna ikiatmastinian wakerimiayi. Tuma asantai Sesarianmayá ishichik Yus-shuar nemartamainiak Manasunnasha júkiarmiayi.

### *Papru Jakupu jeen irastajtsa wémiania nu*

<sup>17</sup> Tura iisha Jerusarénum jeawakrin, nui warasar Yus-shuar ti shiir áujtamsarmiaji. <sup>18</sup> Tura kashin tsawar Papru ímiak Jakupu jeen wémiaji. Nui sha Yus-shuara uuntri matsamarmiayi. <sup>19</sup> Páprusha áujas amik, Israer-shuarchanum ni étsermajai Yus túramia nuna yámankamtaikniumia júki chikichkimas ujakar ujakar awajsamiayi. <sup>20</sup> Papru taman antukar “Yus ti pénerchakait” tiarmiayi. Tura Páprun ju chichaman tiarmiayi “Támena nu péneraiti, yatsuru, túrasha Israer-shuar timiá untsurí Yus-shuar ajasu áiniayat, “ashí Muisais akupkama nu umiktiniatji” tuiniawai. <sup>21</sup> Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chíkich nunkanam pujuinia nuna Muisaisa akupkamurí umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” <sup>22</sup> Wátsek, yatsuru, nuinkia itiumainkit. Ame tátintrumin aents nekaawarka ju kajertamainiak káutramkachartatuak. <sup>23</sup> Wats, antsu nuinkia, ju túrata yatsuru. Ju kuaru áishman Yúsan yaunchu tiarmia nuna umiktasa pujuiniawai. <sup>24</sup> Nii júkiarta. Túram niisha Muisais akupkama nuna umikiar nijiamainiakui, amesha nijiamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiashin awampratin áhattawak. Nu áishmanka intiashin awampran Israer-aents wáinkiar, antur-tamkarainia nu, nekaschaiti, turamartatui. Antsu, Pápruka Muisais akupkama tímianak túrawai, turamartatui. <sup>25</sup> Túrasha yatsuru, nekaata, Israer-shuarcha Yus-shuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtiniaitrume, tímiaji. Tura numpasha umarchatniuitrume, kajentikramusha yúashtiniaitrume. Tura tsanirmash-tiniaitrume. Tu áatramji” tiarmiayi.

### *Páprun achikiarmiania nu*

<sup>26</sup> Nuyá tiniu asantai Papru nú kuaru áishmankan júkiarmiayi. Tura kashin tsawarar nímiak nijiamaramiayi, Muisais timia nútiksaran. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi. <sup>27</sup> Túrasha nu siati tsawant amusattuk ajatemsai, Ásianmayá Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi. <sup>28</sup> Achikiar unsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamá ju Jeencha yajauch awajturmají” tiarmiayi.

<sup>29</sup> Jes, nuik Ipsiunmayá Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi. <sup>30</sup> Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha nú chichamaik epentrarmiayi. <sup>31</sup> Tura maatai tusar matsamtuiniái suntara kapitántri Jerusarénumia aents ashí charaatum ajainian antukmiayi. <sup>32</sup> Kapitáncha ni suntarin tura sarjentuncha irur tseke weriarmiayi aents pujuarmia nui. Aencha suntaran tura kapitánin wáinkiar, Páprun asutíniayat iniaisarmiayi. <sup>33</sup> Kapitánka Páprun jeari achikmiayi. Tura jimiará jirujai jinkiamiayi. Nuyasha aniasmiayi “¿Niisha yait? ¿Warinia túrait?” tímiaji. <sup>34</sup> Túrasha aencha untsurí chichaman unsummiarmiayi. Túmainiakui kapitáncha penké nekaachmiayi. Tuma asantai Páprunka suntar pujamunam júkiarmiayi. <sup>35</sup> Tura suntar pujamunam wáitíniam

jeawar Páprun entsaki júkiarmiayi aents imiá kajerainia asamtai. <sup>36</sup> Tura aencha ukunmaani pataakar, mantamnatí, tu untsunmiarmiayi.

### *Papru chichastinian seamiania nu*

<sup>37</sup> Tura Papru suntarnum awayám, Páprusha kapitiánin Kriaku chichamjai chichaak “Wi ishichik chichasaintjame” tímiayi.

Tutai kapitián chichaak “Warí, ¿amesha Kriaku chicham chichastin nékamek? tímiayi. <sup>38</sup> Nuinkia amesha ¿Ejiptunmaya shuárchakaitiam? ¿Nuik kuatru mir (4000) aents, mankartin tutai atsamunam yaruakchamkam? ¿Kapitiánjai meset najanataj tusa túrachmakum?” tímiayi.

<sup>39</sup> Tutai Papru tímiayi “Núchaitjai. Antsu wikia Israer áentsuitjai. Sirisia nunkanam uunt pepru Tarsu náartin ana nuí akiiniaitjai. Tura waitneasam ju aents chichastin tsankatrukta” tímiayi.

<sup>40</sup> Tura kapitián, ayu, tutai, Papru watainiam wajas, mitiat pujustarum tusa uwejen takuimiayi. Tura aents itiatkarmatai Israer-chichamjai chichasmiayi.

## 22

### *Papru áentsun timia nu*

<sup>1</sup> Papru chichaak juna tímiayi: “Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan títiatjana nu waitneasrum anturtuktarum” tímiayi. <sup>2</sup> Tura Papru Israer chichaman chichaakui, aents nuna antukar nú nankaamas itiatkarmiayi. <sup>3</sup> Nuí Papru chichaak “Wikia Israer-shuaraitjai. Tarsu pepru Sirisia nunkanam ana nuí akiiniaitjai. Túmaitiatnak juí Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijiai wakerukuitjai. <sup>4</sup> Tura Jesusan umirkaru ármia nuna máataj tusan pataatukni wekaimiajai. Túran áishman kan nuwancha achikian sepunam enkeataj tusan túrimiajai. <sup>5</sup> Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akuptukarmia nuna ninkia nékainiawai. Jesusan umirkarun achikia ikiaankan juí Jerusarénum asutniáwarat tusan werimjai’ tímiayi.

### *(Túramuri 9.1-19; 26.12-18)*

<sup>6</sup> “Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi. <sup>7</sup> Túrunamtai wisha nunká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imiá pataauram?” turutmiai.

<sup>8</sup> Takui wi aniasmajai “¿Amesha yáitiam, Uunta?”

Tutai “Wikia Nasarénumia Jesusaitjai. Ame pataaturmena nútjai” turutmiai.

<sup>9</sup> Wijjai pujuarmia nu, newaat wajantun wáinkiar ti ashamkarmai. Túrasha ninkia túrutun antukcharmai. <sup>10</sup> Tura wi tímiajai “¿Nuinkia, Uunta, warí ititurkattaj?” tímiajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmiai, tímiayi. <sup>11</sup> Kame wikia nú newaat ajakun íisan jiru kusurmai. Tuma asamtai winia tsaniakmar enkeki jurukiar Tamaskunam ejetiarmai’ tímiayi.

<sup>12</sup> Papru tuke aujmatki wéawai. “Tura nuí Tamaskunam áishman Ananías pujumai. Niisha Yúsan aneak, Muisais akupkarmia nuna umirkaui. Tura nú péprunmaya Israer-shuar ármia nu nin pénger enentáimtiarmiai. <sup>13</sup> Nú Ananías winia írsataj tusa támai. Taa turutmai “Yatsuru Sauru, pénger iimtia.” Túrutkui nú chichamaik pénger íimtiajai. Túrunan Ananíasnasha wáinkiamjai. <sup>14</sup> Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, ísat tusa, winia chichampruncha antukat tusa ámin yaunchu Yus anaitiamkaiti. <sup>15</sup> Amesha Papru, Yusna ana nu ísumna nusha antukumna nusha ashí aents ujakartatme. <sup>16</sup> Tuma asamtai

yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

17 ‘Tura Jerusarénnum waketkin Yusa Uunt Jeen wémajai Yúsan áujساتج tusan. Nui ímiarmajai. 18 Nui Jesus chichartak “Jui Jerusarénnum Wíi túramur etserkattamna nuna antukchartatui. Tuma asamtai wari jíinkim wetá” turutmiai.’

19 ‘Túrutkui wi tímiajai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nui matsatun achikian awatin sepunam enkeawarmia nuna nékainiawai. 20 Tura nuyá Áminiu etserniun Estepankan máiniakuisha wisha wajam-jai. Túruiniakui, “pénkeraiti” tímiajai. Nú arantcha ni pushirín írsamjai” tímiajai.’

21 ‘Túrasha Uunt Jesus winia turutmai “Wetá. Israer-shuarcha matsatainia nui akup-katjame” turutmai” tímiayi Papru.

### *Suntara kapitíántriñ túrunamia nu*

22 Nui matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi. 23 Tura aentska Paprun kajerainiak, ti untsumainiak pushirín tujaat ajapawar nuñkancha nañkimkiamaiakia ajarmiayi. 24 Tura kapitíán nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. 25 Tura Páprun asutiátai tusar jiníárar awajsam Pápruka kapitíánin chicharuk “¿Rúmanmaya aents áyatik asutiámniakait, ni túramuri nekartsuk?” tímiayi.

26 Nuna táman antuk kapitíáncha uunt kapitíánin ujaktaj tusa werí chichaak “Maaj, túrataj tamena nu anearta. Ju áishman Rúmanam pachitkaiti” tímiayi.

27 Nuna antuk uunt kapitíán Páprun werí aniasmiayi “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

28 Tutai “Wikia ti kuítian akikmakmiajai Rúmanam pachiinkiatniun” uunt kapitíán tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachiinkian akiiníaitjai” tímiayi.

29 Nuna takui Páprun asutiátaj tiarmia nuna wárik iniaisar jíiniar wearmiayi. Tura imia uunt kapitíáncha Rúmanam pachitkian jiníkiá asa ashankamiayi.

30 Tuma asa kashin tsawar uunt kapitíán, urukamtaik Páprun imiá kajerainia, nekaataj tusa wakerak Paprun werí jiníkiámun atirmiayi. Tura Israer-patri uuntriñ chíkich naamka armia nújaisha ikiaankamiayi. Tura nuñkia ni matsatmanum Páprun itiar ajapén awajsamiai.

## 23

### *Israer-aentsu Úuntriñ Papru timiania nu*

1 Papru Israer-patri naamkarín úmamkes iis “Wíi shuartiram antuktatum. Úchichik tuke yamaisha Yus ímmianum péñker wekainuitjai” tímiayi.

2 Papru nuna takui Israer-patri uuntri Ananías, ni suntarín Papruí ayamas pujuarmia nuna “Wenunam awatiarum” tímiayi.

3 Tutai Papru tímiayi “Tsej, jimiará chichamtinia ímiatá, Yus amincha asutiámattawai. Muisais akupeana nuna umiatsui tusam yajauch turutatssam pujame. Entá, ¿nuñkia urukamtia Muisais tímia nuka iniaisam ame suntarum winia asutiátarum tame?” tímiayi.

4 Tura nuna takui nui wajarmia nu Páprun tiarmiayi “¿Maaj, amesha Patri uuntri imiá yajauchisha chichaream?”

<sup>5</sup> Tutai Papru tímiayi “Yatsuru, wisha Patri uuntri áutskaitia tíchamjai. Nékaitkiunka núnaka tíchaajai. Kame wisha nékajai, Yus-Chichamnum tawai “Atumí uuntri yajauch chicharkairap” tawai” tímiayi.

<sup>6-8</sup> Israer-aentsu úuntriya jimiara írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntarisha aentsu wakanísha tura iwianchcha atsawai, tiniu ármiai. Antsu Pariséu aentska, nuka ashí awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmaya ukunam nantaktin átatui tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasarañ nusháa nusháa enentáimprarmiayi. <sup>9</sup> Nuñkia ashí aents charaatum ajararmiayi. Tura Israer-shuara jintinniuri Pariséunam írutka armia nu wajakiar tiarmiayi “Ju áishmañ tunaan penké túrichuiti. Yusa suntari chíkich wakancha nin nekas chichaschamashi. ¿Ya neka?” tiarmiayi. <sup>10</sup> Ti charaatum ajainiakui suntara kapitíantri Páprun achiarchartimpiash tusa suntaran untsuk, “Jiiktiarum, túrarum suntar pujamunam awayátarum” tímiayi. <sup>11</sup> Nuyá kashi Papru Uuntri mesekra ipiatuk “Kakaram ajasta, Papru. Juí Jerusareñnum winia ujakarumna núnismek Rúmanmasha ujaktatme” tímiayi.

### *Páprun máatniun wakeriarmiania nu*

<sup>12</sup> Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yumñkramu atai” tiarmiayi. <sup>13</sup> Nuna tiarmia nuka kuarenta (40) nankaamas ármiai. <sup>14</sup> Tura Israer-patri uuntrin tura Israer-aentsu uuntrincha weriar “Papru máachkurkia penké yurumtsuk pujustatji. Máachrikia yajauchiniam yumñkramu atai” taji. <sup>15</sup> Tuma asamtai ashí Israer-patri naamkaríjia suntara kapitíantri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar niñkia táatsain nákatatji” tiarmiayi.

<sup>16</sup> Tura Papru awe nú chichaman antuk suntar pujamunam taa Páprun ujakmiayi. <sup>17</sup> Tuma asamtai Pápruka suntara kapitíantrin untsuk “Ju uchi uunt kapitíannium jukitia. Niisha chichaman takakui” tímiayi.

<sup>18</sup> Kapitíancha uchin uunt kapitíannium eje tímiayi “Papru enkeamu pujana nu winia untsurak “Ju uchi uunt kapitíannium jukitia. Chichaman takakui” túrutui” tímiayi.

<sup>19</sup> Uunt kapitíancha nú uchin enkeki arantach jukí chicharuk “¿Warí turuttiaj tame?” tímiayi.

<sup>20</sup> Tutai uchi tímiayi “Israer-aents Páprun chichaman jurusarai. “Papru túramuri ti paant nekaatai tusar kashin Israer-shuara uuntriin ejetarum” turamartatui. <sup>21</sup> Tura amesha nuna takui anturkaip. Kuarenta (40) nankaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin titi tusa nákarmainiawai” tímiayi uchi.

<sup>22</sup> Tura uunt kapitíancha uchin chicharuk “Ame túrutmena nu chíkich aents penké ujakaraip’ tímiayi. Nuna ti, uchin akupkamiayi.

### *Akupin Piriksai ejetiarmiania nu*

<sup>23</sup> Nuyanka uunt kapitíancha chíkich kapitíanin jimiaran itia chichaak “Urum, kashi ajapén ajastatuk aj, untsurí suntar ikiaankarta. Jimiara sián (200) aya náwek, setenta (70) kawainium eketka, nuyá chíkich jimiara sián (200) naníjiañ Sesaria nunkanam wétin iwiarata. <sup>24</sup> Páprusha kawainium ekemkatin iwiarturta. Túrarum penkerak ejetarum akupin Piriksai” tímiayi. <sup>25</sup> Tura niijiaj ju chichaman átrar akuptukmiayi:



26 “Ti péñker akupin Píriks, wikia Krautiu Rísias ju papin áatjame. 27 Israer-aents ju áishman̄kan maatai tusar wakeruiniak achikiarmiayi. Tura niisha Rúmanmaya áentsuitkui wikia nuna nekaan suntarjaj werin jukimjai. 28 Wikia ¿urukamtaik achikiaruit? tusan Israer-patri naamkarin jukimjai nin. 29 Páprunka ii uuntri akupkamurin umiatsui tusar nin kajeriarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi. 30 Tura wisha Israer-aents nin máatniun chichaman jurusman nekaan amiin akuptajme. Nuyasha nin kajerainia nunasha tajai “Atumsha Piriksaj werum átum warinma kajerarum nu títiarum” tajai. Ayu. Júchiniak tájame.” Nuna tu áatar akuptukmiayi.

31 Tura suntarsha ni uunt kapitíantri tímia nútiksaran Páprun kashi júkiarmiayi Antipatris péprunam. 32 Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujaj wearmiayi. 33 Sesaria péprunam jeawar papin Piriksan súsarmiayi. Tura Pápruncha nuí ejeniarmiayi.

34 Akupniusha papí aujsua amik Páprun aniasmiayi “Amesha, ¿tuí akiiniaitiam?” Tutai “Sirisia nunkanmayaitjai” tímiayi.

35 Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiayi, suntar ísarat tusa.

## 24

### *Papru Píriksajaj áujmatsamiania nu*

1 Tura senku tsawant nankaamasaj Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujaj táarmiayi. Ju aents Páprun kajerainia ásar akupniunam wearmiayi. 2 Nuí Páprun itiarматаi Térturu chichatan juarmiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. 3 Tuma asakmin iisha ashí matsatmanum tuke tsawant ti shiir yuminsamajme, uunta. 4 Tura amesha ti núkap chicham antuktin nakitiatspash. Tuma asantai antsu ishichik waitneasam anturtukta, tímiayi. 5 Ju áishman̄ Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úntrinti. 6 Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujaj métek asutiátai tusar wakerimji. 7 Túrarin nuyanka kapitían Rísias taa tapit achik jurutramkimijai. 8 Tura atumek akupin Piriksaj werum nuí aujmatkatarum, turamaji, tímiayi. Tuma asantai amesha Píriks, Papru aniasta. Nuiñkia ii tájinia nu nekasaiti, nu nekaattame” tímiayi Térturu.

9 Tura Israer-aents pujuarmia nu “Nekasaiti ashí ni tana nu” tiarmiayi.

10 Nuyá Píriks, uwejejaj, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsurí uwitin pujusuitme. Tuma asantai nuikia shiir enentáimsan páchitsuk chichastatjai. 11 Wats, wi túramur nekartuata. Yúsan áujmataj tusan Jerusarénum wi wémajna nu tuse (12) tsawant nankaamasai. 12 Nuisha yajauch áujmatki weaj wáitkiacharmai. Yusa Uunt Jeencha tura Israer-shuara aujtai jeencha tura pepru jintianmasha áentsnum charáa charáa ajá wekaaj penké wáitkiacharmai, tímiayi. 13 Ju aents juí matsatainia nu wíniaka penké turutchamnia áiniawai. 14 Túrasha juna paant ujaajme. Jesus yamarman jintiána nuna umíajai. Kame Israer-aentska wáitaiiti tuinia nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiaitjai. 15 Tura jakaasha nantaktin átatui, tajai. Warí, péñker aents nútiksaj yajauch aencha nantakiartatui imia Israer-shuar tuiniatsuk. Tura wisha nútiksanak túrunatniuiti tajai. 16 Tura wisha tiniu asan,

wikia winia enentáirui Yus ímmianum makuumatsuk wekasataj tajai. Tura áentsnumsha nútiksanak penké makuumatsuk wekaajai' tímiayi.

<sup>17</sup> Tura, uunta, untsurí uwitin chíkich chíkich nunkanam wekaasuan amikian winia shuarui támajai. Kuítrinchán kuítian susataj tusan tura Yusa kuítríncha nin susataj tusan támajai. <sup>18</sup> Túran wisha, Muisais jintinmia nútiksanak nijiaamaran, Yusa Uunt Jeen pujumiajai. Untsurí aents charaatum ajainiasha atsumiayi. Nuí wiki pujái Ásianmayá Israeraents wáitkiarmiayi. <sup>19</sup> Tura wi yajauch túraitkuíñkia winia wáitkiarainia nu táchatniukait ámin ujatmaktasa. <sup>20</sup> Túrachkuíñkia juí pujuinia nu, Israer-patri naamkari matsatmanum wi pujumajna nuí yajauch túramun nékainiakka turutiarti. <sup>21</sup> Kame, ““jakamunmayá nantakminiaiti” tau asantai makuurtiajtsarum pujarme” matsatmanum tímiaj nujai turutchartimpiash. Nú arantka yajauch túramun penké nekartuacharmai” tímiayi Papru.

<sup>22</sup> Táman antuk Píriks, Kristu shuari túramun paant nekáa, áanik iniaisamiayi. “Antsu kapitíán Risias támatai nuíñkia nu chichaman nekaatjai” tímiayi. <sup>23</sup> Tura nuyá suntara kapitíántrín chichaak “Ju Pápruka tuke emetnati. Tura ishichkikia ankant apujtsarum. Tura nuyá ni amikri taa yáintaj takui suritkiairap” tímiayi.

<sup>24</sup> Tura nuyá chíkich tsawantaj ataksha Píriks ni nuwejají Tursirajají támiayi. Núwenka Israer-shuarauyayi. Pírikska “Papru itiatarum' tímiayi. Papru Jesukristunun étserkui antimiai. <sup>25</sup> Tura Pápruka yajauchiniam wekasashtincha naka wekasatniuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi. <sup>26</sup> Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa. <sup>27</sup> Tura nuyanka jimiará uwí nankaasmatai Píriks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Pírikska, Israeraents péñker enentáimtursarat tusa wakerak, Páprun sepunam tuke ikiukmiayi.

## 25

### *Papru Jístujají áujmatsamiania nu*

<sup>1</sup> Jístusha akupkatin takatan nankaamataj tusa Sesaria péprunam támiayi. Tura menaintiú tsawant nankaasmatai nuyá we Jerusarénum jeamiayi. <sup>2</sup> Nuísha Israer-patri uuntri tura Israeraentsu penkerísha Páprun tsanumprurtai tusar Jístun weriarmiayi. <sup>3</sup> Tura tiarmiayi “Waitneasam Páprusha Jerusarénum akupkata” tiarmiayi. Jintiá maatai tusar wakeruiniak nuna tiarmiayi.

<sup>4</sup> Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuí wárik waketkittiajai” tímiayi. <sup>5</sup> Nuyá nin tímiayi “Atumsha penkeri árumna nu, wijiájí Sesarianam wétiniaitrume. Tura nú áishmanka tunaari ákuíñkia nuísha títiniaitrume” tímiayi.

<sup>6</sup> Jístuka Jerusarénum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nuí jeá kashin tsawar, akupin pujutainium pujus “Papru itiatarum” tímiayi. <sup>7</sup> Tura Papru wayamtai, Israeraents Jerusarénumia taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmiayi. Túrusha penké uyumantikiacharmiayi.

<sup>8</sup> Pápruka chichamprumak tímiayi “Wisha tunaan penké túrachuitjai. Israera uuntri áarmaríncha umirkaruitjai. Tura Yusa Uunt Jeencha yajauch awajsachuitjai. Tura uunt kapitíánniasha yajauch penké chicharkachuitjai” tímiayi.

<sup>9</sup> Jístuka Israeraents péñker enentáimtursarat tusa wakerak, Páprun tímiayi “Wakerakmíñkia Jerusarénum wemí. Wisha nuí ame túramurmin nekaatjai” tímiayi.

<sup>10</sup> Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. <sup>11</sup> Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuinkia wíniaka Israer-shuarnum surunkachminiaitjai tajai. Tuma asamtai seajme, wíi túramun uunt akupin Sésar nekartuati” tímiayi.

<sup>12</sup> Tutai, nuyá ni írutramurijjiai chichasua amik, Jistu Páprun tímiayi “Uunt akupniui wétaj tusam seame. Tuma asamtai nuí wétatme” tímiayi.

### *Papru uunt akupniujai áujmatsamiania nu*

<sup>13</sup> Tura ishichik tsawant nankaamasmatai akupin Akripia ni nuwejai Pirinísejai Jístun áujstataj tusa Sesarianam wearmiayi. <sup>14</sup> Tura untsurí tsawant pujusarmiayi. Tura nuí pujuiniaí Jístuka Papru túrunamun akupniun ujaak tímiayi “Juí áishman pujawai. Píriks nin achik enkea ikiukmiayi, tímiayi. <sup>15</sup> Kame wikia Jerusarénum pujái Israer-patri uuntri tura Israer-aentsu úntrisha, Papru yajauchin túraiti tusar káutrukarmiayi, tímiayi. Mantamnati tusam akupkata, tu seattiararmiayi. <sup>16</sup> Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsajin mantamnati tusar akupeatsji iisha” tímiajai. <sup>17</sup> Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai. <sup>18</sup> Tura Páprun tsanumprurtaí tusar taar chichainiaksha, wi enentáimmiajna núnaka tícharmiayi. <sup>19</sup> Antsu áyatik Yus umirkar túmatairín Papru nuna túrachai, tiarmiayi. Tura nuyasha áishman Jesus naartin nantaki iwiaakui tawai Pápruka, tiarmiayi. Nunak tiarmiayi. <sup>20</sup> Tura wikia nú chichaman túratniun nékachu asan, Páprun aniasmajai “¿Amesha Jerusarénum wétaj tusam wakeramek? Nuí nu chichaman nekartamawarti” tímiajai. <sup>21</sup> Túrasa “Atsá. Juin pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuinkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

<sup>22</sup> Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”. <sup>23</sup> Tura kashin tsawar Akripia Pirinísejai taar, iwiaa-iwiarmamu ajas wayawarmiayi. Suntara úntrijjiai tura nú péprunmaya úntrijjiai wayawarmiayi. Tura nuí Jistu, “Papru itiatarum” tímiayi. <sup>24</sup> Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman íistarum. Ti untsurí Israer-aents Jerusarénumsha tura juí Sesarianmasha ju áishman kan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai. <sup>25</sup> Túrasa wíjiainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. <sup>26</sup> Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. <sup>27</sup> Warí wisha, ni yajauch túramurín áattsuk, uunt akupniunam akupkashtiniaitjai” tímiayi.

## 26

### *Papru Akripiaí chichamprumakmiania nu*

<sup>1</sup> Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takui chichatan juarmiayi. <sup>2-3</sup> Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam pénker anturtukta’ tímiayi.

### *Papru ni yaunchu túrutairín ujakmiania nu*

<sup>4</sup> ‘Wi úchichik winia nunkaruī tura Jerusarénnumsha pujusan wi túramajna nuna ashí wí aents Israer ainia nu nékainiawai. <sup>5</sup> Pariséu ajasan, ni akupeamurīn itiurchat aīn ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. <sup>6</sup> Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrīn yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. <sup>7</sup> Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkur<sup>i</sup>, tsawáisha káshisha nú enentáimtuiniiaji. Tura wisha nú chichamnak enentáimta asamtai wíniaka kajertuiniawai, uunt Akripia. <sup>8</sup> Warí, atumsha “Yus jakancha iniantkimniaiti” tátsurmek’ tímiayi.

<sup>9</sup> ‘Tura wisha yáunchuka Nasarénumiā Jesusnan umirkaruka kajerkatniuiti, tu enentáimniuyajai. <sup>10</sup> Tura Jerusarénnum Yus-shuar ármia nuna kajerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia péñkeraiti tu wémiajai. <sup>11</sup> Tura Israer-shuara iruntai jeen wayan ti asutiármiajai, Jesusnan umirkatniun iniaisarat tusan. Tura imiá kajerkaran chíkich nunkanmasha pataatu wearmiajai achiktaj tusan’ tímiayi.

*Tamasku jintianam túrunamun ujakmiania nu*  
(Túramurī 9.1-19; 22.6-16)

<sup>12</sup> ‘Tura Israer-patri uuntri tsan̄katrukmatāi, papin ni surusarmia nujai, Tamasku péprunam wétaj tusan jíinkimijai. <sup>13</sup> Tura, uunta, nantu tutupin aī, jintiá wéai newaat ajaki ti tsáapin, tsawái nantujai nan̄kaamas etsantrurarmiayi. Tura wijiaī wearmia nunasha núnisarañ etsantrurarmiayi. <sup>14</sup> Tura túrunamtai ashí nun̄ká tepetar wáinkiarimiaji. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka san̄kanmiak numin ijiuna núnismek. Wí aents kajera asam túruname” turutmai.’

<sup>15</sup> ‘Túrutkui wisha “¿Amesha yáitiam, Uunta?” tímiajai.

Tutai Uunt turutmai “Wisha Jesusaitjai, ame pataatamna núitjai. <sup>16</sup> Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai. <sup>17</sup> Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. <sup>18</sup> Péñker jintintiata tusan akupeajme. Kame aencha kiritniumiā jíinkiar tsáapninium wekasarat tusan, tura iwianchin umirtsuk Yúsān umirkarat tusan akupeajme. Tura Winia enentáimtursarmatai Wisha ni tunaarīn tsankurattajai. Nuna túran Yusna ajasaru áiniana nujai apujstatajai.” Nuna Jesus turutmai’ tímiayi.

*Papru mesekrampra umikman ujakmiania nu*

<sup>19</sup> ‘Tuma asamtai, uunt Akripia, Uunt Jesus nayaimpinmaya wantinturak turutmia nuna umirkataj tusan pujajai. <sup>20</sup> Enentāi yapajiáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarénnumiān, Jutía nunkanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiajai ashí shuaran. <sup>21</sup> Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. <sup>22</sup> Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaisha, Yúsān etserniusha tiarmia nunak étsereajai. Nú arantka tátsujai. <sup>23</sup> Krístuka wáitsatniuyayi, tura jakasha émak nantaktiniuyayi, ii uuntri tiniu ármiaji. Tura Krístuka nantaki Yusa chichamen íi áentsun tura Israer-shuarchancha

nútiksān ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

*Papru Akripian Yus-shuar awajsataj tusa wakerimiania nu*

<sup>24</sup>Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

<sup>25</sup>Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti.

<sup>26</sup>Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

<sup>27</sup>Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

<sup>28</sup>Takui Akripia chichaak “Maaj, ishichik awajtame Papru, Yus-shuar ajastin” tímiayi.

<sup>29</sup>Tutai Papru tímiayi “Tura ishichík chichamjaisha untsurí chichamjaisha, amesha uunt Akripia, tura ashí winia anturtukurmena nu, wijjai métek ajasúk tusan wakerajai. Tura antsu wia núnisan jiníkiámua núnaka wakeratsjai” tímiayi.

<sup>30</sup>Papru nuna tuasua amikmatai akupniusha, uunt kapitíáncha, Pirinísesha, tura nuí ashí pujuarmia nu wajakiarmiayi. <sup>31</sup>Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

<sup>32</sup>Tura Akripia Jístun tímiayi “Ju áishman “uunt akupin nekarati” tíchaitkuinkia akupmai makuitji” tímiayi.

## 27

*Páprun Rúmanam akupkarmiania nu*

<sup>1</sup>Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitíántrijai nenakar akupkarmiayi. Nú kapitíáni naari Júriuiti. <sup>2</sup>Tura Atramitiunmaya kanu Asia nunkanam pepru ármia nuí wétasa pujumia nu enkemprarmiaji. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. <sup>3</sup>Nuí enkemprar kashin tsawarar Sitiun péprunam jeamiaji. Nuí jeawakrin kapitíán Juriu, Páprun waitnentak tímiayi “Ame amikrumjin wetá. Au írmasarti” tímiayi. <sup>4</sup>Tura Sitiunnumia jínkir, kanujai wesar nase tukumpramprakin Chipri núnkaka menanmaani aa ikiukmiaji. <sup>5</sup>Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti. <sup>6</sup>Nuí jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitíántri, enkempratarum, turammiaji. <sup>7</sup>Tura untsurí tsawant yáitmataik we-wémiaji tura ti wiántkar Nítionam jeastatuk ajasmiaji. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji. <sup>8</sup>Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti. <sup>9</sup>Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin. <sup>10</sup>Tura Papru chicharuk “Amikru antuktatum. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjash” tímiayi. <sup>11</sup>Suntara kapitíántriníka Páprunka anturtsuk, kanú wianniurin kapitíántrincha tura kanú kapitíántrincha chichamen anturkarmiayi. <sup>12</sup>Tura nuí Shiir Pujutai tutainium yumitin pujustin penkerchaitkui “Nuiníka juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

*Tsúumainium wekasarmiania nu*

<sup>13</sup> Tuma asamtai ukunam nase nunkaaniā tǎpiriri ajakui, ii wétin yamaikia péñkeraiti, tu enentáimsarmiayi. Túmakui kanu emetai jiru júusar jíinkir Krítianam ayamchik wearmi-aji. <sup>14</sup> Túrasha árusañ arakiā kakaram nase, Nuristi tuinia nu tukumpramiayi. <sup>15</sup> Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. <sup>16</sup> Tura Kritia nunkanam áawinini nankaamakur nuinkia nase ishichik mijiantmatai, uchich kanu japikir wémiaj nu ti takasar uunt kanunam enkermiaji. <sup>17</sup> Tura enkerar chapikjai uunt kanun jinikiáarmiayi wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiayi. Nu tarach nase útsuktin tusar nenarma áarmiayi. Túrawar áyatik nase juramkitiai, tiarmiayi. <sup>18</sup> Tura kashin tsawarmatai nasesha chíchimisha tímiatrusañ kakaram aa asamtai kanunmayan káarak irunmia nuna nayaantsanam ajapawarmiayi. <sup>19</sup> Menaintiú tsawant nankaasmatai iisha ii uwejéjain kanunam káarak iruniarmia nusha entsá utsankarmiayi. <sup>20</sup> Tura untsurí tsawant tsawajisha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin atsawai” tiarmiayi. <sup>21</sup> Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Krítianmayan ka jíintsuk anturtukuitkiurminkia yamá ju iturchatnum pujutsuk tura emenkatmatsuk pujaaji’ tímiayi.”

<sup>22-24</sup> ‘Yamá kashi winia Yusru suntari nayaimpinmaya wantintiurkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma pérunam uunt akupniunam jeattame. Tura chikichnasha ámijiai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui. <sup>25</sup> Wisha winia Yúsrin nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum. <sup>26</sup> Tura chíchimisha nunka uchich pújakmanum nu patatmittiaji” tímiayi.

<sup>27</sup> Ayu, katurse (14) tsawant nankaasmatai nú kashi Atria nayaantsanam jeamiaji. Nu nase nánkamas juram wémiaji. Nuyanka kashi ajapén wiantin armia nu nunka ámunam jeateman nekaawarmiayi. <sup>28</sup> Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemañ ataksha nekapmamiayi. Nuinkia painti siati (27) mítru nekapmamiayi. Tuma asa nunká anumsatuk ajasun nekaawarmiayi. <sup>29</sup> Tura kayanam ijiukai tusar ashamainiak kuatru jirun kijinian chapikjai kanú senkarin jinikiáwar entsá ajunkarmiayi. Kijin asamtai, inít tepeámtai nase juramkichmi tusar túrawarmiayi. Tura wake mesekar, tsawarti tusar matsamarmiayi.

<sup>30</sup> Tura matsatainiaj wiantin armia nu, iikia uchich kanunam enkemprar pisarchatjiash tu enentáimsarmiayi. Túmainiak kanú nujinia chíkich jirun ajuntaí tawa nútiksarañ uchich kanun ajuntaí tusar pujuarmiayi. <sup>31</sup> Tura tuma wáiniak Papru suntara kapi-tiántrin tura ni suntarincha ujakmiayi. “Ausha uunt kanunman enketainiachkuinkia atumsha uwemprashtatrume” tímiayi. <sup>32</sup> Tutai suntarsha uchich kanú chapikrin tsupirkar entsá ajunkarmiayi.

<sup>33</sup> Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. <sup>34</sup> Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

<sup>35</sup> Nuna tuasua amik Papru apatkun achik Yúsan yuminsamiayi ashí ímmianuman. Tura puuk yuamiayi. <sup>36</sup> Tura apatkun yuan wáinkiar, ashí aents shiir enentáimsar yurumáwarmiayi. <sup>37</sup> Nusha ashí aents irurmaka jimiará siañ nuyá ataksha setenta sais (276) áarmiayi. <sup>38</sup> Yurumáwar ejemakar, yurumkanka entsá utsankarmiayi, uunt kanu wampú ajasat tusar.

*Kanu penké mesermiania nu*

<sup>39</sup> Tura tsawarmatai wiantin armia nu, nunkan nekaacharmiayi. Túrasha énkentamunam káanmatak aan wáinkiar “Ai kanu anuntai” tiarmiayi. <sup>40</sup> Nuyá jiru entsá ajunman chapikrin tsupirkar entsá ikiukiarmiayi. Tura kanait jiníárma ármia nuna chapikrin tsupirkarmiayi. Tura tarach kanú nujiin amia nuna nenakarmiayi. Túram kanu káanmatkanam anumsatuk ajasmiayi. <sup>41</sup> Tura wainchi jímiar ámunam jeá kanu entsá wayá tepeamiayi. Tura kanú senkarinkia chíchimi yakí takuir ajíamu asa kupintramiayi. <sup>42</sup> Suntarsha, achik júamu armia nú shuaran máataj tusa wakeriarmiayi, yukuak pisararain tusar. <sup>43</sup> Tura kapitíáncha Páprun uwemtikrataj tau asa nuna túratniun tsankatkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi. <sup>44</sup> Nuyá chíkichkia kanunmaya numi, kame nánkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiayi.

**28***Marta nunkanam túrunamia nu*

<sup>1</sup> Tura ashí iwiaakuk jíintrar, nu nunka Marta naartin nekaamiaji. <sup>2</sup> Tura nu matsamin armia nu, shiir awajtamsarmiaji. Tuma asamtai iisha tsetsema asakrin, tura yumisha yútakui, uunt jinia ikiapáramiayi. Tura “anamaitiarum” turammaji. <sup>3</sup> Pápruka jinia kukarun ikiaanak jinium pataamiayi. Túmawaj napi tsuéran ashamak jiinki, Papru uwejen nemaramiayi. <sup>4</sup> Tura nú nunkanmaya aents, Papru uwejen napi nemaran wáinkiar “Ju áishmansha shuáran majchuashit, tiarmiayi. Nayaantsanmaya uwempraitatan ni yusrí iwiaaku átinian suritiawai” tiarmiayi. <sup>5</sup> Páprusha ni uwejen pear napin jinium awanmiayi. Tura penkesha yajauch ajaschamiayi. <sup>6</sup> Tura niisha eáchatpiash tusar ii pujuarmiayi. “Túmatksha jaka inianchatpiash” tiarmiayi. Túrasha ti núkap pujussha penké najaweachmiayi. Túrunamtai, nuinkia nusháa enentáimprar “Pápruka yúschashit” tiarmiayi.

<sup>7</sup> Nú nunkanam aentsu penkeri ámiayi ni naari Pupriu. Nú Pupriu ni jeen in itiaarmamiaji. Tura menaintiú tsawant yurumkanha suramsarmiaji. <sup>8</sup> Tura nu pujarin Pupriu aparí tsuer, numpajai ijiarki jáamiayi. Túmakui Papru werí iyumiayi. Tura Yúsan áujtus amik uwejen nin awantkamiayi. Túram penker ajasmiayi. <sup>9</sup> Nu túramun nekaawar, nú nunkanmaya aents jaa armia nu tariar, niisha penker ajasarmiayi. <sup>10</sup> Túram incha ti shiir enentáimturmasar núkap ajampramsamiaji. Túram ukunam ii wétin jeamtai ashí ii atsumamun suramsarmiaji.

*Rúmanam jeawarmiania nu*

<sup>11</sup> Ii wétsuk nú nunkanam menaintiú nantu pujusmiaji. Tura nuyá chíkich kanunam enkempramiaji. Nu kanusha Arijiántrianmaya yaunchu tau menaintiú nantu yumi yútakui nu pujumiayi. Nú kanu nujiin numi-yus najankamu jímiar ekemiarmiayi, ni náarinikia Kástur tura Púruks. <sup>12</sup> Iisha nu enkemprar weri Serakúsa péprunam jeamiaji. Nu menaintiú tsawant pujusarmiaji. <sup>13</sup> Tura jíinkir nuyanka nayaantsa ayamach weri Rijiu péprunam jeamiaji. Nu kanarmiaji. Tura kashin anariá nase suut umpuunti támiayi. Tuma asamtai nú kashinkia Putiuri péprunam jeamiaji. <sup>14</sup> Nu jeawakrin Yus-shuar pujuarmia nu, ni jeen juramkimiaji. Tuma asamtai nuin chíkichkí tumin pujusmiaji. Tura nuyanka nunkan Rúmanmaani wémiaji. <sup>15</sup> Tura Rúmanmaya Yus-shuar, ii jeatniurin neka ásar jintiá inkiunmaktai tusar winiarmiayi. Chíkichkia Apiu pepru támanum táarmiayi, tura chíkichkia, Menaintiu Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

<sup>16</sup> Tura ii Rúmanam jeawakrin kapitíán Juriu achikia yarumman Rúmanmaya uunt kapitíáin ejetimiayi. Túrasha, Pápruka jea ikiamas niisháa pujustí, tiarmiayi. Tura Páprun ísat tusa chíkichkí suntarnak ni jeen apujtusarmiayi.

*Rúmanam Papru Yus-Chichaman etserkamiania nu*

<sup>17</sup> Nuyá menaintiú tsawant nan̄kaasmatai Pápruka Rúmanmaya Israer-aentsu pen̄kerin̄ untsuk ikiaan̄ak “Yatsurtiram antuktarum. Wisha Israer-áentsun̄ yajauchin̄ pen̄ké túrachmiajai. Tura ii uuntrī akupkarmia nunasha yajauch chicharkachmiajai. Tuma ain̄ Jerusarén̄num winia achirkar Rúmanmaya áentsnum surutkarmiaiyi. <sup>18</sup> Tura nu aencha winia anintsar, akupkatai, turutiarmiayi, wisha pen̄ké yajauchin̄, mantamnamnia tímianu túrachu asamtai. <sup>19</sup> Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin̄ nekarati” tímiajai. Wikia wíi shuara tunaar̄in̄ kapitiánin̄ ujaktinian̄ táchaitjai. <sup>20</sup> Tuma asamtai, yatsurtirmin̄, atumin̄ untsukjarme chichastaj tusan. Yusa anaikiamurī, Israer-shuarti nákaunia nu táwiti wi tu étserkui, juí achikiar jin̄kiámu pujajai” tímiayi Papru.

<sup>21</sup> Tutai niisha tiarmiayi “Iisha Jutía nun̄kanmaya aentsti, ame yajauch túramu papí pen̄ké wáinkiachuitji. Tura ii shuar nuyá táarainia nusha “au yajauch túraití” tu ujatmakcharmaji. <sup>22</sup> Túrasha ashí nun̄kanam yamaram chichaman jintinian̄ yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

<sup>23</sup> Nú tsawantaj iruntrami tiarmia nú tsawant jeamtai, ti untsurī aents Papru pujamunam iruntrarmiayi. Papru jintintiainiak Muisais yaunchu aar akupkamia nujajai tura chíkich Yúsna etserniu aarmarijiaisha, Jesus nekas Yusa Anaikiamurinti tusa paant jintintiawarmiayi. Nuna tura káshik nan̄kaama Yus akupeamunam pachiinkiatniun̄ étse-étserkua kjaraj̄ iniaisamiayi. <sup>24</sup> Tura Papru táman̄ antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiaiyi. <sup>25</sup> Chikichkí enentaikí enentáimsatin̄ atsá asamtai, jünki weartasa pujuarmiayi. Túmainiakui Papru chichaak “Nékasen̄ Yusa Wakaní yaunchu Yúsna etserniu, Isayas naartin̄ áarmarijiaiī ii úuntrīn̄ chicharuk juna tímiayi:

<sup>26</sup> “Ame weme au aents ju titia:

“Ántutka ántakrumsha nekaashtatrumé,  
Íitkia iyakrumsha wáinkiashtatrumé.

<sup>27</sup> Warí, au shuara enentáí katsuarai;  
Kuishijjiaí ántaksha ántichua núnin̄ áiniawai,  
Jiisha epetkamua áanin̄ áiniawai,  
Iyaksha wáinkiaín̄ tusa, ántaksha antukain̄ tusa  
Enentáimkiusha nekaawain̄ tusa,  
Winí uwemprain̄ tusa, tura Winí tsuamarain̄ tusa túrunayi”.

Nuní áarmaiti. <sup>28</sup> Tuma asamtai, nekaatarum. Yamaikia Yusaj̄ uwempratin̄ ana nuna Israer-shuarsha susamuiti. Tura nin̄kia nekas umikiartatui” tímiayi. <sup>29</sup> Tura Papru nuna tī iniaisamtai Israer-shuar nuamtak núkap chicharnaiyasua wearmiayi.

<sup>30</sup> Tura Pápruka nuin̄ jeā ikiamsamunam jimiará uwí pujusmiayi. Tura ashí aents nin̄ iyutaj tusa wearmia nuna ni jeen̄ itiaamiayi. <sup>31</sup> Tuma asamtai Papru arantutsuk urukuk Yus akupeamunam ati, Uunt Jesukristu túramur̄in̄cha ashí etserkamiayi. Nútiks̄an̄ etserkatniuncha Páprun̄ pen̄ké suritkiacharmiayi.



## Papru RÚMANMAYA SHUARAN papí aküptukma

### *Papru Rúmanmaya Yus-shuaran áatramania nu*

<sup>1</sup> Wi Papru Jesukrístu takarniuitjai. Núnisan̄ Yus achirak ni Shiir Chichamen̄ etserkat tusa akatar akuptukmiayi.

<sup>2</sup> Nu Chichamun Yus yaunchu “akupkattajai” tímiayi. Núnaka Yúsna etserin Yus-Papinium paant ujakarmiayi. <sup>3</sup> Nu Chichamnum Yus ni Uchirín áujmatui. Ayashijjain̄kia Tawit weeanum akiiniamiayi. <sup>4</sup> Tura ni tishiir wakan̄jjain̄kia Yusa Uchirín̄ti. Tura ti kakarmaiti. Jakamunmaya nantakmiajai nekas Yusa Uchiría nu, paant nekanamiayi. Niisha ii Uuntrj̄ Jesukrístuiti. <sup>5</sup> Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisan̄ ashí nun̄kanmaya shuar nu chichaman umirkar Jesusa náarin̄ shiir awajsarat tusa akuptukmiayi. <sup>6</sup> Atumsha nuyá shuaraitrume. Tura Jesukrístunu ajasarat tusa Yus achirmakuitrume.

<sup>7</sup> Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparj̄ Yussha ii Uuntrj̄ Jesukrístusha waitnentramainia ásar imiatkinchanum ti shiir pujustinian yainmakarti.

### *Papru Ruma péprunam irautinian wakerimiania nu*

<sup>8</sup> Émkasha, átum Yus nekas enentáimtamun ashí nun̄kanam áujmatenan nekaan Jesukrístun pachisan Yúsna ti shiir yumñsajai. <sup>9</sup> Tuke enentáirjai Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. <sup>10</sup> Ashí tsawant ni wakerutakuin̄kia íitjarum tusan Yúsna seajai. <sup>11</sup> Nekas íitniun wakerajrume. Nuj̄ jean wakanmin yain̄kian Yusjai kanakchamin ajasúk tusan wakerajrume. <sup>12</sup> Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

<sup>13</sup> Yatsurú, tuke íitjarum tusan wakerimjarme. Túrasha iyatsjarme. Kame Yus-Chichaman ujaakun chíkich shuarnuma áintsan̄ atum̄in̄cha Yus kakaram takasman wáinkiatniun wakerajai. <sup>14</sup> Wikia Yus akuptuku asamtai ashí shuaran ujákartiniaitjai. Unuimiaruncha tura unuimiaruncha, ti nékainia nunasha tura nékachuncha, métekrak ujakartiniaitjai. <sup>15</sup> Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

### *Uwempratin Chicham kakarmaiti*

<sup>16</sup> Nu Shiir Chicham Yusa kakarmarijjai ti kakaram asa ashí shuaran uwemtikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisan̄ uwemtikramniaiti. <sup>17</sup> Nu chichamnum Yus enentáimsamia nu páantaiti. Júiti: Áyatik Yúsna nekas enentáimtuiniakui Yuska “péñkeraitme” tíminiaiti. Yus-Papiniumsha núnisan̄ tawai: “Yúsna nekas enentáimta nuna Yus “péñkeraitme” tutai tuke Yusjai shiir wekasattawai.” Tu áarmaiti.

### *Aentsu tunaari*

<sup>18</sup> Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti. <sup>19</sup> Tura nu shuarka ashí Yusna nekaamnia nuna Yus paant awajsa asamtai péñker nékainiawai. <sup>20</sup> Kame yámankamtaikniumiã Yus wáinchataitiat ni najanamurjjai juka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchartatui. <sup>21</sup> Yúsna nékainiyat shiir awajsacharmiayi tura

yumiñsacharmiayi. Tuma ásar aya ánta nunak enentáimtuiniak ni enentái tunaajai piakai. <sup>22</sup> Tura ti nekajai tuíniayat enentáimcha núnin ajasarai. <sup>23</sup> Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinniasha napincha kuntinniasha yajasmáncha nakumkar nuna shiir awajenawai.

<sup>24</sup> Nu asamtai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai. <sup>25</sup> Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnastí” tajai.

<sup>26</sup> Nuna túrin ásarmatai Yus natsanmainia nuna wakeruktinian tsan<sub>ka</sub>tkarmiayi. Túramtai nuwasha áishman<sub>jai</sub> tsan<sub>in</sub>tinian nakitrar nuamtak yajauch awajnainiawai. <sup>27</sup> Núnisan<sub>ñ</sub> áishman<sub>sha</sub> nuwaj<sub>jai</sub> tsan<sub>in</sub>tinian iniaisar nuamtak áishman<sub>ka</sub> tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayash<sub>i</sub> wáitsatniunak sumamawarmiayi.

<sup>28</sup> Tura tuke Yúsan nakitiainia asamtai ti yajauch enentáimiainiak pen<sub>ke</sub> túrachminia nuna túrawarti tusa Yus tsan<sub>ka</sub>tkarmiayi. <sup>29</sup> Nu shuar ti tunaajai piaku áiniawai. Tsanirmausha aya kuítniak wakerincha tura yajauch awajin áiniawai. Nu arantcha awakmakun kajerniusha man<sub>ka</sub>rtincha tuke máanaincha anan<sub>ka</sub>rtincha pen<sub>ke</sub>rcha awajkartincha, tsanumniusha áiniawai. <sup>30</sup> Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “pen<sub>ke</sub>raitjai” tiar nan<sub>ka</sub>amantu enentáimtumainiawai. Tunáa túratniun e<sub>ai</sub>niawai. Apar<sub>in</sub>cha nukur<sub>in</sub>cha umirainiatsui. <sup>31</sup> Enentáincha áiniawai. Tana nuna umichu áiniawai. Anen<sub>ka</sub>rtichu ásar waitnen<sub>ka</sub>rtichu áiniawai. Tsan<sub>ka</sub>kurcha áiniawai. <sup>32</sup> Yuska “Shuar nuna túrinkia jákatniuiti” taman nékainiayat tuke túrukin wénawai. Tura nu arantcha chíkich yajauch túramtai ti shiir wararenawai.

## 2

### *Shuar tunáa túramun Yus paant nékawai*

<sup>1</sup> Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. <sup>2</sup> Yuska nu tunaan túrin ainia nuna súmamtikiashtinkiait. <sup>3</sup> Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá ¿itiurak uwemprattam? <sup>4</sup> Yus ti waitnentrana asa nu tunáa ikiukim Nin enentáimtustinian katsuntramuk nákarmawai. Tura pen<sub>ke</sub>r asa wárik asutiámchakui sumamashtiniaitjai ¿tu enentáimtumamek? Tu enentáimkium ni waitnentrannari<sub>i</sub> ántar awajsaitme. <sup>5</sup> Tura tunaarum enentáimtutsuk tuke túrakmeka súmamtikiatin tsawantaj<sub>i</sub> ti tunáa irutmampramujaj<sub>i</sub> ti asutniáttame. <sup>6</sup> Nu tsawantaj<sub>i</sub> ni túramujaj<sub>i</sub> métek Yus ashí shuaran akirartatui. <sup>7</sup> Shuar tuke pen<sub>ke</sub>r túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Niij<sub>jai</sub> shiir pujustinian sústartatui. <sup>8</sup> Antsu pen<sub>ke</sub>ra nuna wakerutsuk antsu aya yajauchin wakeruiniak Yúsan nakitiainia nuna Yus ti kajerak asutiáwartatui. <sup>9</sup> Nekas Israer-shuarsha tura núnisan<sub>ñ</sub> Israer-shuarchasha tunaan túrin áiniakka ti wáitsartatui. <sup>10</sup> Antsu nekas Israer-shuarnasha tura núnisan<sub>ñ</sub> Israer-shuarchan<sub>cha</sub> pen<sub>ke</sub>r túrin áinia núnaka Yus ti shiir imiatkinchanum apujstartatui. <sup>11</sup> Yus ashí shuaran akantsuk mai metek iyawai. <sup>12</sup> Shuar Muisais akupkamun nékatsuk tunaan túraka aya júnisan<sub>ñ</sub> sumamawartatui. Tura shuar Muisais akupkamun nékayat tunaan túran<sub>ka</sub> nu akupkamujaj<sub>i</sub> sumamawartatui. <sup>13</sup> Akupkamun aya antukarua nuka Yusaj<sub>i</sub> pen<sub>ke</sub>r áiniatsui antsu antukar umirainia nuna Yuska “pen<sub>ke</sub>rait<sub>i</sub>” tawai. <sup>14</sup> Israer-shuarchaka Muisais akupkamun takakainiachkusha aya ni enentáij<sub>jai</sub> nu akupkamun umirainiak <sup>15</sup> nu umireamujaj<sub>i</sub> Yus nu akupkamun ni enentáin<sub>ñ</sub> ikiursarua nuka paant nekaamniaiti. Nujaj<sub>i</sub> métek túruiniak shiir enentáimiainiawai. Tura métek túruiniachkun<sub>ka</sub> pen<sub>ke</sub>rcha

enentáimiainiawai. <sup>16</sup> Wi Uwempratin Chichaman étsereaj nuí ashí shuar uukrishá túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawantaj tunaan túrin sumamawartatui.

*Israer-shuarsha Muisais akupkamun umircha áiniawai*

<sup>17</sup> Ámeka “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash. <sup>18</sup> Yus wakeramuncha nékajai. Tura akupkamun nekaan péñkera nuna wakerajai, tátsumeash. <sup>19</sup> Wakannium kusuraru áinia nunasha jintintiamniaitjai. Tura tsáapninian nekamtikiawarminiaitjai, tátsumeash. <sup>20</sup> Akupkamu ti péñker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash. <sup>21</sup> Pai, chíkichka unuiniatimesha ¿urukamtai imia ámeka unuimiatsum? “Kasamkashtiniaiti” tu étsereatsmek. Táyatmesha ¿urukamtai ámeka kasamam? <sup>22</sup> “Tsanirmashtiniaiti” tátsumek. Enta, ¿urukamtai ámeka tsanirmam? “Ántaryusan nakitiajai” tátsumek. ¿Urukamtai ámeka nu yusa jeeniá kasamam? <sup>23</sup> Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek. <sup>24</sup> Yus-Papiniumsha núnis áarmaiti: “Átum péñker umirchamujaj Israer-shuarcha Yúsan yajauch chicharainiawai.”

<sup>25</sup> Muisais akupkama nu ashí umireakmeka nii timia núnismek tsupirnaktin péñkeraiti. Tura takamtsuk umireachkumka tsupirnakcha núnisketme. <sup>26</sup> Chíkich shuarsha tsupirnakchaitiat Muisais akupkamun umireakka tsupirnatskesha tsupirnakua áintsan̄kete. <sup>27</sup> Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui. <sup>28-29</sup> Kame nekas Israer-shuarka aya pátatkechu antsu tuke enentáijjaj Yúsnan wakera núiti. Núnisan̄ nekas tsupirnaktinkia aya ayash̄jjainchuiti antsu enentáiniam shiir átinia núiti. Nekas akupkamu aya áarchamuiti antsu nekas enentáijjaj umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

### 3

<sup>1</sup> Núnis aisha Israer-shuar ainia nu ¿warí péñkernak takakainia? Tura tsupirnaktincha ¿wariniak yayá? <sup>2</sup> Ti péñkeraiti. Warí, émkaka, Yus ni chichamen Israer-shuaran súsacharmakia. <sup>3</sup> Kame chíkich chíkich umichu áiniakui Yus tsan̄katkama nuna nú shuaran súsachmatain̄kia nuikia “Yus umichuiti” ¿títinkiait? <sup>4</sup> Péñkea. Antsu Yuska nekas túratniua nujaj métek ashí túriniaiti. Shuar umichu áiniakuisha ni támarin̄ mash umiktatui. Ni tamajaj shuáran wáitrin̄ awajeakka nusha péñkeraiti. Núnisan̄ atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmak-tatme” tawai.

<sup>5</sup> Nu arantcha, “Wi tunaan túramujaj Yus imiá péñkera nuna paant awajeakka ¿urukamtai winia asutiua? ¿Nuka péñkerkait?” tíchatapash. (Kame aents chichainia núnisnak tajai.)

<sup>6</sup> Warí, Yus péñkerchaitkiun̄ka ¿itiurak ashí shuara tunaar̄in̄ súmamtikiawarat? Kame imiá péñkeraiti.

<sup>7</sup> Núnisan̄, “Wi umirkachmajaj Yus tuke umiiniana nuna paant awajeaknaka nuikia nujaj in shiir awajsamtai ¿urukamtai “tunaitme” túruta?” tíchatapash. <sup>8</sup> Warí, “tunáa túramujaj Yúsan péñker awajeajaj,” tú nekas enentáimpramniaitkiuin̄kia shuar nuikia “Wats, ashí péñker áti tusar tunáa túratai” tímin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin áiniawai.

*Ashí shuar tunáa túraitji*

<sup>9</sup> Nuikia Israer-shuartikia chikichjaj nan̄kaamas ¿péñkerkaitiaj? Péñkesha. Warí, Israer-shuartisha Israer-shuarchajajashá ashí métekrak tunaan túrin áiniawai. Núnaka jú áarmajaj paant awajsaitjai. <sup>10</sup> Yus-Papisha núnisan̄ tawai:

“Pénkeran túrin chikichkisha atsawai.

<sup>11</sup> Yúsnan nekaatniun nakitiainiawai. Yusnasha eainiatsui.

<sup>12</sup> Yusnumiã kanakiar menkakatniunam wénawai. Chikichkisha pénkeran túrin penké atsawai.

<sup>13</sup> Ashí yajauch chichainiak iwiarsamu yama urainiua núnisan áiniawai. Ni chichamejai tuke anañkartin áiniawai. Chichame napía áintsan najamin áiniawai.

<sup>14</sup> Aya yajauchin kakaram áujmatin áiniawai.

<sup>15</sup> Máataj tusa wárik yujarin áiniawai.

<sup>16</sup> Aya ti itiurchat ti yajauch awajin áiniawai.

<sup>17</sup> Shiir pujustinian nékainiatsui.

<sup>18</sup> Ishichkisha Yúsan ashamenatsui.”

<sup>19</sup> Yaunchu akupkamun umirkatin ainia nú shuar aya tákamtak umirkatin áiniawai. Tuma asamtai ashí shuar umirkachu ásarmatai Yus nujai súmamtikiawartatui. Túrakui niisha pachischamin áiniawai. <sup>20</sup> Akupkamuka aya ii tunaarın paant awajturmajı. Tuma asamtai akupkamu pénker umirkatniujai Yus “pénkeraitme” turamchamniaitji.

#### *Aya Yus shiir enentáimtusar uwempramniaitji*

<sup>21</sup> Yus-Chicham yaunchu áarmanum itiura Yus in “pénkeraitme” túramminiaitjaj nuna paant tawai. Kame akupkamujainchuiti. <sup>22</sup> Antsu iisha ashí shuarsha núnisan aya Jesukrístu shiir enentáimtakrin Yus “pénkeraitme” túramminiaitji. <sup>23</sup> Kame ashí shuarti tunáa túraitji. Tuma asar Yusjai métek pénker ajastin penké jeatsji. <sup>24</sup> Tura Yus in waitnentrama asa kuítchajai “pénkeraitme” túramji. Jesukrístujai uwentikrampra asa túramji. <sup>25</sup> Tura Krístun akupkamiayi ni jakamujai ashí tunaan asakátratniun. Túramtai shuar Nin nekas enentáimtuiniakui Yus tsankuramniaiti. Yaunchu tunáa túramun katsunteak enentáimtuschamiayi. Yamái tsankuramnia nuna yaunchu nekáa, nuna túramniuyayi. <sup>26</sup> Tura yamaiya tunaancha tsankureak ashí shuar Jesusan nekas enentáimtuinia nuna “pénkeraitme” tuke tímianiaiti. Kristu jakamujai nuka paant ajasai.

<sup>27</sup> Nújainkia ii pénker ajasjınia nu “winia kakarmarjai túrunajai” tíchamnia asar çnañkaamantu enentáimtumarminkaitjaj? Penkesha. Warı, akupkamu umitsuk aya Kristu nekas enentáimtakrin Yus “pénkeraitme” túramji. <sup>28</sup> Nujai páantaiti. Akupkamu umirtsuk aya Jesukrístu shiir enentáimtakrin Yus “pénkeraitme” túramminiaitji.

<sup>29</sup> Warı, Yuska Israer-shuarnasha tura núnisan Israer-shuarchancha mai ni Yúsrınchukait. <sup>30</sup> Kame aya chikichik Yúschakait. Tura tsupirnakuncha tsupirnakchancha mai metek aya Jesukrístun nekas enentáimtuiniakui “pénkeraitme” tímianiaiti. <sup>31</sup> Shuar Yúsan shiir enentáimtamujai pénker ajastin áiniakui nujai çakupkamu ántar awajsamukait? Atsá. Antsu nuna nankaamas umirkatin awajsamuiti.

## 4

### *Apraámsha Yúsan shiir enentáimtamujai pénker ajasmania nu*

<sup>1</sup> Ashí Israer-shuara uuntri Apraám enentáimtustai. Niisha çitiurak Yusjai pénker ajasma? <sup>2-3</sup> Ni pénker takasmajai Yusjai pénker ajasuitkiunka nankaamantu enentáimtumarainti. Antsu Yus-Papı tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus íimmianum nankaamantu enentáimprachminiaiti. <sup>4</sup> Shuar íniamna nu takasmatai çaya tsanka asam akiktatmek? Warı, ni takasmanum páchitsuk akikchatniukait. <sup>5</sup> Antsu shuar ni pénker turamuri enentaimtsuk áyatik “Yus tunáa shuaran pénker awajniuiti” tu enentáimtakui Yuska tsanka asa “pénkeraitme” tawai. <sup>6</sup> Tura pénker túrachunak Yus “pénkeraitme” takui nu shuar shiir warasminiaiti. Núnisan tawai uunt akupin Tawit:

<sup>7</sup> “Shuar ashí ni tunaarın Yus asakátar tsankuramu ana nuka shiir enentáimpramniaiti.

<sup>8</sup> Uunt Yus ni tunaarın enentáimtachma asa ti warasminiaiti.” Tu tímiayi Tawit.

<sup>9</sup> ¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi. <sup>10</sup> Tura Apraám tuke tsupirnatsajin Yus nuna tímiayi. Emka Yus “pénkeraitme” timia nú ukunam Apraám tsupirnakmiayi. <sup>11</sup> Apraám tsupirnatsuk Yúsan shiir enentáimtusmatai Yus “pénkeraitme” tusa “tsupirnaktiniaitme” tímiayi. Nújainkia ashí Yúsan shiir enentáimtuinia nú shuar tsupirnatskesha Apraám weeá ániawai. Tura nu shuaran Yus “pénkeraitme” tawai. <sup>12</sup> Tsupirnakusha aya tsupirnakusa Apraám weeá ániatsui antsu nu arant Apraámjai métek Yúsan shiir enentáimtuinia nuka Apraám weeá ániawai. Kame Apraám tuke tsupirnatsuk Yúsan shiir enentáimtusmiayi.

### *Yus shiir enentáimtamujai Nii timia nu uminkiattawai*

<sup>13</sup> Yaunchu Apraáman Yus chicharuk “Amincha amée weeá shuarnasha jú nunkan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsankatkamiayi. <sup>14</sup> Kame aya akupkamun umirniun súsatniuitkiuinikia nuikia Yus enentáimtustin ántrai. Tura Yus Apraáman timia nusha ántrai. <sup>15</sup> Akupkamu akui shuar umirkachka ti asutniáshtatuak. Tura atsakuinikia ¿asutniátniukait? ¿Itiurak umirtsuk ikiuktin?

<sup>16</sup> Tuma asamtai Yus ti anenkartin asa Nin nekas enentáimtuinian ashí tsankatkaiti. Nújainkia Apraám weeasha Yus Apraáman timia nuna páchitsuk wáinkiártatui. Iisha Apraámjai métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsankatramkattaji. <sup>17</sup> Kame Yus-Papinium Apraám átramuiti: “Untsurí shuarsha amée weeá ajasartatui.” Nu asamtai iisha Apraámjai métek Yus shiir enentáimtakrinkia Yus incha Apraám weeá áintsan írmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksana nájanui.

<sup>18</sup> Yus “ti pampantatme” takui Apraám ti uuntach áyat Yus timian enentáimtak yajutmartinian nákasmiayi. Nujai untsurí shuar ní weeá ajasarmiayi, Yus timia áintsan. <sup>19-20</sup> Apraámsha sian (100) uwí takakuitiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiayi. Nujajsha nuna nankaamas kakaram ajasmiayi. <sup>21</sup> Tuma asa “nekas Yus tana nuna páchitsuk umiktatui” tu enentáimpramiayi. <sup>22</sup> Nu asamtai Yus “pénkeraitme” tímiayi.

<sup>23</sup> Tura Yus nekas enentáimtamunam Yus “pénkeraitme” tana nu aya Apraámnak áatrachmaiti. <sup>24-25</sup> Antsu incha túramji. Iisha núnisrik ii Uuntri Jesus nekas enentáimtakrinkia Yus incha “pénkeraitme” turamtatji. Jesuska ii tunaarin jarutramkatniun surunkamiayi. Tura nujai Yus in “pénkeraitrume” taku Jesusan ataksha iniantkimiayi.

## 5

### *Yus “pénkeraitme” túramkurin shíiraiti*

<sup>1</sup> Tuma asamtai Yus nekas enentáimtakrin Yus “pénkeraitme” túramji. Nujai iisha Yusjai shiir nawamnaikiar pujaji. Núnaka ii Uuntri Jesukrístu ni jakamujai sumartamkamiaji. <sup>2</sup> Tura Nii shiir enentáimtakur Yusaj weankaitji. Tura Kristu jarutramkakrin Yus ti anenmaji. Tura tuke anenma asakrin Nijjai métek shiir ajastin nákakur waraaji. <sup>3</sup> Nu arantcha yamá ititurchat pujayatrik nu ititurchatjai unuimiartatji tusar waraaji. Katsuntratniuncha unuitiamji. <sup>4</sup> Tura nu unuimiarar ii katsuntramu paant átatui. Tura nuyá Yus ti shiir awajtamsattajnia nuka shiir enentáijjai nákastatji. <sup>5</sup> Nu ti shiir enentáimsar nákamujai ananmamtsuji. Yuska ni Shiir Wakanin ii enentáin pujurtamuk ni anenkartutairin ti paant awajturmajji. Tuma asamtai Yus túratin nákejnia nu imiá nekas wainkiattaji.

<sup>6</sup> Iik<sup>ka</sup> pen<sup>ke</sup> uwemprachmin asakrin tsawant jeamtai Kristu ashí shuara tunaar<sup>in</sup> jarukmiayi. <sup>7</sup> Shuar chíkich shuaran uwentikratniun ¿jaruktatuak? Pén<sup>ker</sup> shuar a<sup>in</sup> jarukchattawai. Kame ti pen<sup>ker</sup>eraitkiu<sup>in</sup>kia jarukchaintiash. <sup>8</sup> Antsu ii tuke tunáa árin<sup>in</sup> Kristu jarutramkamiaji. Nuj<sup>ai</sup> in ti anenmajnia nuna ti paant iniakturmaji. <sup>9</sup> Tura ni numpej<sup>ai</sup> tunaarincha awajsamu asar imiá nekas Yus asutiámatniua nuyá uwempraitji. <sup>10</sup> Yusa nemasri áyatar Yusa Uchir<sup>í</sup> jakamuj<sup>ai</sup> yamaikia Yusj<sup>ai</sup> shiir nawamnaikiar pujaji. Nu arant nu<sup>ik</sup>ia Kristu tuke iwiaaku asa iij<sup>ai</sup> tsan<sup>in</sup>kiu asa ashí yajauchinmaya uwentikramar tuke shiir awajtamsattaji. <sup>11</sup> Ii Uuntr<sup>i</sup> Jesukristu jakamuj<sup>ai</sup> Yusj<sup>ai</sup> shiir nawamnaikia asar ti waraaji.

### *Atansha tura Krístusha túrawarma*

<sup>12</sup> Ayu. Yámankamtaik emka áishman Atan<sup>in</sup> ni<sup>in</sup>ki tunaan túramtai nú tunaaj<sup>ai</sup> ashí shuar tunaarintin ajasarmiayi. Tura ashí tunaarintin ajarar mash jákatin ániawai. <sup>13</sup> Akupkamu atsaku<sup>in</sup>kia umirkachma nekaachminiaiti. Tuma a<sup>in</sup> Muisais akupkamu atsaisha tuke tunaan túrin ármiaiyi. <sup>14</sup> Atan<sup>in</sup> pujumia nuyá Muisais tuke akupeatsa<sup>in</sup> shuara tunaar<sup>i</sup> paantcha a<sup>in</sup> ashí shuar tunaan túrawar jákarmiayi. Kame ni tunaar<sup>i</sup> Atan<sup>na</sup> áintsachauyayi. Atan<sup>ka</sup> Yus akupkamu paant ujakman umirkachmiayi. Antsu nu shuar Yus akupkamu paant nékainiachiatan<sup>in</sup> tunaan túrin ániak jákarmiayi. Tura Atan<sup>ka</sup> Krístuj<sup>ai</sup> apatkar enentáimpratai.

<sup>15</sup> Atan<sup>in</sup> tunáa túramia nuj<sup>ai</sup> apatka iisam, Yus in tsankatramaj nuka nan<sup>ka</sup>amas pen<sup>ker</sup>eraiti. Kame Atan<sup>in</sup> ni<sup>in</sup>ki tunaan túramuj<sup>ai</sup> ashí aents untsur<sup>i</sup> armia nu, tunaarintin ániak, jákarmiayi. Tura Yus in ti anenma asa chikichik áishmanj<sup>ai</sup> nuna nan<sup>ka</sup>amas tí shiiran tsan<sup>ka</sup>tramaji. Jesukristuj<sup>ai</sup>in<sup>ka</sup> untsur<sup>i</sup> shuaran uwentikrar ti shiiran tsan<sup>ka</sup>teawai. <sup>16</sup> Atan<sup>ka</sup> tunaar<sup>i</sup> imiá yajauch a<sup>in</sup> nuna nan<sup>ka</sup>amas pen<sup>ker</sup>eran Yus tsan<sup>ka</sup>tramkaitji. Iis, aya chikichik tunaan túramuj<sup>ai</sup> aents sumamawarmiayi. Antsu Yus uwempratniun tsan<sup>ka</sup>tramaj núj<sup>ai</sup>in<sup>ka</sup> ti untsur<sup>i</sup> tunaan asakáruiti, tura “pen<sup>ker</sup>eraitme” túramji. <sup>17</sup> Chikichik áishman<sup>in</sup> tunaan túramuj<sup>ai</sup> aents jákatin ániawai. Tura nuna nan<sup>ka</sup>amas chikichik áishman<sup>in</sup> Jesukristu túramuj<sup>ai</sup> ti shiir pujustatji. Kame Yus ti anenma asa ii pen<sup>ker</sup>er túratsrin<sup>in</sup> “pen<sup>ker</sup>eraitrume” túramji. Nu asamtai yamaram iwiaakmanum kakaram ajaji.

<sup>18</sup> Atan<sup>in</sup> tunaan túramuj<sup>ai</sup> ashí tunaarintin ajarar jákarmiayi. Núnisan<sup>in</sup> Jesukristu pen<sup>ker</sup>er túramuj<sup>ai</sup> ashí shuar Yus “pen<sup>ker</sup>eraitme” timia nuka yamaram iwiaakmaj<sup>ai</sup> tuke pujusar-tatui. <sup>19</sup> Núnisan<sup>in</sup> chikichik áishman<sup>in</sup> umirkachmaj<sup>ai</sup> untsur<sup>i</sup> tunaarintin ajasarmiayi. Tura chikichik áishman<sup>in</sup> umirkamuj<sup>ai</sup> untsur<sup>i</sup> shuar pen<sup>ker</sup>er awajnasarmiayi.

<sup>20</sup> Wats, tunáa ti paant atí tusa Yus ni akupkamur<sup>in</sup> susamiayi. Túrasa ti tunáa pampaakui Yus nuna nan<sup>ka</sup>amas waitnentramak nu tunaan asakátramji. <sup>21</sup> Shuar tunaan túrin ásar jákatin ármiaiyi. Tura núnisan<sup>in</sup> ii Uuntr<sup>i</sup> Jesukristu túramuj<sup>ai</sup> Yus in “pen<sup>ker</sup>eraitrume” túramkurin iisha tuke iwiaaku pujustiniatji.

## 6

### *Krístuj<sup>ai</sup> jaka asar tunáa túrachminiaitji tura Krístuj<sup>ai</sup> tsan<sup>in</sup>kiu asar iwiaakuitji*

<sup>1</sup> Núnisaitkiu<sup>in</sup>kia Yus nan<sup>ka</sup>amas waitnentrampratai tusar ¿tunáa túrattajik? <sup>2</sup> Pén<sup>ke</sup>a. Warí, iikia tunáa túrashtin jákaitji. Jáka ¿itiurak tunaan túramniait? <sup>3</sup> Imianniutikia Krístuj<sup>ai</sup> tsan<sup>in</sup>kiu asar imianir Niij<sup>ai</sup> métek jaka áintsar aji. <sup>4</sup> Tura imianir Krístuj<sup>ai</sup> jaka áintsar métek iwiarnasuitji. Tura Yus ti kakaram asa Krístun jakan iniantkimia núnisan<sup>in</sup> incha nu kakarmaj<sup>ai</sup> yamaram enentáij<sup>ai</sup> pen<sup>ker</sup>er wekasatniun iniantankimiaji.

<sup>5</sup> Krístuj<sup>ai</sup> tsan<sup>in</sup>kiu asar Niij<sup>ai</sup> métek jaka áintsan<sup>ket</sup>ji. Tura núnisan<sup>in</sup> Niij<sup>ai</sup> métek nantaktiniatji. <sup>6</sup> Yaunchu enentáimtai<sup>in</sup>kia Krístuj<sup>ai</sup> métek jaka asamtai ii yajauch wakerutain emen<sup>ka</sup>trutmakuitji. Tuma asamtai yamaikia pen<sup>ke</sup> umirkashtiniatji.

<sup>7</sup> Kame ¿jáka ititurak tunaan túrat? Yamaikia an<sup>ka</sup>nt ajasuitji. <sup>8</sup> Iisha nekas Krístuj<sup>ai</sup>

jákaitkiurkia Niijjai métek tuke iwiaaku pujustin enentáimji. <sup>9</sup> Kame Krístuka chikichí jaka nantakin asa atakka jákashtatui. Túmaitkiui atakka ajakrachminiaiti. <sup>10</sup> Kristu chikichí jaka asa ashí tunaajai itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai. <sup>11</sup> Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujai tsaniñkiu asarum iwiaaku pujakrum Yus shiir awajsatarum.

<sup>12</sup> Nu asamtai tunaaka ayashmijn akuptamkashtiniaitrome. Ayashí wakeramuri umirkashtiniaitrome. Ankantaitrome. <sup>13</sup> Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum. <sup>14</sup> Akupkamu umirkatniujai iwiaaku pujatsrume. Antsu atumin Yus ti anenma asa yamaram iwiaakman suramsaitrome. Tuma asamtai yamaikia tunaaka nupettamkachminiaiti.

### *Tuke umireajnia nuna takarniurintji*

<sup>15</sup> Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Péñkea. <sup>16</sup> Tuke umireajnia nuna takarniurintji. Nuka nékatsrumek. Tura ni takarin ajasam umirkatniuitme. Tuma asamtai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji. <sup>17</sup> Atumsha yáunchuka tunáa umirniuitiatrum ikiukrum yamaikia nekas chicham antukurmena nu nekas atumí enentáijjai umirkaitrome. Tuma asamtai Yus ti yumĩnsatniuiti. <sup>18</sup> Yamaikia tunaanumiã ankant ajasu asarum ti péñker wekasatniunam pachiinkiaitrome. <sup>19</sup> Paant nekaak tusan takarniun pachisan tájarme. Wats, yaunchu atumí ayashí muĩjmiainian tura ashí yajauchin túrat tusarum tsan̄kamakmarme. Núnisrumek yamaikia atumí ayashí péñkeran túrat tusarum tura tuke Yusjai shiir wekasat tusarum tsan̄kamaktarum. <sup>20</sup> Atumsha tunáa umirniuyarme nuikia péñker wekaichauyarme. <sup>21</sup> Tura nújajisha ¿warí péñkerna yáinmakmarum? Iista, yamáí natsanmainchakait. Nusha jákatniunam júawai. <sup>22</sup> Antsu yamaikia, tunaanumiã uwempra asarum Yus umirniuitrome. Antsu júka Yusjai shiir wekasatniunam júawai tura nuyá tuke iwiaaku pujustatrome. <sup>23</sup> Tunáa takarkumka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntri Jesukrístujai tsaniñkia pujá asakrin nuna túrutmattaji.

## 7

### *Akupkamujai ankantaitji*

<sup>1</sup> Enentáimpratarum yatsuru. Jákaaka akupkachminiaiti. Aya iwiaakna nu akupkamni-aiti. Nu paant nékatsrumek. <sup>2</sup> Wats, nuwã nuátkamu ni aishri iwiaakkui niijjai tsaniñ pujustiniaiti. Tura aishri jakamtai ankant ajawai. <sup>3</sup> Tuma asamtai aishri iwiaakain chikich áishmanjai tsaniñakka tsanirmawai. Tura ni aishri jakamtai chikich áishmanjai páchitsuk nuatnakminiaiti tura nuikia tsanirmatsui.

<sup>4</sup> Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrome. Túrakrum Krístujai nuatnaikiatin áintsarum ankantaitrome. Niisha jakamunmaya nantakniuiti. Yamaikia Krístunu ajasu asar Ni-ijjai tsaniñkiar Yus wakeramu péñker túratniuitji. <sup>5</sup> Yaunchu wakerutai umirniuyaj nuí akupkamu enentáimtusar nuna nan̄kaamas yajauchia nu wakerimji tura jákatniunam juramkimji. <sup>6</sup> Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakaníjjai tsaniñakur yamaram iwiaakmajai péñker wekasamniaitji.

### *Winia enentáiruj tunáa ana nu*

<sup>7</sup> Núnisaitkiuñkia “Akupkamu yajauchiiti” ¿titiajiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchajai.

<sup>8</sup> Tura nu akupkamun enentáimtakui winia enentáiruĵ tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai. <sup>9</sup> Yaunchu akupkamun nékachkun nánkamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai. <sup>10</sup> Tuma asamtai akupkamujai péñker wekasatniuitiatan umirkatniun tujintiakui aya jákatniunam jurukni. <sup>11</sup> Kame tunáa wakerutainkia nu akupkamujai anankrua péñker iwiaaku pujustinian surutsuk nu akupkamujai jákatniunam jurukmiayi.

<sup>12</sup> Tuma asamtai akupkamuka Yusna asa ti peñkeraiti. Yajauchichuiti. <sup>13</sup> Nuikia ¿péñkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiayi. <sup>14</sup> Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai. <sup>15</sup> Kame túrajna nuna itiurchat enentáimtajai. Péñker túratniun wakeraj nuna túratsjai. Antsu nakitiaj nuna nekaska túriniaitjai. <sup>16</sup> Akupkamu péñkeran nekaan umirkatniun wakerajai. Túrayatnak umirchaitjai. <sup>17</sup> Tuma asamtai wíchaitjai tunaan wakerakun túrajna nuka. Antsu winia enentáiruĵ tunáa wakerutai pujá asa nu túrumtikriniaiti. <sup>18</sup> Yaunchu enentáimtai winia enentáiruĵ pujana nu peñké yajauchiiti. Nuna ti paant nékaji. Tuma asamtai péñker túratniun wakerayatnak peñké tujintiajai. <sup>19</sup> Péñker túratniun wakerayatnak túratsjai. Antsu tunaan nakitiaj nuna túrajai. <sup>20</sup> Nu asamtai nakitiaj nuna túrakun wíchaitjai antsu winia enentáiruĵ tunáa wakerutai pujana nu túriniaiti.

<sup>21</sup> Júnisaiti. Péñker túratniun wakerakun aya tunaan ínkiuajai. <sup>22</sup> Nekas enentáijjai Yusa akupkamurĵn wakerajai. <sup>23</sup> Tumaj yaunchu enentáimtai winia enentáiruĵ pujurtak nupettawai tura nekas wakeraj nuna akirturui.

<sup>24</sup> Maa, ti waitiajai. Jú ayash wakeramujai jákatniunmaya ¿yaki uwemtikrurat? <sup>25</sup> Yuska ii Uuntrĵ Jesukrístujai túrutmamniaitji. Tuma asamtai Yúsan ti yumĵnkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

## 8

### *Yusa Wakanĵjai péñker wekasatin*

<sup>1</sup> Jesukrístujai tsaniñkiarun Yuska “tunaan túrawar jákatniunam wémin áiniawai” tatsui. Nu shuar ni ayashĵ wakerana nuna umirtsuk Yusa Wakanĵ wakerana nuna umirainiawai. <sup>2</sup> Jesukrístujai tsaniñkiu asakrin Yusa Wakanĵ nekas iwiaaku awajtamsaitji. Tuma asamtai tunáa túratniunmaya tura jákatniunmayasha ankant ajasuitji. <sup>3</sup> Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túrait. Ni Uchirĵn ayashtin awajas tunaan jarukat tusa akupkamiayi. Tura nujai ayash tunáa wakeramun nupetkamiayi. <sup>4</sup> Túramtai ii yamaikia ayash wakerana nu umirtsuk tura Yusa Wakanĵ wakeramu túrar akupkamu tana nu umirniuitji. <sup>5</sup> Ayash wakeramun umirainia nu, ayashnia nunak enentáimtuiniawai. Antsu Yusa Wakanĵ wakeramun páchinia nuka Yúsnan enentáimtuiniawai. <sup>6</sup> Ayashnia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjai shiir nawamnaikiar tuke pujusartatui. <sup>7</sup> Aya ayash wakeramun enentáimtuinia nú shuar Yusa nemasrĵ áiniawai. Yus akupeamun nakitiainia ásar ni taman umirkatniun peñké jeainiatsui. <sup>8</sup> Tuma asamtai shuar ni ayashĵ wakeramurĵ warareakka Yúsan shiir awajsachminiaiti.

<sup>9</sup> Tura átumka ayash wakeramu umirtsuk tura Yusa Wakanĵ pujurtamkurmin ni wakeramu enentáimtiniaitrume. Ashí shuar Krísturtin ainia nu ni Wakanĵn takaku áiniawai. Takachaitkiunka nuikia Krístunuchuiti. <sup>10</sup> Tura Kristu atumin pujurtamkurminkia atumí ayashĵ tunaajai jakamnia ain Yus “péñkeraitme” túramu asamtai atumí



wakanínkia nekas tuke iwiaakuiti. <sup>11</sup> Yus Jesukrístun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimiá núnisañ nu Wakanjaj̄ yamaram iwiaakmajaj̄ iniantamkittiarne.

<sup>12</sup> Tuma asamtai, yatsuru, ayash wakeramu penké umirkashtiniaitji. <sup>13</sup> Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka péñker wekasarum nekas iwiaaku átrume.

<sup>14</sup> Ashí shuar Yusa Wakaní timiajaj̄ métek wekainia nu, nu shuar nekas Yusa uchirínti. <sup>15</sup> Yusa Wakaní in pujurtamkurin Yusa uchirí ajasar sapijmiatsuk Yusaj̄ weamkar “Aparú” tímimniaitji. <sup>16</sup> Nu Wakan “nekas Yusa uchirínme” ii enentáin túramji. <sup>17</sup> Tura ni uchirí ajasu asakrin Yus tímia núnisañ ashí Níiniun suramsattaji. Krístun ashí susattana núnisañ incha suramsattaji. Yamái Krístunu takaakur wáitiakrikia ukunam Krístujaj̄ métek ti shiir awajnastatji.

<sup>18</sup> Maa, yamá ti wáitiakrishá ukunman̄ka nayaimpiniam ti shiir pujakur nu wáitsamu kajinmatkittiaji. <sup>19</sup> Tsawant jeamtai Yus ashí ni shuarin Nijjaj̄ métek ti shiir awajstartatui. Nuiñ nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu írussa nu ti nákañiawai. <sup>20</sup> Ashí Yus najanamia nuna yámankamtaik ti péñker najanamiayi. Túrasha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsankatkamiayi. Tuma asamtai iwiarnartin tsawantan nákwai. <sup>21</sup> Nu tsawantaj̄ ashí Yus najanamu emesnartinniumiá uwemprartatui. Tura ashí Yus najanamuka shuar Yusa uchirí ajasarua nujaj̄ métek shiir awajnasar an̄kant ajasartatui. <sup>22</sup> Yamaisha ashí Yus najanamu ainia nu, nuwá jatema wáitia nuniñ ti wáitiainiawai. <sup>23</sup> Yus najanamuka ashí wáitiainiawai. Iisha Yusa Wakaní takakiatar ti wáitiaji. Tura Yusa Wakaní takakur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákwai. Nuisha ii ayashísha an̄kant awajnastatui. <sup>24</sup> Nu tuke enentáimtuki wéakur takamtsuk uwemprattaji. Yamái nu wáinchiatar tuke nákwai. Warí, ¿wáinjia nu nákwai? <sup>25</sup> Tuma asar tuke waincha asar katsuntrar nákwai.

<sup>26</sup> Nu arantcha ii kakarmachu nekapeakrin Yusa Wakaní yáinmaji. Kame Yus áujsatniusha nékachkurin in yáinmaji. ¿Warí seattaj̄ tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmaj̄. <sup>27</sup> Tura Yus ii enentáin enentáimtaj̄ nuna nékaiti. Tuma asa ni shuarī asakrin ni Wakaní ni wakeramujaj̄ métek seatramkurin ántawai.

### *Ti nupetmakuitji*

<sup>28</sup> Yus anea asakrin ashí nan̄kaatamjina nujaj̄ Yus pujurtamji. Tura nujaj̄ péñker awajtamji. Nu paant nékaji. Tura Ni wakerimia núnisañ Ní shuar awajtamsaitji. <sup>29</sup> Yámankamtaiknumiá in nekarmak ni Uchirí Jesukrístujaj̄ métek ajasat tusa achirmakmiayi. Nujaj̄ Yusa uchirí untsurí ajasji. Tura Kristu ii iwiajrinti. <sup>30</sup> Tura Yus achikmia nuna Niiniu awajsamiai. Tura nu shuaran “pénkeraitrume” tímiayi. Tura ti shiir awajsamiai.

<sup>31</sup> Wats, nuikia Yus in yáinmakrin ¿yaki in nupettamkattaj̄? <sup>32</sup> Ni Uchiríncha suritramkachmiayi antsu in jarutramkat tusa akupturmakmiayi. Tura asa ni Uchiríjaj̄ métek ti shiira nuna ashí suramsashtatjik. <sup>33</sup> Yus achikmia nú shuaran ¿yaki sumamtikiat? Yus Ápaka “pénkeraitrume” tiniu asa penké túrashtatui. <sup>34</sup> Tura ¿yaki “jiniun apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuurin̄ ekemas in áujturmaj̄. <sup>35</sup> Kristu ti anenma asakrin in akantamkitin atsawai. Wáitiakrishá, itiurchat ín̄kiuakrishá, shuar áintramkurnisha, tsukamakrishá, entsatai atsakuisha, tsúumainjaj̄isha, tura mantamnakrishá, nujaj̄ “Kristu anentsui” tíchamniaitji. Nuka Kristu anenkrattairiya akantamkitin jeatsui. <sup>36</sup> Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmají.”

Tu áarmaiti.

<sup>37</sup>Tuma aín Kristu in anenma asakrin Niijiai ti nupetmakuitji. <sup>38</sup>Kristu anenkrattairiya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpinmasha tura nunkanmasha akupin ainia nusha, yamá írunna nusha, ukunam átatna nusha, <sup>39</sup>yakí írunna nusha, nunká írunna nusha, kame ashí Yus najanmu írunna nusha Yusa anenkrattairiya penké akantamkichmini-aitji. Yusa anenkrattaisha ii Uuntri Jesukrístu túrunamujai paant wainji.

## 9

### *Yus Israer-shuaran ni shuari arti tusa achikiarmiania nu*

<sup>1</sup>Yamá tájana nu Kristu shuari asan imiá nekasán wáitruksuk tájai. Winia enentáirsha tura Yusa Wakanísha “nekas tawai” turutainiawai. <sup>2</sup>Israer-shuaran waitnentakun ti kuntuts enentáimjai. <sup>3</sup>Wíshuar áiniakui Krístunmaya kanakin yuminnaraintjai nujai wíshuaran yáinminiatkiunka. <sup>4</sup>Israer weeá shuar áiniawai. Tura ni uchirjá áinis Yus achikiaruiti. Yusa wincharísha niijiai pujumiayi. Yaunchu Chicham ní weatríjiai iwíaramuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsankatkattana nunasha ujakmiayi. <sup>5</sup>Ni weatrín Yúsan ti péker enentáimtin irunmiayi. Krístusha aents ajas nú shuarnum akiiniamiayi. Krístuka Uunt Yus asa tura ashí akupin asa Nínki tuke shiir awájností. Núnisan atí.

<sup>6</sup>Kame Yus ashí Nii timia nuna Israer-shuaran súsachmataisha nujai “Yus timia nu uminkiachuiti” tíchamniaiti. Antsu júnis enentáimpratniuiti: ashí Israer weeá áiniayatan Yusjai ísmaka ashí nekas Israer-shuar áiniatsui. <sup>7</sup>Núnisan Apraám weeá shuarsha ashí nekas ni shuar áiniatsui. Iis, Yus Apraáman tímiayi “Aya Isak pampanma amee shuarnum ártatui.” <sup>8</sup>Nujai páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajai métek akiinia nu nekas Apraám weeá shuar áiniak Yus timian wainkiattawai. <sup>9</sup>Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

<sup>10</sup>Nu arantcha, ii weatri Isaka nuwe Ripikia jimiampramiayi. <sup>11-13</sup>Nu uchisha akiini-ainiatsain pékernasha tura yajauchincha túruiniatsain Yus Ripikian tímiayi: “Iwiajria nu ni patain umirkattawai.” Ataksha núnisan Yus ni Papiriin chichak “Jakupan aneakun Esaun nakitramjai” tímiayi. Nujainkia páantaiti. Yus wakerak aya ní enentáijjiajn shuaran achikminiaiti. Nu shuar túrunamu enentáimtutsuk túramniaiti.

<sup>14</sup>Túriniaitkiui “Yus pékerchaiti” ¿titiyajash? Atsá. <sup>15</sup>Yus Muisaisan júnis tímiayi: “Wi wakerajna nunak waitnentrattajai.”

<sup>16</sup>Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijjiajn wakerak waitnentawai. <sup>17</sup>Ataksha Yus-Papininum tawai “Yus Ejiptu nunka akupniurín tímiayi

“Ámijjai ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

<sup>18</sup>Tuma asamtai Yus Nii wakera nuna waitnentawai. Túrusha Ejiptu akupniurín túramia núnisan Nii wakera nú shuaran enentáin kátsuram awajtawai.

<sup>19</sup>Tura “Núnisaitkiunkia ¿urukamtai shuaran Yus súmamtikia? turutchatapash. Nii wakerakuinkia ¿itiurkattajik?” turutchatapash. <sup>20</sup>Warí, aents asam Yusjai ¿tunaiminkia-aitiam? Nuwá pininkian nájankui núweka “¿urukamtai júnis najatam?” tíminkiait. <sup>21</sup>Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

<sup>22</sup>Yajauch shuar ti asutiátin áiniak emesnartinnium wétin áiniawai. Yus nu shuaran asutiá ni kakarmarín iniaktustaj tayat ti katsuntramiayi. <sup>23</sup>Tura katsunteak ni

anenkrattairin iniakmasmiayi. Nú arant nuikia in waitnentramak shíir enentaijjai péñker awajtamkur ni anenkrattairi ti paantchakait. Nekas shíir enentaijjai péñker ajasat tusa yaunchu iwiartampramijai. <sup>24</sup> Tura incha, Israer-shuarnumiasha Israer-shuarchanumiasha, ni shuari ajasat tusa achirmakmijai. <sup>25</sup> Núnisan yaunchu Yúsna etserin Useas Yus-Papinium tawai:

“Wíishuarchan Wíishuar awajsattajai. Aneachmancha aneamu awajsattajai.

<sup>26</sup> Tura Yus “Wíishuarchaitrume” tímia nú shuaran “Nekas iwiaaku Yusa uchiríniuitrume” ukunam títiatui.”

Tu áarmaiti. <sup>27</sup> Antsu Isayas Israer-shuaran páchis tímiayi:

“Israer weeá ti nankaamas untsurí áiniayat penké ishichik uwemprartatui. <sup>28</sup> Kame Yus yajauchin akupkataj tímia nuna takamtsuk wárik umiktatui.”

<sup>29</sup> Núnisan Isayas ataksha tawai:

“Ashí akupeana nú Yus in waitnentramachkurniñkia Sutuma péprusha Kumura péprusha takamtsuk jákarmia núnisan jákaaji.”

### *Israer-shuar uwempratin chichamjai tujinkiarmiania nu*

<sup>30</sup> Wátsek, Israer-shuarcha, Yus iisam ni túramurijjai “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi. <sup>31</sup> Antsu Israer-shuarka péñker akupkamun umiktinian wakeruiniayatan tujintiainiakui nujai péñker ajastinian tujinkiarmiayi. <sup>32</sup> ¿Urukamtai tujinkiarma? Yúsan enentáimtutsuk aya ni péñker túramujai péñker ajastinian enentáimtuiniak tujinkiarmiayi. Krístun enentáimtustinian nakitiainiak shuar kan kapen awankemtuktinia núnisan iniararmai. <sup>33</sup> Tura kaya tukumkar iniarhamniakait. Nu asamtai Yus-Papinium Krístun pachis tímiayi:

“Seun péprunam kayan ikiuajai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaarchartatui” tawai.” Tu áarmaiti.

## 10

<sup>1</sup> Yatsuru, Israer-shuar uwemprarat tusan ti wakerakun Yúsan áujtajai. <sup>2</sup> Maa, uwempratniun nékachiatan Yúsan shiir awajsatniun ti wakeruiniawai. <sup>3</sup> Túmaitiat shuáran Yus péñker awajsatniun nékachu ásar aya ni péñker túramujain péñker ajastinian wakeruiniawai. Tuma ásar Yus péñker enentáimtamujai péñker ajastinian jeacharai. <sup>4</sup> Aya Krístu enentáimtamujai péñker ajastin asamtai akupkamu umirkatniujai péñker ajastin ántrai.

<sup>5</sup> Akupkamujai péñker ajastinian pachis Muisais tímiayi: “Nuna takamtsuk umirniuka nujai péñker pujustatui.” Tu áarmaiti. <sup>6</sup> Antsu Krístun enentáimtus péñker pujustinian pachis shuar juna tímiaiti: “Ti iturchata áinis “¿Yaki nayaimpiniam waka Krístun itiarat?” tiirap,” tawai. <sup>7</sup> Tura ¿Yaki jakamunam we Krístun iniantkit?” tiirap” tawai. <sup>8</sup> Tura junasha tawai: “Yus-Chicham yúpichuch umirkamniaiti. Aya enentáimjai enentáimtakum wenumjai ujaktiniaitme.” Nu Chicham “Yus enentáimtustiniaiti” tawai. Nu Chicham tuke étsereaj núiti. <sup>9</sup> Yus Jesusan jakan iniantkimia nu enentáimtakum tura wenumjai “Jesus winia Úuntruiti” takum uwemprattame. <sup>10</sup> Kame Krístu enentáimtakmin Yus “pénkeraitme” turamtatui nuyá wenumjai “Jesukrístun enentáimtajai” takum uwemprattame.

<sup>11</sup> Ataksha Yus-Papinium tawai: “Nin shiir enentáimtuinia nú shuar natsaarchartatui.”

<sup>12</sup> Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí péñkeran súawai. Tura ashí métek ni Úuntrinti.

<sup>13</sup> Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti. <sup>14</sup> Tura Krístun enentáimtuiniachusha ¿itiurak Nin áujarat? Tura Krístun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniaiti. <sup>15</sup> Tura akupkachmasha ¿itiurak

Yus-Chichaman ujakarát? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamen etserki weana nu ti shírchakait.”

<sup>16</sup> Tura ashí shuar uwempratin chichaman ántuiniayatan umirainiatsui. Isayasha yaunchu aak tímiayi:

“Uuntá, ¿yaki ii étserman antukaruit?”

<sup>17</sup> Paantchakáit. Kristu túramuajakam antuktiniaiti. Tura antukar Krístun shiir enentáimtustiniaiti.

<sup>18</sup> Tura ¿Israer-shuar Yus-Chichaman antukcharu ásarān Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

<sup>19</sup> Tura “Israer-shuar nu chichaman antukariat ¿paant nekaawarmaashi?” inintrusminiaiti. Tura nekas nekaawarmai. Tuma asamtai Muisais tawai:

“Israer-shuar chān nékachu ainiana nuna shiir awajeakun akajkattajrume.”

<sup>20</sup> Nuyá Isayas ashamtsuk áarmiayi:

“Eatkacharua nu wáitkiarmiayi. Inintruiniatsain wantintiukmiajai.”

<sup>21</sup> Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

## 11

### *Chíkich Israer-shuarsha uwemprartatui*

<sup>1</sup> Tura Israer-shuar Yúsan umiiniachkui ¿Yus nin iniaisaashit? Pénkea. Warí, wi Israer-shuar chakaitiaj. Wi Apraámsha tura Pinjamin weeá akiiniachukaitiaj.

<sup>2</sup> Yámankamtaikniumiā Yus Israer-shuaran ni shuar arti tusa achikiu asa yamaikia ini-aisashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi: <sup>3</sup> “Uuntrú, namañ awasar Yus sútaincha mash saákiarai. Áminiun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiai.

<sup>4</sup> Tura Yus ayak tímiayi “Siatí mir (7000) áishmankan Israer-shuar numiā apujtum-saruitjai. Nu shuar ántar-yus Páaran tikishmatrachu áiniawai” tímiayi Yus.

<sup>5</sup> Núnisan yamaisha Yus ti waitnentainia asa ashí Israer-shuar numiā ni shuarin achikiuiti. <sup>6</sup> Yus ni enentáijiañ waitnentak túraití. Nú shuar péñker tura asamtai waitnentatsui. Yus aya péñkernak waitnentakka nuikia waitneñkratchainti.

<sup>7</sup> Ayu. Nuikia ashí Israer-shuar péñkeran eákaru añ aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajar kusurua núnin awajnasarmiayi. <sup>8</sup> Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jñincha tura ántushtai kuíshniasha súsarmiayi. Yamaisha núniskete.”

<sup>9</sup> Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

<sup>10</sup> Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

### *Israer-shuarsha uwempramin áiniawai*

<sup>11</sup> Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarsha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui. <sup>12</sup> Israer-shuar umirkachmajai ashí shuar, Israercha ainia nusha, uwempramnia ajararmiayi. Nuna nankaamas Israer-shuar atak Yúsan enentáimtuiniak uwemprarmatai nujai ashí shuar ti péñker ajarartatui.

<sup>13</sup> Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai. <sup>14</sup> Nuna túrakun átum uwemprarmena núnisan niisha, wíshuar ainia nu, nuna ísar uwemprarat tusan wakerajai. <sup>15</sup> Kame Israer-shuaran iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmaya nantaktinia áintsan ti shiir átatui. <sup>16</sup> Emka apatuk ana nu Yus súakur yuminsamuitkiunka nuikia ashí apatkunam Yus yuminsamuiti. Núnisan numí kankapé péñkeraitkiunka numi takamtsuk péñkeraiti.

<sup>17</sup> Yuska chíkich chíkich Israer-shuaran, numí kanawen tsupik ajapniua áinis, ini-aisamiayi. Tura nuyá atumin niisháa numinmaya árumniñ nu numiniam anujtamkarmarme. Nujai péñker numijjai tsanínkrum nu kakarmajai iwiaakrume. <sup>18</sup> Tura kanawe tsupikmajai nankaamantu enentáimtumasaip. Warí, ame kakarmarmijjai numi wajatsui antsu ni kakarmarijjai iwiaakme.

<sup>19</sup> “Túrasha wi anujnaktinian kanawen tsupikchamka” tíchainmeash. <sup>20</sup> Nekasaiti, túmaitiat niisha Yúsan enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anearta. <sup>21</sup> Yus nekas kanawé péñkercha túrawarun tsupikkia páchitsuk amincha tsupirmakchamniakait. <sup>22</sup> Iista, Yus atumjai ti tsánkaiti tura Israer-shuar umichua nuna ti wari asutiaiti. Tura péñker wáinmamkata. Yus tuke nekas enentáimtachkurminkia atumniasha páchitsuk tsupirmaktatume. <sup>23</sup> Núnisan Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai. <sup>24</sup> Túram Israer-shuarsha asam niisháa numinmaya tsupikiar penké numiniam anujnakuitrume. Nuna tura asa nekas ni kanawé tsupikia ajapamun páchitsuk atak anujkamniaiti.

### *Israer-shuarsha uwempratin áiniawai*

<sup>25</sup> Yatsurú, nankaamantu enentáimtumarajirum tusan yaunchu nekaachman ujaajrume. Júiti: Israer-shuarnumianka chíkich chíkich Yúsan nekas enentáimtustinian nakitiainiawai. Tura aya Israer-shuarsha Yús-shuar ajasarat tusa túrunamiayi. <sup>26</sup> Tura Israer-shuarsha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúnnumiá Uwemtikiartin tátatui. Israernumiá tunaan asakátrattawai.

<sup>27</sup> Jú Chichamnasha nijjai najanattajai: ni tunaarín asakturtatjai.”

<sup>28</sup> Uwempratin chicham atumsha nekaatarum tusa Israer-shuaran Yus ni nemasri awajsaruiti. Tura yaunchu ni weatrín achikiu asa nincha tuke anenawai. <sup>29</sup> Kame Yus amáa nuna ataksha ataatsui. Shuarán achiksha atak iniaiyatsui. <sup>30</sup> Átumka yaunchu Yus umirchayarme. Tura yamaikia Israer-shuar umirainiachkui Yus atumin waitnentrarmarme. <sup>31</sup> Núnisan nii yamaikia Yúsan umirainiatsui. Tura atumin waitnentrampamarum núnisan nincha waitnentrattawai. <sup>32</sup> Nujai ashí métek sumamtikiak métek waitnentrar uwemtikrattawai.

<sup>33</sup> Maa, Yus imiá shiirchakait. Tí nekachukait. Ni túramu penké nekaachminiaitji.

<sup>34</sup> “Uunt Yus enentáimmian ¿yaki neka? Tura ¿ya Nin unuiniaruit. <sup>35</sup> Yaki Nin péñkeran susa shiira nujai yapajniuit?” Tu áarmaiti.

<sup>36</sup> Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisan atí.

## 12

### *Yusaj surumaktarum*

<sup>1</sup> Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu árimiayi. Atumsha núnisrumek iwiaaku árumna nuiñ Nii túrutataj taku túrutati tusarum tuke

enentáijjaj Yusaj tsan̄kamaktarum. Yusaj ísam ti shiir atí tusarum túratarum. Nu túrakrumka páatkechu antsu ti nekas enentáimjaj Yus shiir awajin átrume.

<sup>2</sup> Chíkich shuar aya jú nun̄kanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsan̄katkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péñkeraiti.

<sup>3</sup> Yus winia waitnentrak akatar akuptuku asamtai júna tájarme. Atumek wíkitiajtai tu enentáimtumatsuk jeamna nujaj métek enentáimtumasta. Yus enentáimta asakmin takastinian suramsana nujaj apatkam nekaamata. <sup>4</sup> Ii ayashí chikichkiitiat ii muchitmarj untsurjinti. Tura métekrak muchitiániatsui. <sup>5</sup> Núnisrik iisha, Yus-shuarti, ayashí muchitmarjya áintsarik untsurjitiatar chikichik ayashtinia áintsar takaaji. Nusha Krístujaj tsan̄n̄kiu asar áitkiamuitji. Túramu asar nuamtak atsumnaiyaji.

<sup>6</sup> Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuñkia Yus enentáimtakum unuimiarmam nujaj métek etserkata. <sup>7</sup> Chíkich shuar yáñtinian Yus suramsaitkiuñkia nekas enentáimjaj yáñtá. Unuiniartiniaitkiumka yawetsuk unuiniarta. <sup>8</sup> Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentáijjaj ementutsuk súsarta. Shuaran wáinin atí tusa Yus apujtamsaitkiuñkia ti enentáimsam túratá. Tura shuar itiurchat pujuinia nu yáñtinian Yus suramsaitkiuñkia shiir enentáimsam túratá.

### *Yus-shuar túratniua nu*

<sup>9</sup> Nekas enentáijjaj mai anenai ajatarum. Yajauch nakitrarum péñkera nu túratarum. <sup>10</sup> Nuamtak yachi asarum núnisrum mai anenai ajatarum. Chíkich wijjaj nan̄kaamas úuntaiti tu enentáimtunaistarum.

<sup>11</sup> Nakittsuk kakaram ajasrum ashí enentáimjaj ii Uuntri wakera nu túratarum.

<sup>12</sup> Ukunam Yus tsan̄katramkattajnia nu enentáimtusum warastarum. Wáitiakrumsha katsuntratarum. Tuke iniaitsuk ashí túrunamujaj Yus áujasatarum.

<sup>13</sup> Yus-shuar atsumainia nujaj yáñtarum. Írarsha péñker itiaatarum. <sup>14</sup> Yajauch awajtamainia nu shiir awajsatarum. Yus yajauch yumñtsuk nu shuaran péñker túrawarat tusarum seattiarum.

<sup>15</sup> Warainia nujaj warastarum. Kúntuts pujuinia nujajisha úuttiarum.

<sup>16</sup> Chikichik enentáijjaj métekrak shiir enentáimtunaitiarum. Nan̄kaamantu enentáimtumasaairap. Antsu péejchach ajastarum. “Ti nekajaj” tu enentáimtumasaairap.

<sup>17</sup> Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá. <sup>18</sup> Ame jeamna nujaj ashí shuarjaj nawamnaikiam wekasata. <sup>19</sup> Yuska ni Papiriin júna áantikramiayi: “Wíitjai tunaan asutiátniun. Wisha yapajkiattajaj” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti. <sup>20</sup> Tura nu arantcha tawai: “Ame nemasrum tsukamakuisha ayurata. Kitiamakuisha umartin susata. Nu túrakum péñker ajachua nu iniatsaartatme.” <sup>21</sup> Yajauch nupettamkajñ. Antsu péñker túrakum yajauchia nu nupetkata.

## 13

<sup>1</sup> Akupniunka ashí shuar umirkatniuiti. Akupniuka Yus apujsamuiti. Yus apujsachma akupin atsawai. <sup>2</sup> Tuma asamtai shuar akupniun umirtsuna nu, Yus apujsamun umireachu asa nekas asutniátniuiti. <sup>3</sup> Kame akupniuka péñker shuar sapijmi-akarar tusar apujsachma ániawai. Antsu yajauch shuar ashamkarar tusar apujsamu ániawai. Nii ashamtsuk pujustin wakerakmeka péñker túratá. Túrakminkia akupin shiir enentáimturmartatui. <sup>4</sup> Yainmakat tusa Yus apujsamuiti. Antsu yajauch túrakmeka akupin nekas ashamkatniuitme. Warí, Yus ántar apujsachmaiti. Tunáa shuaran asutiátniun Yus

apujsaiti. <sup>5</sup> Nu asantai akupin tuke umirkatniuiti. Aya asutiúwain tusar umirkashtini-aitji. Antsu shiir enentáijjai wekasatin umirkatniuiti. <sup>6</sup> Tuma asantai núnisañ akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

<sup>7</sup> Ashí túratniua nu túratarum. Akiktiniaitkiumka páchitsuk akikta. Akupniusha uuntcha ashí núnisañ írúnna nusha shiir enentáimtikratarum. <sup>8</sup> Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame. <sup>9</sup> Akupkamusha tawai: “Tsanirmawaip, mañkartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjain tminiaiti: “Ame ayashim aneam núnismek ashí shuar aneata.” <sup>10</sup> Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

<sup>11</sup> Ii yámankamtaik Yus nekas enentáimtusmiaj nuí “Ii ti shiir ajasar tuke uwempratin ukunam átatui” tu enentáimprachmashiaji. Antsu yamaikia nu tsawant yuntumsantai ashí túrajnia nujai shintiarar enentáimpratniuitji. <sup>12</sup> Tuke káshiitiat tsawaattemprai. Ii Uuntri Kristu jú tunáa nunkanam tátin ishichik ajasai. Tuma asantai ii túrutairi kiritniua núnisañ yajauch túrutai ana nuka túrutsuk tsáapninium péñker wekasatin kakaram ajastai. <sup>13</sup> Túratniua nujai métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratui. <sup>14</sup> Ii Uuntri Jesukristu túramia núnisrik túratui. Tura ii ayashí wakeramu umikiat tusar tsañkatkashtiniaitji.

## 14

### *Ame yatsum kakantraip*

<sup>1</sup> Shuar Yúsan ishichik enentáimtana nu itiaatarum tura kakantrairap. <sup>2</sup> Iis, chíkichka ashí yuamniaiti tuiniawai. Tura chikichcha, Yúsnan awajirar, naman yúashtiniaiti tuiniawai. <sup>3</sup> Tura ashí yúa nuka namanken yúatsna nuna wishikrashtiniaiti. Núnisañ ashí yucha nu ashí yuun kakantrashtiniaiti. Warí, núnaka Yus ni shuarin awajsachukait. <sup>4</sup> ¿Ámeke timiataash péñkeraitiam chíkich shuar kakantinia? Antsu ni úuntriñ ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

<sup>5</sup> Chikichcha enentáimpratai. Chíkich shuar tsawantan achikiar “Jú tsawantaj Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. <sup>6</sup> Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsataj tusa túrawai. Yurumkajaisha ashí yúana nu Yúsan yuminkias shiir awajsataj tusa túrawai. Núnisañ ashí yúatsna nusha Yúsan yuminkias shiir awajsataj tusa túrawai.

<sup>7</sup> Iikkia ii enentáijjain iwiaaktsuji. Tura jáakrishha ii enentáijjain jaatsji. <sup>8</sup> Kame iwiaaku pujakrishha ii Uuntri Kristu shiir awajsatai tusar pujurji. Tura jáakrishha tuke Níniuitji. Nu asantai iwiaaku pujakrishha tura jakarsha tuke Krístunuitji. <sup>9</sup> Kame jakancha iwiaakuncha ashí ni Uuntri ajastaj tusa Kristu jaka nantakmiayi.

<sup>10</sup> Tura ¿urukamtaik ame yatsum “yajauchiiti” tame. Urukamtaik nakitiam? Warí, ashí iikkia ii túramu paant awajnasat tusar Kristui naka wajastatji. <sup>11</sup> Nu asantai Yus-Papinium tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrtiartatui” tawai.” Tu áarmaiti.

<sup>12</sup> Tuma asantai iisha chikichik chikichik ashí ii túramu Yus paant ujakartatji.

### *Ame yatsum tunaanum ajurairap*

<sup>13</sup> Nu asamtai “yajauch túriniaiti” tu áujmatnaisashtiniaitji. Antsu ii yachí tunaanum ajuarchatin ti enentáimturtniainitji. <sup>14</sup> Jesukrístu jintintiamu asan júna nékajai: Yus najana-muka péñkerchaka atsawai. Ashí túramniaitjai. Túrassha shuar chichaak “Nu túrushtainti” táyat nuna túrakka niijijai tunaiti. <sup>15</sup> Tuma asamtai shuar chichartamuk “Nu yúakminkia Yusjai péñkerchaiti” tai, ame yúakminkia nu shuar itiurchat enentáimsashtatuak. Tura niisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujain ame yatsum Kristu jarukmia nu emenkákaip. <sup>16</sup> Tura “yuamni-aitjai” táyatam wi yúakui yajauch áujmatrusarañ tusam iniaisata. <sup>17</sup> Kame Yus umirkatin yurumátniujajisha umartinjajisha enentáimtuschatniuiti. Antsu Yusa Wakaníjjai shiir wekasar Yusjai tura shuarjai nawamnaikiar ti péñker wekasatniuitji. <sup>18</sup> Ashí shuar Krístun núnis umireakui Yussha tura chíkich shuarsha péñker enentáimtuiniawai.

<sup>19</sup> Nu asamtai tuke shiir pujusminia nu túrakur Yusjai kakaram ajastin yáiniaiktai. <sup>20</sup> Yus iisam ashí yuamniaitji. Antsu ame yuamna nujai chíkich shuar tunaanum ajuartin tunaiti. Tuma asamtai ame yuam nujai Yus nu shuara enentáin takarsamu emesraip. <sup>21</sup> Nu túrashtin nuikia namañ yúashtincha karía umarchatniusha péñkeraiti. Warí, túrushtajijai ame yátsum itiurchat enentáimtikram tunaanum ajuarchatapash. Tura nu shuar Yúsan nekas enentáimtuschanmia ajastatui. Nuka atsutí. <sup>22</sup> Ame Yus nekas enentáimtakum ashí túramniaitkiumka Yúsak wararsata. Shuar Yus íimmianum shiir enentáijjai mash túramnia nu nekas shíiraiti. <sup>23</sup> Tura araantushim yua nuka Yúsan shiir enentáimtusuk yua asa sumamattawai. Kame ashí Yus shiir enentáimtusuk túramu tunaiti.

## 15

### *Chíkich shuar wakeramuk enentáimtustiniaiti*

<sup>1</sup> Yusjai katsuaru ájinia nu iik enentáimtumatsuk kakarmachu ainia nu yáintiniaitji. <sup>2</sup> Chíkich shuar wakeramu enentáimtustiniaitji. Tura Yusjai nu nankaamas shiir wekasatniun yáinminiaitkiui túratniuitji. <sup>3</sup> Krístusha ni wakeramun túrachmiayi. Antsu Yus-Chicham tana núnisañ chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrumarmiyai.” <sup>4</sup> Núnisañ ashí yaunchu Yus-Papinium aarma in jintintramatniun áararmiyai. Nujai atsanamkurin shiir wáinkiatattajnia nuka katsuntrar nákastatji. <sup>5</sup> Yus atsanamar kat-suntratniun jintintramji. Tuma asa Jesukrístu túramia áintsañ atumniasha chikichik enentáijjai enentáimtunaisar pujustinian yáinmakartí. <sup>6</sup> Nujai ashí métekrak Yus shiir awajsattarme. Niisha ii Uuntrí Jesukrístuncha Aparínti.

### *Israer-shuarchanmasha Uwempratin Chicham etserkamu*

<sup>7</sup> Tuma asamtai chíkich shuarjajisha shiir awajnaisatarum. Kristu núnisañ Yúsan shiir awajsat tusa incha shiir awajtamsamijai. <sup>8</sup> Júna tajai. Kristu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujai Yus timia nuna umikmia nu nekaamniaiti. <sup>9</sup> Tura nu arantcha Israer-shuarchasha Yus waitnentrartin ásarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

<sup>10</sup> Tura nu arantcha tawai: “Ashí nunkanmaya shuartiram ashí Israer-shuar Yúsna ainia nujai warastarum.”

<sup>11</sup> Tura ataksha tawai: “Ashí aents ii Úuntrín shiir awajsarti. Tura ashí shuarsha Nin “Ti úuntaiti” tiartí” tawai.

<sup>12</sup> Isayassa áarmiyai: “Tawitia aparí Isai weatriya akupin akiinkiatatawai. Niisha ashí nunkan akupeakui ashí shuar niiniak shiir enentáimtusartatui.” Tu áarmaiti.

<sup>13</sup> Yus ashí shíiran suramsattakrin nu shiir nákaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakaní kakar-maríjjai ti shiir enentáijjai katsuntrarum, nu nákastarum.



<sup>14</sup> Yatsurú, atumsha anenainiaitume. Tura ashí Yusna nekaarum nuamtak chicharnaikiatin nékarme. <sup>15</sup> Tuma aín kajinmatkijrum tusan ataksha ti paant áakun jú enentáimtikeajrume. Yus winia waitnentrak ni Chichamen etserkat tusa akuptakui nuna áatjarme. <sup>16</sup> Kame Jesukrístu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakaníjjai shiir awajsamu ásarmatai Yusai juiniajai. Tura Yussha shiir enentáijjai itiaiiniawai.

<sup>17</sup> Jesukrístu yaintiu asamtai Yusna takarsamaj nuna wararsamniaitjai. <sup>18</sup> Tura chíkich shuarjai Kristu túramun pachischattajai. Aya wi chichasmajasha tura wi túramujasha Israer-shuarchan Kristu umintikiamia nunak áujmatsattajai. <sup>19</sup> Yusa Shiir Wakaní kakarmarijjai aents tujintiamun túran ashí shuaran Jerusaréñ péprunam nanakanam etserkin Iririkiu nunkanam ejekamjai. Kristu-chichaman ashí nu nunkanam etserkaitjai. <sup>20</sup> Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujai chíkich takasmanum takarsachuitjai. <sup>21</sup> Yus-Papisha núnisan tawai:

“Chichaman penké antukcharuka nekaawartatui. Nin áujmatman anturkacharusha unuimiarartatui.”

### *Papru Rúmanam wétaj tawai*

<sup>22</sup> Nuna pujuru asan íitjarum táyatan íichmajrume. <sup>23</sup> Tura yamaikia juyá takatrun umikian tura yáunchusha tuke íitjarum tiniu asan <sup>24</sup> Ispania nukanam wéakun íistatjarme. Tura atumíin shiir irasan Ispanianam wéakui atumsha yaintkiarum shiir akuptukchat-tarpash. <sup>25</sup> Tura yamaikia kuitjai Jerusaréñnumia Yus-shuaran yáintaj tusan wéajai. <sup>26</sup> Masetúnianmaya shuarsha tura Akayanmaya shuarsha kuítian irurar Jerusaréñnumia Yus-shuaran atsumainia nuna akuptuktai tuiniawai. <sup>27</sup> Ti wakeruiniak túrawarmiayi. Nu nekas túrashtinkiait. Israer-shuarnumia Yus-Chichaman antukaru ásar yamaikia ni kuítrijjai páchitsuk yáinchatniukait. <sup>28</sup> Tuma asamtai jú kuitian súsan umiran nuikia Ispanianam wéakun íiktatjarme. <sup>29</sup> Tura nui winiakun Kristu Shiir Chichamen nujai shiir yáintajrum tusan ejeetitiajrume.

<sup>30</sup> Yatsurú, ii Uuntri Jesukrístunu asarum tura ni Wakaní pujurtamkurmin anenia asarum Yus áujtursatarum. Núnisrum wíjjai métek Yusna takastin yaintkiattarme. <sup>31</sup> Jutia nunkanmaya Israer-shuarnumia uwentikrat tusarum Yus áujtursatarum. Tura jú kuitian júajna nunasha Jerusaréñnumia Yus-shuar shiir achikiartí tusarum Yus áujtursatarum. <sup>32</sup> Nujai, Yus wakerakuinkia, péñker wampú enentáimsan warasan íittiajrume. <sup>33</sup> Yus ti shiir pujustinian súana nu atumjai tsaniñ pujurtamsati. Núnisan atí.

## 16

### *Amikmaamun akupramiania nu*

<sup>1</sup> Ii umai Jépeka Senkrea péprunmaya Yus-shuaran yáiniaiti. Ti penker Yus-shuaraiti. <sup>2</sup> Kristu náariin shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yaintarum.

<sup>3</sup> Pirisirasha Akirasha wíjjai métek Jesukrístunun takasaru ásar amikmaatainijai. <sup>4</sup> Niisha winia uwentikrurtai tusar jáninikiarmiayi. Tuma asamtai yuminkiniyajai. Tura aya wíkichu antsu ashí Israer-shuarchanumia Yus-shuar ánia nusha yuminkiniawai. <sup>5</sup> Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi. <sup>6</sup> Marisha, atumjai ti takasua nu amikmaatruatarum. <sup>7</sup> Tura wí shuarsha Anrunikiusha Júniassha amikmaatruatarum. Niisha wíjjai sepunam pujusarmai. Wíjjai emka Krístun shiir enentáimtusar chíkich akatramujai nankaamas takasaru áiniawai.

<sup>8</sup> Ámpriassha Krístunam winia aneamu amikiur asamtai amikmaatruatarum. <sup>9</sup> Urpanujajsha Jesukrístu takatrí tsaniñniuitji. Niisha tura aneamu Estakishsha amikmaatruatarum. <sup>10</sup> Apirishsha amikmaatruatarum. Niisha Krístun ti shiir enentáimtamú ti páantaiti. Núnisan Aristúpuru shuarsha amikmaatruatarum. <sup>11</sup> Wíishuar Erutiúnsha tura Narsisu shuarsha Krístu shuarí ásarmatai amikmaatruawarta. <sup>12</sup> Tripiniasha tura Tripiusasha Yúsnan takainia ásarmatai amikmaatruatarum. Núnisan ii umai Pírsitia Yúsnan ti takasu asamtai amikmaatruatarum. <sup>13</sup> Rúpusha, nusha ti penker Yus-shuar, tura nukurísha amikmaatruatarum. Niisha wijijai nekas winia nukurua núnisaiti. <sup>14</sup> Asin̄kritiusha, Pirikiuntisha, Érmassha, Patrupassha, Érmessha, tura ashí niijijai Yús-shuar ainia nu amikmaatruatarum. <sup>15</sup> Núnisan Jirurukusha, Júriasha, Néreusha, ni umajijajsha, Urimpiassha, tura ashí Yus-shuar niijijai pujuinia nu amikmaatruatarum.

<sup>16</sup> Nuámtaksha shiir aujnaisatarum. Ashí juyá Krístu shuarí amikmaatmainiawai. <sup>17</sup> Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum kanaktiarum. Ni yajauch túramu átum penker takastin unuimiarmena núnischaiti. <sup>18</sup> Nu shuar ii Uuntrí Jesukrístunun takainiatsui. Antsu ni wak-eramun uminiawai. Tura ti shiir chichasar nékachun anan̄kenawai. <sup>19</sup> Átum umirma ashí shuar nékainiakur ti waraaji. Yajauch túrutsuk aya penker túratin enentáimsarum pujustarum. <sup>20</sup> Yus tuke shiir pujustinian amawa nu ti wárik uunt iwianchin nupettur-maktatui. Tura ii Uuntrí Jesukrístu shiir yainmakarti.

<sup>21</sup> Timiutéusha, wijijai takau, amikmaatmarme. Núnisan Rúsiusha, Jasun̄sha, Susipatre-sha, mash wíishuar ainia nu amikmaatmarme. <sup>22</sup> Wi, Tersiu asan, Papru chichamen̄ ju papinium áateakun Krístu náariñ amikmaajrume.

<sup>23</sup> Káyusha amikmaatmarme. Ni jeen pujaji tura juisha ashí Yus-shuar irunainiawai. Erastusha ju pepru kuítr̄in wáinniuiti. Niisha ii yachí Kuártujaj amikmaatmarme.

<sup>24</sup> Ii Uuntrí Jesukrístu ti shiir yainmakarti. Núnisan̄ atí.

### *Yus shiir awajsatai*

<sup>25</sup> Watsek, Yus shiir awajsatai. Niñki nekas kakaram awajtamsamniaiti. Wi Uwempratin Chichamnum Jesukrístunun étsereaj nujaj ikiantamprattawai. Nu chicham yámankamtaiknumiã nekaachmanak Yus yamaikia paant awajsaiti. <sup>26</sup> Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nun̄kanmayã shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

<sup>27</sup> Yúsak Niñki ti neka asa tura Jesukrístu ti penker tura asamtai Niñki tuke shiir awájnástí. Nuke atí.

## Papru KURINTIUNMAYA SHUARAN Emka papin aar akuptukma

### *Kurintiumaya Yus-shuaran Papru áatramiania nu*

<sup>1</sup> Wi Pápruitjai, Jesukrístu akatramu. Yus nuna wakerak, ni akatramurj atí tusa anaitiukmai. Wi, ii yachj Sústinisjai, ju papí akupeaji. <sup>2</sup> Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujaj tsaninkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrinti. <sup>3</sup> Yus ii Aparí tura ii Úuntrj Jesukrístusha waitnentramainia ásar yainmakarti imiatkinchanum tuke shiir pujustinian.

### *Ii Uuntrj Jesukrístujaj tsaninkia pujustin*

<sup>4</sup> Yusan áujkun yuminsan atumin shiir enentáimtajrume. Jesukrístujaj tsaninkia pujakrumin Yus shiir enentáimturmawai. <sup>5</sup> Jesukrístujaj tsaninkia pujakrumin Yus atumin ti yáinmawai ashí pénger ana nu enentáimtakrum tuke shiir chichastinian. <sup>6</sup> Kristu juna túramniaiti tíchamkaj. Ashí yamaikia uminkiaiyi. <sup>7</sup> Tuma asamtai ashí Yus súramna nu atsumatsrume. Nu túrakrum ii Uuntrj Jesukrístu tatin tuke nákarme. <sup>8</sup> Tura iniaitsuk tuke emettamattawai ii Uuntrj Jesukrístu támatai atumi tunaarj pachischatin. <sup>9</sup> Jesukrístu ii Uuntrinti. Nijjaj tsaninkia pujusúk tusa Yus achirmakmarme. Tura Nii tana nuna tuke umiktatui.

### *Yus-shuar akantramu*

<sup>10</sup> Yatsuru, ii Uuntrj Jesukrístu naarj pachisan, seajrume métek enentáimpratarum tusan. Nísháa nísháa enentáimprairap antsu chikichik enentáijjaj métek enentáimsa pujustarum. <sup>11</sup> Átum yajauch chicharnaisarum pujarme. Kruí shuarj tu ujatarmatai tájarme. <sup>12</sup> Kame júnis awai: Chíkich “Wi Páprunuitjai” tuiniawai. Chíkich “Aporusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristushuaraitjai” tuiniawai. <sup>13</sup> ¿Warí, nuinkia, Kristu akantramukait. Páprusha krúsnum jarutramkamaashi. Tura Papru naarj pachisa imiaimiukaitrum? <sup>14</sup> Atumin untsurj imiaichu asan shiir enentáimjai. Aya Krispu Káyujaj jímiarchiniak imiaimjai. <sup>15</sup> Nújajinkia shuar “Papru náarj in imiaimiuitjai” tíchamniaiti. <sup>16</sup> Maa, nekas, Estepanasa shuarincha imiaimjai tura chíkich wi imiaimiun nékatsjai. <sup>17</sup> Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimpraraj in tusan. Antsu yúpichuch chichaajai Kristu krúsnum jakamuk paant atí tusan.

### *Kristu Yusa kakarmaríncha ni nekatairíncha paant iniakmasmiania nu*

<sup>18</sup> Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántrai nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmarj takusminiaiti” tu enentáimji. <sup>19</sup> Núnisan tawai Yus-Chicham yaunchu aarma: “Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsatjai” tawai Yus ni chichamen. <sup>20</sup> Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiertin áiniana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujaj pénger pujusam uwemprattame” tu enentáimiainiawai. Tura núnaka mash Yus penké ántar najanaiti. <sup>21</sup> Aya ni nékamujaj aents Yusan nekaacharmiayi. Núnisan atí tusa Yus túramiaiyi, timiá neka asa.

Antsu ashí aentsun Yus ni chichamejaji uwentikratniun wakerimiayi. Chíkich “ántraiti” tuiniana nu chichamjajink<sup>i</sup> Yus Nin enentáimtuinia núnaka uwentikratniun wakerak túramiayi. <sup>22</sup> Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash pé<sup>n</sup>ker jijkim turuttia wisha métek enentáimprataj” tuiniawai. <sup>23</sup> Iikia antsu Kristu krúsnum jarutramkamuk étse<sup>r</sup>eaji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ántraiti” tu enentáimiainiawai. <sup>24</sup> Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmarincha ni nekatairincha paant iniakmasmiayi” tu enentáimji. <sup>25</sup> “Yusa nekatairi ántraiti” tuiniawai aents, túrasha imiá nekas pé<sup>n</sup>keraiti. “Yusa kakarmarisha jeatsui” tuiniawai aents, túrasha imiá nekas kakarmaiti. <sup>26</sup> Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisan atumin ti neka íruntsui. Ti akupniusha ti nankaamakusha atumin íruntsui. <sup>27</sup> Antsu ju nunkanam nékachua núnis ana nuna Yus achikiuiti ti neka nuna iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian. <sup>28</sup> Pé<sup>e</sup>jchachincha, nakitsamuncha, ántrachincha, Yus achikiuiti ashí nankaamantu írunna nuna amuktinian. <sup>29</sup> Nújajinka chikichkisha Yusjaji waantu enentáimprachminiaiti. <sup>30</sup> Tura Yus atumin Krístujaji tsanin apujtamsaiti. Tura Kristu enentáimtusar Yus nekas nekatainka nekaattaji. Kristu enentáimtakin Yus shiir enentáimturmaj*i*, pé<sup>n</sup>ker awajtamji, tura uwentikramji. <sup>31</sup> Yus-Papinium yaunchu aarma núniskete: “Shuar nankaamantu enentáimprataj tákunka ii Uuntri Yus túramun wararsati.”

## 2

### *Kristu krúsnum jakamu etserkamu*

<sup>1</sup> Wisha, yatsuru, atumin jeamaj nui Yus-chichaman ti neka chichainia áintsan tura íwiasanak ujakchamajrume. <sup>2</sup> Tura atumjaji pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. <sup>3</sup> Né<sup>k</sup>ayatan kakarmachu sapíjmiashím jearmiajrume. <sup>4</sup> Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmarincha tura ni Wakanincha paant iniakmasan Yus-Chichaman ujakmajrume. <sup>5</sup> Aentsu nekatairjijaji Yus enentáimtuschatniuiti antsu Yusa kakarmari paant nekaarum Yus enentáimtustiniaitrum*e*. Nuní asamtai Yus-Chichaman tu ujakmajrume.

### *Aya Yusa Wakanjijaji Yúsnan nekaamniaiti*

<sup>6</sup> Túmaitiat Yusa nekatairi átsuk. Yúsnan unuimiararujaji Yusa nekatairin áujmatji. Tura Yusa nekatairinka aentsu nekatairi áintsachuiti. Ju nunkanam akupin ainia nuna nekatairinchuiti Yúsna*ka*. Ju nunkanam akupniuka ishichik pujus amuukachartat-uak. <sup>7</sup> Yaunchu ju nunka atsajn Yus in uwentikrampratniun enentáimpramiayi ti shiir pujusarmi tusa. Ju Yus enentáimmari yaunchu nekanachmiayi, tura yamaikia nu nekaar áujmatji. <sup>8</sup> Ju nunkanam akupniuka nuna penké nekaacharmiayi. Né<sup>k</sup>ainiakka ii Uuntri timiá shiira nuna, krúsnum máacharu aayi. <sup>9</sup> Yaunchu Yus-Papinium áarchamukait: “Shuar Yús*an* aneana nuna Yus ti shíiran susattawai. Susattana nuka timiá pé<sup>n</sup>ker asamtai shuar wáink*ach*man, antukchamuncha, enentáimtachmancha Yus susattawai” tu áarmaiti. <sup>10</sup> Tura Yusa Wakani ii enentáin pujurtamuk Yus suramsattajnia nuna yamá*i* paant jintinramji. Nu Wakanin imia Yus enentáimmiancha mash nékawai.

<sup>11</sup> Shuar enentáimna nuna chíkich shuar nekaamniakait. Antsu aya ní enentájijajin nékatsuk. Núnisan aya Yusa Wakani Yús*nan* paant nékawai. <sup>12</sup> Ju nunkanmaya aents enentáimiainia nujaji Yusna nekaachminiaiti. Antsu Yusa Wakanin in súramaj nujaji Yus

shiir tsan̄katramajnia nu nekaamniaitji. <sup>13</sup> Yusa Wakan̄j jintinramji Yúsna chichastinian Nii wakerá áintsan̄. Ni chichamen̄ súrámji. Túramtai ii nékamujaī Yúsna étsertsuji. Tuma asamtai imia Yúsna nuka Yúsjāj péñker wekainia nu jintíaji.

<sup>14</sup> Yus-shuarcha Yusa Wakan̄niun ántatsui ántraiti tusa. Aya Yusa Wakan̄j jintintiamniaitkiui Yus-shuarcha nuna pen̄ké nekaachmin̄ áiniawai. <sup>15</sup> Antsu Yusa Wakan̄n takaku ashí mash iis, péñkera nuna nekaamniaiti. Nii túrana nunasha chíkich shuar súmamtikiachminiaiti. <sup>16</sup> Yus-Papinium yaunchu áarmaiti: “¿Yusa enentáimmiarī ya neka. Tura Yúsna ya jintintiamniait?” tu áarmaiti. Tuma aijn̄ iikia Yus-shuar ájinia nu, Kristu enentáimna núnisrik enentáimji.

### 3

#### *Páprusha Apurussha Yusa takatr̄in mai tsaniñkiar takainiawai*

<sup>1</sup> Tura wikia, yatsuru, nuik āj atumjaī pujakun Yusa Wakan̄n umirniun chichastinia áintsanak atumjaī chichastinian tujinkiamjai. Antsu ayash wakeramu umirin asakrumin Krístunam katsuarcharujaī chichastinia áintsanak atumjaī chichasmajai. <sup>2</sup> Uchi kuírach naman̄ ayurachminiaiti antsu aya umuntsatniuiti. Núnisan̄ aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarne. <sup>3</sup> Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujaī páantaiti átum ayash wakeramu umirniuitrume. Yúsna enentáimticharujaī métek wekainiaitrume. <sup>4</sup> Atum̄inkia shuar “wi Páprunuitjai” tuiniatsuk. Chíkichcha “wi Apurusnaitjai” tuiniatsuk. Tu chichaakrum ayash wakeramu umirniuitrume. <sup>5</sup> Wátsek. Wi Papru ti péñkeraashitiaj. Apurussha ti péñkeraashit. Antsu iisha aya Yusa takarniur̄intji. Yus-Chicham étserkurin ii Uuntrī enentáimtuschkuram. Ii Uuntrī takatan chíkich chíkich suramsamajnia nuke takasmaji. <sup>6</sup> Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai. <sup>7</sup> Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait. <sup>8</sup> Arakan araana nusha, entsan ukatna nusha métek áiniawai. Túmaitkiuisha takasmajaī métek Yus akiktatui. Péñker takasmatañkia péñker akiktatui. <sup>9</sup> Wissha Apurussha Yusa takatr̄i mai tsaniñkiar takaaji. Tura Yus atumí enentáin̄ takaakui atumsha Yusa núnkeá áintsaitrume.

Jeasha enentáimpramniaiti. Yus atumjaī takaak jeá jeamtinia áintsan̄ takaawai. <sup>10-11</sup> Jeá jeamainiak, emka uunt kaya nun̄ká in̄it ikiursar kaki awajsatin áiniawai. Tura nuyañka nu kayanam ekeniar júkitniuiti jeá wewe atí tusa. Wikia jeá jeammin̄ ti unuiniamiarua áintsanak uunt kaya nun̄ká emka ikiustinian nekaan, núnisnak Jesukrístunun emka ujakmajrume. Tura Jesukrístu uunt kaya kaki ikiusma áinis asa Nín̄kiti nūi jeá ekenkatin. Iis, ashí enentáimtustinia nan̄kaamas Jesukrístu enentáimtustiniaiti. Nu asamtai Jesukrístunun emka ujakmajrume. Yus nuna etserkatniun tsan̄katrukuiti. Wi emka, uunt kaya ikiursatniua áintsan̄, Jesukrístunun ujakmajrume. Tura nuyañka chíkich shuar ekeniar jeammin̄ áiniawai. Tura anearti péñker jeamtinian. <sup>12</sup> Tura jeá jeamainiak nii wakerak péñker ana nujaī jeamminiaiti. Nii péñker jeamtinian wakerak kurijaisha, kuítjaisha, shíirmach kayajaisha jeamminiaiti. Chíkich jeamkuka numijaisha, ken̄kujajaisha, nukajaisha jeamminiaiti. Núnisan̄ shuar Yúsna takaak péñker takasminiaiti túrasha nan̄kamas takasminiaiti. <sup>13</sup> Tura amuukatin tsawant jeakui ashí ni takatr̄i paant átatui. Nu tsawantaisha Yúsaiyā ji átatui tura nu jisha ni takatr̄i péñkera nunasha tura yajauchia nunasha nekapsattawai. <sup>14</sup> Tura shiir jeamuka tura nu jeasha esaachmatañkia shiir akinkiattawai. <sup>15</sup> Antsu nan̄kamas jeamuka imian̄in̄ki jiniumiã uwemprattawai, tura ni jeamma esaa pen̄ké atsuttawai.

<sup>16</sup> Enentáimpratarum. Yusa Wakaní atumíin pujá asamtai Yusa Jee ajasuram nu nékatsrumek. <sup>17</sup> Shuar Yusa Jeeen émesekuinkia Yus nu shuaran emesrattawai. Yusa Jeeenka timiá shiir asamtai túrattawai. Nu Jee atumketrume.

<sup>18</sup> Ju nunkanmayan unuimiarua núnisrum “ti nekaitjai” tu enentáimtumasrum ananmamawairap. Antsu ju nunkanmayan nékachu áinis ajas Yúsnan ti shiir unuimiártiniaiti. <sup>19</sup> Ju nunkanmaya aents nékainia nuna Yus “ántraiti” tawai. Yus-Papinium áarmaiti:

“Ju nunkanmayan unuimiarun ni enentáimmiájain Yus sumamtikiattawai.”

<sup>20</sup> Tura nu arantcha áarmaiti:

“Uunt Yuska “unuimiaru enentáimmiáncha penké ántraiti” tawai.”

<sup>21</sup> Tuma asamtai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents áarmatai. Tu enentáimprurum warasairap. Antsu nekaatarum. Ashí íranna nu atumin yainmaktiniaiti. <sup>22</sup> Páprusha, Apurussha, Pítrusha, ju nunkanmayasha, iwiaakmasha, jákatniusha, yamáí íranna nusha, ukunam átatna nusha, mash atumniaiti shiir yainmaktin. <sup>23</sup> Atumsha Kristunuitrume, tura Krístusha Yúsnaiti.

## 4

### *Yus akatramu takatri*

<sup>1</sup> Júnisañ ashí shuar enentáimturmastiniaitji. Iikia aya Kristu yáintrintji. Kristu akatramurintji Yusna yaunchu nekaachma ana nu yamáí etserkatin. <sup>2</sup> Wátsek, akatramuka tána nujai métek umiktiniaiti. <sup>3-4</sup> Wi umikmancha umikchamuncha ii Uuntri Kristu nékawai. Átum enentáimturarmena nusha tura chíkich aents enentáimturainia nusha wíjiainkia ántraiti. Imia wíkisha nekamatsjai. Kame winia tunaarun penké wáintsujai tura aya nujai “pénkeraitjai” tíchamnaitjai. Niñki Yus iirui. <sup>5</sup> Tsawant jeamtaí ii Uuntri Kristu atak tátatui. Tura ashí yamáí kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsain shuar umikiuashit tusarum enentáimtusairap. Tura nu tsawantaj Yus ashí pénker umikiarun shiir awajsattawai. Pénker umikiuncha ishichik umikiuncha takasmajai métek Yus shiir awajsattawai.

<sup>6</sup> Átum “Ju shuar pénkeraiti tura chíkich pénkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajai métek enentáimsatarum. <sup>7</sup> Ámeka chíkich shuarjai méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujai nankaamantu ajai tu enentáimtumam?

<sup>8</sup> ¿Ti kuítrinnia áintsañ tura ashí takakua áintsañ enentáimtsurmek. In nankaakarum uunt kapitián ajasua áintsañ enentáimtsurmek? Nekas uunt kapitián ajasrumka maak. Nuiñkia iisha atumjai akupkaintji. <sup>9</sup> Chíkich shuar mash nankaamantu áinis ániakuisha Yus in ni akatramurín ashí amúamunam apujtamsaitji. Tu enentáimpramniaiti. “Yajauch ániawai, máatái” tu pujurtamji shuar. Tura Yusa suntarisha ashí juyá shuarsha in ístai tusar káutramkaitji. <sup>10</sup> Iikia atumjai jeatsji. Kristu shuari asakrin nékachua áinis enentáimturmajai shuar. Átum antsu Kristunam tí nékachushitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtiantji. <sup>11</sup> Tuke yamaisha tsukamaji, kitiamaji, entsartin atsumaji. Katsumpramji. Jeeasha atsumaji. <sup>12</sup> Ii ewejéjai takaakur ti pimpíaji. Shuar katsekramainiaji túrasha iikia shiir chichamjai aiyaji. Itiurchat awajtamainiakuisha katsunteaji. <sup>13</sup> Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisañ ajapramatniun enentáimturmainiaji.

<sup>14</sup> Atumin aya iniatsaartajtsan juní áattsujrume. Antsu winia aneamu uchirua áintsan jintintjarme. <sup>15</sup> Atumin Yus-Chichaman ujaakun Yus-shuar ajastinian unuiniamjarme. Nujaj Jesukrístu enentáimtakrumin atumí aparía áintsan ajasmajai. Chíkich shuar Krístunun jintinrámatin timiá untsurí ákuisha aya wiki atumí aparíntjai. <sup>16</sup> Tuma asamtai wi wekaajna áintsan wekasatarum atumsha.

<sup>17</sup> Nu túratarum tusan winia aneamu uchirun Timiutéun akuptukmajrume. Niisha ii Uuntri Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujaj wekaamun ataksha enentáimtikramprattawai. Núiti ashí Yus-shuarnum wena jintíajna nuka. <sup>18</sup> Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai. <sup>19</sup> Antsu Yus wakerakuinkia wárik íitjam tusan wakerajai. Nuinkia nankaamantu chichamen antukchattajai antsu wátskea, ni túramurísha íistái. <sup>20</sup> Yus akupeana nú shuar aya chíchainiatsui antsu Yusa kakarmarin iniaktuiniawai. <sup>21</sup> Wátsek, ¿warí enentáimprum? Átum tuke núnisan enentáimkiurminkia wi winin asutiátniuitjarme. Tura péñker enentáimkiurminkia, aneakun shiir chichasminiaitjarme. ¿Atumsha túa wakerarum?

## 5

### *Tsanirmamu ti tunaiti*

<sup>1</sup> Atumín shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai. <sup>2</sup> ¿Nu tunaajajsha tuke nankaamantu enentáimprumek? Antsu úttiniaitrume. Nu shuar tunáa túraka atumíniá akankatniuiti. <sup>3</sup> Ayashur pujachkuisha wi nuí pujáa áintsan nuna tunaarín paant nekaamjai, tura asutiátniuiti tajai. <sup>4</sup> Tuma asamtai átum káunkakrumin ii Uuntri Jesukrístu kakarmaríjjaj tura wi nuí pujáa áintsanak, ii Uuntri Jesukrístu kakarmaríjjaj <sup>5</sup> nu shuar uunt iwianchnum surunkatniuiti ni ayashi wakeramurí amukati tusa. Nujaj ni wakaní uwemprattawai ii Uuntri Jesukrístu támatai.

<sup>6</sup> “Íikia péñkeraitji” tárugna nu ántrai, tunáa atumín tuke akui. Iis, “Karía ishichik yuminnium enketam mash karimtiktsuk” tiniu áiniawai. Núnis átatui ju tunaajaj. <sup>7</sup> Tuma asamtai nu karía ukartarum yajauch awajturmasaj tusarum. Núnisrum ju tunaanumiá kanakrum péñker átatrume. Yaunchu enentái karía núnis amuukatniuiti. Ashí yarmak yuminia áintsan ajasuitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaarí atsakui atumsha nu námper-tantaa áintsar péñker ajasuitrume. Paskua nampertincha Israer-shuar murikiun main áiniawai. Núnisan Krístu jaka ii murikría áinis ajasuiti. <sup>8</sup> Tuma asamtai iisha paskua námper nájanku pujakur tuke núnisan shiir wekasatniuitji. Tuma asamtai ashí yajauch tunaasha írunna nuka karía yaunchu nawamua áintsankete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsankete.

<sup>9</sup> Nuik papin áatramajrumna nuí “Tsanirma shuarjainkia íischatniuitrume” tímiajrume. <sup>10</sup> Ju nunkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin áiniatsuk. Nú shuarjainkia penké íischatniuitkiurmeka ju nunkanmayá jíinkintrume. Núnaka tátsujai. <sup>11</sup> Antsu wi tájana nu júiti, Shuar “Yus-shuaraitjai” tákunka tura tunáa túriniaitkuinkia níjjaj íischatniuitrume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuinkia íischatniuitrume. Penké níjjaj yurumáshtiniaitrume. <sup>12-13</sup> Yus-shuarcha tunaarí pachischatniuitjai. Yus núnaka íistatui. Átumka antsu atumín Yus-shuar ainia nuna tunaarí íistiniaitrume. Tuma asamtai nu shuar tunaarintin atumíyá akankatarum.

## 6

*Yus-shuar nuámtak itiurchat awajnisarka Yus-shuarchajai nuna iwiarashtin áiniawai*

<sup>1</sup> Yus-shuarka chíkich Yus-shuarjai itiurchat pujakka kapitiánjai chichas iwiarashtiniaiti Yus-shuarcha asamtai. Antsu Yus-shuar írunka nujai iwiarati. <sup>2</sup> Enentáimpratarum. Amuukatin tsawantaj Yus-shuarka ashí ju nunkanmaya shuara tunaari mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum. <sup>3</sup> Nu arantcha Yusa suntari túramurisha nekaattaji péñkerashit tusarí. Nayaimpiniam túrawarma nekaatniuitkiurkia itiura ju nunkanmaya nu tujinkiattaj. <sup>4</sup> Pai, itiurchat ákuinkia Yus-shuar penké tujintiainiana nujai iwiaratarum antsu. <sup>5</sup> Natsaruk tusan nuna tájarne. Warí, ¿atumíni chikichkisha atsawak ni yachí itiurchatrí péñker iwiamnia? <sup>6</sup> ¿Urukamtai Yus-shuar ni yachíjjai itiurchat pujakka Yus-shuarchanum wea iwiaratniun? <sup>7</sup> Atumí itiurchatrí kapitiannium jukirmeka nujainkia átum tujinkiamu páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum? <sup>8</sup> Antsu átumka nuámtak yachíjjai itiurchat awajnáiyarme tura kasárnáiyarme.

<sup>9</sup> Tunáa túrinkia Yus akupeamunam pachiinkiachmin ainia nu nékatsrumek. Anannawairap. Ashí tsanirma nusha, ántar-yusan tikishmatniusha, nuamtak áishmanjai tsanirmasha, <sup>10</sup> kasasha, ashí kuítian ikiauwincha, nampencha, tsannumniusha, yajauch chichainia nusha, chíkich shuara anankawar atantin ainia nusha Yus akupeamunma nuí penké wayashtin áiniawai. <sup>11</sup> Atumíyasha chíkich chíkich nuna túrin armai. Tura yamaikia ii Uuntrí Jesusa kakarmarijjai tura ii Yusrí Wakaní kakarmarijjai atumi enentái shiir ajasuiti, atumsha Yusna ajasurme, tura tuke péñker ajasurme.

*Ii ayashi yajauch áchatniuiti*

<sup>12</sup> “Ashí túramniaitjai” tiniu áiniawai tura nekasaiti. Tuma ainí mash yáinkiashtatui péñker wekasatniun. Nekas ashí túramniaitjai tura nánkamas túratniujai nupetnakchat-tajai. <sup>13</sup> Junasha tiniu áiniawai: “Apatuk wakejainchu tura wake apatkujainchu mai ántraití.” Apatkujai wakesha nekas mai metek enentáimpratin áiniawai tura Yus mai metek amuktatui. Núnisan ii ayashi ii Uuntrí Krístunuiti tura Kristu ii ayashi nérenniuiti. Tuma asamtai ii ayashíjjai tsanirmashtiniaiti. <sup>14</sup> Tura Yus ii Uuntrí Jesusan iniantkimia núnisan ii ayashíncha nu kakarmarijjai iniantkittiwai.

<sup>15</sup> Ashí ii ayashíjn Kristu ayashímkiaiti. ¿Nu átumka nékatsrumek? Winia ayashrusha Kristu ayashíya asamtai ¿itiurak nuna tsaní ayashín najanattaj? Penké túrachminiaitjai.

<sup>16</sup> Kame ¿jusha nékatsrumek? Áishman tsaniríjjai tsanínkiar chikichik ayashtinia áinis ajainiawai. Núnisan Yus-Papinium áarmaiti: Mai chikichik ayashtinia áinis ajasartatui.

<sup>17</sup> Tura shuar ii Uuntrí Krístujai tsanínkia mai chikichik wakantin ajainiawai.

<sup>18</sup> Tuma asamtai tsanirmatniunmaya yajáyan wainkiarum tsékeñtiarum. Chíkich tunáa írunka nu ii ayashínkia ti yajauch awajeatsui. Túrasa shuar tsanirmakka ní ayashiniak yajauch awajeawai. <sup>19</sup> Yusa Wakaní ame enentáimin pujurtamu asamtai, ame ayashim ni jeente. Nu Wakanínkia Yus amasuiti. ¿Nuka nékatsrumek? Tuma asamtai ame ayashmi nérenchaitme. <sup>20</sup> Kristu numpejai sumakma asamtai, ayashmisha wakanmisha Yusna áiniawai. Yusna asamtai ayashmíjjai péñker túratniuitme, Yus shiir awájnástí tusam.

## 7

*Nuatkatniusha péñkeraiti, nuatkashtincha péñkeraiti*

<sup>1</sup> Ayu. Átum áatrurmarmena nuna yamaikia ujaktajrume. Shuar nuatteachkusha péñkeraiti. <sup>2</sup> Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwa ní áishrin iniumkati. <sup>3</sup> Áishmansha ni áishri asa nuwen túratniua nuna umiktiniaiti. Núnisan nuwasha ni nuwe asa ni áishrin túratniua nuna umiktiniaiti.



<sup>4</sup> Núwaka nin̄ki ni ayashí nérenniuchuiti, antsu ni áishrīniuiti. Núnisan̄ áishmansha nin̄ki ni ayashí nérenniuchuiti, antsu ni nuwé̄nuiti. <sup>5</sup> Ni ayashí suritnaikiashtin̄ áiniawai. Tura mai itit awajnaitsuk Yus áuj̄satin wakeruiniak ishichik tsawant kanakmin̄ áiniawai. Tura nuin̄kia atak tsanin̄ pujustin̄ áiniawai. Túracharmatain̄kia uunt iwianch, Satanás, tunaanum iniartinian̄ útsutkattawai katsuntratniun̄ tujintiakui.

<sup>6</sup> Ayu. Tura nuna áarayatan̄ nújain̄kia “ashí shuar páchitsuk nuatkatniuiti” tátsujai. Nuatkatniuitkiumka pén̄keraiti. <sup>7</sup> Túramtai “ashí wijīai métek nuatkachuitkiuin̄kia maak ainti” tajai. Tura Yus ashí shuaran imiá métek najanachuiti. Chikichan nuatkatniun̄ súsaiti, tura chikichan yúpichuch katsuntratniun̄ súsaiti.

<sup>8</sup> Natsancha wajencha juna tájai, “Wijīai métek nuattsuk pujusrumka pén̄keraiti.” <sup>9</sup> Tura katsuntratniun̄ tujinkiarka nuatkarti. Ti katsuntrachmin̄ nekapeakum nuatkatniun̄ pén̄keraiti.

<sup>10</sup> Nuatnaikiarun̄ antsu tájai, “Nuwā nuatkamuka ni áishrīn̄ ikiukchatniuiti” tajai. Núnaka ii Uuntrī Kristu akupkaiti aya winia chichampruchuiti. <sup>11</sup> Túramtai ni áishrīn̄ ikiukkia nin̄ki atak nuatnatsuk pujustí tura tsanin̄ pujustinian̄ wakerakka ataksha ni áishrīn̄ wakеткиti. Núnisan̄ áishmansha ni nuwé̄n̄ ajapashtiniaiti.

<sup>12</sup> Chíkich shuaran̄ juna tájai wikia, ii Uuntrī Kristu juna akupkachuiti. Yus-shuara nuwé̄nka Yus-shuarchaitkiun̄ka tura ni áishrīj̄ai pujustinian̄ wakerakka pén̄keraiti; ajapashtiniaiti, tájai. <sup>13</sup> Núnisan̄ Yus-shuara aishrī Yus-shuarchaitkiun̄ka tura ni nuwēj̄ai pujustinian̄ wakerakka pén̄keraiti; ikiukchatniuiti. <sup>14</sup> Nu nuwaka “Yus-shuarchaj̄ai tsanin̄ pujakun̄ Yusj̄ai yajauch̄ ajastatjai” tu enentáimprashtiniaiti. Antsu nii Yus-shuar asamtai ni aishrī niij̄ai pujá asa pén̄ker̄ ajasminiaiti Yusj̄ai. Núnisan̄ núwaka Yus-shuarchaitiat ni aishrī Yus-shuaraitkiuin̄kia niij̄ai tsanin̄ pujá asa pén̄ker̄ ajasminiaiti Yusj̄ai. Núnisan̄ ni uchirísha pén̄ker̄ ajasmin̄ áiniawai Yusj̄ai. Núnischaitkiuin̄kia ni uchirí Yus-shuarcha uchiría áintsar ainti. <sup>15</sup> Tura áishmansha nuwasha Yus-shuarcha ana nu kanaktinian̄ wakerakka túrati. Yus-shuar nuj̄ai an̄kantaiti. Núnisan̄ asati. Tuke máaniaktinian̄ Yus nakitramaji. <sup>16</sup> ¿Núwaka ni aishrī Yus-shuar ajastatna nuna nekas nékawak. Tura áishmansha ni nuwé̄ Yus-shuar ajastatna nuna nekas nékawak? Yus-shuarcha nuka wétinia wakerakka wetí.

<sup>17</sup> Wátsek. Shuarka Yus-shuar ajaska Yus nin̄ najanama áintsan̄ tuke átiniaiti. Pujumia áintsan̄ pujusminiaiti. Núnaka ashí Yus-shuarnum̄ akupeajai. <sup>18</sup> Iis, Yus-shuar ajasuka Israer-shuaraitkiun̄ka tuke Israer-shuar atí. Tura Israer-shuarchaitkiun̄ka Israer-shuar ajastin̄ enentáimprashtiniaiti. <sup>19</sup> Israer-shuaraitkiumsha tura Israer-shuarchaitkiumsha nuka enentáimtuschatniuiti. Aya Yus tana nu umirkatin̄ nekas enentáimtustiniaiti. <sup>20</sup> Yus-shuar ajasuka nuik pujumia áintsan̄ pujusminiaiti. <sup>21</sup> Chíkich shuara takarniur̄i asam̄ ti itiurchat̄ pujakmeshā itiurchat̄ enentáimpráip. Tura an̄kant̄ j̄iinkimniaitkiumkā j̄iinkitiá. <sup>22</sup> An̄kantchaitkiumkā an̄kantaitkiumshā ju enentáimpratá. Takarniuka Yus-shuar ajas̄ tuke chíkich̄ shuarā takarniur̄inkiushā shiir̄ enentáimpratniuitī Kristū nin̄ tunaanumiá̄ an̄kant̄ awajsam̄tai. Tura shuar takarniuchuā nu, Yus-shuar ajas̄ Kristū takar̄in̄ ajasuiti. <sup>23</sup> Ti wáitsamiayī Kristū in̄ an̄kant̄ awajtamsatniun̄. Ni numpej̄aī sumakmā asarum̄ shuar̄ emetamū áirap. <sup>24</sup> Tumā asamtaī shuar̄ Yus-shuar ajas̄ nuik̄ pujumiā áintsan̄ yamaishā pujústí̄ tura Yus̄an̄ enentáimtus̄ wekasati.

<sup>25</sup> Nuwá natsa túratniua nuna yamaikiā áujmatjai. Kristū juna akupkachmaī tura Kristū anēnkratmar̄i ti nekapsā asamtaī wi tájanā nu antukminiaiti. <sup>26</sup> Tumā asamtaī juna tájai. Ti iturchatnum̄ pujá̄ asakrin̄ shuar̄ ayā júnisan̄ nuattsuk̄ pujustin̄ pén̄keraiti. <sup>27</sup> Nuatkaitkiumkā núwem̄ ikiukip. Nátsaitkiumkā nuwá̄ ēakaip. <sup>28</sup> Tura nuatkumkā tunáā túratsme. Nuwashā iniurtukkā niishā tunáā túrachuiti. Túras̄hā nuatnaikiarū iturchatan̄ ti wáinkariatatuī jū nun̄kanam. Nú̄ iturchatnumiá̄ wi uwentikraintjai.

<sup>29</sup> Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarin enentáimprashitiniaiti antsu Yúsna enentáimtustiniaiti. <sup>30</sup> Núnisan tuke Yúsna enentáimsar úutainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Ju nunkanmayajainkia itit awajmamsashtiniaitji. <sup>31</sup> Núnisan aya jú nunkanam pénger pujustin ti takaschatniuiti. Ashí jú nunkanmayanka amuukatniuiti.

<sup>32</sup> Jú nunkanmayajain itit ajaschak tusan wakerajrume. Nátsaka Yúsna enentáimtai ni wakera nuna umiktinian. <sup>33</sup> Túrasha nuatkaka ju nunkanman enentáimtai ni nuarin shiir enentáimtiksatsta. <sup>34</sup> Núnisan nuwá nátsasha nuatkamusha niisháa enentáimiainiawai. Nuwá natsa Yúsna enentáimtai ni ayashísha ni wakanísha tuke Yúsjai shiir atí tusa. Tura nuátkamuka ju nunkanmayan enentáimtai ni áishrin shiir enentáimtiksatsta.

<sup>35</sup> Atumin yáintajtsan juna tájarme. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

<sup>36</sup> Tura shuar ni nawantri natsan nuatnaikiati tákunka péngeraiti. Nawantrin natsa tuke apujsatniun nakitiakka surukminiaiti. Nusha tunaachuiti. <sup>37</sup> Tura chíchka tuke natsan apujsatá tákunka nekas péngeraiti. Apujsatin itiurchatchaitkiuinikia tura ni nawantri nuatnakchatniuitkiuinikia apujsatniuiti. Apujsanika nekas pénger túrait. <sup>38</sup> Tuma asamtai nuatmamtikianka pénger túrayi tura apujsanika nu nankaamas pénger túrayi.

<sup>39</sup> Nuwá aishri iwiaaku pujakuinikia tuke niijjai tsanin pujustiniaiti. Tura ni aishri jakamtai ankant ajas ni wakera nujai Yus-shuaran iis nuatnaikiamniaiti, <sup>40</sup> tura tuke nuatnatskesha nu nankaamas nekas shiir pujustatui. Tú enentáimjai wikia tura Yusa Wakanísha métek tátsuash.

## 8

### *Yurumkasha namansha ántar-yusnum susamu*

<sup>1</sup> Ayu. Yamaikia yurumkasha namansha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiunika nujainkia “neka asan nankaamantuitjai” tu enentáimiui. Antsu shuar chích shuaran aneakka nin pénger atí tusa yayawai. <sup>2</sup> Shuar “ti nékaitjai” tákunka nekas nekaatniua núnaka unuimiarchaiti. <sup>3</sup> Tura Yúsna aneana núnaka Yus pénger nékawai.

<sup>4</sup> Wátsek. Ántar-yus susamu yúatin junis enentáimpratniuiti. Yuska aya chikichkiiti. Tura chích Yus atsakui, <sup>5</sup> aentsu yusrí nayaimpinmasha nunakasha írúnna nuka penké ántar áiniawai. Kame aentsu yúsrísha tura úuntrísha ti írúnui. <sup>6</sup> Tura iikia nékaji, aya chikichik Yus awai, nusha ii Aparínti. Ashí írúnna nuna najanaiti tura ni wakera nuna umikiat tusa najatmamji in. Ii Úuntrísha chikichkiiti, Jesukrístu. Niijjainkia ashí najanamuiti. Tura iisha ni kakarmarijjai iwiaaku pujaji.

<sup>7</sup> Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiruí yajauch ajasjai” tiartatui. <sup>8</sup> Watsek, yuamujai Yus in shiir enentáimtikrampratniun jeatsui. Yuarkia nujai pénger áchattaji tura yúachrikia yajauch áchattaji. <sup>9</sup> Ankantaitme yúatin wakerakmeke. Tura anearta. Ame yúakmin chích shuar itiurchat enentáimna nusha ámin wáitmak yúanka ni enentáin tunáa ajastatui. <sup>10</sup> Íistá. Ámeke neka asam ántar-yusa jeen wayam tura nuí yúakminkia ame yatsum nuí wáitmakchanpiash. Tura niisha itiurchat enentáimiat ántar-yus susamun yúashtimpiash. <sup>11</sup> Nújainkia ame nékamujai ame yatsum Kristu jaka uwentikramia nu yajauch ajastatui. <sup>12</sup> Túramtai ame yatsum itiurchat enentáimna nu yajauch awajeakum

Krístunmasha tunáa túraitme. <sup>13</sup> Nu asamtai winia yatsurun wi yúajna nujaj yajauch awajeaknaka namañnaka penké yuashtatjai nii tunáa ajasain tusan.

## 9

### *Kristu akatramu túramnia nu*

<sup>1</sup> Ashí Kristu akatramurj túratniua nuna wisha túramniaitjai ni akatramurj asan. Iis, wisha ii Uuntrj Jesusan wáinkiaitjai tura wisha Jesukrístu takatrjn takaaajai. Winia takatrujain átumka Yus-shuar ajasuitrume. <sup>2</sup> Chíkich shuar “Kristu akatramurinchuiti” túrutainiakui sha átumka winia takatrujaj Yus-shuar ajasu asakrumin nujaj wi nekas Kristu akatramurjntiaj nu paant nekaamniaiti. Tura tu enentáimtursatniuitrume.

<sup>3</sup> Ashí shuar “Kristu akatramurinchuiti” túrutainia nuna juna tájai. <sup>4</sup> Wisha Yus-Chichaman etserkataj tusan shuárnum iraaakun ashí ajampruinia nuna yuamniaitjai tura umarminiaitjai. <sup>5</sup> Tura Pítrusha, Jesusa yachisha, tura chíkich akatramusha irainiak ni nuwen Yus-shuar ainia nuna jukimnia áiniawai. Wisha núnisnak túramniaitjai. <sup>6</sup> Chíkich akatramuka kuit susamujaj Yus-Chichaman etserainiawai. Wisha Pirnapísha núnisrik túramniaitjai. Kame ¿aya íchikik takastiniaitjai? <sup>7</sup> Suntarka ¿ní kuítrijaj impiash takaa? ¿Tsanimpian aráa nu nuna neren yúatsuk. Wáakan wainiua nusha muntsurin úmatsuk? Núnisan Yus-Chichaman étsera nusha nú takasmanumiá yurumámniaiti. <sup>8</sup> Aya aents enentáimmian chichaatsjai. Muisais akupkamunmasha métek tawai. <sup>9</sup> Muisais akupkamunam áarmaiti:

“Turu takaak jinikiaia saepen pakartaj tusa nájakui ni nujj jinkiatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujaj. <sup>10</sup> Antsu in jujaj nekaawarat tusa tímiayi. Jinkein araana nusha tura júukmatai saepen pakaana nusha nuna jinkein mai yurumáin áiniawai. Paant atí tusa Yus nuna áarmiayi. <sup>11</sup> Tuma asamtai Yus-Chicham atumjin etserkakrin nuyá átum takakrumna nujaj in ajamsatniuitrume. ¿Nusha itiuurchatkai? <sup>12</sup> Chíkich akatramu atumjin irutainiak ajamsamun yuamniaitkuinkia iikia nekas túramniaitjai ii etserkamujaj Yus-shuar ajasakrumin.

Tura wikia antsu túrachuitjai. Atsumaknasha ashí itiuurchat ana nuna katsuntramjai Kristu shiir chichamen étserkui shuar itiuurchat enentáimturarain tusan. <sup>13</sup> Ashí shuar ni yúsriniun tuke pujurin ainia nu, ni yusrj jeen írúnna nuyán yurumáiniawai. Tura yus-sutai namañken maawar nuyá yurumáiniawai. <sup>14</sup> Núnisan Yus-Chichaman etserniua nuka Yúsnan takasu asamtai penker ajamsatniuiti. Nuna Kristu akupkamiayi. <sup>15</sup> Tura wisha ajamsamun yuamniaitiatan tuke winia kuítrujaj yurumámjai. Tura yamaisha surúsúk tusan áattsujrume. Antsu nuna túrutsuk jakañka maak aintjai.

<sup>16</sup> Uwempratin chichaman wi étserkun aya nújain “ti penkeraitjai” enentáimtumsajai. Kame Yus nuna túratniun surusuncha itiuurkatjak. Nuna túrachkunka ti itiuurchat pujusaintjai. <sup>17</sup> Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. <sup>18</sup> Tura jujaj antsu nekas warasminiaitjai: Wi túramnian iniaisan chikichnan takatsuk aya winia kuítrujain uwempratin chichaman étserjai. Nujaj waraakun akikma áintsankete.

<sup>19</sup> Chíkich shuara takarniuchuitiatan ashí shuara takarniuriya áintsanketjai Kristu shuarj untsurj ajasarat tusan. <sup>20</sup> Israer-shuarjaj pujakun niisha Yus-shuar ajasarti tusan Israer-shuara áintsan ajai. Kame Muisaisa akupkamurj umirkatin áiniakui wisha aun umirkashtiniaitiatnak umirniuitjai. <sup>21</sup> Tura Israer-shuarchasha Yus-shuar ajasarti tusan, nu shuar Muisaisa akupkamurin umirkashtin áiniakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai. <sup>22</sup> Yusjaj katsuarchasha ti penker Yus-shuar ajasarti tusan wisha kat-sarcha áintsan ajai. Chíkich chíkich shuarjaj métek ajajai ishichkisha Yus-shuar ajasarti

tusan. <sup>23</sup> Ashí wi túraj núnaka uwempratin chicham tuke shiir atí tusan túrajai. Tura nu chichamjaj wisha atsumtsuk shiir wekaajai.

<sup>24</sup> Shuar nekapnaisatniusha untsurí tsékentín átsuk tura aya chikichik awakmatsuk. Nínki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum. <sup>25</sup> Shuar nakurak nekapnaisatin ainia nuka nupetmaktaj tákunka ashí itit awajea nuna ikiuiniawai. Iisha núnisrik nu enentáijjaj Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjinia nú tawasap tuke amuukashtatui. <sup>26</sup> Wikia aya nánkamsan tsékeatsjai. Nasejaj maania áintsan máaniatsjai. <sup>27</sup> Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitrurainti.

## 10

### *Ántar-Yus tikishmatrashtiniaiti*

<sup>1</sup> Enentáimpratarum, yatsuru. Yus yaunchu ii úuntriñ ashí métek yáinmiayi. Nusháa yurañmijaj jintian nekapruiamiayi. Tura ashí ii uuntriñ nu yurañmin apapekar wearmiayi. Ashí núnisar Kapáaku Nayaantsan Yus akankamunam wekasar katitkiarmiayi.

<sup>2</sup> Tura Muisaisan umirkar yurañminiam tura nayaantsanam ashí imiaimiu áintsan ajasarmiayi. <sup>3</sup> Núnisan ashí mash Yusnumia yurumkan yuawarmiayi. <sup>4</sup> Entsancha ashí mash Yus susamunak umararmiayi. Kame Yus kayanmaya entsan akupkamtai ashí umararmiayi. Krístusha, nú kaya áintsan, niijaj tuke weakui ni wakaní atsumamurin Krístunmayañ takusarmiayi. <sup>5</sup> Tuma aijn Yus ti yáinmaitiat ni wakeramun umikcharmiayi. Tura ásar ni nunkeen jeatsuk atsamu nunkanam ti untsurí jákarmiayi.

<sup>6</sup> Iisha nujaj unuimiartiniaitji. Iikia ni wakeriarmia áintsar<sup>i</sup> yajauchia nu wakerukchatniuitji. <sup>7</sup> Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakuí Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

<sup>8</sup> Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantaj jákarmiayi. <sup>9</sup> Iisha tunáa túrar “Yus asutiúáshtatui” tu enentáimprashhtiniaitji. Niisha nuna túrawar napijjaj esaim untsurí jákarmiayi. <sup>10</sup> Yussha yajauch áujmatsashtiniaiti. Nuna túrawarmatai Yus ni suntarín akupak untsurín maawarmiayi.

<sup>11</sup> Yaunchu ii úuntriñjaj túrunamu in amúamu tsawantnum pujajnia nuna jintintramat tusa áarmaiti. <sup>12</sup> Tuma asamtai shuar “Tunaanum iniaarchattajai” tákunka anearti. Anearchamka iniaarminiaitme. <sup>13</sup> Tura ame itiurchatrumka aya amek nekapeatsme. Chíkich shuarsha nu itiurchatjaj métek nekapsatin áiniawai. Jusha ti enentáimpramniaiti. Ame katsuntratin tujintiamna nuna nankaamas itiurchatan Yuska péñker asa tsankatramatsui. Antsu itiurchat tarutrammatai, nu itiurchatnum pujamin Yuska uwempratniun jintintramattawai. Nújainkia katsuntrattame.

<sup>14</sup> Nu asamtai aneamu yatsuru penke ishichkisha ántar-yus enentaimtusairap. <sup>15</sup> Atumsha nékatsrumek. Wi tájana nu nekaschakait. <sup>16</sup> Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujaj Kristu numpé métek enentáimtaji taji. Tura apatkusha púurar<sup>i</sup> tura métek yuar<sup>i</sup> nujaj Kristu ayashí in jarutramkamu métek enentáimtaji taji. <sup>17</sup> Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuar<sup>i</sup> métek enentáimprar chikichik ayashtinia áintsar aji.

<sup>18</sup> Israer-shuartisha enentáimpratai. Yus-sutai namanken yuinia nu, métek yuawar Yusan métek enentáimtuiniatsuk. <sup>19-20</sup> Núnisan Yus-shuarsha ántar-yus sutai namanken suiniak nekas-Yusan suiniatsui antsu yajauch wakanin suiniawai. Kame ántar-yus

áiniak penké ántar áiniawai, iwiaakuchu áiniawai. Nu namansha sutai namanketiat penker namanquete, yajauchichuiti. Aya junak tajai. Yus-shuarcha ántar-yus sutai namanken suiniakui amesha nijjaj métek yuamka yajauch wakanniasha nijjaj métek enentáimtajai tame. Nu antsu yajauchiiti. <sup>21</sup> Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitrume. <sup>22</sup> ¿Warí, Yus akajkatin wakeramek. Iisha nin nupetkamniashitaj?

### *Aya aneakur takastiniaitji*

<sup>23</sup> “Ashí túramniaitjai” tiniu áiniawai. Ayu, tura mash yáintkiashtatui penker wekasatniun. Nekas ashí túramniaitjai tura mash yáintkiashtatui wakaniur kakaram ajastin. <sup>24</sup> Nú arantcha chíkich yáintincha enentáimpratniuitji. Aya íniuk pachischatniuitji.

<sup>25</sup> Naman súmakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. <sup>26</sup> Ashí ju nunkasha tura ashí írunga nusha Yúsnachuk ainia. Tuma asantai penker áiniawai.

<sup>27</sup> Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. <sup>28</sup> Tura chíkich chichaak “Ju ka ántar-yus susamu namanquete” túramkuinkia nuikia yuawaip. Yúakminkia nu shuar itiurchat enentáimprattawai. <sup>29</sup> Ame páchitsuk yuamniaitkiumnisha nii antsu yúachmin asa itiurchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitaj. <sup>30</sup> Wi Yúsan yuminsan yúakuisha urukamtia itiurchat enentáimturainia. Yus yuminsachmakait?” tíchatameash. <sup>31</sup> Ayu, yúakmesha úmakmesha ashí túamna nusha ashí shuar Yúsan shiir enentáimtusarti tusam túratá. <sup>32</sup> Tuma asantai ii túramujaj chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji. <sup>33</sup> Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

## 11

<sup>1</sup> Kristu turamia áintsan takaajai wisha. Atumsha núnisrum wi takaajna áintsarum takastarum.

### *Nuwá Yusa jeen túratin*

<sup>2</sup> Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume. <sup>3</sup> Nu arantcha ujaaajrume. Yus Apa Krístun akupea áintsan Kristu ashí áishmankan akupeawai. Núnisan áishmansha ni nuwen akupeawai. <sup>4-5</sup> Íjjajinkia shuar Yus áujenak tura núnisan Yus-Chichaman étserainiak áishman etsenkrukchatniuiti antsu nuwá múuknum nukumaktiniaiti. Tuma asantai áishman nui etsenkrukka natsantaiti. Tura nuwá múuknum nukumakchanka natsantaiti. Intiashin tsupimiarua áintsankete. <sup>6</sup> Nuwá múuknum nukumaktinian nakitiakka intiashin tsupirtí nuikia. Watsek, nuwá ni intiashin tsupirtinian nakitiakka, tura awampratniun natsamakka múuknum nukumakti nuikia. <sup>7</sup> Áishmankka Yúsan nakumeawai. Yusna shiir ana nuna nakúmkáttsa Yus áishmankan najanamiayi. Tuma asantai áishmankka etsenkrukchatniuiti. Antsu nuwanka áishmanna shiir ana nuna nakúmkáttsa Yus najanamiayi. <sup>8</sup> Iis, Yus áentsun najaneak nuwanmayan áishmankan najanachmiayi antsu áishmanka ukunchíjjaj nuwan najanamiayi. <sup>9</sup> Nuwan yáinkiat tusa áishmankan najanachmiayi antsu áishmankan yáinkiat tusa nuwan najanamiayi. <sup>10</sup> Tuma asantai núwaka múuknum nukumaktiniaiti, nayaimpinmayá aencha ísarti tusa. <sup>11</sup> Ayu, tura áishman nuwajainchu atsuinti tura nuwasha núnisan áishmanjainchu atsuinti. Yus ju nunkan núnisan atí tusa najanaiti. <sup>12</sup> Iis, Yus nuwan áishmannumiá najanamiayi tura áishmansha nuwanmayá akiiniaiti. Tura Yus mai najanaiti.

<sup>13</sup> Enentáimpratarum atumsha. Nuwa múuknum nukumatsuk Yus áujsatin ¿pénkerkait?  
<sup>14</sup> Ii shuartinkia áishmañ intiash ajakin natsantchakait. <sup>15</sup> Antsu núwaka intiash ajakin pénkerchakait. Múuknum nukumaktinian susamuiti. <sup>16</sup> Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentáimji.

*Kristu jakamu enentaimtustin nampernum yajauch túramu*

<sup>17</sup> Yamái áarattajrumna nujajñ shiir enentáimtatsjarne. Atum irunkuram yáiniaiktiniaitruma tuke pénker wekasatin. Átum antsu iruntrarum yajauch awajnaiyarme. <sup>18</sup> Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit. <sup>19</sup> Tuke tupartatrumek Yúsnan ti nekana nu shuar paant nekanat tusarmea. Antsu kajernaikiar kanaktin pénkerchaiti. <sup>20</sup> Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti. <sup>21</sup> Iis, ashí ní yurumken itiaawai aj yurumáttsa tura chikichan náksatsuk niá niá wari yuattsa wakerawai. Chíkichkia ishichik itiaana nu tsukamawai tura chikichcha nampekarai. <sup>22</sup> Yurumkan ishichik itiaana nu iniatsáarchamek. Atum áitkiarum núnisan Yusa jeen yurumáshtiniaiti. Natsantaiti. Warí, chíkich jea átsuk aj yurumátin. ¿Warimpait. Jujaj shíirash áujsatjarum? Atsá. Jujaj shiir áujsachminiaitjarne.

*Kristu jakamu enentaimtustin námper*

<sup>23</sup> Ii Uuntrj Kristu jintintruama núnaka ujakmajrume. Jútas tuke súratsajñ, nu kashi ii Uuntrj Jesus apatkun jukí <sup>24</sup> Yusan yuminsamiayi. Nuyá puur tímiayi “Yu-atarum. Jusha winia ayashruiti; atumin jarutramkatta núiti. Ju yúakrum Winia enentáimtursatarum” tímiayi. <sup>25</sup> Núnisan yurumá umik piniñnasha achik tímiayi “Ju piniñ Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtursatarum’ tímiayi. <sup>26</sup> Tuma asamtai ju apatuk yúakrum tura piniñsha úmakrum ii Uuntrj Kristu jakamuri enentáimtarme. Kristu táatsajñ ju tuke túratniuitrume.

*Shiir enentajijjai Kristu jakamu enentaimtustin nampernum yuatniuiti*

<sup>27</sup> Tuma asamtai shuar Yusan enentáimtutsuk ju apatkun yuawar tura ju piniñnumiñcha umarar Kristu ayashincha ni numpencha yajauch enentáimta asa tunáa túraiti. <sup>28</sup> Nu asamtai ashí shuar ju apatkun yútsuk tura ju piniñnumiñcha úmutsuk ni enentáin iwiaratniuiti Yusjaj. <sup>29</sup> Kristu ayashí jakamu enentáimtutsuk yúakka tura úmakka nuna tura asa asutniáttawai. <sup>30</sup> Atumsha tura asarum jaarne tura pimpiruitrume. Chikichcha jákaru áiniawai. <sup>31</sup> Ímia-iik ímiakrinkia Yus in asutiámachaintji. <sup>32</sup> Tura ii enentáin Yus yajauchia nuna wáiniuk asutiámji. Túrachkuñka ashí Yus-shuarchajaj súmamtikramawaintji.

<sup>33</sup> Tuma asamtai, yatsuru, iruntrar yurumáttsa matsatkurmeke nákastarum métek yurumátin. <sup>34</sup> Shuar tsukamakka ni jéeniñk' yurumáti. Nújainkia yajauchijjai irunchakrumin Yus asutiámashtatrume. Ayu, chíkich áatrururmena núnaka wi aj jean iwiarattajai.

## 12

*Yusa Wakaní ni shuarin susamu*

<sup>1</sup> Yusa Wakaní ashí ni shuarin súana nuna yamá ujaktatjarne. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

<sup>2</sup> Yaunchu átum Yus-shuar tuke ajatsuk chíkich shuarjaj métek ántar-yus tikishmatramarme. Niisha ántar-yus ásar áujmattramsachmin ármiai. <sup>3</sup> Tura jújajñ shuar Yusa Wakaní kakarmarjijjai chichaana nu nekaamniaiti. Yusa Wakaníjijjainkia shuar “Jesus yajauchi-iti” tíchamniaiti. Núnisan aya Yusa Wakaníjijjain “Jesus winia Úuntur asa akuptuktiniaiti” tíminiaiti.

4-5 Yusa takatrĭ íruntſuk. Tura Yusa Wakanĭnk' ashĭ nuna takastinian súsaiti. Tura shuar Yus-shuara Uuntri chikichik aĭn ashĭ Yusa takatrĭn métek takaatsui. Antsu chikichkin ashĭ nanĭkaamas pé<sub>n</sub>ker takaawai. Yusa Wakanĭsha nuna shiir takasat tusa súawai. Tura Nii wakera nuna Ni<sub>n</sub>ki ni shuarĭn chikichĭk chikichĭk niisháa niisháa súawai. 6 Yúskete ashĭ ni shuarĭn niisháa takamtikeana nu. Ni<sub>n</sub>ki ashĭ ni shuarĭ enentáĭn takaak takatnasha shiir takamtikeawai. 7 Yusak túratin súsam Yusa Wakanĭ kakarmarĭ paant átatui nu takasmanum. Tura ashĭ shuar ní takatrĭjĭaj yáiniaiktin áiniawai. 8 Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakanĭ kakarmarĭjĭaj nuna túratniun súsaiti. 9 Chikichnasha Yúsan áujenak Yúsan ti enentáimtusar nekas iturchat ana nuna iwiaratniun súawai. Níncha Yusa Wakanĭ kakarmarĭjĭaj nuna takastinian súsaiti. Chikichnasha jaan tsuártinian súawai. 10 Chikichnasha aents ni<sub>n</sub>ki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia pé<sub>n</sub>ker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintíatniun súawai. 11 Tura ashĭ shuara enentáĭn nu Wakanĭk takaawai. Tura Nii wakera nuna anĭkant anĭkant súawai takastinian.

### *Ashĭ Yus-shuar Kristu ayashĭa áintsan ajainiawai*

12 Iikia Kristu ayashĭa áintsar' ayashĭmkiaitji. Kristu ayashĭ muchitmarĭsha írunui. Niisha túmaitiat chikichĭk ayashĭtiaiti. 13 Tura imianiakrin Yusa Wakanĭ chikichĭk awajtamsamji, Kristu ayashĭa áintsan. Israer-shuarsha, Israer-shuarchasha, ti iturchat takaana nusha, anĭkant ainia nusha, ashĭ yamáĭ chikichĭk ajasuitji. Tura Yusa Wakanĭ pimiutkamuitji Niĭjĭaj tsanĭnkia pujakur.

14 Ayashĭ muchitmarĭ aya chikichkichiiti. 15 Tuma asamtai, winia nawer uwejruchuiat tuke winia ayashrunuiti. 16 Winia kuíshrusha jĭruchuiat tuke winia ayashrunuiti. 17 Wátsek winia ayashur aya jĭkitkiuĭnkia ¿itiurak antukaintiaj? Winia ayashrusha aya kuíshkitkiuĭnkia ¿warĭjĭainĭ nekapſaintiaj? 18 Nu asamtai Yus winia ayashru muchitmarĭ ni wakeramunam ikiusuiti. 19 Chikichĭk muchitmajĭin ¿ayash áminkiait? 20 Antsu untsurĭ muchitma akuisha chikichĭk ayashkiiti. Iisha núnisrik chĭkĭch chĭkĭch iisháa takayatrik métek takasar Yus wakeramu takamtsuk umáji.

21 Winia jĭiru pé<sub>n</sub>ker aĭn winia uwejrúncha wakerishtatjak. Winia muukarsha pé<sub>n</sub>ker aĭn winia nawernasha wakerishtatjak. Núnisan Yus-shuar shiir enentáimtumak ní yachĭn “atsumatsjame” tíchamniaiti. 22 Antsu ii muchitmarĭ ishichĭk enentáimtajnĭa nu atsakuĭnkia ti atsumawaintji. 23-24 Chĭkĭch muchitmasha, ímiancha nu, shiir iwíarmamtaji. Tura nu muchitmaka shiir íisminia nujĭaj nanĭkaamas pé<sub>n</sub>ker wainji. Iis, shiircha nu antsu pé<sub>n</sub>ker wainji. Yus ii ayashĭn núnisan atí tusa najanamiayi. 25 Nujĭainĭkia ayashĭ muchitmarĭ máanaitsuk métek yáiniainiawai. 26 Chikichĭk muchitmaram najaimiakum ashĭ ayashnium wáitiatsmek. Núnisan chikichĭk muchitmaram ayap ajakum ashĭ ayashnium shiir átsumek.

27 Núniskete Kristu ayashĭjĭaj ayashĭmkiaji nu. Tura chĭkĭch chĭkĭch ní muchitmarĭ aji. 28 Ayashnium muchitma írunna áintsan Yus ní shuarĭn untsurĭ takatan súsaiti. Emka Yus akatramu, nuyá ní chichamen etserin, nuyá jintinkíartin, nuyá aents túrachminian túrin, nuyá tsuákratin, nuyá yáĭnkratin, nuyá akupĭn, nuyá niisháa chichamjĭaj chicharin, mash írunui. 29 ¿Ashĭ Yus akatramuk ainia. Ashĭ Yus-Chichaman etserniuk ainia. Ashĭ jintinkratniuk ainia. Aents túrachminian ashĭ túriniak ainia. 30 Ashĭ tsuákratniuk ainia. Ashĭ niisháa chichamjĭaj chichamtiniak ainia. Ashĭ niisháa chichamjĭaj chichasman jintĭnkratniuk ainia? Atsá. Túmachuiti. 31 Túmaitkuĭnkia pé<sub>n</sub>kerana nu takastin wakeruktarum. Tura imiá pé<sub>n</sub>kerana nuna jĭjĭ jintintiatjarne.

## 13

### *Aneatin*

<sup>1</sup> Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Penké antranak chichajai. <sup>2</sup> Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsan ti enentáimtusan murá umuchiayatnak, anenkratchaknaka penké antraitjai. <sup>3</sup> Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan surumayatnak tura anenkratchaknaka antranak túraitjai.

<sup>4</sup> Aneñkartaka wari kajeatsui, tsánkaiti, chíkich shuaran shiir awajniuiti, péechach asa waantu enentáimtumsui. <sup>5</sup> Aneñkartaka natsanta nuna túrichuiti, níniunak enentáimchaiti, kajechuiti, páchichuiti. <sup>6</sup> Chikicha tunaarín wararchaiti antsu péñker shuaran wararniuiti. <sup>7</sup> Aneñkartaka aya katsunteawai. Tsanú chichamnasha nakiti-awai antsu aya péñker ana nuna nákwai. Tunáa shuar shiir ajastí tusa tuke nákwai.

<sup>8</sup> Aneñkrattainkia tuke amuukashtiniaiti. Antsu ju nunka amuukmataisha Yus-Chicham etserkatin atsuttawai, tura niisháa chichamjai unuimiatsuk chichastincha amuukattawai, tura ashí nekanamtai unuimiartincha atsuttawai. <sup>9</sup> Kame yamaikia aya ishichik nékaji. Yus-Chichamsha amutsuk étserējai. <sup>10</sup> Túra ukunam mash nekanamtai yámankamtaik nekaamuka ántar átatui.

<sup>11</sup> Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. <sup>12</sup> Núnisrik yamá ju nunkanam Yus paant wáintsuji. Íspik kusurunam ímsatniua áintsan̄kete. Antsu ukunam mai métek paant wainniaikiattaji. Yamaikia aya ishichik nékajai. Nuñ antsu Yus winia nékara áintsanak nekaattajai. <sup>13</sup> Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattainkia ashí nan̄kaamakuiti.

## 14

### *Niisháa chicham unuimiatsuk chichastin*

<sup>1</sup> Nu asantai, anenkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatin péñkeraiti. <sup>2</sup> Nújainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakaní nin chichastinian súawai túrasha tana nu nekaachminiaiti. <sup>3</sup> Antsu Yus-Chichaman étserēa nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. <sup>4</sup> Niisháa chichamjai unuimiatsuk chichaana nuka aya nin̄ki katsuartinian yáinmamui. Antsu Yus-Chichaman étserēa nuka ashí Yus-shuaran ikiatsuawai.

<sup>5</sup> Atumsha ashí mash niisháa chichamjai chichastinian wakerajrume. Túrasha nuna nan̄kaamas Yus-Chicham etserkatniun wakerajrume. Aya chichastin̄jainkia ju imiá péñkerchakait. Kame chichasma jintiákmeka maak. Nujai Yus-shuar tsakarartatui. <sup>6</sup> Enentaimpratarum, yatsuru. Nuñ irakun aya niisháa chichamjai chichaaknaka ¿itiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarme. Yus-Chichamnasha tura ashí Yúsnan̄cha jintinkiuuncha yáintatjarme.

<sup>7</sup> Peemsha tura tumansha wi tájana áintsan̄ áiniawai. Péñker tuntuíyamuka paant nekaamniaiti. Tura péñker tuntuíyachkuñkia, nu tuntuíyamu nekaachminiaiti. <sup>8</sup> Suntarsha mesetnum wéenakuí ni kapitian̄tri ni wakeramun ujaktinian kachun umpuawai. Paant umpuakuñkia suntarsha ni wakeramun nekaawartatui. Tura paant umpuachkuñkia suntarsha ¿itiurak mesetnum wétinian iwiarat? <sup>9</sup> Atumjajisha núniskete. Nekaachmin chichamjai chichaakminkia ¿támena nuna itiur nekaawartata? Nase chichartsumeash. <sup>10</sup> Ju nunkanmaya chichamka ti untsurí írunui. Nu chichaman



nékakka ashí antukmin áiniawai. <sup>11</sup> Tura chíkich shuara chichamen ántachkunka níjjaińkia yajaya apachia áintsanak ajajai. Niisha wíjjaińkia yajaya apachia áintsankete. <sup>12</sup> Tuma asamtai, Yusa takatrí ti wakera asarum ashí Yus-shuaran íkjarartatna nú takat nekas wakeruktarum.

<sup>13</sup> Nu asamtai niisháa chichamjai chichaitkiumka chichasumna nu jintiartin Yus seata. <sup>14</sup> Niisháa chichamjai Yusan áujeaknaka nekas winia wakantrujai áujeajai tura áujsajna nuna nékatsjai. <sup>15</sup> Antsu wikia júnisan enentáimjai. Yúsan áujeakun winia wakantrujai sha áujsattajai tura enentáimtsuk áujsashtajai. Kantamkuncha kantamaj nuna enentáimkiun winia wakantrujai sha kantamattajai. <sup>16</sup> Amesha shuar iruntramunam aya wakanmijai niisháa chichamjai Yus shiir yuminsakmincha nekaachmin asamtai nékachuka ámijai métek áujsatniun jeatsui. <sup>17</sup> Ti shiir Yus yuminsam áujeatsmeash tura chíkichka Yusjai ikiakáatsme. <sup>18</sup> Ashí átum nusháa chichamjai chicharmena nuna nankaamas wikia chichajai. Nuna Yusan yuminsajai. <sup>19</sup> Túmaitiatnak untsurí chichamjai chichasan ántumtikiashtinjaińkia nankaamas Yus-shuar iruntramunmanka aya senku chichamchijaiń tiintjai, paant jintintiaewartaj tusan.

<sup>20</sup> Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chíkich írunna nujai uunt enentáimpratniua áintsarum enentáimpratarum. <sup>21</sup> Yus-Papinium áarmaiti:

“Yajaya shuaran akupkan niisháa chichamjai chichastajai. Tura nújajai sha antur-tukchartatui” tawai Yus.” Tu áarmaiti.

<sup>22</sup> Nújajaińkia páantaiti, nusháa chichamjai chichastinkia Yus-shuarchan ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti. <sup>23</sup> Tuma ajn, nékachusha tura Yus-shuarchasha Yus-shuar iruntramunam wayanaka tura ashí niisháa chichamjai chichainianak wáinikianka “mash waurka ajarai” enentáimtur marchartatuak. <sup>24</sup> Tura Yus-Chicham étserkurminkia nékachusha tura Yus-shuarchasha nu wayanaka ashí tárumna nujai ni tunaarín ímias enentáimturtatui. <sup>25</sup> Nújajaińkia ni enentáin úumak ana nuna paant wáiniak tikishmatar Yusan shiir awasattawai. Tura “nekas Yus atumjai pujawai” títiatui.

### *Ashí tuke shiir takastarum*

<sup>26</sup> Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjai chichastinniasha, nusháa chichasman jintiatniuncha, ashí Yus-shuar Yusjai tsakararti tusar juna mash takasarti. <sup>27</sup> Nusháa chichamjai chichainiakka chikichik chikichik chichasarti. Tura jimiarchik menaintiuchiksha chichasarti. Tura ni timianka jintiartiniaiti. <sup>28</sup> Jintiartin atsakuinkea nusháa chichamjai iruntramunam chichaschatniuiti. Antsu ninke Yusjai chichasti. <sup>29</sup> Núnisan jimiarchiksha menaintiuchiksha Yus-Chichaman etserkarti. Tura chíkich shuar nu iruntrar ni etserkamun enentáimprarti péńkerashit tusar. <sup>30</sup> Tura chikichik chichaakui Yus chikichan nu pujana nuna yamaram chichaman súakuinkea emka chichaa nu iniáisatí. <sup>31</sup> Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújajai sha Yus-shuar unuimiarar kakarartatui. <sup>32</sup> Yúsnan étserainia nuka tuke enentáimprar chichastin áiniawai. Enentáimtsuk nánkamsan chichasmin áiniatsui. <sup>33</sup> Yuska pachimtak chichaman nakitiak shiir chichasmanak wakerawai.

Chíkich nunkanmasha ashí Yus-shuar iruntramunam túrainia áintsarum túratniuitrume atumsha. <sup>34</sup> Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin áiniawai. <sup>35</sup> Inintrustininian wakerakka ni jēn waketkin ni aishrin nu aniasi. Ashí iruntramunam nuwá chichastin natsantaiti.

<sup>36</sup> Jusha enentáimpratarum. Yus-Chicham atumjai nankamnachmai. Núnisan aya atumjinin Yus-Chicham jeartamchaiti. Chíkich nunkanmasha Yus-shuarti túrutai

enentáimpratniuitrume atumsha. <sup>37</sup> Atumjín shuar “Yus-Chichaman tuke etserniuit-jai” enentáimtumatsuash. Tura chíkich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí. <sup>38</sup> Tu táchakuinkia niisha ántar ániawai.

<sup>39</sup> Nu asamtai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiairap. <sup>40</sup> Túmaitiat antukchamin awajtsuk ashí shiir túratarum.

## 15

### *Kristu nantakmia*

<sup>1</sup> Ataksha, yatsuru, uwempratin chichaman wi etserkamaj nuna atumin enentáimtikrattsan wakerajrume. Nu chichamsha atumsha enentáimturarum tariarurme. <sup>2</sup> Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

<sup>3</sup> Winia ujakmunak ujakmajrume. Nu chichamsha ashí nankaamas úuntaiti. Júiti nu chicham: Ii tunaarín asakártasa Kristu jarutramkamiaji, Yus-Papinium tana núnisan. <sup>4</sup> Tura jakamtai iwiarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan. <sup>5</sup> Nantakisha Pítrun wantintiukmiayi, nuyá ni akatramurín wantintiukmiayi. <sup>6</sup> Nuyanka kiniantusa (500) nankaamas Yus-shuaran wantintiukmiayi. Nú shuarnumiasha ishichik jákaru ániawai tura untsurí tuke pujuiniawai. <sup>7</sup> Nuyasha Sántiakun tura nuyá ashí ni akatramurín wantintiukmiayi.

<sup>8</sup> Ashí amúamunmasha winiasha wantintiurkamiayi, wi yajauch wekaa ajn. <sup>9</sup> Wisha Yus-shuaran ti yajauch awajsa asan chíkich Yus-akatramujai ímianchaitjai. Nekas winia péñkerujai ni akatramuríntjai tíchamniaitjai. <sup>10</sup> Antsu Yus ti shiir anentak winia enentáiruj pujurtus péñker najataiti. Nu asamtai winia kakarmarjai takaschaitjai, antsu Yus, anenkartin asa, winia enentáiruj takaakui ashí ni akatramurín nankaamas takasuitjai. <sup>11</sup> Tura wi takaakuisha tura ni takainiakuisha mai péñkerkete. Nu chichamka mash étsereaji tura nu chichamsha átum enentáimtusmarme.

### *Jákaru nantakiartatui*

<sup>12</sup> Iisha “Kristu jakamunmaya nantakniuiti” tu étsereaji. ¿Itiur nuikia shuar jakamunmaya nantakchatniuiti tuinia? <sup>13</sup> Jakamunmaya nantakchatniuitkiuinkia nuikia Krístusha nantakchaiti. <sup>14</sup> Tura Kristu nantakchaitkiuinkia ii uajnia nu penké ántraiti, atumsha Kristu enentáimtarmana nusha ántraiti. <sup>15</sup> Núnisaitkiuinkia iisha “Yus Krístun iniantkimiayi” tákur waitruamji. Iis, nekas jakamunmaya nantakchamniaitkiuinkia nuikia nekas Yus Krístun iniantkichiuiti. <sup>16</sup> Jaka nantakchatniuitkiuinkia imia Krístusha iniantkichmaiti. <sup>17</sup> Tura Kristu iniantkichmaitkiuinkia átum Kristu enentáimtamusha penké ántraiti. Tunaarmisha asakárchamu ániawai. <sup>18</sup> Núnisaitkiuinkia Yus-shuar jákaru ainia nu tuke meñkakarú ániawai. <sup>19</sup> Iikia Kristu enentáimtusar tuke Niijjai shiir pujustin náka. Tura aya jú nunkanam pujustiniaitkiurkia Kristu ántar enentáimtakrin ashí nankaamas waitnentrampatniuitji.

<sup>20</sup> Antsu imiankas Kristu jakamunmaya nantakniuiti. Ashí ukunam jakanmaya tuke jákashtinian nantakiartatna nuna Nii émtukuiti. <sup>21-22</sup> Yaunchu Atañ tunáa túramtai ashí shuar jákatin ániawai. Núnisan yamaikia Krístujain tuke atakka jákashtinian nantakiartiniaiti. Iis, chikichik áishmanjain jákatin nankamnamiayi. Nuka Atankauyayi. Núnisan chikichik áishmanjai nantaktin nankamnamiayi. Nuka Krístuiti. <sup>23</sup> Yus wakerana nuí Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarín júuktinia áintsan iniantkittiaiwai. <sup>24</sup> Nuinkia mash amuukattawai. Nuí Kristu ashí kapitiánniasha, ashí akupniuncha, ashí núnisan jú nunkanam írúna nunasha nupetak emesrattawai. Krístusha ashí mash ni Aparín susattawai. Tura Yus Apa ashí akupin átatui nuikia. <sup>25</sup> Iis, júnisán átatui. Emka Yus

Apa ashí ni nemasrín nupetak Krístun susattawai akupin atí tusa. <sup>26</sup> Tura ni nemasrín nupetak ashí amúamunam jákatniuncha nupetkattawai. <sup>27</sup> Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niniki súsachmaiti. <sup>28</sup> Tura Yus Apa ashí mash ni Uchirín Krístun nekas susamtai Kristu nuikia ashí akupin ajas atak ni Aparín mash awantuki núnisan surumaktatui. Nuin̄kia Yuska tuke ashí nan̄kaamantu átatui.

<sup>29</sup> Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

<sup>30</sup> Iikia ¿urukamtai tuke ján̄inkiaruitiaj? Nantakchatniuitkiuin̄kia ántra wáitsaintji. <sup>31</sup> Atsá, pen̄ké áintsachuiti. Nu asamtai átum ii Uuntri Jesukrístu enentáimtakrumin wi shiir enentáimtajrume. Tura wisha tuke tsawantin ti itiurchat pujakun jákatniua áintsan pujajai. <sup>32</sup> Jakamunmaya nantakchatniuitkiuin̄kia wi ántranak kajen shuarjai Ipiasiunam máaniakuitjai. Maa, uunt yawáa áinis kajen áрмаi. Wats, núnisaitkiuin̄kia antsu “yurumar nampektai, kashin jákashtatjik” titiai nuikia.

<sup>33</sup> Anan̄nawairap. “Pén̄keraitiatam yajauch shuarjai tsan̄inkia wekakmeka ya-jauch máatrattame” tiniu áiniawai. <sup>34</sup> Tunáa ikiuakrum pen̄ker wekasatin shiir enentáimpratarum. Iis, shuar Yúsan nékainiachu tuke awai. Atumin natsāaruk tusan tájarne.

### *Iniantkimiu ayash átatna nu*

<sup>35</sup> Shuarsha inintruschaimpiash ¿jákarusha itiurak nantakiarat. Nantakiarsha warí ayashniak takusarat? <sup>36</sup> Enentáimtsuk inintrawai. J̄inkiaí araamsha jaka áintsan amúatsuk. Túrayat tsapaatsuk. <sup>37</sup> Tsapaitniur̄isha araatsme antsu trikiu j̄inkiaichisha chíkich árika j̄inkiaichir̄isha araame. <sup>38</sup> Nuyá tsapaakuisha Yus wakerana núnisan ní tsapaitniur̄incha súawai. Tura an̄kant an̄kant tsapaitniur̄inkia súsaiti. <sup>39</sup> Núnisan ashí ayash métekcha áiniawai. Áentsnaka niishaaiti. Kuntinniasha niishaaiti. Nanamtin-niasha namaknasha niisháa áiniawai. <sup>40</sup> Nayaimpiniam yaa írunui tura ju nun̄kanam írunna nujai nusháa ímtin áiniawai. Nayaimpinmayasha nun̄kayasha shíirmari nushaiti. <sup>41</sup> Etsá winchar̄isha nantunusha yáanusha mash nushaaiti. Nuamtak yaaksha chikicha winchar̄inkia chikichnajāinkia nushaaiti. <sup>42</sup> Núniskete jaka nantaktincha. Káurtinnium iwiarsam jákashtinnium nantaawai. <sup>43</sup> Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. <sup>44</sup> Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

<sup>45</sup> Yus-Papinium nuní áarmaiti:

“Emka áishman̄ ni naar̄i Atan̄, aents ajas iwiaaku ajasmiayi.” Tu áarmaiti.

Ukunman̄ka, yamaram Atan̄ka áintsan̄, Kristu, wakan asa, ashí áentsun nekas iwiaaku átinian susamniaiti. <sup>46</sup> Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu. <sup>47</sup> Emka áishman̄ nun̄kajai najanamu asa nun̄kayaiti. Ukunmaya áishman̄sha ii Uuntri Kristu asa nayaimpinmayaiti. <sup>48</sup> Atan̄ka áintsan̄ ainia nusha juyá ayashtin áiniawai. Kristu áintsan̄ ainia nusha nayaimpinmaya ayashtin áiniawai. <sup>49</sup> Yamái juyá áiniakur ukunam nayaimpinmaya ayashtin ajastatji.

<sup>50</sup> Juna tájarne, yatsuru. Ayash númpentin asa nayaimpiniam, Yus akupeana nuj, wayachminiaiti. Iis, káutain̄kia káurchatniunam wayachminiaiti. <sup>51</sup> Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. <sup>52</sup> Tura pusarí muíttsarnin̄ ti wárik yapajniáttaji. Tura ashí amuukai tusa umpuuartatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuin̄ yapajniáttaji. <sup>53-54</sup> Jú kautain̄kia yamá jákatniuitiat káurchamnia ajastiniaiti. Túrasha jákachmin átatui. Nu túrunamtaisha Yus-Papinium aarma uminkiattawai:

“Jákatniun Yus nupetak amukuiti. <sup>55</sup> ¿Itiur jákatjik yamaikia. Jákatniusha itiur nupet-tamkañ mantamataj?” Tu áarmaiti.

<sup>56</sup> Yaunchu Yus akupkamu tiniu asamtai shuar tunáa tura jákatniuiti. <sup>57</sup> Yamái antsu ii Uuntri Jesukrístu túramujaj jákatniunka Yus nupetkaiti. Tura incha nujaj uwempratniun amaakui shiir yúmin̄kiaji.

<sup>58</sup> Nu asamtai, aneamu yatsuru, kakaram ajasrum yawetsuk nan̄kaamas Yusa takatri takastarum. Ii Uuntri Krístujaj tsaniñkia takaarum nuka pen̄ké ánrachuiti. Nu paant nékarme.

## 16

### *Yusa kuitri irurtin*

<sup>1</sup> Yusa kuitri irurtinkia, Yus-shuaran Karasea nun̄kanam tímiaj núnisnak atumniasha tájarme. <sup>2</sup> Ashí tumiñtin, Yus súramna áintsam akankam ikiusta. Nújain̄kia wi jeattaj nui yaunchu akankamu mash irurmin átatui. <sup>3</sup> Nui jeancha átum anaiyarmena nu shuaran papijaj Jerusaréñnum akupkattajaj. Tura atumí kuítrumin aisha ii yachin̄ súsartatui. <sup>4</sup> Wisha wéminiaitkiuñkia wijaj wéartatui.

### *Papru irastatna nui*

<sup>5</sup> Wi Masetúnia nun̄kanam wétiniaitjai tura nuyá Kurintiunam jeattajaj. <sup>6</sup> Nui sha untsurí tsawant pujuschatjash. Ishichik nantusha wéchanianum pujuschatjash. Tura wi atak wéakui atumsha yáintkiarum shiir akuptukchattarpash. <sup>7</sup> Aya wárik nan̄kaamaktinian nakitiajai. Antsu Yus wakerakuñkia untsurí tsawant atumjaj pujus-taj tajaj. <sup>8</sup> Tura juin̄ Ipisiunam pintikustís nampernum pujustajaj. <sup>9</sup> Juin̄kia Yusa takatri tí shiir takastin awai. Tura untsurí shuar wi takaamun nakitiainiawai.

<sup>10</sup> Timiutéu nui jeamtain̄kia, shiir awajsatarum; sapijmiakain̄. Niisha wijaj métek Yusa takatrin̄ takaawiti. <sup>11</sup> Nu asamtai nakitirairap. Antsu yáin̄krum winí shiir akup-katarum. Chíkich yachijaj tatí tusan nákaajaj.

<sup>12</sup> Apurusnasha chíkich yachijaj winí írmasartí tusan ti seamjai tura pen̄kesha nakiar-mai. Kame nii ankant aku nui winishtimpiash.

### *Áujmamsamu*

<sup>13</sup> Aneara tariarum Yus nekas enentáimtustarum. Áishman̄chakaitrum, kakaram ajas-tarum. <sup>14</sup> Anen̄kartamujaj mash túratarum.

<sup>15</sup> Ayu, yatsuru. Estepanasa shuari ashí emka Akaya nun̄kanam Yus-shuar ajarar-man nékarme. Niisha Yus-shuaran yáintajtsar tuke takainiawai. <sup>16</sup> Niisha tura ashí nijaj métek yáin̄kiar takainia nú shuar seatmana nu tuke túratarum. <sup>17</sup> Estepanasha Jurtunátusha Akaikiusha atum̄iya táarmatai shiir waraajaj. Átum yajá pujakrum tu-jintiarmena nuna túrawarmai. <sup>18</sup> Niisha winia shiir enentáimtikrurarai. Núnisañ shiir enentáimtikramprattarme. Nuní aents tuke shiir enentáimtustiniaiti.

<sup>19</sup> Asia nun̄kanmaya Yus-shuar amikmáatmainiawai. Akirasha ni nuwe Prisirajajisha ashí Yus-shuar ni jeen Yus-Chichaman irunturarusha Jesusa náariin̄ amikmáatmainiawai.

<sup>20</sup> Ashí ii yachisha amikmáatmainiawai. Nuámtaksha shiir awajnaistrum amikmáaniatarum.

<sup>21</sup> Wi Papru asan juchiniak winia uwejruraj áaran amikmaajrume.

<sup>22</sup> Ii Uuntri Jesukrístun aneachuka yajauchiniam yuminkramu atí. “Ii Úuntri, wari tatá.”

<sup>23</sup> Ii Uuntri Jesukrístu yainmakarti. <sup>24</sup> Jesukrístunu asakrumin atumin ashí ti anea-jrume. Nu atí.

## Papru KURINTIUNMAYA SHUARAN Ataksha papin aar akuptukma

### *Kurintiunmaya Yus-shuaran Papru áatramiania nu*

<sup>1</sup> Wi Pápruitjai Jesukrístu akatramu. Yus nuna wakerakui ni akatramuri anaikia-muitjai. Ii yachi Timiutéujai Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme. <sup>2</sup> Apa Yussha, ii Uuntri Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

### *Papru wáitsamuri*

<sup>3</sup> Ii Uuntri Jesukrístu Apari, ii Yusri ana nuna naari uunt awajsatai. Niisha ii Aparínti. In waitnentramaji. Tura Niisha ii Yúsrínti. Tuma asa in tuke atsanamaji. <sup>4</sup> Ii wáitajnia nuí Yuska in atsanamaji. Tura in atsanamajinia nútiksarik iisha chíkich shuar wáitainia nuna atsankrarat tusa túrutmaji. <sup>5</sup> Warí, Kristu wáitsamuri núkap pachiinkiaitjia núnisrik ni atsanramuri núkap pachiinkiaitji. <sup>6</sup> Tuma asamtai, wáitajnia nu, Yusa uwentikrampratniuri tura ni atsankratniuri atumsha takustarum tusar wáitajji. Tura Yus in atsanampramjia nu, Yusa uwentikrampratniuri tura ni atsankratniuri átum takustarum tusar atsanramuitji. Wats, átum uwentikramu tura atsanramu asarum, ii wáitsajnia nútiksarmek wáitayatrum shiir enentáimsarum katsuntramniaitrum. <sup>7</sup> Tura “túrattawai” tu enentáimtajrume. Warí, átum iijjai métek wáitsaitrum. Núnisan iijjai métek Yus atsanramtsurmek.

<sup>8</sup> Yatsurtiram, iikia Asia nunkanam ti itiurchat wáinkiamjia nu nekaatarum tusar wakeraji. Imiá itiurchat wáinkiar iikia katsuntratin jeachmaji. <sup>9</sup> Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumsuk, antsu jakamunmayan iniannua nú Yúsan enentáimtusarat tusa nu túrunamji. <sup>10-11</sup> Jakamnia itiurchatnumiá Yuska uwentikrampramji. Tura yamaisha uwentikrampratajtsa pujurtamji. Tura atumsha in Yus áujtakrumniñkia “Yuska tuke uwentikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yumínsartatui.

### *Kurintiunam wau wéchatniun Papru ujakmiania nu*

<sup>12</sup> Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anañtsuk tura Yus umirkar wekaimji. Aya ii nekatairijiañ wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji. <sup>13</sup> Áatjarmena nu páantaiti. Átum áujsarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. <sup>14</sup> Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátnia nú tsawantaj átum winia shiir enentáimtursattarme. Tura átum péñker wekasa asakrumin shiir enentáimtustatjarme. <sup>15</sup> Tura ii shiir enentáimtuniaj nuna nékakun ataksha Yusa waitnenkartutairi nekapsak tusan ataksha atumjin irastinian wakerimjai. <sup>16</sup> Masetúnia nunkanmaani wéakun írkuta nankaikitjarum tusan enentáimmiajai. Tura wáketkuncha ataksha ístajrum tusan wakerimjai. Túramtai wi Jutía nunkanam weakui átum yáintkiatarum tusan atumin ístinian wakerimjai. <sup>17</sup> Nuñkia ¿urukamtai túrachmaj? ¿Péñker enentáimtsukek “wetajai” tímiaj? ¿Wi Yus-shuarcha nunisan, jimiará chichamtiniaiti, tú enentáimtursarumek? <sup>18</sup> Núchaiti. Yus tana nuna tímiatrusan umiana nútiksarik iikia ii chichame umiktai tusar

wakeraji. Jú chichamaik, “Ee, atsá” tátsuji. <sup>19</sup> Wissha Serpanujaj Timiutéujaj Yusa Uchirj Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai. <sup>20</sup> Niijjajsha Yus tana nu tímiatrusañ uminiui. Tuma asamtai Jesukristu enentáimtakur “nii tana nuna nekas túrattawai” tu enentáimji. Tu enentáimsar Yusa naari shiir awajeaji. <sup>21</sup> Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji. <sup>22</sup> Tura ukunam ii achiktatjinia nuna, nekas amastatjai tusa Yus ni Wakanin ii enentáin apujturmajji. Nujaj Níiniuitji tusar paant nékaji.

<sup>23</sup> Atumjin iturchatan wáinkiajj tusan nakitiakun atumí péprurj Kurintiunam jeachmajai. Wáitrakuinkia “Yus iirsati” tajai. <sup>24</sup> “Aya wi tájana nútiksarmek Yus enentáimtustarum” waantu enentáimtumasar nu titin nakitajji. Yus nekas enentáimtusmaajaj kakaarme. Antsu nekas warastarum tusar wakeraji.

## 2

<sup>1</sup> Tuma asamtai, atak kúntuts awajsajjrum tusan nakitiakun, “atumí tunaari íwiartsurminiñ jeashtatjai” tímiajai. <sup>2</sup> Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrus-miniaitrume. <sup>3</sup> Wi jeakun atumí tunaari íwiartsurminiñ kúntuts enentáimsajj tusan nakitiakun, nu papin áarmaj nútiksanak áarmajai. Warí, atumketrume winia waramtikrustin. <sup>4</sup> Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

### *Yajauchin túrana nu tsankuratin*

<sup>5</sup> Túrasha kúntuts awajtusmia nu, aya wíniak kúntuts awajtuschamai. Antsu atumni-asha ishichik kúntuts awajtamsayi. Patasa chichasajj tusan “ishichik” tajai. <sup>6</sup> Kame nu áishmankan iruntra chicharkarum wáitkiasmarum nuke máakete. <sup>7</sup> Antsu yamaikia tsankuratniuitrume. Shiir enentáimtikratniuitrume. Niisha imiá kúntuts pujus nú arant ajasáin tusarum túratniuitrume. <sup>8</sup> Túrakrum nii nekas anearmena nu paant iniaktustarum tusan seajrume. <sup>9</sup> Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. <sup>10</sup> Átum tsankurearmena nú shuaran wissha núnisnak tsankureajai. Tura tsankuratin ákuinkia, wi tsankurajna nu ashí atumnian enentáimtusan, Kristu ímmianum túrajai. <sup>11</sup> Kame uunt iwianch Satanás in emestam-pratajtsa wakerana nusha nékaji. Tuma asamtai, túrawain tusar tsankuratniuitji.

### *Trúas péprunam Papru juákchamiania nu*

<sup>12</sup> Krístunu shiir chichaman Trúas péprunam etserkatajtsan jean, ti péñker takastinian wáinkiamjai. <sup>13</sup> Túrasha ii yachj Titiun wáinkiachu asan, shiir enentáimsatniun tujinkiamjai. Tura asamtai Trúasnumiá aentsun áujsan ikiukiaran Masetúnia nunkanam wémiajai.

### *Krístujaj nupetkamniaitji*

<sup>14</sup> Kristu Jesusjaj Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukujj kunjúakui, ashí nékainia núnisan ii et-serkamujaj Kristu shiir chichamen Yuska ashí aentsun nekamtikiainiawai. <sup>15</sup> Kristu in pujurtamu asamtai Yusjaj nekapsamka iikia kunjúaji. Ii kunjúajnia nuna uwemtikramu ainia nusha tura uwemtikrachma ainia nusha nekapramnia ainiawai. <sup>16</sup> Menkakatniunam weena nuka ii kunjúajnia nuna jakamnia mejea nekapramji. Tura iwiaaku átinnium weena nuka iwiaaku átin kunjúa nekapramji. Maa, nu túratniuncha ¿yaki jeá?

<sup>17</sup> Kame untsurj aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamun asar, Yus ímmianum anañtsuk esetsar étsereaji.

## 3

*Yamaram chícham najanamu*

<sup>1</sup> ¿Nu tákurninkia, “ataksha ninkí waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitiaj? ¿Chíkich iniaktustin nú papí atumin seatniukaitiaj?

<sup>2</sup> Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áujsatniua núnisan ashí aents atumí túramurí wáinkiar ii etserkamaj nu, Papru nekas Yusa takatrín takaawai tusa nekaamnia áiniawai. <sup>3</sup> Iis, tátsujak. Papí aarma núnisketrume. Nu papí Krístu áarmaiti tura iisha nú papí atumin súaji. Tíntiajaínchu antsu iwiaaku Yusa Wakaníjiaí áarmaiti. Kayanmasha áarchamuiti; antsu shuara enentáin, auka, áarmaiti.

<sup>4</sup> Kame Krístunu asar, Yus enentáimta asar, nusha túminiaitji, taji. <sup>5</sup> Ju nékaji; imia iik penké tujinkiaitji. Antsu ii túrajnia nu Yus ni kakarmarín súramkurin túraji.

<sup>6</sup> Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakaníjiaí yamaram wekasatniun súramji. Yusa kakarmaríjiaí nu chicham étserji. <sup>7</sup> Yaunchu chichamnaka kayanam aar Yus Muisaisan susamiayi. Susamia nuí, Muisaisa yapi ti wincha ajasmiayi. Túrunamtaí Israer-shuar ni yapin íistinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan winchajaí susamuyayi. <sup>8</sup> Tura yamaram chichaman Yusa Wakaní súramna nu, nujají nankaamas shíiraiti. <sup>9</sup> Kame mesertinnium ejeana nú chicham winchajaí susamuyayi. Tura nujají nankaamas Yúsnum ejeana nú chichamka Yus íimmianum péñkeraiti. <sup>10</sup> Iista; yamaram ana nu imiá shiir asa, yaunchu wincha amia núnaka mushatmamtikiui. <sup>11</sup> Núkap arur pujuschamnia nu wincha áchamkia. Kame tuke átinia nuke nujají nankaamas shíiraiti.

<sup>12</sup> Nu nékakur ti paant étserji. <sup>13</sup> Muisais túramia nútiksarik túratsji. Ii uuntri Israer-shuar ni yapin wincha ajas menkaan wáinkiarain tusa tarachjaí ni yapin Muisaiska nukumakmiayi. <sup>14</sup> Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan yaunchu aarma chichaman áujsam antukar nekaatniun tujintiainiawai. Krístu enentáimtuschatin ni enentáin nukukma nu yapajíáchmaiti. Aya Krístujají nuka yapajíámniaití. <sup>15</sup> Yamaisha Muisaisa áarmarín áujsar nékainiatsui, ni enentáimmiari nukurkamu asa. <sup>16</sup> Tura aencha ni enentái yapajíá Uuntna ajasmataikia ni enentáimmiariya nukurkamu ana nu jusamuiti. <sup>17</sup> “Uunt” tájinia nu, Yusa Wakaníiti. Uunt Yusa Wakaní pujana nuí ankant ajastiniaití. <sup>18</sup> Nuke asamtaí, iisha ii yapí tarachjaí nukukchamu asar íspikia núnisketji. Uunt Krístu péñkerí iniakmaji. Krístu péñkerí nú núkap takaki wéakur, Krístujají métek ajastasa pujaji. Yusa Wakaníkia nuna túrawai.

## 4

<sup>1</sup> Yus in waitnentrama asa ni chichamen etserkatniun ataktamsaitji. Tuma asamtaí yawetsuk takaaji. <sup>2</sup> Uuka túratin ana nuyá tura natsanmají ana nuyasha kanakmiaji. Anankataí tusar wekaatsuji. Tura Yus-Chichamjají nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. <sup>3</sup> Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuíniawai. <sup>4</sup> Uunt iwianch, ju nunká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajají tsáapnin enentáimpraraín tusa ukustawai. Nu Krístu Yúsan ímiatrusan nakumui. <sup>5</sup> Iisha étserkur, Jesukrístu ii Úuntrinti tu étserējaji. Iikia atumí úuntrintji tátsuji. Antsu, Jesus ii uuntri asamtaí, atumí yáintrintji, taji. <sup>6</sup> Yaunchu kiritin aan Yus tsáapin atí tusa tsáapnin

awajsachmakia. Nú Yúsaiti ii enentáin tsaapnin awajtamsamia nu. Nu tsaapnijiaí ni shiirmarín, Jesukrístu iniakmia nuna, ashí aents nekaawarat tusar Jesukristunun étserajji.

*Yusak enentáimtusar wekasatin*

<sup>7</sup> Nu tsáapin imiá pēnker ana nuna ii ayashíin Yus ikiusuiti. Tura ii ayashí kakarmachu, nuwe najanamua áanin asamtai, warí, kakaram ájinia nu Yúsnumiachukait. Ii aī nuna nekaawarat tusa Yuska ni tsáapnintrín ii ayashíin ikiusuiti. <sup>8</sup> Tuma asamtai ii itiurchatrí árentmaku árinín tuke jīinkimniaitji. “Itiurkatjik” taji, túrasha Yus yáinmaji. <sup>9</sup> Aents pataaturmainiakrincha Yus ikiurmatsji. Emesrataj tukamá tujintiainiawai. <sup>10</sup> Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Krístu kakarmarí ii ayashíin iniakmaji. <sup>11</sup> Iisha Jesusna ajasu asar wekaajnia nuí tuke tsawant tsúumainium jasattuk ajaji. Túrar ii ayashí jakamniaitiat nu ayashnium Jesusa iwiaakmarí paant iniakmaji. <sup>12</sup> Iisha Yus-Chicham étserkur ii ayashíin jasattuk ajaji, tuma aīn atumsha umikiu asarum nekas iwiaaku atin wáinkiarne.

<sup>13</sup> Yus-Papínium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. <sup>14</sup> Yus kakarmaiti. Uunt Jesusan jakamunmayan iniantkimiayi. Incha núnisan Jesusjai iniantamkittiaji. Tura atumjai métek ni pujamunam juramkittiaji. Nusha paant nékaji. <sup>15</sup> Atumsha untsurí aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yumínsarum pujarme. Nujai Yusa naarí uunt awajsamuiti. Nu nekaar wáitsatin ashamatsji. <sup>16</sup> Tura yaweatsji. Ii ayashí amuiki wéakuisha ii enentáinkia yamaram ajaki wéawai. <sup>17</sup> Warí, ukunam tuke shiir pujustatjina nu enentáimtakrikia, ju nunkanam wáitiajnia nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijiaí Yuska ti shiir ana nuna amuukachmin ana nuna núkap suramsattaji. <sup>18</sup> Tuma asamtai wáinjina nu ti enentáimtatsji. Antsu wáintsujnia nu nekas enentáimtaji. Wáinjina nusha aya yamaiyaiti. Antsu wáintsujnia nuka tuke amuukachminiaiti.

## 5

<sup>1</sup> Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashí emesnakuisha warí itiurtamajia. Nuka aaka núnisan amuukamniaiti. <sup>2</sup> Ju ayashnium pujusar wáitiaji, taji. Yamaram ayash nayaimpiniam pujana nu achiktai tusar wakeraji. <sup>3</sup> Ayashtichu ajasajj tusar, yamaram ayashtin ajastaitsar wakeraji. Pushía núnik yamaram ayash in nukurmaktai tusar wakeraji. <sup>4</sup> Tura juí ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmí tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustatji. <sup>5</sup> Yamaram ayashintin ajastinian iwiarturmaruitjina nu Yúsaiti. Tura nekas túrattajai tusa ni Wakanín suramsaitji.

<sup>6-7</sup> Ju nékaji. Ju ayashnium pujajnia juínkia Uunt Jesusjai pujatsji. Tuma asamtai, wáinjina nu ti enentáimtutsuk Yus enentáimtusar tuke shiir enentáimsar wekaaji. <sup>8</sup> Tura ju ayashniumiá jīinkir Uunt Jesusjai tuke pujustaitsar wakeraji. Tura túrattaji tu nékaji. <sup>9</sup> Tuma asamtai ju ayashnium pujakrishia tura ju ayash ikiukrishia Uunt Jesus tuke waramtikсатаi taji. <sup>10</sup> Warí, ju ayashjai ii túramajnia nu ujakam, “pēnkeraiti”, “yajauchi-iti” Krístu turutit tusar, ashí iisha Uunt Krístui jeatniuitji. Tura ii túramujai métek akirmaktatji.

*Krístun waramtikсатаj taji*

<sup>11</sup> Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaji. Tura incha Yus nékarmaji. Tura ii túramurí átumka



atumí enentáin paant nékarme, tajai. <sup>12</sup> Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya pátatkea nujai warainia nú shuar tsanumprutmainiakui yaintkiatarum tusar taji. <sup>13</sup> “Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáintai tusar túraji. <sup>14</sup> Kame ashí ii túrajnia nu Kristu anenkrattairijiai túraji. Kame ju nékaji: Kristu ashí shuaran jaruku asamtai, Yus íimmianum ashí iisha jaka núnisaitji. <sup>15</sup> Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia juí, iik wararmamtsuk, Kristu umirkatniuitji. <sup>16</sup> Tura yamaisha aya ni ayashí írsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashí írsar “Kristu yajauchiiti” tu enentáimsamijai. Tura yamaikia yapajjár, esetsar enentáimkiur “Kristu Yusa Uchirínti” taji.

### *Krístujai yamarmaitji*

<sup>17</sup> Tuma asamtai, Krístunu ajasúka yamaram najanamuiti. Yaunchu enentáimtaiirí menkakayi. Antsu núnaka íkias ni enentáimtaiirí nekas yamarmaiti yamaikia. <sup>18</sup> Nunasha Yus túraiti. In nawampramkattsa Krístun akupturmakuitji. Tura nu etserkatniun incha ataktamsaitji. <sup>19</sup> Yuska in tunaarínniutin asutiámatniun nakitiak Krístujai nawampramkamijai. Tura incha Yus-shuartin nu ujaktinian ataktamsaitji. <sup>20</sup> Krístunu ataksamu asar, Yuska “winia Uchirjai nawamnaikiatarum” tusa ii wenejai atumin seatmarme. Tuma asakrin, Kristu náariin “túratarum” tájarme. <sup>21</sup> Krístuka tunaan penké túrachmiayi. Túmanak ii tunaariin Yus Krístun makuumiayi. Nuna tura Krístunam makuuchmin awajtamsamijai.

## 6

<sup>1-2</sup> Ni Papiriin Yus yaunchu Isayasan júna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrín pachitkijnia nu, Yusa anenkrattairí pénker achiktarum tusar seajrume. <sup>3</sup> Tura “Papru etserkamurí ántraití” tíraín tusar chíkich yajauch enentáimtiktsuk pénker wekaaji. <sup>4</sup> Nekas Yusa takarniuríntji nuna paant nekaawarat tusar wáitiatrik, atsumayatrik, itiurchatnum pujayatrik shiir katsunteaji. <sup>5</sup> Ju itiurchat wáinkiamji: katsumpramkarmaji; sepunam enketmáwarmijai; charáa-charáa awajtamiarmijai; takatcha ti itiurchat takasmijai; kanutsuk pujumijai; tura tsukasha ti tsukammijai. <sup>6</sup> Tunáa nakitrar wekaaji; Yus-Chicham unuimiátraitji; shiir enentáijiai katsuntrar wekaaji. Chíkich shuar pénker awajeaji; Yusa Wakaní pujurtamkurin shuar nekas aneaji; <sup>7</sup> nekas chicham ana nu étsereaji; tura Yusa kakarmarísha nú paant iniakmaji. Tura ni nemasrín nupettukain tusa suntar ni tantarín júana núnisrik iisha ii nemasrí íwianch nupettamkaj tusar ii Yusrí tuke umirkar wekaaji. <sup>8</sup> Shuar shiir enentáimturmainiakrincha, yajauch enentáimturmainiakrincha, pénker chichartamainiakrincha, yajauch chichartamainiakrincha tuke Yusjai shiir wekaaji. “Wáitruiniawai” turamainiakrincha tuke nekas chichajai. <sup>9</sup> “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnatsji. Yusa takarniuríntiaj nu ashí nujai paant nekaamniaiti. <sup>10</sup> Kúntuts pujayatrik ii enentáinkia waraaji; kuítrinchaitiatrik chíkich shuar kuítrintin awajeaji; penké takakchiatrik ashí wáinji.

<sup>11</sup> Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. <sup>12</sup> Wikia atumin paant chichastajtsan wakerajrume; antsu átumka anenttsuk paant chichastin nakitrarme. <sup>13</sup> Winia uchirua núnisnak chichajrume; wi tuke paant chichaarjarmena núnisrumek atumsha atumí enentáin ana nu, paant ujakatarum tusan seajrume.

*Yusa jeentji*

<sup>14</sup> Yus-shuar Yus-shuarchajai tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjai métek enentáimiainiawak? ¿Tsáapnisha kiritjai máimtek áminkiait? <sup>15</sup> ¿Křístuka uunt iwianchjai nawamnaikiamniakait? ¿Yus-shuar Yus-shuarchajai tsaniñ shiir pujusminkiait? <sup>16</sup> ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrume. Yus Ninki ni Papiriin juna tíchamka: Niiijai tsaniñkia pujusan, niiijai wekasartatjai tura ni Yusri átatjai; tura niisha Wíi aents ajasartatui.

<sup>17</sup> Tuma asamtai junasha tímiayi:

Nii matsatainia nuyá jíinkitarum, tura niija kanaktiarum, tawai Uunt Yus; tura yajauch ana nu antinikiarap. Túrakrumninkia awayattajrume.

<sup>18</sup> Tura atumí Aparí átatjai; átumka winia uchir átatrume. Nuna Wi imiá kakaram uunt Yus asan tajai. Tu áarmaiti.

**7**

<sup>1</sup> Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasain tusar, ashí tunáa ana nuyá kanaktiniaitji. Túrar “Yusak nekas ii úntrinti” takur, ii ayashísha, ii enentáisha takamtsuk tuke tsawant Yus íktustiniaitji.

*Kurintiunmaya shuar enentáimprarmatai Papru warasmiayi*

<sup>2</sup> Ataksha nawamnaikiatai. Iikia shuar yajauch awajsachmaji; yajauch jintintra-chmaji; anankachmaji. <sup>3</sup> Makuutai tusan nuna tátsujai. Antsu nuik tíchamkajrum, iwiaaku pujakřisha jakarsha átumka ii enentáin áchitkiarme. <sup>4</sup> Araantutsuk áatjarme; shiir enentáimjai. Itiurchatnum pujayatnak, atumin enentáimtusan enentairuí kakaram enentáimsan waraajai.

<sup>5</sup> Jui Masetúnianum penké ayamprachmaji. Antsu ti wáitsamji. Áentsnumia itiurchat wáinkiamji, tura ii enentáijiainkia ashamkamji. <sup>6</sup> Tura kúntuts pujakřincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármaj. <sup>7</sup> Tura átum nii ikiakármarmuna nuna Titiu ujatkamai. Nuna antukan ti warasmajai. Títuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

<sup>8</sup> Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiyajai, túrasha yamaikia tátsujai. Papí áujsarum ishichik kúntuts enentáimprarmuna nuna nekaan waraajai. <sup>9</sup> Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarm atumí enentái Yusjai yapajíá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijjai yajauch awajsachji. <sup>10</sup> Nekaatarum. Yus wakerana nútiksar kúntuts katsunteakka ni enentái Yúsnun yapajíáwaj. Nuñkia ni tunaariya uwempraiti. Nuka “túrurmainchu túraitjai” tíchamniaiti. Antsu Yusan enentáimtutsuk kúntuts pujakka ni enentái yapajíáshtatui; yapajítsuk ni tunaariya uwemtsuk jakattawai. <sup>11</sup> Tura iistarum; Yus wakerana nútiksarmek atumí kúntutsri katsuntearme. Tuma asarum wi áatjarmena nu esettsarum enentáimtusurme. Atumí túramuri ujatkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin péñker túrarmena nu, paant iniakmarme. <sup>12</sup> Kame yajauchin túramia nuna ni tunaarín iniaiat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnun in anearmena nu nekamarum tusan áatramjarme. <sup>13</sup> Atum umikiu asarum waraakrumin iisha shiir

enentáimji. Tura shiir itiaamarumna nuna Titiu waraak ujakamtai nú nan̄kaamas shiir waraaji. <sup>14</sup> Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun tímiaj nusha nekasauyi. <sup>15</sup> Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii péñker tati tusarum pachischarme. Tura nii taa seatmarma nu umikiurme. Títiuka nuna enentáimias waraawai. <sup>16</sup> Tura wikia, átum péñker túramurmin nekaan tura péñker túrawartatui tu enentáimsan waraajai.

## 8

### *Yus-shuarti ii kuitri súsatin*

<sup>1</sup> Yatsurtiram, Masetúnia núñkanmaya Yus-shuaran Yus waitnentainia nuna yamáí ujaktatjarne. <sup>2</sup> Ti itiurchatnum nekapsamu ainiawai. Túmayatan̄ warainiawai. Tura ti kuítríncha ániyatañ emeentutsuk kuítrinnia núnisañ suiniawai. <sup>3</sup> Juna wi paant nekaan ujaajrume. Niisha wakeramujaj̄i súsatniun jeainia nuna súniawai; tura nú nan̄kaamasha súniawai. <sup>4</sup> Yus-shuaran kuítrinchan súsartaitsa ti wakeruiniak, nu túratniun ti seatmarmaji. <sup>5</sup> Tura ii enentáimmiáj nú nan̄kaamas túrawarmiayi. Emka Yúsnum niñki sumamawarmiayi. Tura Yusa wakeramurj̄i túrat̄taji tusar incha “yáin̄tajrume” turammiaji. <sup>6</sup> Tuma asamtai, “Masetúnia nuñkanam kuit júuktin nan̄kamamamna nu, Kurintiu peprunmasha amukta” tusar Titiu seamiaji. <sup>7</sup> Atumsha ashí péñker túratin ti nékarme. Yus enentáimtustincha, unuiniartincha, ju nuñkanmaya nekaatniusha, in aneatniusha nuka ashí nékarme. Wats, jusha túratarum. Yus-shuar kuítrincha ainia nu achikiarat tusarum Titiu támatai núkap susatarum.

<sup>8</sup> Kame atumí úntr̄ia núnisnak akupeatsjarne, túratniuitrume tusan. Antsu chíkich shuar ni kuítr̄in susartasa ti wakeruinia nuna atumin ujakan, atumí anenkrattair̄i nekaspashi tusan nekapsatajtsa pujajai. <sup>9</sup> Ii uuntrī Jesukrístu waitnenkartutair̄i nékarme. Ashí takakuyayi, tura atumin anenma asa kuítrincha núnisañ ajasmiaiyi. Ju nuñkanam kuítrincha núnis ajasmatai átum nayaimpiniam kuítriniak tusa túramiaiyi.

<sup>10</sup> Juna enentáimjai. Nuik uwitin, “yáin̄tat̄ji” tíchamkarum. Tura nu túratin ti wakerimiarme. <sup>11</sup> Nan̄kamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. <sup>12</sup> Iistarum. Ni kuítr̄in Yúsan nekas susatajtsa wakerakuñkia, nii jeana nuna susat tusa Yus wakerawai. “Jeana nú nan̄kaamas susati” tátsui Yus.

<sup>13</sup> Chíkich ti núkap susarum atumnia táasat tusan tátsujai. <sup>14</sup> Antsu ashí métek takusarat tusan tajai. Iis atumsha yamaikia ti nukap takakrume; nujaj̄i atsuma nu súsatniuitrume. Ukunam chíkich tsawantaj̄i átum atsumashtarneash. Nuiñkia niisha atumin suramsarti. Nu túratin ákuñkia ashí métek takustin átatui. <sup>15</sup> Yusa Papirīin yaunchu áarman núnis tátsuk:

Núkap takusmia nu ampirchamiayi; tura ishichik takusmia nu atsumachmiayi.

### *Titiu chíkich Yus-shuarjaj̄i Kurintiunam wetin ármiayi*

<sup>16</sup> Tura wi aneajrumna núnisañ atumin aneatniun Yus Titiun susamiayi. Tuma asamtai Yúsan yuminsan pujajai. <sup>17</sup> Iis, wi takui wétinian wakerimiayi. Tura nú nan̄kaamas, atumin anenma asa, ni enentáij̄iañ wéawai.

<sup>18</sup> Tura chíkich Yus-shuar Titiujaj̄i akupkatajtsa pujajai. Nu shuar Yusa Chichamen ti pen̄ker etserainakui, ashí Yus-shuar iruntramunam nin péñker áujmatainiawai. <sup>19</sup> Tura nú shuarnaka ii tsaniakmar̄i atí tusar ashí Yus-shuar iruntramunam nuna anaikiarmiayi. Iij̄iañ kuítian jukiarti tusar anaikiarmiayi. Iis Yusa náar̄in ashí aents uunt nan̄janawarat tusar tura ashí shuar atumí tsan̄kar̄in nekaawarat tusar nu takat túratsjik.

<sup>20</sup> Iis, ju kuit ii jukittiajnia nu, núkap asamtai, aents tsanumprutmawaraj̄i tusar, Titiujaj̄i

tura jū shuarjaisha wéaji. <sup>21</sup> Yus ímmianumsha, aents ímmianumsha ii naka wekaajnia nuna nekaawarat tusar túraji.

<sup>22</sup> Nu jimiará shuarjai chíkich Yus-shuar akupeaji. Yusa takatrīn takastasa ti wakerarena nu nekas nékaji. Tura átum yáintin ti wakerarmena nuna nekáa niisha atumīin jeataj tusa ti wakerawai. Nuna túmak Yusa takatrīn takastinian wakerana nuna paant iniakmawai. <sup>23</sup> Tura aisha chíkich shuar Tituun nekaataitsar anintruiniakuisha, “Titu Papru tsaniakmarinti. Incha yáinmaktajtsa Páprujai takaawai” titiarum. Chíkich Yus-shuaran nekaataitsar anintruiniakuisha, “Yus-shuar akupkamu áiniawai, tura Kristu náarīn shiir awajin áiniawai” titiarum. <sup>24</sup> Tura atumí anenkrattairi ashí Yus-shuar nekaawarat tusarum, nu shuar péñker itiaatarum. Nu túrakrum, atumnia ii shiir tímiaj nu nekasaiti tu iniaktustatrume.

## 9

### *Yus-shuaran kuítrinchā súsarmia nu*

<sup>1-2</sup> Kame átum Yus-shuar kuítrincha súsatīn wakerarme; nuna nékajai. Tuma asan núnaka áatrachminiaitjarme. Atumsha súsatīn wakera asakrumin wi nunasha shiir enentáimsan, “Akaya nunkanmaya shuar nuik uwitīnia wakerusmatak yáintīnian wakeruiniawai” tusan Masetúnianmaya shuáran ujaajai. <sup>3</sup> Tura “kuítniasha súsatniun ti wakeruiniawai” tímiaj nuna, “wáitiaiti” tíarajīn tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. <sup>4</sup> Wi ukunam Masetúnianmaya shuarjai atumīin jean, kuit súsatīn tímiarmena nuna iwiarachman wáinkian natsarajīn tusan, tura atumsha natsarajīrum tusan túrajai. Warí, “súsatniun ti wakeruiniawai” tuke tu wéatsjak. <sup>5</sup> Nu tuma asamtai, au takui súarme tu enentáimsarajīn tusan jū Yus-shuaran emka akupenajai. Niisha nu kuítian iwiaratniun yáinmakarti, tajai. Nuiñkia wisha Masetúnianmaya shuarjai ukunam jeawakrin, nu kuit atumsha nekas atumí enentáijjaink<sup>i</sup> súsatīn wakerarmena nu nekaamnia átatui.

<sup>6</sup> Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete. <sup>7</sup> Tura ashí shuar ni enentáin enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai. <sup>8</sup> Ashí péñker ana nuna suramsatniun Yus tujintiatsui. Nujai átum atsumashtatrume. Tura chikichan yáintin núkap takustatrume. <sup>9</sup> Yus-Papinium jū aarma awai:

Kuítrinchan núkap susayi;

nuna tura, tuke túratin átatui.

<sup>10</sup> Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujai péñker túratarum tusa araakrumin ipiampartatui. <sup>11</sup> Tuma asamtai núkap juukma takaku asarum, núkap súsatīn jeattarme. Nuiñkia súarmena nuna ii uwejeyan chíkich Yus-shuar achikiar Yúsan yuminsartatui. <sup>12</sup> Warí, jū kuit Yus-shuar kuítrincha súakrin ni atsumamurīncha atsumachartatui. Tura nú nankaamas Yúsan ti yuminsartatui. <sup>13</sup> Nu shuar yáintai tusarum tura ashí Yus-shuar yáintai tusarum súatsrumek. Nujai Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarīn uunt awajsartatui. <sup>14</sup> Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsan áujturmasartatui. <sup>15</sup> jTura ashí iisha ii Yusri ti yuminsatniuitji! ¿In súramjinia nuna yaki jintíartīnian jeá?

## 10

*Papru nekas jintintiamniaiti*

<sup>1</sup> Wats, “Papru iijai pujak péechach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijiai juna seatjarum tusan pujajai. <sup>2</sup> Atumí weatkamuriya shuar chichainiak “Papru ni tsaniak-marijiai ju nunkanam akupin ajastai tusar wakeruiniak jintintiniawai” turutainia nuna kúishtumaktajtsan enentáimjai. Wisha atumiin jean kakaram chichaschataj tusan, nu antukairap tu seajrume. <sup>3</sup> Áentstańka nunkanmaya áentsuitji, túrasha jú áents maania aintsar máaniatsji. <sup>4</sup> Ju nunkanmaya nan kijiai máaniatsji antsu ii nan kirij Yusa kakarmarinti. Nujai iwianchi kakarmari núpeteaji. <sup>5</sup> Ju nunkanmaya aentsu jintiamurinkia tura waantu enentáimtumamurinkia, Yus nekaatniun itit awajea nuka, nu nan kijiai núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nan kijiai núpeteaji. <sup>6</sup> Nekas umirkatin átum jeawakrumninkia nuinkia umirkatniun tuke nakitiainia nu, Yusa kakarmarijiai asutiáttaji, tajai.

<sup>7</sup> Atumsha aya pátatek ana nu iiyarme. Wats, shuar nekas Krístunu ajasman neka-maka, núnisan winiasha Krístunuiti tu enentáimtursatniuiti. <sup>8</sup> Yusa kakarmarijiai akupeaji tuke tákuncha natsaamatsjai. Nu kakarman atumin péńker jintintiatarum tusa Kristu suramsaitji. Kame atumin emesratniun suramsachuitji. <sup>9</sup> “Ni áarmarijiai awaktamkatajtsa wakerutmaji” tátsurpash. Núchaiti. <sup>10</sup> “Papru áarmari ti kakaram áiniawai, tura juj pujak kakarmachuiti; tura etserkatniuncha nékatsui” turutainiawai. <sup>11</sup> Wats, tuinia nuka junasha nekaawarti. Yajá pujakur kakaram áajinia núnisrik atumjai pujakrishakakaram túrattaji.

<sup>12</sup> “Wiki imiá péńkeraitjai” tuinia nujai méteketji tátsuji. Ní shuaraitji tátsuji. Warí, niisha imia niniki nekapmamainiawai. Tura ni ai ísar “nu nan kaamas péńkeraitjai” tu wéenawai. Nuna túruiniak netse túruiniawai. <sup>13</sup> Antsu iikia, ii nekamatin jeajnia nú nan kaamas waantu ajaschattaji. Ii takastatjinia nuj Yus Niniki jintintramji. Nu arant wéatsji. Kame atumiin takastinian Yus tsan katramkaitji. <sup>14</sup> Tuma asamtai, tájinia nu Yus tsan katramka nú iniankas túratsji. Warí, iisha emka Kristu chichamejai atumiin jeachmakaj. “Emka jeamji” tájinia nu ántar tátsuji. Kame Yus tsan katramakrin jeamji. <sup>15</sup> Chíkich takasmanum iikia waantu enentáimtumasar, “ii takatrinti” tátsuji. Antsu yamá enentáimtarmenta nú nan kaamas Yus enentáimtustarum tusar wakeraji. Nu túrakrumninkia atumiin tuke takasminiaitji. <sup>16</sup> Nuyasha chíkich takaana nuj takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íiniuiti” tíchattaji.

<sup>17</sup> Tura péńker enentáimtumastaj tusa wakerakka, Yúsnaítjai tusa péńker enentáimtumasti. <sup>18</sup> Warí, niniki “péńkeraitjai” tumamna nuka anturkachminiaiti. Antsu Uunt “péńkeraiti” tana nú shuar nekas péńkeraiti.

## 11

### *Ántar etserniun Papru áujmateawai*

<sup>1</sup> Waurua núnisnak chichastatjana nu anturtukaintrumeash. Ee, anturtuktarum tusan seajrume. <sup>2</sup> Atumniasha Krístunak anajmamtikrajrume. Tura nuwa chíkich áishman kan nékatsuk ni áishrijaink' nuatnaiya núnisrumek átum chikicha chichame umirtsuk aya ni chichamenk' umiakrumin Krístu íjetaj tusan wakerajrume. Nuna túrataj tusan atumin akasmatajrume. Nu akasmaktinian Yus surusuiti. <sup>3</sup> Túrasha íwianch ni nekatairijiai emka nuwa Epan anańkamia nútiksan atumniasha Yusa jintiya awajimtikramar Kristu aneashtinian enentáimtikramprarmatai anańkamu ajrum tusan tsuutajrume. <sup>4</sup> Warí, chíkich shuar Jesusnan nusháa étserkamujai táiniakuisha péńker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume. <sup>5</sup> Kame “Yúsnumia akatramu asar etserkatin imiá nékaitji” tuinia nujai

nañkaamas nékaitjai, tu enentáimjai. <sup>6</sup> Ti péñker chichastinian nékachiatnak winia nekaatairsha taamtsui. Núnaka ii túramurijjai tuke paant iniakmaji.

<sup>7</sup> “Akirkata” tútsuk Yus-Chichaman atumin ujakmajrumna nui ¿tunáa túrajak? Átum ankant ajastarum tusan wikia péejchach ajasu asan, “etserkamunam akirkata” tíchamjarme. <sup>8</sup> Antsu atumin yáintaj tusan pujakun chíkich Yus-shuarnumiá kuítian suruiniakui achikmiajai. Nuna túran ni kuítrín emeentukmiajai. <sup>9</sup> Tura atumjai pujusan atsumaknasha atumniaka seachjarme. Masetúnianmaya Yus-shuar taar, wi atsummiajna nuna surusarmiayi. Nu tuma asamtai tájarme, seachjarme tura seashtatjarme. <sup>10</sup> Ashí Akaya nunkanam nuna ujaktinian suritrukchartatui. Nuna tákun Kristu nekasrijjai tajai. <sup>11</sup> ¿Urukamtai nuna taja? ¿Atumin aneachu asanak taja? Atsá. Aneajrumna nuna Yus nékawai.

<sup>12</sup> Túrasha wi túrajna nuna tuke turu wétatjai. “Papru túrana núnisrik túraji” tuinia nuna tíarain tusan túrattajai. <sup>13</sup> Warí, niisha Yúsnumiá akatrachma ániawai. Anankartin ániawai. “Kristu akatramurintji” tumá átaj tusar wekainiawai. <sup>14</sup> Nusha urukaku túmait tíchamniaiti. Warí, imia Satanáskesha “nayaimpinmaya akatramuitjai” tumá átaj tusa wekaatsuk. <sup>15</sup> Nuñkia imia ni suntarisha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujai métek nekapmá asutiátin átatui.

### *Papru wáitsamia nu*

<sup>16</sup> Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsankatruktarum. Ishichik waantu enentáimtumastaj tusan wakerajai. <sup>17</sup> Tura waantu enentáimtumastaj tájana nu, Unta tsankatramurijjai tátsujai. Antsu waurka núnisnak chichaajai. <sup>18</sup> Untsurí ju nunkanam uunt ajarar ti waantu enentáimtumainiakui wisha ishichik waantu enentáimtumastatjai. <sup>19</sup> Imiá nékayatrum waurka ainia nu shiir enentáimtusrum ánturearme. <sup>20</sup> Niisha atumin takantikramainiakui, kasartamainiakui, atumí nérenniuri ajainiakui, yajauch chichartamainiakui, yapimin awattamainiakui ashí nu katsuntearme. <sup>21</sup> Natsamayatnak tájarme jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.) <sup>22</sup> Niisha Ipríu-shuar ániakuisha wisha núnisnak Ipríu-shuaraitjai. Israer-shuar ániakuisha wisha núnisnak Israer-shuaraitjai. Apráma weeatrú ániakuisha pai, wisha núnisnak. <sup>23</sup> Kristu takarniurintji, tuiniawai. Wikia aujai nañkaamasaitjai. Kame nuna tákun waurka núnisnak chichaajai. Kame nijjai nañkaamas takasuitjai; nijjai nañkaamas asutiámuitjai; nijjai nañkaamas sepunam enkeamuitjai; ti núkap jániñkiamjai. <sup>24</sup> Israer-shuar chikichkí achirkacharmai. Antsu tímiajni senku jea achirkarmai. Tura emka achirkarmia nui awa-awatatqua trainta nuiwi ejeyarmiayi. Tura nu tímiajni senku jea achirkarmia nuisha nútiksán nujai métek awatturarmiayi. <sup>25</sup> Numijjai menaintiú awatturarmai. Kayajajisha mantuatai tusar chikichkí tukurarmai, kanusha menaintiú wayamai wi enkempran wekaimiaj nui. Tura nayaantsanam ajapén chikichik kashi nui pujusan tsawarmajai tura nu tsawantcha tuke pujusmajai. <sup>26</sup> Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaisha, wí shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajustaj tusar wakeriarmai. <sup>27</sup> Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekruí wáitsaitjai.

<sup>28</sup> Tura nuna nañkaamas, kaarka kijin júkitniua núnisnak Yus-shuar péñker wekaini-awash tusan ashí tsawant ti enentáimsan pujajai. <sup>29</sup> Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanum ajuawarmatainkia

wisha natsamakun kajekan wáitijai. <sup>30</sup> Maa, waantu chichastin ákuinkia, antsu winia kakarmachu awajtuinia nuna ujakan waantu ajasaintjai. <sup>31</sup> Yus, ii Uuntrj Jesukristu Aparj ana nu (ni naari tuke shiir awajsamu atí) wi wáitratsjana nuna nékawai. <sup>32</sup> Tamasku péprunam pujaj nu nunkanmaya akupin winia jinkia juruktiaj tusa wakerak pepru tanish téntakma wáitirijn suntaran apujсамиayi. Aretas uunt kapitián pujaj túramiayi. <sup>33</sup> Túrasha uunt chankinnium enketawar pepru aa tanishrj áankamunam jiki itiararmiayi. Tu uwempramijai.

## 12

### *Papru wáinkiamia nu*

<sup>1</sup> Kame wiki shiir chicharmamsatniun nakitijai. Túmayatnak ímiarjana nuna tura uunt Yus iniaktursamia nuna ujaktinaitjarme. <sup>2</sup> Krístun umirin ana nú áishman kan nékajai. Nu áishman jimiará nayaimpin nan kaikin menaintiú nayaimpiniam junakniuiti. Nusha katurse uwí nan kaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. <sup>3</sup> Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. <sup>4</sup> Yushuara wakaní shiir pujutainium junakmiayi. Nuisha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. <sup>5</sup> Nu áishman ka túrunamurj nan kaamakuiti tajai. Tura wikia nan kaamakuitjai túmamtsuk, kakarmachuitjiana nuna paant ujaajai. <sup>6</sup> Nan kaamakuitjai túmamtiaj tusan wakeraknaka nekas tímniaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujaj métek enentáimtursatarum tusan wakerajai.

<sup>7</sup> Wi nayaimpiniam wáinkiamajna nu timiá pénger asamtai ántar waantu enentáimtumaschatniun, jan ki mesertinia núnisan winia ayashruj najaimiatniun sunasmiajai. Nuka wi wáitsatin Satanásnumia akupkamuiti. <sup>8</sup> Nuka jurutkia tusan Úuntan menaintiú seamjai. <sup>9</sup> Tuma aiñ Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashijn winia kakarmarun wáiniainiawai.” Tuma asamtai, Kristu kakarmarj winia ayashruj paant ati tusan kakarmachuitiatnak araantatsjai. <sup>10</sup> Tuma asamtai, wi Krístun anekui shuar katsekruiakuisha, kajertuiniakuisha, winia kuítrusha, kakarmarsha atsain waraajai. Kame ashí itiurchat ana nu kakarmachuitiatnak kakaram nekapeajai.

<sup>11</sup> Wi “péngeraitjai” túmankun waurua núnisnak chichaajai. Tura atumsha winia pénger chichartusminiatratrumek, túrachu asakrumin tu chichasjai. Warí, wi péngé ántraiatnak, “ti pénger akatramuitji” tumamainia nú nun kaachichuitjai. <sup>12</sup> Atumjai pujumiaj nu, itiurchat ámanman katsuntran takasmiajai. Yuska ni kakarmarj iniakmastaj tusa ti uuntan aents tujintiamun túratniun surusmiayi. Nujaj “Papru nekas winia akatramuruiti” tusa paant iniakmasmiayi. <sup>13</sup> Warí, chíkich Yus-shuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarme. ¡Nu yajauchiitkiunkia tsankurturatum!

### *Papru atak tátinrjn ujakmiania nu*

<sup>14</sup> Jújainkia menaintiú iwiarnarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuítrjn wakeratsjai. Antsu atumin wakerajrume. Warí, winia uchirchakaitrum. Uchisha aparj kuítian ikiauntukchatniuiti. Antsu aparj ni uchirjn kuítian ikiauntuktiniaiti. <sup>15</sup> Atumniasha yáintaj tusan ashí takakjana juna ajapawaintjai, tura winia kakarmarnasha ashí emenkákaintjai. Wi ti wakeramaitiatrum átumka ishichik wakerutarminj túrawaintjai.

<sup>16</sup> Túrasha chíkich shuar chichainiak “Nekasaiti; Papru nin̄ki ii kuítr̄in jurutramkich-maji. Túrasha anan̄kartuatniun neka asa in anan̄kramachmiasha” turutainiatsuk. <sup>17</sup> ¿Nusha itiura? ¿Shuáran wi akupkamaj nujaj̄i kuítr̄umin achikjak? <sup>18</sup> Atumin írmasat tusan Titiun “wetá” tímiajai. Tura nin atampr̄it tusan chíkich Yus-shuaran akupkamjai. ¿Titiusha kuítr̄umin juruttramkimkiarum? ¿Wisha niisha mai metek enentáimsar métek takaschamkaj̄i?

<sup>19</sup> ¿Warí enentáimsarum? ¿Átum péñker áiniawai turutik tusar nu tájik? Antsu, aneamu yatsurtiram, ii tájinia nu atumin Yúsnum ikiakártajrum tusar taji. <sup>20</sup> Wi atum̄in jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrum, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, nin̄ki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai. <sup>21</sup> Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsur̄i shuurtiram iniaisachurmena nuna nekashtajash. Tura enentáim yapaj̄itsuk tuke tura asakrumin útchatjash taji. Kame wi átum umikchamun nekaamtai Yus winia iniatsátrattawai tusan tsúumajai.

### 13

<sup>1</sup> Jujaj̄i menaintiú ístajrum tusan winiajai. Ashí iwiaratin ana nu, jimiará tura menaintiú shuara chichamejaj̄i iwiarnartatui. <sup>2</sup> Wi atum̄jaj̄i pujachiatnak, atum̄jaj̄i pujáa núnisnak áatjarne. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarne, wi atak tana tunaarum iwiareachkurminkia iniaisashtatjarne. <sup>3</sup> Nuin̄kia wi Kristu kakarmarij̄ijaj̄i chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atum̄í enentáin kakaram takaawai. <sup>4</sup> Kristu nekas kakarmachua nútiks̄an krúsnum máamuitiat, Yusa kakarmarij̄ijaj̄i iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmarij̄ijaj̄i ni takatr̄i takaaji. Nu atumin iniakmstatji.

<sup>5</sup> “Nekas Yús̄an umirniushitiaj̄i” tusarum nekamatarum. Ímiastarum. Ántar Yus-shuarchaitkiurmeka Jesukrístu atum̄í enentáin pujurtama nu nekaattarme. <sup>6</sup> Tura iikia ántar Yus-shuarchaitji nu nekaatarum tusan wakerajai. <sup>7</sup> Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar áiniawai” túramprin̄, átum péñker wekasatarum tusar wakeraji. <sup>8</sup> Warí, Yusa nekas chichame emesratin tujintiaji. Antsu ii túrajnia nu Yusa nekas chichamejaj̄i túrajai. <sup>9</sup> Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. <sup>10</sup> Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atum̄in jeaknaka kakaram chicharkaj̄ijrum tusan winitsuk ju papin áatjarne.

#### *Amikmaawai*

<sup>11</sup> Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikrampr̄arti. Chikichík enentáik enentáimsatarum. Shiir awajnisarum pujustarum. Tura Yus anenmarmena nu, shiir enentáimtikramna nu atum̄jaj̄i pujurtamsattarme. <sup>12</sup> Yúsnum shiir enentáimtunaisrum amikmaanaisatarum. <sup>13</sup> Ashí Yus-shuar ainia nu amikmaatmarme. <sup>14</sup> Uunt Jesukrístu waitnenkartutair̄i, Yusa anenkrattair̄isha atum̄in pujurtamsati. Tura Yusa Wakan̄isha tuke nemartamsarti. Nu atí.



## Papru KARASEANMAYA SHUARAN Papí aar akuptukma

### *Karaseamaya Yus-shuaran Papru áatramiania nu*

<sup>1</sup> Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nun̄ki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun. <sup>2</sup> Wissha, ashí Yus-shuar wijīaj̄i pujuinia nusha, ju papí akupeaji. Ashí Yus-shuar Karasea nun̄kanam pujarmena nu áujsatarum tusan ju papin akuptajrume.

<sup>3</sup> Yus Apa tura ii Uuntrī Jesukrístusha waitnentramainia ásar yainmakarti imiatkinchanum tuke shiir pujustinian. <sup>4</sup> Yus ii Aparī nuna wakera asamtai, Jesus ni ayash̄in surumak wáitsamiayi ii tunaarī asakártinian. Nuna tura ashí tunáa ju nun̄kanam ana nuyá an̄kant awajtamatai tusa in yáinmaji. <sup>5</sup> Tuma asamtai tuke Yus shiir atí. Ayu.

### *Chíkich uwempratin chichamka atsawai*

<sup>6</sup> Maa, nekasaash timiá wárik Yus ikiukmiarum. Kristu in ti anenma asamtai Yus ni shuarī ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum. <sup>7</sup> Wátsek, nekas chíkich chicham pen̄ké atsawai shuar umikiar uwempratin. Antsu yajayā shuar atum̄in̄ taar pen̄kercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. <sup>8</sup> Tuma asamtai Yus nin yajauchiniam yum̄in̄krattawai. Wissha Yus-Chicham yapajiámun etserkamtāin̄kia Yus winia yum̄in̄krurtatui. Nayaimpinmaya suntarsha nusháa chichaman wi etserkachmaj nuna étserkūin̄kia nunsha yum̄in̄krattawai. <sup>9</sup> Paant ujakjarne túmaitiatnak ataksha ujaajrume: Nán̄kamas shuar ni-isháa uwempratin chichaman, wi etserkachmaj nuna étserkūin̄kia Yus yum̄in̄krattawai.

<sup>10</sup> Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

### *Papru júnis Yus akatramu ajasmiayi*

<sup>11</sup> Antsu nekaatarum, yatsuru. Uwempratin chichaman wi étserjana nuka áentsnumīanchuiti. <sup>12</sup> Aentska ujatkachmai. Unuitiutnasha unuitiurchamai. Antsu Jesukrístuk winia paant jintintruamai.

<sup>13</sup> Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wissha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. <sup>14</sup> Tura kakaram ajasan, ii uuntrī yaunchu tiarmia nuna yawetsuk umiktinian ti enentáimpramjai. Tura untsur̄i shuaran wijīaj̄i métek uunt armia nuna nan̄kaamas Yúsnan takasmajai. Túmaitiatan aya winia únun̄trun chichamen ti umirniuyajai. <sup>15</sup> Túrashá wikia akiintsaīn̄ Yus winia achirkamiayi, tura ti anen̄kratmarijīaj̄i winia anaitiukmiayi. <sup>16</sup> Nuikia shiir enentáimiuk ni Uchir̄in̄ paant nekantikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. <sup>17</sup> Uunt péprunmasha, Jerusarén̄numka, wéchamjai winí emkaru Yus akatramujaī chichastinian. Antsu wárik Arapia nun̄kanam wémajai. Tura nūj̄i Yúsán enentáimtasuan atak Tamasku péprunam waketkimjai. <sup>18</sup> Tura menaintiú uwí nan̄kaamasmatai, nuyá Pítrujaī áujmattsataj tusan Jerusarén̄num jeamjai. Tura jimiará semanachik pujusmajai Pítrujai. <sup>19</sup> Tura

Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai. <sup>20</sup> Yus iirui. Wi tájana nu nekasaiti, wáitchaiti.

<sup>21</sup> Nú ukunmasha Siria nunkanmasha, Sirisia nunkanmasha wémajai. <sup>22</sup> Tuma asamtai ashí Yus-shuar Jutía nunkanam pujuarmia nu winia nekaracharmai. <sup>23</sup> Aya antukarmai. “Yaunchu in ti áintrammiay nu yamaikia Yus-Chichaman étseruk wekaawai. Yáunchuka in amutmaktinian wakeriniaitiat yamaikia iniaisaiti” tiarmai. <sup>24</sup> Túrawar winia enentáimtursar Yúsan shiir yumĩnsarmai.

## 2

### *Chíkich Yus akatramu Paprun shiir enentáimtuiniawai*

<sup>1</sup> Tura katurse uwí nankaamasmatai wisha Pírnápíjjai Jerusarénum wémajai. Titiuncha jukimjai wijjai. <sup>2</sup> Yus akupta asamtai Jerusarénum wémajai. Tura nuí jean aya Yus-shuara úuntriíjain áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aĩn tusan tu áujmattsamjai. <sup>3</sup> Niisha Yus-shuara úuntriĩntiat itiurchat enentáimpracharmai. Antsu chíkich shuarka Titiu Israer-shuarchaitiat wijjai pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai. <sup>4</sup> Tura nu shuar ántar yachi áiniak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. <sup>5</sup> Túrasha penké ishichk-isha umikchamji. Antsu atumĩn Yus-Chicham yapajniátsuk métek jeartamat tusar ni chichame penké anturkachmajai. <sup>6</sup> Nu arantcha Yus akatramu uuntriĩkia yamaram túratniunka suruscharmajai. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuaran mash métek iyatsuk. <sup>7</sup> Yus akatramu uuntriisha Yus winia Israer-shuarchan Yus-chicham ujaktinian akuptukma nuna nekarawarmajai. Tura Pítruncha akupkamai Israer-shuaran Yus-Chicham ujaktinian. <sup>8</sup> Pítrun Israer-shuarnum akupkama nú Yusak winiasha akuptukmai Israer-shuarchanum. <sup>9</sup> Tuma asamtai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pírnápínsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar. <sup>10</sup> Áyatik “Kuĩtrincha enentáimtusum tuke yáĩntarum” tiarmai. Wisha núnaka ti wakerakun tuke túriniaitjai.

### *Papru Pítrun chicharkamai*

<sup>11</sup> Tura nú ukunam wi Antiukía péprunam pujain Pítiur tamai. Tura nuí yajauch túramtai, Yus-shuara úuntriĩniak chicharkamjai. <sup>12</sup> Iis, Israer-shuar tuiniawai, “Israer-shuarcha Muisais timia núnisan tsupirnakcha asamtai, nu shuarjai yurumáshtiniaiti” tuiniawai. Túmaitiat Pítiur yurumámnian nékak, emka Sántiak shuar táatsain Israer-shuarchajai yurumámai. Tura nuyá Sántiak shuar Jerusarénumiá Antiukíanam jeawarmatai Pítiur ashamak tsupirnakcha shuarnumiá kanakin yurumáchmai. “Tsupirnaktini-aitme” tiniu ainia nuna ashamak túramai.

<sup>13</sup> Tuma asamtai chíkich Yus-shuar, Israer-shuar armia nu, Pítrujai métek emka yurumáwaru áiniayat jimiará enentai takusar ukunam iniaisarmajai. Pírnápísha neka áyat nútiksai nupetnakmai. <sup>14</sup> Tura nuna íisan ashí íimiainiaĩn Pítrun chicharkamjai. Yus Shiir Chicham tana nujai métek wekasachu ásarmatai tímiajai “Ame Israer-shuaraitiatam Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijjai métek wekasatin áiniawai” tiip” tímiajai.

*Israer-shuarsha Israer-shuarchasha mai métek Yúsan enentáimtusar uwemprartatui*

<sup>15</sup> Iikia nekas Israer-shuaraitji. Israer-shuarcha, tunáa ainia áaniuchuitji. <sup>16</sup> Túmaitiatar ju nékaji. Akupkamu umíamujai uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujai péñker ajaschattaji. Akupkamunka shuar umiktaj táyat, chikichkí shuarkesha nujai péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar. <sup>17</sup> Tura Israer-shuar enentáimprashimpiash, “Wátsek, núnisaitkiuin<sup>ñ</sup>kia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashiniaiti. <sup>18</sup> Antsu yaunchu, wi túrashtiniaitjai tímiaj nuna awain<sup>ñ</sup>kin túratniuitjai tákunka nuikia nekas tunaitjai. <sup>19</sup> Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjai iwiaaku pujajai ni wakera nuna umiktinian. <sup>20</sup> Wisha Krístujai krúsnum jákaitjai. Tuma asamtai yamaikia wikia iwiaaksujai wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. <sup>21</sup> Yus ti péñker asamtai itiurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuin<sup>ñ</sup>kia, nuikia Kristu ántar jákaayi.

### 3

*Yus akupkamu tura Yus enentáimtustin*

<sup>1</sup> ¿Warin<sup>ñ</sup> aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktushamkarum? <sup>2</sup> Wátsek, aniasatjarme, enentáimpratarum. ¿Warijjain<sup>ñ</sup> Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram? <sup>3</sup> ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijjain<sup>ñ</sup> umiktin enentáimprarmek. <sup>4</sup> Penké ántrarmek wáitsamarum tura antsu ishichkisha unuimiarchamkarum? <sup>5</sup> Naka enentáimpratarum. Yus ni Wakanín súrantsuk tura aents túrachminian atumíin ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

<sup>6</sup> Yaunchu ii uuntri Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, péñkeraitme” tímiayi” tawai.

<sup>7</sup> Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchiría áintsan<sup>ñ</sup> ajasaru áiniawai. <sup>8</sup> Yamái páantaiti. Yus ashí Israer-shuarchancha tawai “Aya winia enentáimtursarum péñker átatrume”. Israer-shuarchasha nujai péñker ajastinia nuna ti yaunchu neka asa, Apraáman ujakmiayi,

“Ámijjai ashí aents ti shiir ajasartatui.”

Tu ujakmiayi. <sup>9</sup> Tuma asamtai ashí shuar Yúsan enentáimtuinia nuke Apraámjai métek péñker ajasar shiir warasartatui.

<sup>10</sup> Antsu ashí shuar “akupkamun umirkan uwemprattajai” tuinia nuka yajauchiniam yumíñkramu áiniawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajauchiniam yumíñkramu áiniawai.” Tu áarmaiti.

<sup>11</sup> Nújain<sup>ñ</sup>kia páantaiti. Akupkamu umirkatniujai péñker ajaschamniaiti Yusjai, antsu aya Yus enentáimtusam péñker ajasam uwemprattame. <sup>12</sup> Shuar akupkamu umirkatniun

enentáimna nuka aya nujai péñker ajastinian enentáimiui; Yúsan enentáimtak péñker ajastinian enentáimtsui.

<sup>13</sup> Tura Kristu yamaikia uwemtikrampramji. Akupkamun umirkachu yuminkramuiti tana nuka in túramtsuji. Antsu Kristu in yainmaktin krúsnum jaka yuminkramu ajasmiayi. Kame áarmaiti:

Shuar jakati tusa numiniam nenasma yuminkramuiti.

<sup>14</sup> Tuma asamtai Jesukrístu jakamujai ashí Israer-shuarchasha Apraámjai métek péñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

### *Yus akupkamu tura Yus túrattana nu anajmarma*

<sup>15-16</sup> Iis, yatsuru, Yus Apraáman Chichaman najana anajmatuk,

“Ámijjai tura amée weeá akiinkiattana nujaisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nukia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti.

<sup>17</sup> Wátsek, Yus núnisan Chichaman Apraámjai najana, ukunam umitsuk iniaisachmini-aiti. Tura Chichaman najanamia nú ukunam, kuaru sianu nuyá trainta (430) uwi nankaasmatai, Yus ni akupkamurin Muisaisan susamiayi. Túramaitiat nujai Yusa yaunchu Chichamen yapajiáchmiayi iniaisatniun. <sup>18</sup> Tuma asamtai Yus timia nuka tuke uminkiattawai, Yus yaunchu Apraámjai Chichaman najana asamtai. Nújainkia páantaiti, péñker ajastajtsar akupkamu umikrikia shiir pujuschartatji antsu Yus timia nujai iikia takatsuk shiir pujustatji. Nuna tsankatkamiayi Yus Apraámjai Chichaman najaneak.

<sup>19</sup> “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsain Yus tímía nu uminkiachminiuyayi. Tuma asamtai nii táatsain ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari ju akupkamun ashí iwiarar Muisaisan susar akatrarmiyai Israer-shuaran susárti tusar.

<sup>20</sup> Antsu chikichik shuar ninki takastinian enentáimkiunka chikichan atsumatsui. Tura Yus aya chikichkiiti. Ninki chikichan akattsuk ashí aentsun Apraámjai péñker awajsatniun Apraáma anajmatar nijjai Chichaman najanamiayi.

### *Yus akupkamu itiúrkátin*

<sup>21</sup> “¿Tura Yus jimiará chichamjai chichaawak, tíchaintmeash. Emka Apraáman “Jujai uwemprattame” tíchamkia, nuyá Muisaisan ni akupkamurin súsachmakia?” tíchaintmeash.

Tura áintsachuiti. Nekaata, akupkamu umirkatniujai Yusjai tuke péñker pujusmini-aitkiunka nuyá aya akupkamujai uwempram tunaajainchu ajasaintme. <sup>22</sup> Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timiá asamtai, uwemprartatui. <sup>23</sup> Tura Kristu táatsain Nin enentáimtusochamniauyayi. Tuma asamtai Nii táatsain akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji. <sup>24</sup> Akupkamu, nuika, in waitmakmaji uchin kuírchin wainnia áintsan. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsjai péñker áiniawai. <sup>25</sup> Yamái Kristu nekas enentáimtustiniaiti tuma asamtai yamaikia akupkamu kuirchia áintsan wáitmatsji. <sup>26</sup> Antsu Jesukrístu enentáimtusar, nujai Yusa uchirí úuntmaru ajasuitji. <sup>27</sup> Ashí Kristu náariin imiaimiu-tirmeka Kristu áintsan ajasuitrume. <sup>28</sup> Jesukrístujai tsaninkiu asarí imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwá, ashí mash Jesukrístunuitkiunka yamaikia “niishaaiti” tu enentáimprashtiniaiti. Ni shuari mash chikichik áinijai. <sup>29</sup> Tura Krístunuitkiurmeka Apraám weeá áintsan ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

## 4

<sup>1</sup> Kuítrinniu uchirí ashí ni aparí takakna nuna niiniu áhattawak ukunam. Tura uchichitkiunka ni aparí takarniuriya núkete. <sup>2</sup> Tuke uunt ajatsuk ni wáinnia nuna umirkatniuíti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuíti. <sup>3</sup> Núnisrik iisha úchichik asarkia ashí aentsu akupkamurí umirkatni-  
uji. <sup>4</sup> Tura tsawant jeamtai, Yus ni Uchirín akupkamiayi ju nunkanam. Niisha Yúsaitiat nuwanam akiiniamiayi. Tura aents ajasmiayi. Tura aents ajas yaunchu akupkamuncha umirkatniuyayi. <sup>5</sup> Nujai ashí aents akupkamun umirkatin armia nuna uwemtikrataj tusa támiayi. Tura iisha yamaikia nujai ni uchirí uunt ajasminiaitji. <sup>6</sup> Atumsha nekas ni uchirí ajasakrumin Yus ni Uchirí Wakanín atumi enentáin akupturmakuiti. Tura nu Wakan atumí enentáiyá Yúsan “Aparú” tawai. <sup>7</sup> Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Krístuiyan.

*Papru nu Yus-shuaran yáintinian wakerawai*

<sup>8</sup> Yaunchu átum nekas Yus nékachkuram, ántar-yus írunna nu umirkamarme nekascha yúsak. <sup>9</sup> Tura yamaikia nekas Yus nékarme, kame Yus atumin nekarmarme. Núnis asamtai itiuurtsuk atak aentsu akupkamurí umirkatin enentáimprum. Nujai kakaram ajaschamniaitme tura umikmesha yainmakchattawai uwempratin. <sup>10</sup> Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum. <sup>11</sup> Ashamajai, atumíin ántankeash takasmaj tusan. <sup>12</sup> Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuí pujakui ishichiksha yajauch awaj-tuschamarme. <sup>13</sup> Antsu nekarmarme ayashruí itiuurchat pujayatan Yusa shiir chichamen emka ujakmajrume. <sup>14</sup> Tura winia sunkur ti yajauch awajtain atum winia nakitrurum muírukchamarme, antsu Yusa suntaríá áintsarmek itiamarmarme. Jesukrístu anturkat-niua áintsarum anturtukmarme. <sup>15</sup> Maa, wi nékajai, nuik atumí jiiimi ukuinkiarum surusaarme, túramniaitkiurmeka. Tura shiir enentáimpramarmena nusha itiuurtsukait yamaisha. <sup>16</sup> Yamaikia nekas chichaman étserkun ¿atumí nemasrj ajasjak? <sup>17</sup> Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusar. <sup>18</sup> Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjai pujainsha tura pujatsainsha. <sup>19</sup> Uchirú, nuwa jurertaj tana núnisnak ataksha wáitijai Kristu atumíin paant atí tusan. <sup>20</sup> Atumjai pujaknaka maak aintjai. Yamái pujaknaka nekas nusháa chichasaintjarme. Itiuurkatjarmetsuk nékatsjai.

*Akarsha, Sarasha jimiará Chichaman nakumainiawai*

<sup>21</sup> Ayu, “akupkamu umirkatniuíti” támena nu nekaata; akupkamuka júnisaiti. <sup>22-23</sup> Aarma awai: Apraám jimiará uchirtiniuyayi. Emka ni takarniurj jurermiayi Ismaeran. Nuyá Apraáma nuwe jurermiayi Isakan. Ismaera nukurj Apraáma takarni-  
uriyayi. Tura Apraám Yusan enentáimtutsuk niijjai kanarmatai, ni takarniurj jurermi-  
ayi. Tura antsu Isaka nukurínkia takarniurinchuyayi, antsu nekas ni nuwe áuyayi. Niisha ti úuntchiniak, Yus “jurertatme’ tímiayi. Tuma asamtai Yus timiajai Isakan jurermiayi. <sup>24</sup> Ayu. Yamái tájana nuka Yusa Chichamen jimiaran nakumui. Ismaera nukurj Akar chikichik Chichaman nakumui. Yaunchu Senái muranam Yus ni akupka-  
murín áarmiayi Israer-shuar, takarniua áintsan, umirkarti tusa. <sup>25</sup> Senái murasha Akara nunke Arapiyanam wajaawai. Akarsha Senái muran nakumak, ashí Israer-shuaran “Akupkamujai uwempramniaiti” tuinia nuna nakumui. Yamaisha Israer-shuara uun-  
trj Jerusarénum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. <sup>26</sup> Antsu ashí Yus-shuarti uwempra asar imiankas ankant pujaji. Nayaimpinmaya

Jerusarénnumiá áentsuitji. Nuyá áentsti tuke ankant pujuiniaji. Nuyá aents asakrin, nu yakiya Jerusarénka ii nukuríá áintsan enentáimpramniaiti. <sup>27</sup> Junis áarmaiti:

Warasta, misurma, uchi takakchiatmek;

Ti shiir warasta, uchí najawę nékachiatmek.

Nuwa ajapamu uchin jurertatui;

Nuwa áishrinniua núnaka nankaamas uchirtin átatui.

<sup>28</sup> Iisha, yatsuru, Isaka áintsarí, Yus timiajai akiiniaitji. <sup>29</sup> Yaunchu Ismaer Isakan kajerak iturchat awajsamiayi. Núnisan yamaisha Ismaera áintsan aya ayashnumiá ainia nú aents Yusa Wakaníya akiinia nuna yajauch awajenawai. <sup>30</sup> Tura Yus-Papinium áarmaiti:

“Takarniusha, ni uchiríjiai, ajapam awemata. Nekas péñker nuwa uchiríjiai tsanin pujuschamniaiti. Aparí kuítríncha achikchamniaiti,” tawai Yus-Papí.

<sup>31</sup> Ayu, yatsuru, nekaatarum. Takarniu uchirínchuitji antsu ankant pujaji nekas péñker nuwa uchirí asarí.

## 5

### *Yusjai tuke ankant atarum*

<sup>1</sup> Kristu uwentikrampramiaji tuke ankant átinian. Tuma asamtai kakaram ajasam tuke ankant pujustá. Ataksha nu iturchatnum waketkip.

<sup>2</sup> Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí iturtamkamniait? <sup>3</sup> Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti. <sup>4</sup> Atum “Akupkamu umiakmin Yus shiir enentáimturmastatui” tárumna nu, nu shuartiram Krístuiya tupanniuitrume. Yusa anenkrattairiya kanakniurme. <sup>5</sup> Iikia, antsu, Yusa Wakaníjiai tura Yus enentáimtakrin Yus shiir enentáimturmatatji, tu enentáimji. <sup>6</sup> Nekas Krístunuitkiurkia tsupirnakrin atsumatsji. Antsu aya Yus nekas enentáimtakur ashí anenaitniuitji.

<sup>7</sup> Atumsha Krístujai péñker wekaimiarme. ¿Urukantai nekas Yus timia nu iniaisatin enentáimprum ataksha akupkamunam waketkitin? <sup>8</sup> Nú enentai Yúsaiyanchuiti. Niijiai wekasatniunka Yus achirmakuitrume. <sup>9</sup> Ju enentáimpratarum: Karía ishichik yuminium enketam mashí karimtiktsuk. Aneartarum atumsha. <sup>10</sup> Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

<sup>11</sup> Wíkiá, yatsuru, yamaisha “tsupirnakriniaiti” tuke tákuñkia Israer-shuar yajauch awajtuscharainti. Antsu Kristu jakamun étsereatnak “tsupirnakriniaiti” tákuñkia kajertukcharainti. <sup>12</sup> Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

<sup>13</sup> Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. <sup>14</sup> Ju chichamjai ashí akupkamu mash uminkiatstawai: Ame ayashim aneamna áintsamek chíkich shuarsha aneata. <sup>15</sup> Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

### *Ayash wakeramu tura Yusa Wakaní wakeramu*

<sup>16</sup> Juna tájarne: Atumí ayashi wakerana nu umikíajj tusarum Yusa Wakaní kakarmarijiai wekasatarum. <sup>17</sup> Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiamé. Páantchakait. <sup>18</sup> Tura Yusa Wakaní jintinramkuñkia, aentsu akupkamurijiai itit áchattame.

<sup>19</sup> Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin, <sup>20</sup> ántar-yus ainia nu tikishmatratin, wawekratatin, nemasnaikiatin,

katsumnaikiatin, akasmaktin, wari kajektin, nan̄kaamantu enentáimtumastin, aya ni-  
isháa niisháa enentáimsartin, níiniunak ístin,<sup>21</sup> yajauch enentáimtunaistin, man̄kartuatin,  
nampektin, nampernum aya ti yurumin, tura ti nampen átin. Chíkich nujaj métek  
áiniawai. Nuik ujakmajrumna núnisnak ataksha tájarne: Shuar nuna túrakka Yusaj  
pujustinian pen̄ké tujinkiattawai.

<sup>22</sup> Ayu, yamaikia Yusa Wakaní kakarmaríjjaj túratin enentáimsatai. Yusa Wakaní ii  
enentáin pujak, pen̄ker túratniun nerektinia áintsan̄ neremtikramji. Ju áiniawai: aneatin,  
shiir enentáimsatin, Yusaj tura shuarjaj nawamnaikiar wekasatin, shiir enentáíjjaj  
katsuntratin, chíkich shuar shiir awajsatin, tsan̄ka átin, tana nuna tímiatrusan̄ umiktin,  
<sup>23</sup> péejchach ajastin, iik ímiasar tunáa túrashtin. ¿Ju túratniuncha yaki surimia? <sup>24</sup> Shuar Je-  
sukrístunu ainia nu, ni ayashí wakeramuríncha tura nunisan̄ ni túramuríncha surimiak  
wekaawai. Ni ayashí krúsnum maatniua áintsan̄ túraiti.

<sup>25</sup> Yusa Wakaní kakarmaríjjaj Yus-shuar ajasu asar, núnisrik Yusa Wakaní kakar-  
maríjjaj wekasatai. <sup>26</sup> “Wats, nekapnaisatai. Wi imiá pen̄keraitjai” nuámtak túnaisuk,  
yajauch enentáimtunáischatniuiti.

## 6

### *Yáinniaiktarum*

<sup>1</sup> Túrasha, yatsuru, Yus-shuar tunáa túrashtimpiash. Atumsha nekas Yusaj  
wekaarumna nu, nu wáinkurmeka, yátsum Yusaj iwíarat tusarum yáintárum. Tura  
nan̄kaamantu enentáimtumatsuk túratarum. Tura amesha nekamata. Tunaanum iniaraj  
tusam anearam wekasata. <sup>2</sup> Káarak kijin akui nuámtak yáiniaiktin átsuk. Núnisrumek  
atumsha, itiurchatrí akui nuámtak yáiniáiktarum. Túrakrumka Kristu akupeamurí  
umíarme.

<sup>3</sup> Shuar tujintiayat “nan̄kaamantuitjai” tákun̄ka anañmamui. <sup>4</sup> Shuar ní túramuríniak  
enentáimtumastiniaiti. Níiniunak enentáimtumakuíñkia tura pen̄keraitkiuíñkia chikicha  
túramurí iirtsuk, antsu n̄iniun pen̄ker iis wararsattawai. <sup>5</sup> Iis, ashí ní káarkariniak  
júkishtinkiait.

<sup>6</sup> Shuar Yus-Chichaman unuimiatna nu, nu shuar nin jintána nuna ashí takakna nujaj  
yáintí.

<sup>7</sup> Anañmamawairap. Shuar Yúsana anañkatniun tujintiawai. Ame araamna nuna  
neren̄ júuktatme. Chíkich nere áchattawai. Atumi enentáincha núniskete. <sup>8</sup> Iista. Shuar  
ni ayashí wakeramunak tuke enentáimtakka, jataj nere áintsan̄ araaiti. Nerekmataj  
jákatniun júuktatui. Tura Yusa Wakaní wakera nuna tuke enentáimtakka Yusaj tuke shiir  
pujustinian júuktatui. <sup>9</sup> Nu asamtaí pen̄ker túratin yawetkishtiniaiti. Tura pimpitsuk  
takasar júuktin tsawant jeamtaí, páchitsuk júuktatji. <sup>10</sup> Tuma asamtaí yáinmin̄ ákuíñkia  
ii jeajnia nu túratniuitji nekaska ii yachí yáin̄kiartin, Yus-shuar ainia nu. Tura ashí  
shuarsha yáintinaiti.

### *Jesukrístunu ajasar yamaram akiiniatin nekas pen̄keraiti*

<sup>11</sup> Ímsakua, winia uwejrujaj urutá uuntna áatjarum. <sup>12</sup> “Nekas tuke tsupirnaktini-  
aitme” tuinia nuka áyatik shuar shiir enentáimtursartí tusa tuiniawai. Kristu krúsnum  
jakamun étsereakuíñkia itiurchat awajtusarain̄ tusar “tsupirnaktiniaitme” tuiniawai.  
Shuar “ashí akupkamun umiktajai” tusa, Muisais timia núnisan̄ tsupirnaktiniaiti. <sup>13</sup> Pai.  
Tura nú shuar tsupirnaku áiniayat ashí akupkamun umiiniatsui. Muisais timia nuna  
ajapén ikiuniawai. Túmaitiat tsupirnaku tusa wakerutmainiawai. Áyatik atumin “Pai,  
niisha tsupimiatkiakji” titiai tusar wakerutmainiawai. <sup>14</sup> Wikia, antsu, aya ii uuntri  
Jesukrístu krúsnum jakamunak wararsatniun enentáimjai. Tu enentáimkiun Kristu  
krúsnum jakamia áintsanak ju nun̄kanmaya ana nuna jaka áintsan̄ páchiatsjai; tunaanum  
winia útsukatin atsawai. <sup>15</sup> Krístunu ajasrikia tsupirnaktincha tsupirnakchaitkiursha

mai ántrai<sub>t</sub>i antsu yamaram akiiniatin nekas pé<sub>n</sub>keraiti. <sup>16</sup> Ashí nekas Yus-shuaran, wi tájana nuja<sub>i</sub> métek wekainia nuna, Yus shiir enentáimias yáin<sub>t</sub>i tuke shiir pujustinian.

<sup>17</sup> Yamaikia itiurchat najatawarain. Jesusa takatr<sub>i</sub> takaakui asutiuawarma paant ayashru<sub>i</sub> chimikma írunui.

<sup>18</sup> Yatsuru, ii uuntri<sub>i</sub> Jesukrístu atumin shiir yainmakarti. Nuke atí.



## Papru IPISIUNMAYA SHUARAN papi akuptukma

### *Ipisiunmaya Yus-shuaran Papru áatramiania nu*

<sup>1</sup> Yus nuna wakerakuí Jesukrístu akatramuitjai. Jesukrístu nekas enentáimtusurum Yus-shuar ajasrum Ipisiunam pujarmena nuna ju papin áatjarme. <sup>2</sup> Yus ii Aparísha tura ii Uuntri Jesukrístusha waitnentramainia ásar imiatkinchanum shiir pujustinian yainmakarti.

### *Krístujai tsaninkiu asakrin Yus ti shiira nuna tsankatramji*

<sup>3</sup> Ii Uuntri Jesukrístu Apari Yus nekas shiir awajtustiniaiti. Iisha Krístujai tsaninkiu asar ii enentáin ashí nayaimpinmaya ana nujai warasminiaiti. Túmaitkiui Yus nu waratain ashí suramsaitji. <sup>4</sup> Krístujai uwemprar ti shiir tunaajainchu Niijiai pujusarat tusa Yus, ju nunka atsaisha, anaitiamkamiaji. <sup>5</sup> Yámankamtaiksha incha ti anenmak Jesukrístu túrunamujai ni uchiri ajasat tusa wakerutmakmiaji. <sup>6</sup> Ni aneamu Uchirijiai tsaninkiu asakrin nekas ti anenmaji. Nu enentáimsar ti shiir awajsatniuitji. <sup>7</sup> Yus ti anenmakrin ni aneamu Uchiri numpé puarmatai, nu jakamujai ii tunaarin akikmatramak uwentikrampraitji. <sup>8</sup> Tura ti anenmak ni enentáimtairin tura nekatairinha suramsamiaji. <sup>9</sup> Nujai shiir enentáimturmak in uwentikrampratniun wakerutmakmiaj nuna, yaunchu nekaachman, yamá paant awajturmaj. <sup>10</sup> Ashí ju nunkanam íranna nunasha tura nayaimpiniam íranna nunasha Kristu ashí akupin ati tusa Yus tsankatkattawai. Nunasha Yus yaunchu enentáimturam asamtai tsawant jeamtai ashí uminkiaítawai.

<sup>11</sup> Iisha Krístujai tsaninkiu asakrin Yus yaunchu achirmakmiaji ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

<sup>12</sup> Iikia Israer-shuar asar Kristu emka umirkakrin in imiá penker túrutmamun nekaawar ashí shuar Yúsan ti shiir awajsamin ániawai. <sup>13</sup> Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanin akuptuktaj timia nuna akupturmakmai. Nuna tura “nekas Wíi shuaraitrume” tawai. <sup>14</sup> Yamái Yusa Wakaní ii enentáin pujuruk tuke uwentikramji. Tura takas umik nu tsawantai ashí tsankatramkattaji. Tura ii enentáin pujá asamtai Yus ukunam Niijiaisha ashí tsankatramkattaj nu paant nékaji. Maa, Yus ti penker asamtai Nin ashí ti shiir awajsarti.

### *Papru Yus-shuaran áujtusmiania nu*

<sup>15</sup> Átum ii Uuntri Jesukrístu nekas enentáimtamuncha tura ashí Yus-shuarjai shiir awajnaiyamuncha antukjai. <sup>16</sup> Túran shiir enentáimkiun Yúsan áujkun tuke yúminkiajai. <sup>17</sup> Ii Uuntri Jesukrístu Apari Yus ti shiir asamtai Nin áujeakun ni Wakaní ni nekatairin suramas ashí jintinramawarti tusan seajai. Nujai nuna nankaamas Yus nekaattarme. <sup>18</sup> Tura enentáimincha paant enentáimtikramprarti tusan seajai. Nujai shiir túrutmataj tusa achirmakuitrum nu nekaattarme. Nu arantcha imiá shiira nu, Yus ni shuarin ashí tsankatkattana nusha nekaattarme. <sup>19</sup> Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai <sup>20</sup> nujai Krístun jakamunmaya iniantkimiayi. Tura nayaimpiniam jukí ni untsuurini akupin pujutainium apujsamiai. <sup>21</sup> Tura ashí ju nunkanam akupin ainia nújaisha tura ukunam nunka átatna nu akupin áminia nújaisha tura ashí akupin ainia nújaisha tura ashí naari nékamu ainia nujajisha Yus Krístun ashí nankaamas akupin najanamiayi. <sup>22</sup> Tura ashí íranna nu, Krístun umirkartin ániawai. Tura Yuska Krístunak ashí Yus-shuara Akupniuri

awajsamiayi. Túramtai Kristu ni shuari muuké áintsan\_kete. <sup>23</sup> Tura ashí nun\_kanam Yus-shuar ainia nu Kristu ayashí najanainiawai. Tura Kristu ashí ni ayashín pimiutkaiti tura nu arantcha ashí írúnna nunasha pimiutkaiti.

## 2

### *Yus anenma asa uwemtikramji*

<sup>1</sup> Átum yajauch túrakrum tunaanum tuke wekaakrum Yúsnumiá kanakin asarum jákauyarme. <sup>2</sup> Nu tunaanum jú nun\_kanam pujuinia nujai métek tuke wekainiuyarme. Túrarum uunt iwianchi wakeramurj umirniuyarme. Uunt iwianch ashí Yúsan umirainiatsna nuna akatenawai. <sup>3</sup> Ashí iisha núnisrik yaunchu nu shuarjai métek ii ayashí wakerakmu umirniuyaji. Tura íi enentái wakeramusha umirniuyaji. Tuma asar tura tunaajai akiinia asar chíkich shuarjai métek ti kajernakmiaji. <sup>4</sup> Antsu Yus ti waitnen\_kartin asa in ti anenmamiaji. <sup>5</sup> Tuma asa ii tunaanum tuke jaka pujarnin Krístujai métek iwiaaku awajtamsamiaji. Aya ti anen\_kartin asa uwemtikrampramiaji. <sup>6</sup> Tura Krístujai métek iniantamkimiaji. Nuyá Jesukrístujai métek, akupin pujutainium yamaisha apujtamas tuke nupetkatniun tsan\_katramkaitji. <sup>7</sup> Nujai ni ti anen\_kratmarincha tura Kristu túrunamujai waitnentrampramuncha tuke iniaktusmin átatui. <sup>8</sup> Jesukrístu nekas enentáimta asakrumin Yus waitnentramar uwemtikrampraiti. Juka átumkeka túrunachuitrume. Antsu Yuska Niñki kuítchajai suramsaitrume. <sup>9</sup> Shuar ni takatríjjai uwempratniuitkiunka nan\_kaamantu enentáimsainti winia kakarmarjai uwemprajai tusa. Nu enentáimsatniuka atsutí tusa Yuska átumka takaatsrumnin uwempratniun suramsamiarme. <sup>10</sup> Yus najanamuitji. Kame Jesukrístujai tsaníakrin yamaram iwiaakman suramas tuke pé\_nker túratniun najatmamji. Yáunchuk nuna enentáimturmasmiaji.

### *Krístujai tsanin\_kiu asar shiir nawamnaikiar pujaji*

<sup>11</sup> Nuik ámarum nu enentáimpratarum. Ashí Israer-shuar ni ayashín tsupirnakku ásar ashí Israer-shuarchan, tsupirnakcha áiniakui, pen\_ké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. <sup>12</sup> Nuik Krísturtinchauyarme. Israer-shuarcha asarum ashí ni túrutairísha tura ashí Yus nin tsan\_katkarmasha nekaachuyarme. Tura jú nun\_kanmaya asarum nekas Yusa nu enentáimtichuyarme tura shiir pujustin nan\_kamsarum enentáimpramarme. <sup>13</sup> Antsu yamaikia Krístujai tsanin\_kiu asarum, yaunchu Yusaíya yajá pujuwitiatrum, yamaikia Kristu numpé puármatai ni jarutramkamujai tántaitrume. <sup>14</sup> Israer-shuarjai Israer-shuarchajai nemasmanaikiar ajapén péen\_kramu ámiaji. Tura Kristu nuna sáaki nawamnaimtikramkamiaji. Tura chikichik shuar najatmamiaji. <sup>15</sup> Nuik aya Israer-shuar Muisais akupkamu untsurí armia nuna umirkatin áiniak nujai chíkich shuarjai nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamiaji. <sup>16</sup> Núnisan\_ ámiayi. Kristu krúsnum jaka nemasjai mai apattamak chikichik awajtamas Yusjaísha nawamnaimtikramkamiaji.

<sup>17</sup> Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi. <sup>18</sup> Yamaikia Israer-shuartisha tura Israer-shuarchasha mai metek Kristu túrunamujai tura Yusa Wakanj takaku asar Yusaj jeatniuitji. <sup>19</sup> Tuma asantai yamaikia chíkich shuar\_chaitrume, antsu ashí Yus-shuarjai métek ajasuitrume. Nekas Yusa shuarin\_rume.

<sup>20</sup> Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan\_ yaunchu Yúsnan etserniusha tura Kristu akatramurísha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujai nan\_kaamas Jesukrístu enentáimtustiniaiti. <sup>21</sup> Jea apujtukmarj Kristu asantai Nij ti pen\_ker ekeniar jea jeamnaki wéawai. Tura ii Uuntri Krístujai Yusa Jee ti shiir átatui. <sup>22</sup> Núnisrumek atumsha Krístujai tsanin\_kiu asarum átum ashí Yus-shuarjai Yusa Jeyya

áintsan̄ ajasuitrume. Tura Yusa Wakan̄i ashí Yus-shuara enentáin̄ pujú asamtai nekas Yusa Jeente.

### 3

#### *Papru Israer-shuarchanum Yus-chichaman etserkatniuya nu*

<sup>1</sup> Nu asamtai atumin Israer-shuarchatirmin yáintaj tusan Jesukrístunu étserkun sepunam pujajai. <sup>2</sup> Yus anentak Yus-Chichaman atumin etserkatniun akatar akup-tukuiti. Nu nékatsrumek. <sup>3</sup> Yus nuna túrutak yaunchu nekaachmancha paant awajtur-samiayi. Núnaka ishichik áatraitjarme. <sup>4</sup> Nu áujsarum Krístunu yaunchu nekaachman yamaikia paant nékajna nu nekaattarme. <sup>5</sup> Nú chichaman yáunchusha chikichkinke-sha ujankachmiayi. Túrasha yamaikia Yusa Wakan̄i Krístu akatramur̄incha etserni-ur̄incha nu chichaman paant awajtusarai. <sup>6</sup> Nu chicham̄ juiti: Uwempratin chichaman umirkar Israer-shuarcha Israer-shuarj̄ai métek Krístuj̄ai tsan̄inkiaru ásar chikichik shuar ajasartatui. Tura nu arantcha Yus ni shuar̄in ashí shíiran tsan̄katkatniun ana-jmatrama nūj métek pachiinkiertatui. <sup>7</sup> Yus ni kakarmarij̄iai winia yáintiuk tura ti anentu asa nu uwempratin chichaman etserkat tusa akatturmiayi. <sup>8</sup> Ashí Yus-shuarj̄ai nan̄kaamas wi péñkercha āin̄ Israer-shuarchanum shiir chichaman etserkat tusa Yus tsan̄katrukmiayi. Krístuj̄ain̄kia kuitj̄ai nan̄kaamas péñker, enentáimtustin jeatsjinia nu, takakji. Nusha ti shiir chichamaiti. <sup>9</sup> Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. <sup>10</sup> Yamaikia ashí nayaimpiniam pujuinia nuka Yus ni shuarīin túrunamun ísar Yuska imiá neka asa ashí enentáimniua nuna paant nékainiawai. <sup>11</sup> Yus j̄únis túratniun yáunchuk enentáimpramiayi. Tura ii Uuntrī Jesukrístuj̄ai mash uminkiamiayi. <sup>12</sup> Tura Krístuj̄ai Yusai yúpichuch jeaji. Tura Nin nekas enentáimtusar sapijmiatsuk Niin tantamniaitji. <sup>13</sup> Tuma asamtai tájarme, atumin yáintaj tusan sepunam pujakui kúntuts enentáimprairap. Antsu nuj̄ai Yus atumin ti shiir awajtamkurmin átum warasuk tusan wakerajrume.

#### *Kristu ti anenkratniuiti*

<sup>14</sup> Nu asamtai ii Uuntrī Jesukrístu Apar̄in̄ tikishmatran áujtajrume. <sup>15</sup> Ashí nayaimp-inmasha tura nun̄kasha Yus-shuar ájinia nu nekas ni shuar̄i áiniaji. <sup>16</sup> Yus ti kakaram asa ni Wakan̄ij̄iai atumí enentáin̄ pujureak ashí ni kakarmariyan̄ atumin suram-sarat tusan áujtajrume. <sup>17</sup> Yus nekas enentáimtakrumin Krístu atumí enentáin̄ pujusat tusan áujtajrume. Tuke yapaj̄itsuk anen̄kratin átarum tusan áujtajrume. <sup>18</sup> Túrakrum ashí Yus-shuarj̄ai Krístu anen̄krattair̄i nekaattarme. Imiá uunt asa nan̄kantsuk tuke amuukachminiaiti. <sup>19</sup> Nu anen̄krattai ashí takamtsuk nekaachmin āin̄ nekaatarum tusan áujtajrume. Nuj̄ai Yus takamtsuk pimiutramkattarme.

<sup>20</sup> Nekas Yus shiir awajnasti. Ni ti kakaram asa ii seajnia nuna nan̄kaamas tura enentáimprachminia nunasha nan̄kaamas iin̄ pujurtamuk ashí túramniaiti. <sup>21</sup> Ashí Yus-shuarjaisha tura Krístuj̄aisha Yusa péñker̄i tuke paant wantinin atí. Yus tuke iniaitsuk shiir awajnasti. Núnisan̄ atí.

### 4

#### *Yusa Wakan̄ij̄iai tsan̄inkiar pujakur túratin*

<sup>1</sup> Atumsha ni shuar̄i ajastin Yus achikma asarum péñker wekasatarum tájarme. Ii Úuntrīniun étserkun sepunam pujakun seajrume. <sup>2</sup> Nekasmiancha ajasrum aneniakrum katsunnairatarum. <sup>3</sup> Yusa Wakan̄i chikichik shuar awajtamkurmin shiir awajnaisarum pujustarum. <sup>4</sup> Yusa Wakan̄inkia chikichkiiti. Tura ashí métek Yus achikma asar métek Niij̄iai shiir pujustin enentáimji. Iisha Krístu ayash̄í ayash̄ímkia asar chikichik ayash̄kiitji. <sup>5</sup> Ii Uuntrī chikichkiiti. Niñki nekas enentáimtusar métek imiantiniaitji. <sup>6</sup> Chikichkiiti Yus, ashí Yus-shuarti ii Apar̄inti. Ashí akuptamniuitji. Ashí ni shuarīin̄

pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

<sup>7</sup> Tura chikichik chikichik niisháa shiir takastinian suramsaitji. Tura Kristu wakerimia núnisan suramsaji. <sup>8</sup> Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíiran susamiayi.”

Tu áarmaiti.

<sup>9</sup> Tura “wakamiayi” tana nu ¿warintuia? Kristu nayaimpiniam pujá asa yakí wákanka emka tárashinkiait. Nekas nunká tamiayi. <sup>10</sup> Niñki ataksha nekas nayaimpiniam wakamiayi. Nuna tura asa ashí ni shuarin pimiutkarmiayi. <sup>11</sup> Tura nujai chikichan akatramun awajsamiayi. Chikichnasha Yúsna etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiartinian awajsamiayi. <sup>12</sup> Túramtai ashí Yus-shuar ni takatrijiaí yáiniaikar ti penker shuar ajainiakui Kristu ayashi takamt-suk katsuarartatui. <sup>13</sup> Nujai Yus nekas enentáimtamunam Yusa Uchiri ashí métekrak penker nekaattaji. Nu túrakur katsukir Krístujai métek penker ajastatji. <sup>14</sup> Tura uchía áintsar áhattaji. Úchikia ashí yamaram chichaman antukar wari yapajiniawai. Tura anankartinia chichamen antukar waaku áiniawai. Kame nu anankartin shuar ti paant chichayatan ni shiir chichamejai anankatniun pujurenawai. <sup>15</sup> Antsu nekas aneniakur nekas chicham ujanaiktiniatji. Túrar Krístujai tsaninkiar tuke tsakakir ashí penker túratnuijai Niijai métek ajastatji. Krístuka ashí ni shuari muuké áintsankete. <sup>16</sup> Tuma asa ni ayashin wáinkui ashí nuna muchitmarí penker yáiniaikar ashí ni túratniurin shiir takasartatui. Nujai nu ayashnium muchitmarí chíkich chíkich penker takainiak métekrak shiir tsakartatui. Tura anenainiakui nu ayashsha penker úuntmartatui.

### *Krístujai tsaninkiu asar yamaram iwiaakmanum wekaaji*

<sup>17</sup> Ii Uuntri Kristu ímmianum juna akatjarme: Chíkich aents Yúsna nékachu ásar ántar ni enentáimmiájain wekainia núnisrum wekasairap. <sup>18</sup> Ni enentáin kusuru áiniak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui. <sup>19</sup> Nu arantcha, ni túramurijiaí natsamtichu ásar ti ya-jauchiniam surumakar ashí tunaan wararainiak túrin áiniawai. <sup>20</sup> Antsu átumka núnisrum enentáimtustin unuimiarcharmame. <sup>21</sup> Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmame. <sup>22</sup> Yaunchu enentáimtairmeka ayash wakeramu anankramin ainia nujai piaku asa imiá yajauchiiti. Nu enentáimtairmesha yaunchu túrutairmesha ajapa iniaisarum. <sup>23</sup> Túrarum penker enentáimsarum wakannium yapajíatarum. <sup>24</sup> Tura yamaram enentáimtairam emetatarum. Nuka Yusjai métek najanamu asa nekas penker tura shiira nuna tuke túriniati.

<sup>25</sup> Nu asamtai chikichik ayashi muchitmarí asarum wáitrutsuk nekas chicham chicharnaisatarum.

<sup>26</sup> Kajeakrum tunáa túrawairap. Tura nu kajeakmasha tsawant takamtsuk áchatniuiti.

<sup>27</sup> Uunt iwianch yajauch awajtamtsatin tsankatkaip.

<sup>28</sup> Kasasha kasamtsuk kakaram takakmasti. Tura ni uwejéjai penker takaak atsumainia nú shuarnasha susati.

<sup>29</sup> Muijmiai chicham chichasairap. Antsu chichastin akui penker chicham, chíkich shuar penker awajsamnia nu chichastarum. Anturtuinia nuna yáintaj tusarum nu chicham ujaktarum. <sup>30</sup> Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

<sup>31</sup> Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí.

<sup>32</sup> Antsu shiir awajkartin ajasrum waitnennairarum, Kristu jakamujai Yus atumí tunaarin tsankurtampra nútiksarmek tsankurnairatarum.

## 5

*Yus-shuar túratin*

<sup>1</sup> Nekas Yusa Uchirí aneamu asarum Nii tura núnis túratin wakeruktarum. <sup>2</sup> Kristu in anenmaj núnisrum anenaitiarum. Kame ii tunaarín akikmaktaj tusa jákatniunam surumakmiayi. Túramtai Yus shiir enentáimtusmiayi.

<sup>3</sup> Yusna asarum tsanirmatniusha yajauch túratniusha tura jú nunkanmayan ikiaunkatniusha ishichkisha enentáimtuschatniuitrume. <sup>4</sup> Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yuminsatniuiti. <sup>5</sup> Shuar chíkich nuwajaj tsanirmakka tura ashí yajauchin wakerakka tura jú nunkanmayan ikiaunkatniun wakerakka Yusaj Kristu akupea nuí penké pachiinkiachminiaiti. Kame jú nunkanmayan ikiaunkatín ántar-yus tikishmatratniua nujaj méteketete. <sup>6</sup> Nu túramniaiti tusar ántar chichamjaj anankramacharti. Warí, nuna túruiniakui Yúsan umirainiachun Yus ti asutiáwartatui. <sup>7</sup> Tuma asamtai nu shuar penké pachischatniuitrume.

<sup>8</sup> Yáunchuka atumsha kiritniunam wekainiuyarme. Tura yamaikia Krístujaj tsanínkiu asarum péñker tsáapninium wekaarme. Shuar tsáapninium wekainia nujaj métek wekasatarum. <sup>9</sup> Tsáapninium wekainiaka shiir awajkartincha tura nekas chichamtincha tura péñker túrin áiniawai. <sup>10</sup> Ii Uuntri Kristu wakeramu nekaatin wakeruktarum. <sup>11</sup> Kiritniunam wekainia nu túramu pachisairap. Antsu nu shuar tsáapninium enkeatarum. <sup>12</sup> Ni uuk túruinia nu áujmatsatin natsanmainiaiti. <sup>13</sup> Tura ashí tsáapninium itiamu ashí paant ajawai. Tsáapnikia ashí paant awajeatsuk. <sup>14</sup> Nu asamtai Yus-Papinium tawai:

“Kanaruitme nu shintiártá. Jakamunmaya nantáktiá. Tura Kristu tsáapin awajturmas-tatui.”

Tu áarmaiti.

<sup>15</sup> Nu asamtai átum túramu ímiastarum. Nékachu áintsarum pujusairap. Antsu péñker enentáimprarum wekasatarum. <sup>16</sup> Péñker túratin tsawant wasúrkáip. Tunáa ti pampaatsuk. <sup>17</sup> Enentáincha áirap. Ii Uuntri Kristu warinia wakera nu enentáimtustarum. <sup>18</sup> Nampekairap. Nampeakmeka aya yajauch ajame. Antsu Yusa Wakaní winia enentáiruí takamtsuk pujurtusti, tu enentáimsatarum. <sup>19</sup> Túrarum Yus shiir enentáimtakrum Yus-kanta kantamkirum shiir áujnaisatarum. <sup>20</sup> Ii Uuntri Jesukrístu náaríjjaj ashí irunna nu Yus Apa tuke yuminsatarum.

*Yus-shuar túratin*

<sup>21</sup> Yus-shuar asarum nuámtak umirnaikiatarum. Túrakrum Kristu shiir awajsattarme.

<sup>22</sup> Núwaka Krístun umirna núnisan ni áishríncha umirkatniuiti. <sup>23</sup> Kristu ni shuarín akupeana núnisan áishmansha ni nuwen akupkatniuiti. Kristu ni shuarín ayashimiak ni muuké áintsankete. Tura nin uwemtikiartiniiaiti. <sup>24</sup> Nu asamtai Yus-shuar Krístun umirin áiniawai. Núnisan ashí ana nujaj nuwá ni áishrín umirkatniuiti.

<sup>25</sup> Kristu ni shuarín ti aneak nin yáintaj tusa jákatniun surumakmiayi. Núnisrumek áishmantirmesha atumi nuwé aneatniuitrume. <sup>26</sup> Kristu ashí ni shuarín ni Chichamejjaj tura entsajaj nijjar ní shuar péñker árat tusa jakamiayi. <sup>27</sup> Nujaj ashí ni shuarín tunaarinniuchu tura yajauch máatrachu antsu ti péñker shiir awajas Niini éjetaj tusa túramiayi. <sup>28</sup> Núnisan áishman ni ayashín anea núnisan ni nuwen aneatniuiti. Shuar ni nuwen aneak nujaj ni ayashíncha aneawai. <sup>29</sup> ¿Yaki ni ayashín nakitniuit? Antsu péñker wáiniuk áyureatsuk. Kristu núnisan ni shuarín wainiui <sup>30</sup> ni ayashí asamtai. Kame ni ayashí muchitmarintji. <sup>31</sup> “Tuma asamtai áishman ni aparíncha nukuríncha ikiukin ni nuwejjaj tsanínkiar chikichik ayashtin ajainiawai.” Tu áarmaiti. <sup>32</sup> Nusha Kristu ni shuaríjjaj tsanínmán tawai. Nuka yaunchu nekaachma yamaikia nekanaiti, tura ti enentáimturtiniiaiti. <sup>33</sup> Tura núnisan ashí áishmantiram atumí nuwé atumí ayashía nútiksarmek aneatniuitrume. Nuwasha ni áishrín umirkatniuiti.

## 6

<sup>1</sup> Uchitirmesha, Yus-shuar asarum apasha nukusha umirkatarum. Nuka ti penkeraiti.

<sup>2</sup> Emka akupkamu “umirkam nekas shiir átatme” tana nu júiti:  
“Apasha nukusha umirkata.

<sup>3</sup> Túrakmeka shiir átatme tura jú nunkanam untsurí tsawant pujustatme” tawai.

<sup>4</sup> Atumsha, uchirtintirmesha, atumí uchirí ánrarum akajkairap. Antsu Yúsan shiir enentáimtusarat tusarum ti penker jintinkirum tsakatmartarum.

<sup>5</sup> Takakmautirmesha, atumí uuntri jú nunkanam pujuinia nu ti penker umirkatarum. Kristu umirkatniua áintsarum wishiktsuk ashamakrum tuke enentáijjai takarsatarum.

<sup>6</sup> Aya wáitmakui shiir enentáimtursat tusarum penker takarsairap. Antsu Kristu takarniuríá núnisrum ashí ame enentáimjai Yus wakera nu túratarum. <sup>7</sup> Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijjai takastarum. <sup>8</sup> Kame chíkich chíkich ní takasmajai métek akinkiartatui. Ii Uuntri Kristu nu shuar penker túramujai métek akiktatui.

<sup>9</sup> Tura atumsha, iniamniutirmesha, atumí takartamu wakaní mántutsuk shiir enentáijjai iniartarum. Nekas enentáimpratarum. Ii Uuntri nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

### *Yusa kakarmarijiai íwianch taritratarum*

<sup>10</sup> Wátsek, yatsuru, ii Uuntri Yusjai tsanínkiu asarum ní ti kakarmarijiai iwianchjai máanaiktin kakaram ajastarum. <sup>11</sup> Apach máanainiak jiru entsarua núnisrum Yus susamujai entsartarum. Nujai íwianch nupettamkui tariartatme. <sup>12</sup> Kame Yusna takáa asar penké áentsjai máaniatsji antsu yajauch wakan kakaram írúnna nujai máaniaji. Niisha jú nunkanam, kiritniunma áintsan, tunaanum wekainia nuna akupin áiniawai. <sup>13</sup> Jiru entsartinia áintsarum Yus súramna nu entsartarum. Nu entsarmajai itiurchat tsawant taritra nupetkarum tuke tariarum wajastatrum. <sup>14</sup> Wats, nekas tariartin nekas chicham emenmamatarum. Tura penker túratniujai jatairum ajaktarum. <sup>15</sup> Suntar iwiarnak sapatan aweá áintsarum Yusa shiir chichame etserkatin iwiarnartarum. <sup>16</sup> Nuyasha ashí nankaamas, tantar takustinia áintsan, Yus tuke nekas enentáimtustarum. Nujai íwianch ekeétrámkamusha uwemturtatme. <sup>17</sup> Múukem ajaktincha Kristu uwentikrampramu múukmiin etsenkruktarum. Tura Yus-Chicham puniáa áintsan achiktarum. Nuka nekas Yusa Wakaní puniarinti. <sup>18</sup> Yusa Wakaníjjai Yus áujeakrum tuke seatniuitrume. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. <sup>19</sup> Núnisan winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. <sup>20</sup> Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

### *Amikmaamu*

<sup>21</sup> Ii aneamu yachi, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti. <sup>22</sup> Tuma asamtai ii jui pujamun ujatmak ikiantamprarat tusan akuptajrume.

<sup>23</sup> Yus Apasha tura ii Uuntri Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti.

<sup>24</sup> Ashí ii Uuntri Jesukrístun tuke enentáijjai aneana nuna Yus shiir yáinti.

Nuke atí.

## Papru JIRIPIUSNUMIA SHUARAN papí akuptukma

### *Papru sepunam pujus Jiripiusnumia Yus-shuaran áatramiania nu*

<sup>1</sup> Wi Papru Timiutéujai Jesuskrístu takarín asar ashí Yus-shuar Jiripius péprunam pu-jarmena nu ju papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesukrístujai tsaninkiu asakrumin ju papí áateajrume. <sup>2</sup> Yus ii Aparísha Jesukrístu ii Úuntrisha atumin waitnen-tramainia ásar imiatkinchanum tuke shiir pujustinian yainmakarti.

### *Papru Yus-shuaran Yúsan áujtawai*

<sup>3</sup> Ashí tsawant atumin enentáimtakun Yúsan tuke shiir yúminkiajai. <sup>4</sup> Yúsan áujeaknasha ti warasan seatjarme. <sup>5</sup> Kame iikia yámankamtaiknumia Yus-Chicham métek yáiniáikiar iniaitsuk takasuitji. <sup>6</sup> Yus atumín ti péñker awajsatniun nan̄kama asa núnisan Jesuskristu táatsain̄ tuke shiir awájtámki nekas péñker najatmattarme. Nuka ti nekasaiti. <sup>7</sup> Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti aneñkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti pen̄keraiti. <sup>8</sup> Jesukrístu aneñkrattairijjai wi atumin aneamun Yussha paant nékarui. <sup>9</sup> Yúsan áujeakun anearmena nú nan̄kaamas aneak tusan seatjarme. Tura nújajisha ti neka ajasrum <sup>10</sup> ashí péñkera nu achikiuk tusan Yúsan áujtajrume. Atumin nu túrunamtain̄kia yamaisha tunáajain̄chu pujustatrume tura Kristu támatai sumamashtatrume. <sup>11</sup> Núnisan̄ Jesukrístu kakarmarijjai ashí péñker túrin átatrume. Tura nújai ashí shuar Yúsan ti shiir enentáimturartatui.

### *Wi ju nun̄kanam aya Krístunak enentáimtakun pujajai*

<sup>12</sup> Winin túrunamu itiurchat ain̄ nujai uwempratin chicham nekas pampaawai. Nu nekaatarum tusan wakerajrume, yatsuru. <sup>13</sup> Iis, uunt akupniu suntarisha tura ashí shuarsha wi Krístunun etseru asan sepunam pujamun paant nékainiawai. <sup>14</sup> Ti untsurí Yus-shuar wi sepunam en̄ketman nekaawar ii Uuntrí Jesusan nekas enentáimtusar sapijmiatsuk Yus-Chichaman etserainiawai.

<sup>15</sup> Kame shuar awai winia kajertuiniak tura nan̄kaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai. <sup>16</sup> Yajauch shuarka Krístun shiir enentáimtutsuk antsu ashí shuar ní chichamenak anturkar wíi shuar ajasarat tusar etserainiawai. Túruiniak wisha sepunam pujakui nu arant itit awaj-tustinian wakerutainiawai. <sup>17</sup> Antsu péñker shuar Krístun nekas aneek etserainiawai. Nu uwempratin chicham imiá pen̄keraiti wi titin asamtai winiasha anentainiak shiir et-serainiawai. <sup>18</sup> Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna nan̄kaamas shiir enentáimprattajai. <sup>19</sup> Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jinkittijai. <sup>20</sup> Nekas juna wakerajai: Natsamtsuk uunt akupniu Jesukrístun paant ujakartinian wakerajai. Nujai winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamsajai. Aya Kristu kakarmarín winí nan̄kaamas nekaawarat tusan wakerajai. <sup>21</sup> Wíjain̄kia ju nun̄kanam iwiaaku pujakun aya Krístunak enentáimtakun pujajai. Tura jákatniusha juí pujajnia nuna nan̄kaamas péñkeraiti. <sup>22</sup> Ju nun̄kanam pujakun Uunt Jesusnan takasminiaitjai. Nu asamtai tunatsuk achiktaj

nékatsjai. <sup>23</sup> Wíjjainkia itiurchataiti mai achiktin. Jákatniuncha wakerajai Krístujai tsaninkian pujustaj tusan. Wíjjainkia nu imiá péñkeraiti. <sup>24</sup> Túrasha atumin yáintaj tusan tuke ju nunkanam iwiaaku pujusminiaitjai. <sup>25</sup> Kame tuke pujustajai nékajai. Núnisnak atumjai pujakun Yus nekas enentáimtakrum nankaamas waraakrum tuke katsuaruk tusan yáintatjarne. <sup>26</sup> Nu asamtai wi atumjai pujakui Jesukrístu yuminsarum shiir warasatrume.

<sup>27</sup> Kristu chichame ti penker asamtai atumsha aya péñkera nuke túratarum. Wi atumjai pujaknasha tura yaja pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum. <sup>28</sup> Atumí nemasrisha ishichkisha sapijmi-antikramkarain. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisañ atí tusa Yus túrait. <sup>29</sup> Krístunu asarum Nii nekas enentáimtustinniasa tura Niiniu asarum wáitsatniusha Yus anenma asa tsankatramkaitrume. <sup>30</sup> Yus-Chicham pamparat tusar maimetek ti takáa asar wáitjai. Wi nuik ti takasmaj nu nekamarme. Tura yamá tuke takaaj nusha ántarme.

## 2

### *Kristu péjchach ajasmatai Yus ti uunt awajsamiayi*

<sup>1</sup> Kristu ikiantamkuisha, ni anenkrattairi atsanamkuisha, ni Wakanj atumjai pujakuisha, anenkratniuitkiurmesha, waitnenkratniuitkiurmesha <sup>2</sup> waramtikrustarum. Métekrak takastarum. Mai metek anenaitiarum. Yusa Wakanj atumí enentáin pujá asamtai chikichik enentáik enentáimsatarum. <sup>3</sup> Átum wakeramuk túrawairap. Nankaamantu ajastaj tírap. Antsu péjchach ajasrum chikich shuar atumjai nankaamas péñker enentáimtusta. <sup>4</sup> Aya níniak péñker átatna nunak shuar túrashti. Antsu chikich shuar yáinminia nuna túrati.

<sup>5</sup> Kristu Jesus enentáimpramia núnisrum enentáimpratarum. <sup>6</sup> Niisha Yúsaitiat ju nunkanam winiak tuke Yusjai métek átinian emettsuk <sup>7-8</sup> antsu nuna ikiuak aents ajas péjchach asa ashí aentsu takarín ajasmiayi. Tura aentsu ayashín ayashimiak tura Yúsan umireak jákatniuncha surimiakchamiayi. Maa, imiá tunaarinnia áintsan krúsnum natsanmainium jakamiayi. <sup>9</sup> Túramtai Yus nekas nankaamantu awajsamiayi. Ni náaríncha ashí paant awajsamiayi. <sup>10</sup> Tuma asamtai ashí nayaimpiniam írúnna nusha, nunká írúnna nusha, tura iwiarsamusha Jesusa náarín antukar tikishmatrartatui. <sup>11</sup> Tura ashí shuar Jesukrístu ashí akupin ajasman paant nekaawartatui. Nújainkia Yus Apá kakarmarisha paant nekanattawai.

### *Yus-shuar kiritniunam keeák tsáapin awajeana áintsan áiniawai*

<sup>12-13</sup> Nu asamtai, aneamu yatsuru, wi atumjai pujakui umirtukmarmena nuna nankaamas yamaikia arant pujakuisha umirtuktarum. Iis, Yus atumí enentáin takaak ni shiir wakeramu wakeruktinniasa tura umiktinniasa pujurtamprume. Nu asamtai atumsha kakaram ajastarum Yus ti penker awajtamsatniun wakera nu túrunati tusarum. Tura péjchach enentáimprarum awajirminiaitjai tusarum aneara wekasatarum.

<sup>14</sup> Ashí yajauch tunaitsuk tura jianaitsuk wekasatarum. <sup>15</sup> Túrakrum makuumatsuk tunaajainchu áatrume. Antsu Yusa uchirí áatrume. Ju nunkanmasha shuar imiá tunaan túrinjaisha máatrachu asarum kiritniunam ji keeá áintsanketrume <sup>16</sup> iwiaaku pujustin chicham paant awajeakrum. Nújai Kristu támatai atumín ántran takascha asan ti shiir wararsattajrume. <sup>17</sup> Winia takatrujai Yus-shuar ajasakrumin wi jákatniuitkiuncha nújaisha warasaintjai. Atumsha wi waraajna jui núnisrumek warastarum tusan wakerajrume. <sup>18</sup> Atumsha waraakrumin métek wararnaisatai.

### *Timiutéuncha Epaprutíiuncha Papru ujatkamiania nu*



19 Ii Uuntri Jesus wakerakuin̄kia Timiutéun írmainiarat tusan ti warik akuptuktatjarme. Tura átum shiir pujamu ujateakui warastatjai. 20 Kame Timiutéu wijījai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarime. 21 Chíkichka Kristu wakeramun iniaisar ní wakeramunak páchiniawai. 22 Túrasha átumka Timiutéu tuke péñker túramu nékarme. Uchi ni aparíjiāi takaana áinis Yusa shiir chichame etserkatniun yáintkiaiti. 23 Winia itiurtukartiñ nuna nekaan Timiutéu írmainiarat tusan akuptuktatjarme. 24 Kame Kristu yáintkiui wíkisha wárik ímniaitjarme.

25 Wi atsumaj nuna írsati tusarum Epaprutítu akupturkamarme. Wijījai métek tsaniñ takasuiti. Tura métek wáitsaitji. Áunkesha akupkamnia enentáimjai. 26 Nii jaawai taman átum antukman nekáa, írmaitniun ti wakerutmarime. 27 Maa, nekas ti janiñkiamai. Túrasha Yus nin waitnentramai. Kame winiasha wi jūi wáitiakun nii jakamtai nu arant ti kuntuts pujuschatniun waitnentrurmai. 28 Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme. 29 Kristu yumĩsarum ti shiir warasrum wáinkiatarum. Chíkich shuar niijiāi métek péñker Yus-shuar ainia nusha shiir enentáimtustarum. 30 Kristu takatrĩn takaak ti janiñkiamai. Átum yáintkiachminia nuna winia yáintkiataj tusa pujus janiñkiamai.

### 3

#### *Kristu nekaatin ashí nan̄kaamas péñkeraiti*

1 Ayu. Warastarum, yatsurtiram, ii Uuntri Kristu ti péñker asamtai nuik áatramajrum nuna ataksha títiatjarme. Ataksha ujam yainmakminiaitkiuin̄kia wijījain̄kia itiuur-chatchaiti atak enentáimtikratin. 2 Yajauch shuarjai aneartarum. Nu shuar Muisais timia núnis tuke yamaisha tsupirnaktiniaitrum tuiniawai. 3 Antsu iikia ayash tsupirnakmajai péñker átiniaitji tu enentáimtatsji. Iikia antsu ii wakanjiāi Yus shiir awajeaji tura Jesukrístunu asar Niñki shiir wararji. Nu túrakur Muisais timia nu umintikia iitji. 4 Jūi nun̄kanam írunna nujai waantu enentáimpramniaitkiuin̄kia ashí shuarjai nan̄kaamas wikia waantu enentáimtumaraintjai. 5-6 Israer-shuar asan Muisais timia núnisan wi akiiniamtai uchu (8) tsawant nan̄kaasmatai tsupirtukarmiayi. Israer-shuarum Pinjamín weeitjai. Winia aparsha nukursha mai Israer-shuar áiniakui wi imiá Israer-shuaraitjai. Wisha Pariséu tuinia núnisan Muisais akupkamun ti umirin asamtai chíkichka winia sumantkiatniun tujintrin árimiayi. Tura Pariséu asan Kristu-shuarin ti kajerkan áintramjai. 7 Ashí nujain̄kia waantu enentáimtumauyajai. Antsu yamaikia Krístujain̄kia péñké ántar áiniawai tajai. 8 Ashí enentáimpramnia ákuisha winia Úuntur Jesukrístu shiir enentáimtustin nekas péñkeraiti. Nu asamtai Krístunu ajakun wi takusmaj nu muijmiai ajasmatai núnaka iniaisamjai. 9 Nuna túran Niijiāi tsaniñkian pujajai. Tura akupkamu umirkatniujai péñker ajaschaitjai antsu Krístun enentáimtakui Yus “péñkeraitme” túrutui. 10 Tuma asamtai ashí nan̄kaamas wakeraj nu júiti: Krístun péñker nekaan nekas enentáimtustinniasha tura ni iniantkimiu kakarman takustinniasha wakerajai. Tura Niijiāi métek ajastinian wakerakun ni wáitkiamunam tsaniñtinniasha tura Nii jakamia núnisan jákatniuncha wakerajai. 11 Túraknaka Krístujai métek jakamunmayá nantaktiaj tusan wakerajai.

#### *Papru kakaram ajasmiai Kristu wakeramun umiktinian*

12 Kame wakerukuitja nuna mash umirkachuitjai. Krístujai métek nekas péñker shuar ajaschaitjai. Túrasha Kristu Jesus “nūi ejetajam” emka túrutkui, wisha nūi jeataj tusan kakaram ajasan pimpitsuk takaajai. 13 Yatsuru, wisha nūi jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. 14 Tura nuna umikmatai nayaimpiniam Jesukrístujai tsaniñkian shiir pujustinian Yus surustatui.

15 Ashí shuar Yusjaj katsuaru ájina nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme. 16 Tura aneartarum. Naki pujutsuk jeajnia nujaj métek umirkatin pimpitsuk takastiniaitji. 17 Yatsuru, wisha tura chikichcha wijjaj métek péñker túrajnia nu wáinkiuuram atumsha núnisrumek túratarum. 18 Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsnum jakamun mujjaiainiawai. 19 Tuma ásar emesratniunam akupnakartatui. Ni ayashí wakeramun, ni yusrja áintsan, tuke umirainiawai. Natsanmainian túruiniayat wararainiawai. Tura ju nunkanmayanak enentáimtuiniawai. 20 Antsu iikia nayaimpinmaya shuar asar ii Uuntri Jesukristu in uwentikrampra asamtai nayaimpinmaya tatí tusar náka. 21 Nii taa, ii yajauch ayashin yapajjá ni ayashíjjaj métek ti shiir awajsattawai. Ashí uunt akupin ajas nu kakarmajaj túrutmattaji.

## 4

### *Krístujaj tsaniñkia wekáa asarum warastarum*

1 Nu asamtai, aneamu yatsuru, ii Uuntri Krístujaj tsaniñkiu asarum kakaram ajastarum. Maa, ti aneakun atumin enentáimtakun ti waraajaj tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

2 Ewautiancha tura Séntikincha, ii Uuntri Kristu shuarj ásar, mai metek enentáimsarat tusan seajaj. 3 Amincha, winia ajirú, nu nuwaj yáinkta tusan seajme. Niisha wi iwiaaku chichaman étsereakui wijjaj métek takasarmaj. Tura Krimintisha tura chikichcha wijjaj métek takasarmaj. Nuna náarin iwaaku átinnium Yus áatraití.

4 Nu asamtai Uunt Jesusjaj tsaniñkia pujá asarum warastarum. Ataksha “warastarum” tájarme. 5 Uunt Jesus tátin ishichik ajasaj. Tuma asamtai tsanka enentái takakrum nu paant nekanati.

6 Itiurchat enentáimsatin atumjaj penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata. 7 Nuñkia atumí enentái ankant átinian, áentstikia penké nekaachminia nuna, Yus amastatui. Yus atumin ankant awajtamsa asa atumí enentáin tura atumí enentáimsamuríncha yajauch wayawain tusa shiir waitmaktatrumé Jesukrístujaj tsaniñkiu asakrumin.

### *Ashí péñker ana nu enentáimsatarum*

8 Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chikich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chikich shiir anturkamnia ana nusha enentáimsatarum.

9 Wi unuiniarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumñkia Yuska ankant átinian amastaj tusa pujurtamsattarme.

### *Jiripiusnumiq Yus-shuar Páprun kuítian akuptukarmiania nu*

10 Ii Uuntri Kristu anea asarum winiasha ataksha enentáimturum asakrumin ti waraajaj. Kame kajinmatrukmiarme tátsujaj antsu kuítrum atsakui yáintkiatin tujinkiamarme. 11 Tura kuítian atsumakun tátsujaj. Antsu wi takakjana nujain warastinian unuimiáruitjai. 12 Kuítrinchati pujustinia nuna nékajaj tura ti nukap takustinia nunasha nékajaj. Tsukamaknasha jéemarnasha, itiarar takustinniasha tura penké takutsuk pujustinniasha unuimiáruitjai. 13 Kristu ni kakarmarin surakui ashí túramniaitjai. 14 Tuma ain atumsha wi atsumamu akupturkarum ti péñker túramarme.

<sup>15</sup> Jiripiusnumia shuartiram, ju ti penker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujai atumí wakanín yáinma asantai yuminsarum akupturkamiarme. <sup>16</sup> Atumek wi Tisarúnikia nunkanam atsumakun pujajsha kuit akupturkamiarme. <sup>17</sup> Aya kuit akupturkakrumin tu enentáimtsujai. Antsu nu kuit Yusaj kawentramkaku tusan wakerajrume. <sup>18</sup> Epaprutítijai akupturkamarum nujajsha atsumamaj nuna nankaamas tiaruncha wáinkijai. Akupturkamarum nusha ti kunquin Yus susamua áinis ti shiir auyi. <sup>19</sup> Winia Yúsrusha ti penkeran nukap takakui. Atumsha Jesukristunu ajasu asarum Yus seamnaitrume. Tura Yuska ti takakna nujaj ashí atsumarmena nuna suramsattarme. <sup>20</sup> Ii Aparí Yus tuke shiir atí. Nuke atí.

### *Amikmaamu*

<sup>21</sup> Winia náaruisha tura Jesukristu náarincha ashí Yus-shuar ainia nu chícham uja-trukturum. Niisha shiir pujusarti. Wi írutramusha núnisan shiir pujusarti tusa akupturmainiawai. <sup>22</sup> Tura ashí akupin Sésaraj pujuinia nuyá Yusna ajaruka tura chíchich Yus-shuarsha shiir pujusarti tusa chichaman akupturmainiawai.

<sup>23</sup> Ii Uuntri Jesukristu atumniasha ti shiir yainmakarti. Nuke atí.

## Papru KURUSENMAYA SHUARAN papi akuptukma

### *Kurusenmaya Yus-shuaran Papru áatramiania nu*

<sup>1</sup> Wi Pápruitjai. Yus wakerutak Jesukrístunun etserkat tusa akatra akupkamuitjai. Wishá ii yachi Timiutéujai <sup>2</sup> ju papi áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Apari atumin wáitnentaimturma asa yainmakarti imiatkinchanum tuke shiir pujustinian.

### *Papru Yus-shuaran Yúsan áujtusmianis nu*

<sup>3</sup> Iisha atumin Yus áujtakur ii Uuntri Jesukrístu Apari Yus ashí tsawant yúminkiaji. <sup>4</sup> Atumsha Jesukrístu ti shiir enentáimtamusha tura ashí Yus-shuar aneamusha antukji. <sup>5</sup> Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatái tusarum nákarne. <sup>6</sup> Nu chicham ashí nunkanam pampaakuí shuara enentáin nereá áinis nusháa ajasar yamaikia péñker túrin áiniawai. Núnisan atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai. <sup>7</sup> Nu chichaman Épapas ujatmakmarne. Niisha iijjai métek takasu asantai ti aneamuiti. Atumniasha Kristu takatrín ti shiir takartamsaiti. <sup>8</sup> Niisha átum Yus-shuar asarum mai anenai ajamun ujatmakmaji.

<sup>9</sup> Iisha nu antukar Yus ashí tsawant áujtajrume. Yus ni wakeramun ti paant nekaprut-mawarat tusar seaji. Ashí Yúsnan ni enentáimtaijijai ashí Níiniun paant nekaatniun Yus jintintramat tusar seaji. <sup>10</sup> Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum Nin ti penker nekaak tusar seaji. <sup>11</sup> Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuntrattarme. <sup>12</sup> Yus ni shuarín tsáapninia nuí ashí péñkeran susattawai. Tura incha nuí pachiinkiatniun tsankatramka asakrin Yus Apa yuminsamniaitrome. <sup>13</sup> Yus iwianchin nupetak íwianch akupeana nú kiritniunmaya uwemtikramar ni aneamu Uchiri akupeana nuí wearmakmaji. <sup>14</sup> Ni Uchiri krúsnum jaka ii tunaarín nijjar tsankurtamar uwemtikrampramaji.

### *Kristu jakamujai Yusjai nawamnaikiar shiir pujustin*

<sup>15</sup> Yus wáinkiachminiaiat ni Uchiri akiiniamai tura ayashimkiamiyai. Túmaitiat ashí najanamua nuna yaunchu pujú asa ashí akupniuiti. <sup>16</sup> Niiijai Yus ashí nayaimpiniam írunna nunasha nunká írunna nunasha, ashí wáiniaj nunasha núnisan wáintsuj nunasha mashi najanamiyai. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Niiijai najanamu áiniak Nin umirkarti tusa najanamu áiniawai. <sup>17</sup> Ashí najanamua nuna yaunchu, Krístuka tuke pjuwiti. Ashí najanamu írunna nuna emestsuk wáinniuiti. <sup>18</sup> Ashí Yus-shuar métekrak chikichik ayashtinia áinis enentáimkiumka nuna muuke Krístuiti. Tura nu ayashín ni iwiaakmarijjai iwiaaku átinian súsaiti. Niisha ashí jakamunmaya nantakni-ujai imiá nankaamantuiti. Nújainkia ashí enentáimpramnia írunna nunasha akupniuiti. <sup>19</sup> Yus ashí takamtsuk Kristui shiir pujumiyai. <sup>20</sup> Núnisan Yus Kristu krúsnum jakamujai ashí nayaimpinmasha tura ju nunkanmasha írunna nuna Niiijai nawamnaikiar shiir pujusarat tusa wakerukmiyai.

<sup>21-22</sup> Atumsha nuik tunáa túrin asarum atumí enentáin Yusa nemasri ámarne. Tuma asarum yaja wekaimiarne. Antsu Kristu, aentsu ayashín ayashimiak, krúsnum wáitias

jakamujai ii tunaari asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsai eje-tamtatji. <sup>23</sup> Tuma asamtai Jesukrístu shiir enentáimtusrum kakaram ajasrum kat-suartiniaitrum. Tura uwempratin chicham antukuitrum nuyá kanakchatniuitrum. Ju uwempratin chichaman ashí nunkanam etsernakuiti. Wisha, Papru asan, etserkat-niun yaimjai.

### *Papru ashí Yus-shuaran yáinkratniuiti*

<sup>24</sup> Atumin wáitiaknasha ti shiir waraajai. Kristu ni shuarin nekas péñker awajsat tusa wáitiana nuñ pachinkia asan waraajai. Ashí Yus-shuar Kristu ayashí áintsan áiniakui Yus-shuaran yáintajtsan ayashrujai wáitiakun shiir enentáimjai. <sup>25</sup> Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáinrintjai. <sup>26</sup> Yámankamtaiknumia nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti. <sup>27</sup> Nu chichamsha júiti: Kristu atumí enentáin pujak Nijijai métek ti shíram awajtamsattawai. Nu imiá shiir chichamnum Israer-shuarchasha pachiniainian Yus ashí ni shuari nekawaarat tusa wakerimiayi.

<sup>28</sup> Iisha Kristu étseraeji. Túrar ashí enentáimtikrar péñker nekaawarat tusar jintintinaijai. Nujai Krístujai tsaninkiar ashí péñker tsakarartatui. <sup>29</sup> Tuma asamtai Kristu ni kakarmarñ tí surakui nekas kakaram takaajai.

## 2

<sup>1</sup> Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmayá shuarnasha, tura ashí winia waitcha ainia nunasha yáintaj tusan ti takaitjai. <sup>2</sup> Ashí shiir enentáimtikratniun ti takaajai. Núnisan aneniarum chikichik enentáijjai métekrak wekasatarum tusan wakerajrume. Nu arantcha, ashí Yusna ti penker nekaarum tuke katsuaruk tusan takaajai. Nujai Kristu ti penker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíiraiti. <sup>3</sup> Tura kakaram ajasam Kristu péñker nekaam ashí shiir enentáimpramnia nusha tura ashí Yusna nekaamnia nusha nekaattarme. <sup>4</sup> Atumin chíkich shuar ni-isháa chichamjai shiir chichartamas anankramawarain tusan nuna tájarme. <sup>5</sup> Wi nuñ atumjai pujachkuncha nuñ pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna ísnaka shiir enentáimjai. <sup>6-7</sup> Nu asamtai átum ii Uuntri Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Nijijai tsaninkrum ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yusjai kanakchattarme. Yus-Chicham núnisan etsernakmatai nekarmarme. Tuma asarum Yus tuke yuminsarum, núnisan péñker wekasatarum.

### *Krístujai yamaram iwiaakma takakji*

<sup>8</sup> Aneartarum atumsha. Shuar aentsti enentáimmiain ashí ju nunkanmayan enentáimprar tura Krístun enentáimtutsuk niisháa chichaman áujtamainiak nekaschajai anankramataj tusa wakerutmainiawai.

<sup>9</sup> Krístunam Yus ashí takamtsuk pujuwiti. <sup>10</sup> Túmakui atumsha Krístujai tsaninkiu asarum ni iwiaakmarñ takamtsuk takakuitrum. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti. <sup>11</sup> Nu arant átum ayashnium tsupirnatskesha Kristu shuari ajasakrumin ashí ayash wakeramun, tsupirkatniua áintsan, Kristu ajapamiayi. <sup>12</sup> Tura atumsha Yus ni kakarmarñjai Kristu jakan iniantkimia nu enentáimtusrum imianmiarme. Túrarum Krístujai métek iwianasmarme. Tura núnisrumek Krístujai métek nantakmiarme. <sup>13</sup> Nuikkia átumsha tsupirnatsuk atumí tunaari tuke akui atumí wakanñin jákauyarme.

Tura yamaikia Jesukrístujai tsanínkiu asakrumin Yuska atumí tunaari tsankur yamaram iwiaakman suramsaitrume. <sup>14</sup> Tura ashí ii tumashrin sumantikramatin amia nuna japiruiti. Kristu krúsnum jakamtai ashí akupkamujai sumantikramamun tsankurtampramijai. <sup>15</sup> Núnisan Kristu krúsnum jaka, iwianchnium ashí akupin ainia nuna nupetak ashí íimiainaiñ iniatsararmiayi.

### *Nayaimpiniam írunna nu enentáimtustarum*

<sup>16</sup> Akupkamunmaya Yus ankant awajtamsamtai chíkich shuar ame túramujai yajauch enentáimturmarain. Yúamna nujai, úamna nujai, uwitíncha, nantutíncha, tura tsawantíncha nampermam nujai chíkich shuar yajauch áujmatramkuisha ¿warí urukatin? <sup>17</sup> Nu nampernum Israer-shuar Kristu túrattana nuna nakumainiak túrin ármiayi. Tura Kristu taa imia Niñki pujá asamtai nakumkamuka ántraití. <sup>18</sup> Tura shuar “Péejchach ajasam Yus áujtsuk aya Yusa suntari shiir awajsatniuiti” túramkuínkia anturkairap. Nu shuar mesekranam wáinkiamun áujmatenak ántar nankaamantu enentáimtumainiawai. Aya aentsti enentáimian chichainiawai. <sup>19</sup> Tuma ásar Krístujai tsanínkiar wekainiatsui. Kristu ashí akupin asa ni shuarin Yúsnan jintintia shiir tsakarat tusa péñker wáiniui. Nu arantcha ashí ápateak Yus wakerana áintsan chikichik awajeawai.

<sup>20</sup> Atumsha Krístujai jaka asarum aya aentsti enentáimtai ikiukniuitrume. Nuikia ¿urukamtai ju nunkanmaya ana nu tuke páchiarum? Nii tuinia nu umirkashtiniaiti. <sup>21</sup> “Ju antínchatniuiti, tuiniawai. Ju yúashtiniaiti. Tura ju achikchatniuiti” tuiniawai. <sup>22</sup> Nusha ¿warí, takasam amuukashtatuak? Kame áyatik aents akupkamu ániawai. <sup>23</sup> Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

## 3

<sup>1</sup> Nuikia Krístujai nantakin asarum nayaimpinmaya írunna nu wakerukturum. Nui Kristu pujawai Yusa untsuuríni. <sup>2</sup> Ju nunkanam ana nu enentáimtsuk aya nayaimpinmaya ana nu enentáimtustarum. <sup>3</sup> Atumsha Krístujai tsanínkrum jakarmame. Tuma asarum Krístujai tsanínkrum Yusjai iwiaaku pujarme. <sup>4</sup> Krístukete ii iwiaakmarí. Nii nayaimpinmaya wantinkiuisha atumsha Niiñjai métek wantinkiattarme. Tura Niiñjai métek ti penker átatrume.

### *Yaunchu iwiaakmasha tura yamaram iwiaakmasha*

<sup>5</sup> Tuma asamtai ju nunkanmaya ana nu ajakratniua áintsarum iniaisatarum. Tsanirmatniusha, tunáa wakeruktíncha, tura takakna nujai nankaamas wakeruktíncha ántar-yus tikishmatratniua áintsan asamtai iniaisatarum. <sup>6</sup> Shuar Yúsán umirtsuk aya nuna túrin ásarmatai Yus nin kakerak ti asutiáttawai. <sup>7</sup> Atumsha núnisrumek túriniuyarme. <sup>8</sup> Tura yamaikia jusha iniaisatarum: kajektíncha, yajauch wakeruktíncha, yajauch túratniusha, katsekmaktíncha, yajauch chicham chichastíncha, mash iniaisatarum. <sup>9</sup> Yus-shuar ajasrum yaunchu enentáimtairam iniaisarmame. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. <sup>10</sup> Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Niiñjai métek shiir atí tusa. Túramtai Yus ti penker nekaki wéaji. <sup>11</sup> Krístuka ashí írunna nujai nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin ániawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

<sup>12</sup> Yus atumin anenmak Niiniu arti tusa achirmakmarme. Túrutma asamtai jujai shiir iwiarmampratniua áintsarum tuke túrin atarum: waitnenkartin, shiir awajkartin, péechach átin, émtin áchatin, tura katsuntin átin. <sup>13</sup> Kristu atumí tunaarín tsankuramia núnisrumek nuamtak tsankúrnáiratarum. Chíkich yajauch awajtamkuisha shiir kat-suntram yapajniaitsuk tsankúrnáiratarum. <sup>14</sup> Tura ashí nankaamas anenaitiarum. Túrakrumka chikichik ajasrum mash péñker túrattarme. <sup>15</sup> Kame chikichik ayashtinia áintsarum ajastarum tusa Yus ni shuarí ajasat tusa achirmakmarme. Tuma asamtai Yusa shiirí atumí enentáin pujurtamsati. Nujai Yus yuminsatarum.

<sup>16</sup> Kristu shiir chichame atumí enentáin piakti. Nekas naka enentáimprarum jintin-naiyarum mai ikiakánai ajatarum. Yus kanta kantamárum tuke enentáijjai Yus yuminsarum shiir awajsatarum. <sup>17</sup> Tura takaakmesha, chichaakmesha, kame ashí túramna nuka Jesukrístu shiir awajsataj tusam ni kakarmarijjaín túrata. Túrakum Krístujai Yus Apa yuminsata.

### *Yus-shuar túratniua nu*

<sup>18</sup> Nuwatiram, atumí aishri umirkatarum Uunt Yus nuna wakerakui. <sup>19</sup> Áishmantiram, atumí nuwé aneatarum. Atumí nuwejai kajernaikiairap. <sup>20</sup> Uchitiram, ame apa nukusha tuke umirkatarum. Nu túrakrum Yus shiir enentáimtiksattarme. <sup>21</sup> Uchirtintiram, atumí uchiri ti kakantrairap. Ti kakanteamka uchisha ti kuntuts pujus péñker wekasatniun nakitchanpiash. Nu túrunawain tusarum ántrarum atumí uchiri kakantrairap. <sup>22</sup> Takarniutiram, atumí uuntri shiir umirkatarum. Ju nunkanmaya uuntri aín aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke péñker takastiniaitrume. <sup>23</sup> Ashí túramna nu asump enentáijjai takakmasta. Aya aentsuk yáintinia áintsachu antsu nayaimpinmaya Úntrum yayá áitkiasrum takastarum. <sup>24</sup> Ame Úntrum Kristu asa nayaimpiniam ashí shiir takustinian tsankatramkattawai. <sup>25</sup> Antsu tunáa túrin ni yajauch túramujai métek akinkiáttawai. Yus ashí áentsun métek iyawai.

## 4

<sup>1</sup> Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk péñker iniartiniaitrume.

<sup>2</sup> Yus áujkuram Nii yuminsarum asummiarum iniaitsuk áujstatarum. <sup>3</sup> Incha Yus áujtustarum. Kristu-chicham yaunchu nekaachman yamá étserkun sepunam pujajai. Tuma asamtai nuna shiir ankant etserkat tusarum áujtursatarum. <sup>4</sup> Tura wi paant etserkatniuitiaj núnisan etserkat tusarum áujtursatarum.

<sup>5</sup> Yus-shuarchajai shiir túratarum Yus-Chichaman yajauch enentáimturarain. Kakaram ajasrum tsawant ántrarum iniankasairap. <sup>6</sup> Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujaktin nekaattarme.

### *Amikmaamu*

<sup>7</sup> Ii aneamu yachi Tíkikiu ashí wínian ujatmaktatrume. Niisha wijjai métek Yúsnan pimpitsuk ti penker takasuiti. <sup>8</sup> Nu asamtai ii jui pujajnia nuna ujatmak ikiantamprarat tusan akuptajrume. <sup>9</sup> Núnisan ii aneamu yachi Unisemu niijjai winiawai. Niisha atum weeaiti, tura Yusjai shiir wekaawai. Nu shuar ashí jui túrunamun ujatmaktatrume.

<sup>10</sup> Aristarku wi sepunam tsaninkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nuj jeamtaí antukmarum núnisrum péñker wáinkiatarum. <sup>11</sup> Justu Jesus náartin amikmaatmarme. Júchik áiniawai Rúmanmaya Ísraer-shuar winia Yúsnan etserkatin atutkaru ainia nu. Túmainiak ti shiir ayamtikru-iniawai. <sup>12</sup> Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsan áujeak Yusjai kakaarum tuke shiir Yus wakera nu túrak tusa seatramprume. <sup>13</sup> Wissha Épapas atumin ti enentáimturman nékajai. Núnisan

Rautiséanmaya shuarnasha tura Iarapurisnumia shuarnasha ti páchiniawai. <sup>14</sup> Rukas, aneamu tsuákratin, núnisan Témassha amikmaatmarme.

<sup>15</sup> Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jeen irunainia nú Yus-shuarsha amikmaatruatarum. <sup>16</sup> Átum ju papí áujсарum umikrum Rautiséanmasha nuyá Yus-shuar áujсarti tusarum akupkatarum. Tura atumsha núnisan Rautiséanmaya papí támatai atumsha áujсatarum. <sup>17</sup> Tura ju Arkipiu titiarum: “Ii Uuntri Jesus ni takatrin suramsa nu péñker umikta” tawai, titiarum.

<sup>18</sup> Wi, Papru, winia uwejruijái júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.



## Papru

# TISARÚNIKIANMAYA SHUARAN

## Emka papín aar akuptukma

### *Papru ni tsaniakmarijjai Yus-shuaran áatramiania nu*

<sup>1</sup> Wikia Pápruitjai. Wisha Serpanujai tura Timiutéujai Tisarúnikianmaya Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrama ásarmatai, ti shiir imiatkinchanum pujustarum, tu wakerajrume.

### *Tisarúnikianmaya shuar Yus nekas enentáimtusar umirkatniun jintintiarmania nu*

<sup>2</sup> Iisha Yus áujkurkia atumniasha tuke enentáimtusar Yus shiir yuminsaji. <sup>3</sup> Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. <sup>4</sup> Yatsurú, Yus anenmarme. Anenma asa Winia arti tusa achirmakurmena nusha nékaji. <sup>5</sup> Enentáimpratarum. Iisha Yúsai Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijjai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

<sup>6</sup> Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat aijn Yus-Chicham umikiurme. Tura wáitiatrumek Yusa Wakaní shiir enentáimtikramkui warasrum pujarme. <sup>7</sup> Nu túrakrum ashí Masetúnia tura Akaya nunkanmaya Yus-shuarsha shiir wekasatin jintintiarne. <sup>8</sup> Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui. <sup>9</sup> Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji. <sup>10</sup> Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáiri tsawantri jeattana nuyá uwemtikrampratin.

## 2

### *Yus-chichaman paant ujakarmiania nu*

<sup>1</sup> Atumsha nékarne, yatsurú, iisha ántar atumjin jeachmaji. <sup>2</sup> Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti péñker nékarne. <sup>3</sup> Warí, iisha Yus-Chicham atumin ujakmiaj nu nekasauyi. Tura yajauch enentáimsan, anañkatjarum tusan tíchamjarme. <sup>4</sup> Antsu Yus in péñker enentaimturmas Uwempratin Chicham etserkatarum tusa akatrampramiaji. Tuma asamtai núnisrik étseraeji. Túrasha aya aents waramtikсатаi tusar étsertsuji. Antsu Nínki Yúsak ii enentáin nekartamin asamtai, shiir enentáimtikсатаitsar túraji. <sup>5</sup> Átumka nékarne, péñkesha shírmach chichasan anañkachjarme. Nuyasha, kuit achiktai tusar ántar chichaschamji. Núnaka Yus nékawai. <sup>6</sup> Iisha Kristu akatramurintji. Tuma asar ni kakarmarijjai akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. <sup>7</sup> Antsu uchi kuírchin ni nukurí péñker

iis tsakatmana áintsarik iikia atumniaka shiir íismajrume. <sup>8</sup> Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachaaji, atumín ti anea asar<sup>i</sup>. <sup>9</sup> Yatsurú, ii atsumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékar<sup>me</sup>. Iis, Yus-Chicham étserkur, tsawa<sup>j</sup>sha káshisha takasmiaji. Nusha, akirkata, tij tusar takakmasmiaji.

<sup>10</sup> Yatsurú, atumjai pujumiaj nu<sup>i</sup> iisha Yus wakerana nu túrimiaji, tura yajauch túrutsuk shiir wekasamiaji. Nujai incha chikichkisha yajauch chichartamkatniusha atsumiaji. Nuka atumsha nékar<sup>me</sup> tura nú arant Yus nékawai. <sup>11</sup> Tura atumniasha an<sup>k</sup>ant an<sup>k</sup>ant Yúsnum ikiakármajrumna nu nékar<sup>me</sup>. Tura uchin ni apar<sup>i</sup> átsan<sup>k</sup>keana nútiksarik shiir enentáimtikramajrumna nusha nékar<sup>me</sup>. <sup>12</sup> Tura Yúsjai shiir wekasatarum tímiajrume. Yus nan<sup>k</sup>aamas uunt asa ashí akupeawai. Tura Yus-shuaraitrumna nuna, Winin pachiinkiarat tusa, Yus untsurmarme. Yus untsurma asantai Níniuitrume. Niiniu asarum Yusa uchir<sup>i</sup>a núnisrumek wekasatniuitrume.

<sup>13</sup> Yus-Chicham ii étserma antukrum, aya áentsnumia<sup>n</sup>chaiti tímiarme. Yúsnumia<sup>i</sup>ti tímiarme. Nu tiniu asarum umirkarmarme. Kame nekas tárume. Ii étserj<sup>i</sup>nia nu nekas Yusa chichamente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmi<sup>n</sup>kiaji. <sup>14</sup> Yatsurú, ju nekaatarum. Aya atumek wáitiatsrume. Ashí Jutía nun<sup>k</sup>anam Israer-shuar, ni shuar<sup>i</sup>nketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuar<sup>i</sup>n wáitkiarmainiawai. Nujai Jutía nun<sup>k</sup>anmayá Yus-shuarjai métekrak ajasurme. <sup>15</sup> Niisha Israer-shuaraitiatan Yus-Chichaman etserin armia nuna nuamtaketiat máawarmiayi. Tura nú weeák Uunt Jesusnasha máawarmiayi. Tura incha aa jiki akuptamkarmiaji. Maaj, niisha Yúsán shiir enentáimtikiainiatsui. Tura núnisan ashí áentsun kajerainiawai. <sup>16</sup> Warí, Israer-shuar<sup>cha</sup> Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújai<sup>n</sup>kia nan<sup>k</sup>aamas yamaikia túrawarai. Pai, túrasha yamaikia Yusa kajetair<sup>i</sup>i imiá tsumaj<sup>i</sup> ana nu<sup>i</sup> pujusarai.

### *Papru ataksha Tisarúnikianam irautajtsa wakerimiania nu*

<sup>17</sup> Iisha, yatsuru, ishichik tsawant atum<sup>i</sup>ija kanakir jeachat pujayatrik, atumjaisha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji. <sup>18</sup> Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji. <sup>19-20</sup> Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukrístu tátintri shiir enentáimsar náka<sup>i</sup>. Nii támatai imiá warastatji. Atumin Yus-shuar awajsa asar, Nii támatai atumsha iij<sup>i</sup>ai Jesus shiir inkiuntatji. Tuma asantai nu enentáimsar tawasap achiktinia áintsar waraaji.

## 3

<sup>1-2</sup> Iisha ataksha atumin ístaitsar ti wakerimji. Tura tujintiakur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristui Uwempratin Chicham etsermiaj nu<sup>i</sup>, Timiutéuka iij<sup>i</sup>ai métek takasu<sup>i</sup>ti. Tuma asa niisha Yusa takatrin takáa asa atumniasha Yusai kakartarum turamarti tusar akupkamji. <sup>3</sup> Tura nú arant, itiurchatan wáiniuk iniaisarain tusa ikiakátmararti tusar Timiutéu akupkamji. Yatsurú, átumka nékar<sup>me</sup>, ashí Yus-shuaraitj<sup>i</sup>nia nuka páchitsuk wáitsatniuitji. Iis, tuma asantai atumsha ti nekas itiurchatnum pujarme, Yus-Chicham umirka asarum. <sup>4</sup> Iimiatarum, atumjai nuik tuke pujumj<sup>i</sup>nia nu<sup>i</sup> “iisha wáitsartatji” tíchamkajrum. Iis, túrunachaik. Nuka nékar<sup>me</sup>. <sup>5</sup> Tura atumin íwianch tunaanum ajun<sup>m</sup>archariash tusan, wisha kúntuts enentáimsamiajai. Tura ántrar takaschaj<sup>i</sup>ash tu enentáimsamiajai. Tuma

asantai nekaataj tusan ti wakerakun, wisha ti nukap tsawant nákaschamijai. Antsu wárik Timiutéun akupkamijai. Yúsjaí péñkerash wekainia tusan, “nu inintrusam ikiuuta” timiajai.

<sup>6</sup> Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji. <sup>7</sup> Tuma asantai, yatsuru, ashí iturchat tura wáitsatin wáiniatrik átum Yus shiir enentáimta asakrumin iisha shiir enentáimji. <sup>8</sup> Atumsha Yúsjaí tariara weká asakrumin, shuar jaa péñker ajas enentáí chinkiana áintsarik enentáimji. <sup>9</sup> Yus péñker umirka asakrumin, iisha shiir waraaji. Warasu asar ii Yusri ti yúminkiaji. <sup>10</sup> Incha Yus akuptamkurniñkia atumiin tímiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

<sup>11</sup> Atumiin weri ístinian ii Apari Yussha tura ii Uuntri Jesukrístusha in yáinmaktai tusar wakeraji. <sup>12</sup> Atumin ii aneajnia núnisan Yus atumniasha mai anenai ajatniun tura chikichcha aneastinian enentáimtikramprarti. Tura nú nukap anenkrattain Yus amasarti tusar wakeraji. <sup>13</sup> Yus ikiakátmakui átum tunáa túrutsuk Yus umirkarum wekasatarum tusar ii Apari Yus seaji. Ii Uuntri Jesus Níiniurijiai winiak péñker wekaarmin tati tusar taji.

## 4

### *Péñker túratniun Yus wakerana nu*

<sup>1</sup> Iikia Uunt Jesus akupkamuitji. Tuma asar nu kakarmajai atumniasha ju túratarum tusan akupeajrume. Atumsha iwiaaku pujarmena nuj Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum. <sup>2</sup> Uunt Jesusa akupeamurijiai tura nu kakarmajai atumniasha nuik unuiniarmajrumna nu átumka nékarme. <sup>3</sup> Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”. <sup>4-5</sup> Yus-shuarcha ainia nu, Yúsan nékainiachu ásar, aya niñki enentáimtumasar aya ni ayashi wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuari péñker enentáimtusrum shiir aneasrum ayastarum. <sup>6</sup> Nú arant, amesha ame yatsum anankam ni nuari yajauch awajtusaip. Nu túrakrumniñkia ii tímiajrumna nútiksar Uunt Yus ti kakaram asutiámawartatui. <sup>7</sup> Warí, Yus incha péñkercha yajauch túratarum turamchaitji. Antsu aya péñkerak túratarum turamji. <sup>8</sup> Tuma asantai shuar ju chichaman nakitiakka áentsun nakitiatsui, antsu Yúsan nakitrait. Tura nu Yussha ni Wakanin amaawiti tunaan túrashtinian.

<sup>9</sup> Tura yamaikia nuamtak Yus-shuar aneniastin ana nuna ti neka asakrumin áatrashtatjarne. Warí, imia Niñki Yus atumin mai anenai ajatniun jintinramawarmatai nékarme. <sup>10</sup> Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumí anenkrattairi nú nukap ajasti tusan, seajrume. <sup>11</sup> Yamaikia tímiaj nútiksarmek, yayauchin túruinia nuj wekatsuk, chikich shuarna pachittsuk, atumí takatriin shiir ankant pujusrum atumí uwejejin takakma pujutarum. <sup>12</sup> Átum táasairum tusan tájarne. Túrakrumniñkia atumniasha chikich shuar péñker enentáimturmasartatui.

### *Kristu tátintri*

<sup>13</sup> Yatsuru, Yus-shuarcha ni shuari jakamtaí “atakka wáinkiashtatjai” tusa ti kuntuts enentáimainiawai. Tuma asantai atumsha nútiksarmek kúntuts enentáimsairum tusan juna tájarne. Jákaru ainia nu urukawartinkit paant nekaatarum. <sup>14</sup> Jesus jákayat nantakchamkia. Núnisan Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. <sup>15</sup> Tuma asantai Yus-Chicham nekaprutamnia

nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. <sup>16</sup> Antsu Yus akupeakui, Yusa suntarí uuntri untsumkui tura Yusa kachurin umpuarmatai Uunt Jesukristu untsumuk Yus pujamunmaya tarat-tawai. Nuiñkia Krístunu ajasar jákaru áiniana nu iwiarsumunmaya nantakiartatui emka. <sup>17</sup> Tura nuyá iisha Yus-shuar tuke iwiaaku pujajnia nu Krístujai yurañminiam ajapén inkiunaikiartatji. Nuní ashí nayaimpiniam ii Uuntri Jesukristujai tuke iwiaaku pujusartatji. <sup>18</sup> Tuma asamtai ju shiir chicham atumin ujakjana jujai mai ikiakánai ajatarum.

## 5

<sup>1</sup> Túrasha, yatsuru, ni tátintri waritin tura warí tsawantai, nuka áatratin atsumatsrume. <sup>2</sup> Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisañ nákatsuk pujuiniaj Uunt Kristu tsawantri jeattawai. <sup>3</sup> Ashí shuar “Pai, yamaikia ti nekas shiir péñker pujuiniaji” tu matsatainiaj, aya aneachma nunka mesertin tsawant jeattawai. Nuwa ajamtin aya aneachma jatema áintsañ, nékachmanum átatui. Túmakui pisartin penké atsuttawai. <sup>4</sup> Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsañ tarutrámashatui. <sup>5</sup> Enta, átumka tsáapninium wekáa asarum Yus-shuartirmeka nékaitrume. Iikia kiritniumianchuitji. <sup>6</sup> Nu tuma asar, chikich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi. <sup>7</sup> Iis, kashi kanarchatniukait. Tura nampeena nu kashi nampeenawai. <sup>8</sup> Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasri anankruawain tusa anear wekasatniuiti. Tura iisha núnisrik íwianch yajauch awajtamsajj tusar anearmi. Yus enentáimtusar aneetniuitji. Tura núnisrik iisha, ju nunkanmaya uwemprar Yúsaj tuke pujustatji, tu enentáimprar wetái. <sup>9</sup> Páantchakait. “Jinium wéchatniuitrume” Yus incha túramji. Antsu ii Uuntri Jesukristujai uwempratniun tsankatramkaitji. <sup>10</sup> Niijjai métekrak iwiaaku ami tusa Jesukristu in jarutramkamiaji. Nu tuma asamtai iisha ii ayashjjai iwiaaku pujakrishia Niijjai iwiaakji, tura ii ayashjjai jáakrishia Niijjai tuke iwiaakji. <sup>11</sup> Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

### *Papru Yus-shuaran jintintiamiania nu*

<sup>12</sup> Yatsurú, juna seajrume. Atumjai pujuinia nú shuar Yúsnañ takakmainiakui shiir enentáimtusarum. Jintinramuk chichartamainiakui umirkatarum. <sup>13</sup> Yúsnañ takainia ásarmatai ti péñker enentáimtusarum aneestarum. Tura yajauch awajnaitsuk ti shiir nawamnaikiarum matsamsatarum. <sup>14</sup> Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáintarum. Tura ashí shuarjai kajetsuk katsuntrarum wekasatarum.

<sup>15</sup> Aneartarum, yatsuru. Chikich yajauch túrutmantai amesha nútiksamek yapajki-aip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuarsha nútiksarmek túratarum. <sup>16</sup> Tuke shiir warasrum pujustarum. <sup>17</sup> Tuke tsawant iniaitsuk Yus áujasatarum. <sup>18</sup> Péñker pujakmesha, itiurchat pujakmesha ashí warí wáiniam nuisha Yus shiir yuminsatarum. Kristu Jesusaj Yus-shuar ajasutiram nu túratniun Yus wakerawai.

<sup>19</sup> Ji ikiajniaktinia núnisañ Yusa Wakaní enentáimin keana nuka tunaajai téenmamtikiarum ikiajniakairap.

<sup>20</sup> Yus jintintrar akupkamu asa péñker chichaman etserainia nu nakitirairap.

<sup>21</sup> Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. <sup>22</sup> Ashí yajauch ana nuyañka kanaktiarum.

<sup>23</sup> Yuska, imiatkinchanum wekasatin amaana nu, atumin takamtsuk shiir awaj-tamsartí. Tura ii Uuntri Jesukrístu táatsain, atumí wakaní atumí enentaj tura atumí ayashisha mash métek tunaajainchu awajtamsati. <sup>24</sup> Yus atumin untsurmakmarumna nu tímianak uminiaiti. Nii tana nuna yawetsuk túrattawai.

*Amuamunam amikmaatin*

<sup>25</sup> Ashí yatsurtiram winiasha Yus áujtursatarum. <sup>26</sup> Ashí Yus-shuar árum nu, amikmaaniatarum. <sup>27</sup> Winia Uuntru Jesukrístu chichamejai juna tájarme. Ju papí ashí Yus-shuar antukarti tusarum ashí iruntramunam áujstarum. <sup>28</sup> Ii Uuntri Jesukrístu atumin yáinmákartí. Nu atí.

## Papru

# TISARÚNIKIANMAYA SHUARAN

## Ataksha papin aar akuptukma

*Papru ni tsaniakmarijjai Yus-shuaran áatramiania nu*

<sup>1</sup> Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarme. Atumsha ii Apari Yusna tura Uunt Jesukristunu ajasuitrume. <sup>2</sup> Tuma asakrumin ii Apari Yus tura ii Uuntri Jesukristusha waitnentrama ásarmatai yáinmakar penker awajtamsarat tusan wakerajrume.

*Kristu támatai tunáa shuaran Yus asutiáttawai*

<sup>3</sup> Yatsurú, átum penker matsatu asakrumin iisha Yus tuke yúminkiaji. Átumka Yus nekas enentáimtustin nú nukap nekaakrum wéarme. Tura nuamtak aneniastincha nú nukap nékarme. Nu tuma asamta Yus yuminsatniuitji. <sup>4</sup> Átum Yus-shuar asakrumin chích shuar atumin yajauch awajtamainiawai. Tura itiurchat wainiu asarum ti wáitjarne. Nu tuma aijn átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. <sup>5</sup> “Yusa akupeamurin pachiinkiamniaitrume” Yus túramprume. Nu pachiinkiatat tau asarum ju nunkanam wáitjarne. Tura wáitiakrumsha nuna nankaamas iwiarnaruitrume nu pachiinkiatin. Kame nújainkia Yus atumin achirmak penker túrait, nuka páantaiti. <sup>6</sup> Núnisan atumin wáitkiarmainia nunasha Yus tímiatrusan wáitkiasartincha nekas penkeraiti. <sup>7</sup> Tura wáitiarmena nusha Yus íjjaisha ayamtikramprartin penkeraiti. Ii Uuntri Jesukristu ji keana ímianisan kakaram suntarijja nayaimpinmaya tara wantinkiamtai, nu tsawantai Yus ayampratniun suramsartatji. <sup>8</sup> Tura nú tsawantajsha Yúsan nékainiatsna núnaka ii Uuntri Jesukristu ti asutiátajtsa tátatui. <sup>9</sup> Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nu akupeajrume, átum winia umirtukcha asakrumin” nin tiartatui. <sup>10</sup> Kame Uunt Jesukristu tátin tsawantri jeamtai, ni shuari, ni enentái penker awajrsaru áinia nu, ni náarin shiir pachisartatui. Tura Yúsan umikiaru ásar, ti shiir enentáimsar Jesukristun ísartatui. Ii ujakmajrumna nu antukrum umirka asarum atumsha nu pachiinkiatarme. <sup>11</sup> Nu tuma asamta ii Yusrin atumin tuke áujtajrume. Yus atumin achirmakuitrume. Nuinkia Yuska atumí enentáin takas Nii wakera nujai métek awajtamsati, taji. Yus umirka asarum penker wekasataj tusarum wakerarme. Túrarum Yus enentáimtusum penker túratin wakerarme. Tura wakerarmena nu umiktin Yuska ni kakarmarijja yáintí, tu áujtaji. <sup>12</sup> Átum penker wekasa asakrumin chích shuarsha ii Uuntri Jesukristu náarin nankaamantu enentáimtusartatui. Nusha auka ii Yusri tura ii Uuntri Jesukristu waitnentáimturmasar penker wekasatniun yáinmakui túrarme. Túramtai chích shuar shiir enentáimturmasartatui.

## 2

*Tuke Tunaarintin wantinkiattana nu*

<sup>1</sup> Tura, yatsuru, ii Uuntri Jesukristu tátatna nuna tura Nijjai inkiunaiktatjinia nunasha ujaktinian wakerajrume. <sup>2</sup> Chích shuar anankramawar “Uunt Jesukristu tsawantri jeayi” tu ujamaktaj tusar wakeruiniawai. “Ímiarmaj nujai nékajai” turamainiakuiisha, “chícham étserman antukmaj nujai nékajai” turamainiakuiisha, tura “Papru papí áarmari nuna takui nékajai” turamainiakuiisha, páchim enentáimprairap. Tura sapijmiakairap tusan seajrume. <sup>3</sup> Penké anannawairap. Nekaatarum. Nu tsawant jeatsain Yúsumia

kanaktin átatui. Tura nú arant, Tuke Tunaarintin, emesnartatna nu wantinkiatstawai. <sup>4</sup>Niisha aya wíniak enentáimtursarat tusa wakerak, ántar-yusnasha tura nekas Yúsnasha shuar tikishmatrarain tusa ti nakitrattawai. Niñki ti nankaamantu enentáimtumás, Yusa nuke ajas, Uunt Yusa Jēen wayáa pujustatui. “Júiti Yús” shuar turutiarat tusa mash túrittawai. <sup>5</sup>Yatsurtiram, wi atumjai pujakun nuna ashí ujakmajrume. ¿Nuka kajinmakniurmek? <sup>6</sup>Yámaikikia, ni tsawantri jeatsain, Tuke Tunaarintin wantinkiajin tusa surimia nu nékarme. <sup>7</sup>Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. <sup>8</sup>Nuñkia nu Tuke Tunaarintin wantinkiatstawai. Tura Uunt Jesus ni wenejai umpuí aun máattawai. Tara ni wincharijjai nuna amuktatui. <sup>9</sup>Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anañkawartatui. <sup>10</sup>Jinium wémin ainia nú shuaran ashí tunáa ana nujai anañkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai. <sup>11</sup>Iis, nekas ana nuna nakitia ásarmatai, ti anañmamawar wait-chichaman umirkarat tusa Yuska tsañkatkattawai. <sup>12</sup>Warí, niisha ni tunaarin wararainiak, nekas ana nuna nakitraru ásarmatai, Yuska “jiniun wétatrume” tiartatui nuna.

### *Uwempramin ainia nu*

<sup>13</sup>Tura, yatsuru, Uunt Jesus aneamu árumna nu, iisha atumin enentáimtusar ii Yusri yuminsaji. Átum nekas ana nuka umikiurme. Tuma asakrumin Yusa Wakaní atumí enentáin péñker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume. <sup>14</sup>Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukrístu ti péñker pujana nu pachiinkiamniuram tusan ujakmajrume, nú chichaman.

<sup>15</sup>Wátsek, yatsuru, Yusjai katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. <sup>16</sup>Ii Uuntri Jesukrístusha tura ii Apari Yussha ti péñker ásar incha anenmatsjik. Tura waitnentrana ásar incha shiir enentáimtikramji. Tura nú nankaamas ii tuke péñker pujustinian ikiurtamsaitji. <sup>17</sup>Nu tuma asamtai, péñker chichastarum tusa, tura péñker takastarum tusa Jesukrístuka shiir enentáimtikramar ikiakátmarartí.

## 3

### *Papru “áujtursatarum” tímiania nu*

<sup>1</sup>Nuyá, yaturú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nunkanam wakerukartí tusarum Yus seatarum. <sup>2</sup>Tura yajauch shuar, péñker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu áiniawai. <sup>3</sup>Túrasha Uunt Jesusak atumin iniaitsuk wáitmaktatrume. Tura atumin iki-akátmartatrume. Tura íwianch anañkramataj takui kíishturmaktatrume. <sup>4</sup>Kame Yus atumin yainmaktatrume, taji. Ii tájnia nu yamá umíarme. Tura tuke umirkattarme. Nusha nekaar shiir enentáimji. <sup>5</sup>Uunt Yus yainmakartí ni anenkrattairin nekaatniun. Kristu itiurchatan katsuntramia núnisan atumniasha katsuntratniun Yus yainmaktí.

### *Takastiniaitji*

<sup>6</sup>Yatsurtiram, antuktarum. Ii Uuntri Jesukrístu chichamejai ju taji: “Nuyá Yus-shuar wi jintinramun nakitiak aya wékana nu ikiuktiarum.” <sup>7-8</sup>Ii túrajnia núnisrumek túratin nékarme. Júiti: atumjai pujusmaj nu tuke takakmasmiaji. Atumí yurumkari iisha akikmakar yurummiaji. Atumjai itiurchat áchatí tusar tsawaisha káshisha tuke takakmasmiaji. <sup>9</sup>Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji. <sup>10</sup>Warí, atumjai pujumiaj nu “Takastinian nakitiana nuka yurumáshti” tíchamkají. <sup>11</sup>Iis,

atumiinia weeá, nánkamas enentáimiainiak tura nánkamas túruiniak penké takatsuk pujuiniawai, túramainiaji. <sup>12</sup> Nú shuáran ii Uuntri Jesukrístu chichamejai “Tákamtak shiir takakmasartí” tajai.

<sup>13</sup> Yatsurtiram, yawetsuk shiir túratarum. <sup>14</sup> Ju papinium ii tájinia nuna, shuar umik-tinian nakitiakuinkia “umichuiti” tákuram, ni natsarat tusarum ikiuktiarum. <sup>15</sup> Túrasha “Yus-shuara nemasrinti” tiip. Áyatik jintintrata, tura Yúsaj enentáimtikrata, ame nekas yatsumeá áitkiasmek.

*Papru aujsua ikiuamu*

<sup>16</sup> Uunt Yuska, imiatkichu enentái susamniaiti. Jú Yus, itiurchatnum pujarminiñ atumin tuke imiatkichu enentáimtikramsarti. Uunt Yuska atumin pujurtamsarti, tajai.

<sup>17</sup> Jui wi Papru juna aajai. Wi papin akupeaj nu júnisnak winia náarun áaran apujeajai, wíniaiti tusan. <sup>18</sup> Ii Uuntri Jesukrístu atumin ashí yainmakarat tusan wakerajrume. Nu atí.



## Papru TIMIUTÉUN Emka papin aar akuptukma

<sup>1</sup> Wi Papru Jesukrístu akatramurintjai. In uwemtikkiartin Yussha tura ii Uuntri Jesukrístusha winia akuptuku ániawai. Jesukrístujai métek ti shiir ajastai tusar nákaji. <sup>2</sup> Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukrístusha ti anenma ásar waitnentramainiak imiatkinchanum ti shiir pujustinian yainmakarti.

### *Wait chichamjai anearta*

<sup>3</sup> Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuji wait-chichaman jintin ainia nu suritkiarta. <sup>4</sup> Niisha Israer-shuara weatrin áujmatsamunak tura ni weatrin naari ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha surítkiatá.

<sup>5</sup> Yus-shuar tuke enentáijjai Yúsán shiir enentáimtusar tura tunáa túrutsuk aya péñkera nuna wakerukar anenkartin ajastin ániawai. Núnisan péñker ajasat tusar Yus-Chicham étseaeji. <sup>6</sup> Chíkich shuar juna iniaisar ántar chichaman áujmatainiawai. <sup>7</sup> Yúsán nekachiat “jintinniuitjai” tuiniawai. Tura unuiniainia nuna nekainiatsui.

<sup>8</sup> Yus wakeramun nekaatin tura tunaan suritkiatin akupkamuka nekas péñkeraiti. Nu paant nekaji. <sup>9</sup> Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsánasha tura ashí Yúsánasha nakitiainia nunasha, aparín máinniasha, nukurín máinniasha, kame mankartinniasha, <sup>10</sup> nuwáncha tura áishmannasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai. <sup>11</sup> Núnisan tawai ti shiir uwempratin chicham Yus suramsamajnia nu. Nu chichamnaka etserkatniun Yus péñker asa tsankatrukuiti.

### *Yus waitnenkartin asamtai Papru yuminsamiayi*

<sup>12</sup> Ii Uuntri Jesukrístu shiir enentáimturu asa Níiniun etserturkat tusa kakarman surusuiti. Túruta asamtai yúminkiajai. <sup>13</sup> Wi Yúsán imiá yajauch chicharniuyajai. Yus-shuarnasha áintrarmiajai. Yusnasha katsekniuyajai. Túrin aijn Yus winia waitnentrurmiayi. Kame Jesuska Yus Anaikiamun nekachu asan wi túramu yajauchiiti tu enentáimchauijai. <sup>14</sup> Tura ii Uuntri Jesukrístu ti nekas waitnentrurmiayi. Tura Jesukrístujai tsaninkia pujakui Yus nekas enentáimtustinniasha tura anenkartin ajastin-niasha surusuiti.

<sup>15</sup> Ju chicham ti nekasaiti. Tunáa shuáran uwemtikrataj tusa Jesukrístu ju nunkanam taramiayi. Nunasha ashí shuar nekaatin ániawai. Tura wikia ashí shuarjai nankaamas tunáan túriniaitjai. <sup>16</sup> Ti tunáa aijn Jesukrístu ti anenkartin ana nu paant nekanati tusa Yus winia waitnentrurmiayi Tuma asamtai chíkich shuar, wijjai métek, Yúsán nekas enentáimtusar Niiijai tuke iwiaaku pujusartatui. <sup>17</sup> Yus tuke jacha asa tuke iniaitsuk akupniuiti. Wáinchataitiat imiá nankaamas nekaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisan tuke atí.

<sup>18</sup> Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawaj tusam aneamam túrata. <sup>19</sup> Chíkich shuar tunaajai anearcharu ásar

Yúsan ikiukiarmai. <sup>20</sup> Iminíusha tura Arejántrusha núnisan<sub>n</sub> Yúsan ikiukiarmatai uunt iwianchnium surukarmajai. Nujai<sub>n</sub> Yúsan ti yajauch chicharsacharat tusan túraitjai.

## 2

### *Yus áuj satin*

<sup>1</sup> Wátsek, emka seajrume Yus áujeakum Yus yuminsam ashí shuar yainkiat tusam áujtusarta. <sup>2</sup> Imiatkinchanum pujusar Yusjajsha tura áentsjajsha shiir túratai tusar tura ashí akupin ainia nusha pé<sub>n</sub>ker akupkarat tusar Yus áujtustiniaitji. <sup>3</sup> Áitkiasar seatin pé<sub>n</sub>ker asamtai, uwentikramajnia nú Yus wakerawai. <sup>4</sup> Ashí shuar nekas chichaman nekaawar uwemprarat tusar wakerawai Yus. <sup>5</sup> Aya chikichik Yus awai. Tura Jesukrístu aents ajas Yusjaj áentsun nawamnaimtikiartiniaiti. <sup>6</sup> Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi. <sup>7</sup> Nuna túratniun Yus winia akatar akuptukuityi. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrusuk nekas tajai.

<sup>8</sup> Nu asamtai áishman<sub>n</sub>ka kajetsuk yajauch tunaitsuk antsu pé<sub>n</sub>ker enentáijia<sub>n</sub>i uweje takuiniar Yúsan áuj sarti. <sup>9-10</sup> Núnisan<sub>n</sub> núwaka iwiarmamuk nekasmiancha pé<sub>n</sub>ker enentáijia<sub>n</sub>i entsararti. Chíkich shuar nu nuwan iis temashmarmarincha, sháukríncha, kurimkiamuncha, iwiarmampramuríncha núnaka enentáimtutsuk antsu ni pé<sub>n</sub>ker túrunamun enentáimtusarti. Núnisan<sub>n</sub> áchatniukait nuwá Yús-shuar ainia nujai. Ni pé<sub>n</sub>ker túramujai nekas shiir awajmamsashtinkiait. <sup>11</sup> Núwaka takamtak pujusar umiiniak unuimiararti. <sup>12</sup> Nuwan<sub>n</sub>ka ashí iruntramunam unuiniartinniasha tura ni áishrín akupkatniuncha suritajai. Antsu takamtak pujustiniaiti. <sup>13</sup> Yus emka áishman<sub>n</sub>kan Ata<sub>n</sub>kan najanamiayi. Nuyá nuwan Épan najanamiayi. <sup>14</sup> Tura Yus timian umirkach Ata<sub>n</sub>ka anan<sub>n</sub>achmiayi. Antsu Épa ananna asa tunaan túramiayi. <sup>15</sup> Túmaitiat jurertin asa, emesnartinniumiá uwempraiti. Tura Yúsan nekas enentáimtak anenkartiniaitiuk tura esetar enentáimiuk pé<sub>n</sub>ker wekasatniuityi.

## 3

### *Yus-shuaran wáinin*

<sup>1</sup> Shuar Yus-shuaran wáinkiatniun wakerakka pé<sub>n</sub>ker takatan achikiuityi. Nuka nekasaiti. <sup>2</sup> Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuityi. Niisha pé<sub>n</sub>ker esetar enentáimin naka wekasatniuityi. Íraran ni jeen ti shiir itiaatniuityi. Pé<sub>n</sub>ker jintinkratin átiniaiti. <sup>3</sup> Nampechusha tura suiir enentáimtichusha átiniaiti. Aya kuítian iki-aun<sub>n</sub>katniun enentáimtuschatniuityi. Antsu tsan<sub>n</sub>ka átiniaiti. Kajechusha átiniaiti. Chikichnancha wakerutkashtiniaiti. <sup>4</sup> Ni shuarín shiir akupeakui ni uchirísha umin tura shiir awajkartin ártiniaiti. <sup>5</sup> Kame ni shuarín akupkachminiaitkiun<sub>n</sub>ka ¿itiurak Yus-shuaran wáinkiat? <sup>6</sup> Yus-shuaran wáinniuka yama Yus-shuar ajasu áchatniuityi. Túmaitkiun<sub>n</sub>ka ti nan<sub>n</sub>kaamantu enentáimtumak iwianchjai métek tunaan túrak sumamattawai. <sup>7</sup> Yus-shuarchasha nin shiir enentáimtustin ániawai. Núnischaitkiuin<sub>n</sub>ka nin yajauch chicharainiakui iwianch wárik tunaanum ajuartatui.

### *Yus-shuaran yain*

<sup>8</sup> Núnisan<sub>n</sub> Yus-shuaran yaincha pé<sub>n</sub>ker asamtai ashí shuar nin shiir enentáimtustin ániawai. Nii tana nuna tímatusan<sub>n</sub> umin átiniaiti. Nampechu átiniaiti. Aya kuítian iki-aun<sub>n</sub>katniun enentáimtuschatniuityi. <sup>9</sup> Yúsnan ti pé<sub>n</sub>ker nekaatniuityi. Tura esetar enentáimsatniuityi. <sup>10</sup> Emka pé<sub>n</sub>ker ístiniaiti nuyá pé<sub>n</sub>ker wekaakka Yus-shuaran yain átiniaiti. <sup>11</sup> Nuwasha pé<sub>n</sub>ker asamtai ashí shuarsha nin shiir enentáimtustin ániawai.

Tsanumniuchu antsu esetar enentáimiar nii chichaa ímiatrusan umin átiniaiti. <sup>12</sup> Yus-shuaran yainkia nuwan apatkachu átiniaiti. Tura ni uchiríncha ni shuaríncha ashí shiir akupin átiniaiti. <sup>13</sup> Yus-shuaran yayaḱ nekas péñker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

### *Yusna ana nu imiá nanḱaamas péñkeraiti*

<sup>14-15</sup> Wárik íitniun wakerajme. Túmaitiatnak sétaknasha Yus-shuarjaj takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. <sup>16</sup> Maa, imiá nekasaiti, Yus iwiainturmakma ashí nanḱaamas ti péñkeraiti. Tura júiti:

Yuska aents ajas jú nunḱanam paant wantinkiamiayi.

Yus Wakancha “ti shiiraiti” Nin tímiayi.

Yusa suntarisha Nin wáinkiarimiayi.

Ashí nunḱanam nu etsernakmiayi.

Túramtai ashí nunḱanmaya shuar umirkarmiayi.

Tura nayaimpiniam waketkimiayi.

## 4

### *Amuukatin tsawantin*

<sup>1</sup> Yusa Wakanj ti paant tawai, amuukatin tsawant jeakuí untsurj aents Yus enentáimtustinian iniaisar antsu yajauch wakanin nemarsar íwianch jintíamun anturkartatui. <sup>2</sup> Yajauch shuaran anturkartatui. Nu shuar ni enentáj narúa áinin ásar ni tunáa túramun péñké enentáimtichu áiniawai. Tuma asa shiir chichainiyatan wáitrin áiniawai. <sup>3</sup> Nu shuar nuatnaikiatniun suritiainiawai. Núnisan chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yuminsar páchitsuk yuámin áiniawai. <sup>4</sup> Ashí Yus najanamu péñker asamtai nakittsuk antsu Yusan yuminsar yúatniuiti. <sup>5</sup> Yus-Chicham tana nújajisha tura yuiniak Yúsan yuminkias áujsamujaj ashí péñker ajasuiti.

### *Jesukrístu péñker takarin*

<sup>6</sup> Wi tájamna nu chíkich Yus-shuar jintintiakmeka Jesukrístu péñker takarin átatme. Tura ashí Yus-Chicham péñker jintíamu unuimiaru asam nujaj kakaram ajastatme. <sup>7</sup> Antar chichamsha tura netse chichamsha enentáimtutsuk nekas Yusna ana nu túratin kakaram ajasta. <sup>8</sup> Kame ayash kakaram awajsatniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái ju nunḱanmasha yáinmaji tura ukunmasha Yusjaj pujustin asakrin nanḱaamas péñkeraiti. <sup>9</sup> Nu imiá nekas asamtai ashí shuar nuna enentáimtustiniaiti. <sup>10</sup> Nekas iwiaaku Yus ashí shuaran uwentikramni-aiti, tura ashí Nin enentáimtuinia nú shuaran nekas uwentikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

<sup>11</sup> Nuka ashí ame jintiakum akupkatniuitme. <sup>12</sup> Ti úuntchaitkiumnisha nakitramprarain. Antsu péñker túrakum Yus-shuar unuiniarta. Chichammijajisha, túramurmijajisha, anekratmarmijajisha, nekas Yus enentáimtamujajisha, tura esetra enentáimsam Yusna péñker túramujajisha niisha túrawarat tusam iniaktusarta. <sup>13</sup> Wi jeatsain Yus-Chicham áujeakum shuar jintintiata. Túram Yus-shuar ikiakárarta. <sup>14</sup> Yus-shuara uuntri Yúsnan takastin anaitiamak uwejen awantramsarmai. Nuna túramainiak “Ju shuar kakarman Yúsnunian takustatui” túramarmia nu, kakaram ajasam tímiatrusam túratá.

<sup>15</sup> Tuke enentáimjaj wi tájamna nu enentáimtakmin ame péñker túruki wéamun nekaawartatui. <sup>16</sup> Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeka uwemprattame amesha tura ujainiam nusha uwentikrattame.

## 5

*Yus-shuarjaj ititur túratniuit*

<sup>1</sup> Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumeá nútiksamek shiir awajsarta. <sup>2</sup> Nuwá úuntchisha nekas ame núkua nútiksamek shiir awajsarta. Nuwá nátsasha nekas ame umaimia nútiksam shiir enentáimjaj péñker awajsarta.

<sup>3</sup> Wajé nekas atsumin ainia nusha yáin̄kiarta. <sup>4</sup> Tura wajé uchirtiniaitkiuñkia tura tirañkrinniuitkiuñkia, nu shuar wajén wáinkiar̄ti. Emka ni shuar̄in péñker wáinkiatniun unuimiararti. Ni apar̄í anemia núnis awantuiniak shiir wáinkiar̄ti. Núnaka Yus ti shiir enentáimtawai. <sup>5</sup> Nekas wajé niñki pujana nu Yúsan enentáimtak tsawaisha káshisha iniaitsuk Yúsan áujeawai. <sup>6</sup> Antsu aya wárastiniak wakera nuka iwiaakiat jaka áintsan̄kete. <sup>7</sup> Tura wajenka ni shuar̄i wáinkiar̄ti. Yus-shuaran yajauch chicharnaktin atsutí tusam wí tájamna nu ashí Yus-shuar ujakarta. <sup>8</sup> Shuar ni jéen pujuinia nuna nekaska wáinkiatniuiti. Tura nuyá chíkich shuárnasha yáin̄tiniaiti. Túrachkun̄ka Yus tana nuna umíatsui, tura Yus-shuarcha nujaj nan̄kaamas yajauchiiti.

<sup>9</sup> Yusa kuítrij̄aj yáinniaiktiniaitkiun̄ka wajé sesenta (60) uwí nan̄kaamas takustiniaiti. Tura chikichik aishriniak takusu átiniaiti. <sup>10</sup> Ti paant péñker túrin átiniaiti. Ni uchir̄in péñker tsakatmaashit, íraran péñker táata tíniuashit, nekasmiancha enentáimtum̄ar Yus-shuaran yáiniaashit, wáitiainia nuna waitnenniuashit, tura chikichnasha péñker túriniaitkiun̄ka maak.

<sup>11</sup> Tura sesenta (60) uwí takakchaka chíkich wajejaj iruraip. Ni ayash̄i wakeramur̄i Krístuiyá kanamtikiainiawai tura ataksha nuatnaikiatniun wakeruiniawai. <sup>12</sup> Tura emka enentáimtiarmia nuna iniaisar sumamainiawai. <sup>13</sup> Nu arantcha nakimiainiak ántar irauwear chikicha itiuarchatr̄in áujmatsachminia nunasha áujmatin áiniawai. <sup>14</sup> Nu asamtai wajé úchipiak ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurij̄aj in kajertamainiaj nú shuar yajauch enentáimturmarcharti. <sup>15</sup> Kame nuik chíkich chíkich wajé Krístuiyá kanakiar iwianchin nemarsaru ásarmatai nuna tájai.

<sup>16</sup> Áishman̄sha nuwasha Yus-shuar ainia nu ni shuar̄in wajé ákuñkia Yusa kuítr̄in seatsuk nii yain̄tí. Nujaj chíkich wajén nekas atsumainia nuna Yusa kuitri yáin̄tatui.

<sup>17</sup> Yus-shuara uuntr̄i Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimtustinaiti. <sup>18</sup> Yus-Papiniumsha núnisan̄ áarmaiti:

Jiñkiaia saepen pakartaj tusa turu takaak nájakui ni nují jiñkiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

<sup>19</sup> Chikichik shuarak Yus-shuara uuntr̄i tunaar̄in etsertukmatañkia anturkaip. Antsu jímiarsha menaintiusha tsanumtsuk métek tuiniakui anturkata. <sup>20</sup> Chíkich shuarsha ni tunaar̄in ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti. <sup>21</sup> Yussa ii Uuntr̄i Jesukrístusha tura nayaimpinmayá suntarsha ímiainiamunam “túrata” tájame. Ashí shuarjaj niisháa enentáimtutsuk métekrak túrata. <sup>22</sup> Yus-shuara uuntr̄i atí tusam wárik anaikiaip. Wárik túramka chikicha tunaar̄in sumamattame. Ashí tunaanum pen̄ké pachin̄kiaip.

<sup>23</sup> Wakemjaj jau asam aya éntsak úmutsuk karía ishichik pachimpram umarta.

<sup>24</sup> Chíkich shuara tunaar̄i wáitsatin imiá paant áiniawai wáitsatin tsawant jeatsaj̄in. Tura chíkich shuara tunaar̄in̄kia paantcha áiniawai antsu ukunam paant nekanawartatui.

<sup>25</sup> Núnisan̄ péñker túramusha ti paant áiniawai. Tura yamá páantchaitiat tuke paantcha áchammiaiti. Páchitsuk nekanattawai.

## 6

<sup>1</sup> Takarniutirmesha, atumí uuntri ti shiir umirkatarum. Túrachkumniñkia chíkich shuar Yusnasha ii unuiniamuncha yajauch áujmattsartatui. <sup>2</sup> Atumí uuntri Yus-shuar áiniakka aya Yusjají yatsum asamtai nakiarchatniuitrume. Antsu nuna nankaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

*Yusna wakeruktincha tura kuit wakeruktincha*

<sup>3</sup> Shuar ti shiir naka chichaman ii Uuntri Jesukristunu ana nuna nakitiak antsu niisháa chichaman étserkunka <sup>4</sup> nu shuar nankaamantu enentáimtumayat ántrai. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjají nupetmaktaj tusar nankaamas áujmatainiak kajernaikiar tura katseknaikiar péñker enentáimtunaitsuk <sup>5</sup> tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin áiniawai. “Yusna ana nujají kuítrintin ajasminiaiti” tuiniawai. Nu shuar pachisaip. <sup>6</sup> Shuar takakna nujajin waraakka Yusna ana nujajisha waraak ju nunkanmasha tura nayaimpinmasha nekas kuítrinniuiti. <sup>7</sup> Iis, ju nunkanam misuk támaji; núnisar misuk jiinkittiaji. <sup>8</sup> Tuma asamtai yurumkasha tura entsataisha takakkurkia nujajin warasa pujustiniaitji. <sup>9</sup> Antsu kuítrintin ajastaj tuinia nu, tunaanum awañkemkar iniainiawai. Tura antra nuna wakerukar itiurchatan wáiniainiawai. Nujají emesratniunmasha jeainiawai. <sup>10</sup> Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjají yajauch awajmamsarai.

*Yusna nu túrunat tusam kakaram ajástá*

<sup>11</sup> Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsunrata. <sup>12</sup> Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurí shuar iruntramunam etserkaitme. <sup>13</sup> Yuska ashí iwiaaku átinian súwiti. Jesukristusha Punsu Piratují nekasa nuna ti paant ujakmiayi. Tuma asamtai Yussha Jesukristusha írainiamunam nuna tájame. <sup>14</sup> Ii Uuntri Jesukristu táatsajin wi tájamna nu yapajítsuk tura yajauch chicharnakchamnia péñker umiktá, tájame. <sup>15</sup> Tsawant jeamtaí Jesukristu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjají nankaamas Úuntaiti. <sup>16</sup> Iwiaaku átinia nérenniurí Nínkiti. Ti tsápninnium pujakuí nuntumtuachminiaiti. Wáinchatai asamtai shuar péñké wáinkiacharu áiniawai. Nínki ashí shiir awajsatniuiti tura Nínki tuke ashí akupin atí. Núnisañ atí.

<sup>17</sup> Jú nunkanam kuítrintin ainia nusha nankaamantu enentáimtumasharti. Kuitcha yúpichuch menkakamnia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti. <sup>18</sup> “Péñker túratarum” tiarta. Tákumin niisha shiir enentáijají ni takakman ajamsarti. Nuyá nú péñker túramujají Yusají ikiáunkartí. <sup>19</sup> Nuna túruiniak kuítriniawartatui. Núnisañ tuke iwiaaku átinian wáinkiaratui.

*Amuak Timiutéun akatramu*

<sup>20</sup> Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip.

<sup>21</sup> Chíkich shuar nuna umirkar Yusajiyá kanakiarai.

Wátsek, Timiutéu, Yus shiir yainmakti.

Nuke atí.

## Papru TIMIUTÉUN Ataksha papin aar akuptukma

### *Papru Timiutéun áatramiania nu*

<sup>1</sup> Wi Pápruitjai. Yus wakerakui Jesukrístu akatramuri ajasuitjai. Ashí Jesukrístujai tsaniñkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti. <sup>2</sup> Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnentramainiak imiatkinchanum shiir pujustinian yainmakarti.

### *Krístunu takastiniaitjinia nu*

<sup>3</sup> Tsawajsha káshisha Yúsan áujeakun ámin tuke enentáimtusan ti shiir Yúsan yúminkiajai. Winia weatur túrawarmia nútiksanak Yúsan enentáimtakun ti shiir awajeajai. <sup>4</sup> Kanakmiaj nuí eantramiam nuna tuke enentáimtajme. Ataksha wararnaisatai tusan íitniun wakera-jme. <sup>5</sup> Yus nekas shiir enentáimtiniaitmena nuna nékajai. Nukuchrum Ruítiaasha tura ame nuku Eunisiasha emka Yúsan nekas enentáimtin ármiayi. Amesha núnisketme.

<sup>6</sup> Tuma asakmin tájame: Yusna takasái tusan winia uwejrún ámin awanteakui Yus kakarman suramsamia nujai atak kakaram takasta. <sup>7</sup> Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. <sup>8</sup> Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étserkam nujai shuar yajauch túramainiakui surimiamtsuk wáitsatin enentáimtumarta. <sup>9</sup> Ii péñker túrichu árinin Yus in anenma asa uwemtikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiayi. Yaunchu ju nuñka atsaisha in tuke waitnentrampramijai. <sup>10</sup> Turá yamá in Uwemtikkiartin Jesukrístu támatai nu anenmam paant ajasuiti. Niisha jákatniun nupetak emesramiayi. Tura uwempratin chichamjai jáchatai iwiaakman paant awajturmajai.

<sup>11</sup> Nuna etserkat tusa Yus anaitiukmiayi. Tura akattur Israer-shuarchanum akuptukmiayi. <sup>12</sup> Túruta asamtai ti wáitijai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wínian susamaj nuna ti péñker waitruktatui.

<sup>13</sup> Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujai anenkratniuitji. Tuke núnismek túrata. <sup>14</sup> Yus ámin takasat tusa suramsamu shiir takasta. Tura Yusa Wakanj in pujurtamaj nuna kakarmaríjjai túrata.

<sup>15</sup> Asia nuñkanmaja shuar mash iniaitiusarmai. Nu nekaachmaashum. Nu shuarnumiá Pijirusha Ermujenessha armái. <sup>16</sup> Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantrurhamai. Ii Uuntri Kristu ni shuarincha waitnentrarti. <sup>17</sup> Rúmanam taasha natsantrutsuk eatak wáittsuk iniaitíuschamiayi. <sup>18</sup> Ipiisu péprunam pujarin ti yainmakmiaj nu paant nékame. Tuma asamtai amuukatin tsawant jeamtaí nincha Uunt Yus waitnentrati.

## 2

### *Kakarman ajasta*

<sup>1</sup> Amesha, uchirú, Jesukrístujai tsaniñkiu asam nu kakarmajai kakaram ajasta. <sup>2</sup> Untsurí ántuiniamunam wi etserkamaj nu, shuar umikmin ainia nu jintintiawaram chikichnasha jintintiawarat tusam akupkarta.

<sup>3</sup> Ame ti penker Jesukristu suntari asam wáitsatin katsuntrata. <sup>4</sup> Suntarka ni uuntri tana nunak umiktin asa chíkich takatan pachintiuikchatniuiti. <sup>5</sup> Núnisan nakurincha nakurustinia nujai métek nakurachkunka nekas penkeran awakmakun súsatniua nuna achikchamniaiti. <sup>6</sup> Ataksha núnisan shuar ajan takaana nu, ashí shuara nankaamas nuyan yúashtinkiait. <sup>7</sup> Wats, ju menaintiu métek-taku chicham áiniawai. Penker enentáimtakmin ii Uuntri Kristu paant awajturmastatui.

<sup>8</sup> Jesukristu jaka nantakmia nu enentáimprata. Tura Uunt akupin Tawit ni weatri asantai Jesussha uunt akupin átiniaiti. Núiti wi uwempratin chichaman étsereaj nu. <sup>9</sup> Nuna étsereakun sepunam jirujai jinkiamu pujakun wáitiajai. Túrasha Yus-Chicham jinkiachminiaiti. <sup>10</sup> Ashí shuar ni shuari arti tusa Yus achikiarua nuna yáintajtsan ashí itirchatan katsunteajai. Nujai Jesukristujai tsaninkiaru ásar uwemprar tuke shiir pujusartatui Yusjai.

<sup>11</sup> Ju imiá nekasaiti:

Jesukristujai jákaitkiurkia Níjiaisha tuke iwiaaku pujustatji.

<sup>12</sup> Wáitakrishia Níjia akupkattaji.

Natsantakrinkia Niisha natsantramprattaji.

<sup>13</sup> Umichuitkiurniisha Ninkia tuke uminiaiti. Warí, Yuska ni enentáimmiyajin yapajniátsuk tuke umiktiniaiti.

### *Yusai natsaaraqaj tusam ashi túrata*

<sup>14</sup> Shuar jintintiakum ju enentáimtikrata. Ii Uuntri Yus íimmianum chichamjai yajuch tunaiyarain tusam chicharkarta. Nu tunaitin penké áantraiti antsu ántuiniana nuna yajuch awajenawai. <sup>15</sup> Yus-Chicham tuke enentáimjai penker unuimiátram shiir jintintia warta. Túrakum Yus penker írsat tusam penker takarin atá. Túramka Yusai natsaarchattame. <sup>16</sup> Jú nunkanmayanak ántar áujmatin ainia nujai kanaktia. Shuar nuna áujmataniak tunaanum nuna nankaamas wáiniawai. <sup>17</sup> Ni jintiniamusha sunkurjai métek pampaawai. Iminíusha tura Piritiusha nu shuar áiniawai. <sup>18</sup> Niisha nekas chichaman iniaisar tura ashí Yus-shuar nantaktincha nankaamasai tuñiakui chíkich chíkich shuar Yúsan naka enentáimtuiniatsui yamaikia. <sup>19</sup> Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

<sup>20</sup> Kuítrinniu jeen kurijiai najanamusha kuitjai najanamusha írunui. Nújainkia ti shiira nu takastin áiniawai. Tura numijiai najanamusha nuwejai najanamusha írunui. Antsu nújainkia nekasmiancha ainia nu takastin áiniawai. <sup>21</sup> Núniskete Yusa takatrijiai. Ashí tunaanumiá kanakir penker wekasar shiira nu takasmin átatji. Kame ashí penkera nu takasmin asakrin ii Uuntri Jesukristu wakerak penker takata nu apujtamsamniaitji.

<sup>22</sup> Natsá wakerutai iniaisam esetram penker wekasata. Amesha ashí shuar shiir enentáijiai Yúsan áujena nujai Yus nekas enentáimtakum aneniakum ti shiir pujustá.

<sup>23</sup> Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai. <sup>24</sup> Ii uuntri Jesukristu takarniuka chíkich shuarjai nemasmanaikiashitiniaiti, antsu ashí shuarjai penker nawamnaikiatniuiti. Tura waitnentáimturar penker jintintiatniuiti. <sup>25</sup> Tura umircha shuarnasha Yus ni enentáin yapajtiakui nekas chichaman shiir enentáimturarat tusa penker enentáijiai jintintiatniuiti. <sup>26</sup> Nujai íwianch ni wakeramu túrawarat tusa achikmaitiatan uwemprartatui.

## 3

### *Amuukatin tsawant jeatemantai aents ti tunaan túrawartatui*

<sup>1</sup> Amuukatin tsawant jeakui ti itirchat átatui. <sup>2</sup> Shuar aya ninki enentáimtumasantatui. Kuítian ti wakeriartatui. Nankaamantu enentáimtumartatui. Yúsnasha yajuch chicharsartatui. Aparincha umirkachartatui. Yumínsatniuncha nékachú ártatui. Ashí

Yúsnancha enentáimtuschartatui. <sup>3</sup> Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasrī ártatui. <sup>4</sup> Amikrincha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. <sup>5</sup> Yusa kakarmarī “ántrai” tuíniak péñker umirkachartatui. Túrasha Yúsan umirua núnisar túrawartatui.

Nu shuar péñké pachisáip. <sup>6</sup> Nu shuarsha shiir chichayatan anañkawar jeá wáiniawai. Tura nuwá esetar enentáimchan nekas tunaarinniun anañkainiawai. Nu nuwá ashí yajauch wakeramujai anannainiawai. <sup>7</sup> Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. <sup>8</sup> Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámprissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintíatniun péñké tujintiainiawai. <sup>9</sup> Túrasha nuna nankaamas kuakchartatui. Shuar ti paant ni netse túruiniamurin nekarawartatui. Núnisan nu jimiará iwishniujai túrunamiayi.

### *Amúak Papru Timiutéun akatramiania nu*

<sup>10-11</sup> Tura ámeke wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura aneñkratkun shiir enentáijiai katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwemtikrurmiayi. <sup>12</sup> Nekasaiti, shuar Jesukristujai shiir túrataj tákuñka ni nemasrī ántiam ti wáitsatniuiti. <sup>13</sup> Tura ashí anañkartin ainia nusha kame ashí yajauch shuarsha nú yajauch túrukiar wétatui. Iwianchjai anañkamu ásar chikichnasha anañkiar weartatui.

<sup>14</sup> Antsu ámeke unuimiam nu imiá nekasaiti tu enentáimtakum tuke emetata. Jintin-tramawarmia nú shuarsha wáitrichua nu nékame. <sup>15</sup> Úchichinmayañ Yus-Chicham nékame. Yus-Chichamka uwempratniun jintin-tramamniaiti. Nusha “Jesukristu nekas enentáimtakum uwemprattame” tawai. <sup>16-17</sup> Ni Papirin áarat tusa Yus ni shuarin áantikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá péñkeraiti. Tunáa túrajnia nu Yus-Papijiai nekatatniuiti. Tura awajiakrincha Yus-Papí núnaka paant jintin-tramji. Nuyá naka wekasatniun jintin-tramji.

## 4

<sup>1</sup> Ii Uuntri Jesukristu amuukatin tsawantai Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niisha tura Yus Apasha ímiainiamunam juna akateajme. <sup>2</sup> Uwempratnin chicham etserkata. Yúpichuchia nuisha tura itiurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. <sup>3</sup> Ukunmañka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekapea áintsan, nankaamas unuimiaru atai tusar, nankamas unuikiartinian ti untsurí eakartatui. <sup>4</sup> Nekas shiir chichaman iniaisar ikiuiniak ántar áujmatsamun enentáimtusartatui. <sup>5</sup> Antsu ámeke tuke péñker túratin wakerakum ashí itiurchat katsuntrata. Uwempratnin chicham étserkum takatrum péñker umikta.

<sup>6</sup> Ishichik ajasai winia iwiaakmar Yusai surumaktin. Mantamnan nayimpiniam wétin jeatimiai. <sup>7</sup> Shuar kakaram maanainia núnisnak tuke kakaram takasmajai. Tséken péñker tsekea áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai. <sup>8</sup> Tuma asamtai tawasap nukajai najanam tsékena susamua áintsan



wisha péñker túramunam akinkiattajai. Tura aya wíniak akirkashtatui. Antsu ashí ni tátinian shiir enentáijjiai nákania nunasha nekas péñkera nuna akikiartatui.

*Timiutéu túratin akatmamturma*

<sup>9</sup> Wárik iiraitin enentáimturata. <sup>10</sup> Témas aya jú nunkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi. <sup>11</sup> Túrawarmatai aya Rúkas wijjiai pujawai. Márkus eaka wáinkiam ame itiaritia. Jui ti penker yainkiamniaiti. <sup>12</sup> Tura Tíkikiunka Ipisiu péprunam akupkamjai. <sup>13</sup> Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska penké papí takurtuktia.

<sup>14</sup> Arejántruca jirujai takawa nu ti yajauch awajtusuiti. Túrutaitkiuisha ni túramujai métek Yus akikti. <sup>15</sup> Nu amesha péñker wáinkiatá. Ii étsereamun penké nakitiawai.

<sup>16</sup> Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak. <sup>17</sup> Tura ii Uuntri Jesukrístu ni kakarmarín surus yaintkiamiayi. Nujai uwempratin chichaman ashí nunkanam Israer-shuarsha antukarti tusan etserkamjai. Tura núnisan akupniunmayasha ii Uuntri uwentikrurmiayi. <sup>18</sup> Tura núnisan ashí yajauchia nuyá uwentikrurmatai Nii akupeana nuñ nayaimpiniam jeattajai. Niñki tuke shiir awajnasti. Núnisan atí.

*Amikmaamiania nu*

<sup>19</sup> Piriskancha ni áishri Akiranacha amikmainiajai. Núnisnak Unisépuru shuarincha amikmainiajai. <sup>20</sup> Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. <sup>21</sup> Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

<sup>22</sup> Ii Uuntri Jesukrístu ámijjai tsaniñ pujustí. Tura Yus ashí péñker waitmakarti. Nuke atí.

## Papru TITIUN papí áatramu

### *Papru Titiun áatramiania nu*

<sup>1</sup> Wikia Pápruitjai Yusa takarniuri. Tura Jesukrístu akatramuríntjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui. <sup>2</sup> Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunñkan najantsuk, “uwemtikrattajai” Yus tímiayi. Tura Niisha wáitruatniun tujintiawai. <sup>3</sup> Tura yamaikia, tsawant jeamtaí, nuna nekaawarat tusa ii Yusri uwemtikkiartinia nu, winia chichamur ujakarta tusa, winia akatturmiayi.

<sup>4</sup> Titiu, wi Yusna étserma umikiu asakmin winia uchirua áitkiasnak papin áateajme. Iis, iijjaj métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Apari Yussha, ii Uuntri Jesukristusha, Uwemtikkiartin ana nu, enentáimin imiatkincha awajtamsati, tajai.

<sup>5</sup> Wats, wi iwiarachmajna nu ame iwiarata tusan Kreta nunñkanam ikiukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

### *Yus-shuaran wáinin*

<sup>6</sup> Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirisha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti. <sup>7</sup> Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtaí nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kuítrintin ajastaj tusa wakerukchatniuiti. <sup>8</sup> Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunñkanmaya akupeamuncha, núnisañ Yús akupeamuncha umirkatniuiti. Tura niñki ímiastiniaiti. <sup>9</sup> Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuimiátramiania nuyá kanakchatniuiti. <sup>10</sup> Nekaata. Umichu ti irunui. Niisha ántar chichau ásar anañmau ániawai. Israer-shuar weenam ti irunui nú shuar. <sup>11</sup> Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni írutkamurijjaj yajauch enentáimtikiainiawai. Tuma asamtaí auka, ni wene epetkatniuiti, ántar chichainiakui. <sup>12</sup> Warí, imia Krétanmaya chichaman etserin juna tíchamka: “Krétanmaya aentska tuke wáitrin ániawai. Tura nákitiat ti yurumin ániawai. Yajasma núnisañ ániawai.” Nuna tíchamka. <sup>13-14</sup> Maa, niisha nékasañ tímiayi. Nu tuma asamtaí, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsan nekas umirkarat tusam, umichu shuar kakaram chicharkarta.

<sup>15</sup> Enentáimprata. Yus-shuarka, ni enentái chamir ajasu ana nuka, ashí ni wainnia nuna péñkernak enentáimtawai. Tura chíkich shuar, Yúsan umirkachu asa, ni enentái wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai. <sup>16</sup> Tura niisha “Yus-shuaraitjai” tuíniayatañ, Yúsan umirtsuk niisháa túruiniawai. Tuma ásar mujjmiaí ániawai niisha. Umichu ásar péñkeran túratniun penké tujintiainiawai.

## 2

### *Pénker jintintiatin*

<sup>1</sup> Tura amesha, Tituu, pé<sub>n</sub>ker chicham etserkata. Yus-Chicham tátsuna nu etserkaip. <sup>2</sup> Antsu áishman<sub>n</sub> katsunt Yusna ainia nu, ju jintintrata. Nampechu, ná<sub>n</sub>kamas enentáimcha, esetas enentáimin arti. Yus tana nuna umirin tura anenain arti. Ni itiurchatr<sub>iin</sub> Yúsan enentáimtusar katsuntin arti. <sup>3</sup> Tura nú<sub>n</sub>ismek nuwa<sub>n</sub> katsunt Yusna ainia nusha ju jintintrata. Niisha nú<sub>n</sub>isaran<sub>n</sub> Yus-shuarti túramnia nuna pé<sub>n</sub>ker túrawartí. Tsanumin tura nampen áchartí. Antsu pé<sub>n</sub>ker wekasatniun unuinin arti. <sup>4</sup> Niisha yama nuatnakua nuna ni áishr<sub>iin</sub> ni uchir<sub>iin</sub>cha nekas aneetniun unuiniarartí. <sup>5</sup> Junasha jintintrartí. Esetas enentáimin, pé<sub>n</sub>ker wekain ártiniaiti. Ni takatr<sub>iin</sub> pé<sub>n</sub>ker takastin ániawai. Ni áishr<sub>iin</sub> umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkar<sub>iin</sub> tusar túrawartiniaiti. “Tu jintintrarta” titiá.

<sup>6</sup> Nuyá, Tituu, natsa áinia nu “ná<sub>n</sub>kamsar enentáimsarum wekasairap” titiá. <sup>7-8</sup> Tura amesha, Tituu, ashí tsawant pé<sub>n</sub>ker wekasatá. Nu natsa wi túramun júkiar nunak túrawarmi tusam, nu túrata. Tura anturtamna nu “nekaschapitia” t<sub>iin</sub> tusam, esetsam enentáimsam, Yus-Chicham tana nu ímiatrusmek jintintiata. Nú túrakmi<sub>n</sub>kia, Yus-Chichaman nakitiana nu shuar “Tituu ná<sub>n</sub>kamas chichaawai” titiaj tukamá, natsa<sub>a</sub>mak tujintramkattawai.

<sup>9</sup> Takarin ainia nu, ni takartair<sub>iin</sub> umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá. <sup>10</sup> “Kasamkairap, tura aná<sub>n</sub>kawairap. Iis, pé<sub>n</sub>ker túrakrumka, takarniuitiatrum, shiir tura asarum ii Uwemtikramin Yusr<sub>i</sub> chichamen shíiraiti, tu enentáimtikrattarme” titiá.

<sup>11</sup> Yus in waitnentrama asa ashí áentstin uwemtikramprataj tusa wakerutmaji. <sup>12</sup> Kame Yus waitnentrama asamtai, tunáa ana nu iniaisatniuitji, nu nékaji. Tura ju nun<sub>n</sub>kanmaya yajauch ana nu wakerukchatniuitji. Tura antsu ju nun<sub>n</sub>kanam pujayatrik esetsar enentáimsar ana<sub>n</sub>ma wekatsuk tuke tsawant Yus anear wekasatniuitji. <sup>13</sup> Túrar ii Yusr<sub>i</sub> Jesukrístu, uwemtikramajnia nu, imiá shiir iwiarnar tatí tusar nákastiniaitji. <sup>14</sup> Jesukrístuka in jarutramkamiaji, ii tunaar<sub>iin</sub>ia uwemtikrampratajtsa. Tura, Winia ajarar tuke enentáij<sub>i</sub>ai pé<sub>n</sub>ker túrawarat tusa, ii tunaar<sub>iin</sub> japirtampramiaji.

<sup>15</sup> Tituu, anaikiamu asam arantutsuk nu jintintrata. Yajauch ana nuna túrawar<sub>iin</sub> tusam chicharkarta. Pé<sub>n</sub>keran túruinia nu ikiakárta. Tura yajauch chichartukar<sub>iin</sub> tusam tuke pé<sub>n</sub>ker wekasata.

## 3

### *Yus-shuarti túratin*

<sup>1</sup> Tituu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. ““Pé<sub>n</sub>keran túratin ana nuna páchitsuk túrattajai” títiniaitume” titiá. <sup>2</sup> “Tsanumprairap, kajernaikairap, antsu shiir enentáimtunaistarum” titiá. Nan<sub>n</sub>kaamantu enentáimtumatsuk ashí shuar pé<sub>n</sub>ker awajsatarum tusam tu jintintrarta. <sup>3</sup> Warí, iisha nú<sub>n</sub>isrik Yus-shuar ajatsuk ná<sub>n</sub>kamsar wekaimji, Yuska umirtsuk. Tura íwianch emetamu pempée wekaimji. Tura ii ayásh<sub>i</sub> wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. <sup>4</sup> Túrasha Yus in uwemtikkiartin ana nu, anen<sub>n</sub>kratin asa, ni anen<sub>n</sub>krattair<sub>iin</sub> ashí áentsun iniaktus in uwemtikrampramiaji. <sup>5</sup> Yus in waitnentrama asa, iikia júkesha pé<sub>n</sub>ker túrachma a<sub>iin</sub> uwemtikrampramiaji. ¿Itiurak uwemtikrampramiaj? Ii tunaar<sub>iin</sub> asakátrampramiaji, nijiaktinia áintsan. Tura Yusa Wakan<sub>i</sub> pujurtamkurin, ii iwiaakmar<sub>iin</sub> yamarman amasmaji. <sup>6</sup> Jesukrístu jakamuj<sub>i</sub> Yus in emeenturmatsuk ni Wakan<sub>iin</sub> suramsamiaji. <sup>7</sup> In anenma asa nuna túramiayi. Nu<sub>n</sub>kia iisha yamaram awajsamu asar tuke iwiaaku átin, ti wakerimiaj nu íniuiti. <sup>8</sup> Nuka ti nekasaiti. Tuma asamtai Yúsan umirkarmia nu, pé<sub>n</sub>ker túratniun tuke wakerukarat

tusam tuke jintinki wetá. Wi tímiajna nu, pé<sub>n</sub>ker asamtai, ashí aents nuna nekaatniun atsumainiawai. <sup>9</sup> Shuar netse áujmatainiakui ameja pachisaip. Tura “aya winia úntruk pé<sub>n</sub>ker áiniawai” tu chichasaip. Tura Israer-shuara akupkamurj̄ itiurkit tusa shuar ti áujmatainiakui nusha pachisaip. Ántrai<sub>t</sub>i nuka. Pé<sub>n</sub>ker wekasatniun yayatsui.

<sup>10</sup> Shuar tsanumprur yajauch enentáimtunaimtikiana nu chicharkata. Ántachkuin<sub>k</sub>ia ataksha chicharkata. Tura pen<sub>k</sub>é tujinkiamka j̄i<sub>k</sub>i akupkata. <sup>11</sup> Nujai juna nekaamni-aitme: nuna tura asa awajiruiti. Tura ni tunaar<sub>i</sub>n<sub>i</sub>n̄ jakattui.

*Papru wakerana nu*

<sup>12</sup> Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Jui Neka-purishum yumí nantu asamtai seturan pujuttajai. <sup>13</sup> Senas, chichaman ti unuimiaru pujana nu, amikiur Apurusj̄ai jeamtai, nii atsumtsuk shiir weartí tusam, ame túratin jeamna nu yain<sub>t</sub>a. <sup>14</sup> Iiní Yus-shuar ainia nusha pé<sub>n</sub>ker túratniun tura atsumainia nunasha yáin<sub>t</sub>inian nekaawartí. Ántar pujusar<sub>i</sub>n̄ tusan nuna tajai.

<sup>15</sup> Ashí wijj̄ai pujuinia nu amikmaatmainiawai. Tura ii amikr̄i Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

## Papru JIRIMIÚŃKAN papí áatramu

### *Papru JirimiúŃkan papin áatramiania nu*

<sup>1</sup> Wi Papru ju papin áaran akuptajme ámin, Jirimiunká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijiai tsaniŃkia takáa asakmin ju papin akuptajme. <sup>2</sup> Núnisan ame jeemiin Yus-shuar irunainia nunasha tura ii umaj Apiancha tura Arkipiuncha iijiai ti kakaram takasu asamtai ju papin akuptajrume. <sup>3</sup> Yus ii Apari tura ii Uuntri Jesukrístu shiir enentáimturma ásar yainmakarti imiatkinchanum tuke shiir pujustinian.

### *JirimiúŃ pėnker Yus-shuar ámiayi*

<sup>4-5</sup> Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúmiŃkijajai. <sup>6</sup> Áujeakun chíkich shuarsha ámijiai métek Yúsan nekas enentáimtuiniak ashí pėnker ana nuna ti paant nekaawarat tusan seajai. Ashí pėnker ana nuka Jesukrístu shiir awajsamujai takakji. <sup>7</sup> Wisha ame anenkratmajai ti shiir enentáimtakun waraajai. Yatsurú, ámijiai ashí Yus-shuarsha shiir enentáimiainiawai.

### *Papru Unisemun waitnentratiun JirimiúŃkan seamiani nu*

<sup>8</sup> Nu asamtai kakaram tátsujme. Kame wakeraknaka Kristu akatramu asan “Ju túrata” tímíniaitjiame. <sup>9</sup> Antsu aneakun aya júnisan tájame. Wi Papru úuntach asan tura Krístun takarkun sepunam pujakun <sup>10</sup> Unisemu waitnentrati tusan seajme. Niisha wi ujakmajai Yus-shuar ajasu asa winia uchirua áintsanĳete. Sepunam pujayatan ni aparíya áintsanak ajasjai.

<sup>11</sup> Nuikkia Unisemu ántrauyi antsu yamaikia aminiisha winiisha yáimniuiti. <sup>12</sup> Ataksha awantajme. Wi ti pėnker aneamu asamtai pėnker itiaata. <sup>13</sup> Wi Yus-Chichaman étserkun sepunam pujajai. Túmakun ame yajá pujakum yáintkiatin tujintiakmin nii antsu wijiai pujus yáintkiat tusan wakerimjai. <sup>14</sup> Túrasha ámin ujatsuk túrachmin enentáimpramjai. Kame ame wakerakum útsukchamujai “pujustí” tákumninkia maak. <sup>15</sup> Júnissha enentáimpramniaiti. Unisemu ishichik tsawant menĳakamai tura yamaikia waketki ámijiai tuke pujustatui. <sup>16</sup> Kame yamaikia emetachma antsu ame aneamu yátsumeá áinis átatui. Nuka ti pėnkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

<sup>17</sup> Wisha ti pėnker amikrumchakaitiaj. Tuma asam winia itiaarua nútiksam shiir awayáta. <sup>18</sup> Yajauch awajtamĳaitkiuinĳia tura ámijiai tumashitkiuiŃsha wi akiktatjai. <sup>19</sup> Wi Papru nekas winia uwejruijai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum. <sup>20</sup> Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikrurta.

<sup>21</sup> Ti pėnker uminiaitme nuna nékakun júnisan áatjame. Tura wi seajmena nuna nanĳaamas túrattamna nuna nékajai. <sup>22</sup> Ayu. Átum Yus áujturkurmin Yus winia tsanĳatruktatui atumijn iiraitniun. Tuma asamtai wi nuĳ jean pujustin iwiarturata.

### *Amikmaamiania nu*

<sup>23</sup> Épaprassha niisha Jesukrístunu étseruk sepunam wijiai pujus amikmaatmarme. <sup>24</sup> Núnisan Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

<sup>25</sup> Ii Uuntri Jesukrístu atumniasha ti shiir yainmakarti.  
Nuke atí.

## ISRAER-SHUARAN papi akuptukma

### *Yus ni Uchiríjiai ni chichamen ujatmakji*

<sup>1</sup> Yáunchuka Yúsnan etserniujai chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitíncha niisháa niisháa chichas ujakmiayi. <sup>2</sup> Antsu jú amúamu tsawantajkia ni Uchirí Jesukrístujain ashí Niiniu ana nuna ujatmakji. Yus Niijiai ashí írúnna nuna najana asa mash Nin súsaiti. <sup>3</sup> Niyaiti Yusan imiá métek nakumeana nu. Tura Niyaiti Yus nankaamas shiira nuna paant awajeana nu. Niisha aya ni chichamejai kakarma nujai ashí írúnna nuna wáiniuk emeta pujurui. Tura ii tunaarín nijiatramak akupin pujutainium, Yusa untsuurini, pujusmiayi.

### *Nayaimpinmaya suntarjai Kristu nankaamantuiti*

<sup>4</sup> Yusa Uchirí nayaimpinmaya suntarjai imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai.

<sup>5</sup> Wátsek, nayaimpinmaya suntaran chikichkinkesha juna tútsuk Krístun tímiayi: “Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

<sup>6</sup> Tura jú nunkanam ni Iwiairín akupeak tímiayi:

“Ashí Yusa suntarj tikishmatrarti.”

<sup>7</sup> Nayaimpinmaya suntarnan júnis chicharui:

“Nayaimpinmaya suntarín takartursarat tusa nasea áintsan awajsaiti. Ni suntarín chárpia áinis akupeawai.”

<sup>8</sup> Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti. <sup>9</sup> Péñkera nu ane-naitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujai nankaamas uunt awajtamsaiti.”

<sup>10</sup> Nu arantcha tawai:

“Uuntá, yámankamtaik Ame jú nunka najanamiamé. Túram ame uwejmijiai nayaimpisha najanaitme. <sup>11</sup> Nusha mai amuukarmataisha Ame tuke pujuttame. Tarachjai métek mamurartatui. <sup>12</sup> Tura ipijram ikiustatme. Pushiya áintsam yapajiáttame. Túrashá Ámeka núnismek átatme. Játsuk tuke pujuttame.”

<sup>13</sup> Ataksha tímiayi:

“Akupin pujutainium, winia untsuurini, pujusam nákarsatá. Ame nemasrumin nu-petkan Ámin umirtamkarti tusan amastatjai.”

Núnisan nayaimpinmaya suntaran penké tíchamiayi. <sup>14</sup> Antsu Yusa suntarj wakan áiniak ashí shuar uwemprartatna nuna yáinkiarat tusar Yus akupkamu áiniawai.

## 2

### *Anearta. Uwempratin Chicham nakitrashtiniaiti.*

<sup>1</sup> Nuikia Kristu ti uunt asamtai ashí Niiniu antukajnia nujai kanakchatin ti enentáimtustiniaitji. <sup>2</sup> Yaunchu nayaimpinmaya suntar Muisaisan súsarmia nú akup-kamu nekas uminkiatniuyayi. Shuar umitsuk tunaan túramtai ti kakaram asut-niáwarmiayi. <sup>3</sup> Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nankaamas uwemtsuk asutniáttaji. <sup>4</sup> Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian

kakarman Yus iniakmasmiayi. Núnisañ ni Shiir Wakanj ni wakerana núnisañ niisháa niisháa kakermajaj takamtikeawai. Nujaj Yus-Chichama nu paant nekanamniaiti.

### *Jesukrístu aents ajasmiania nu*

<sup>5</sup> Ayu. Nuik áujmatkur “jú nunka amuukattawai” taji. Tura yamaram nunkanam nayaimpinmaya suntar akupkachartatui. <sup>6</sup> Antsu ii akupkattajnia nu, Yus-Papinium áarmaiti:

“¿Shuarti warimpiaitiaj ame imiá enentáimtitniusha? Kame, ¿shuar warí asamtai pujursataj tamea? <sup>7</sup> Ishichik tsawant nayaimpinmaya suntarjaj péejchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsankatkattame. <sup>8</sup> Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. <sup>9</sup> Tura wáinjinia nu Krístuiti. Niisha aents ajas ishichik tsawant nayaimpinmaya suntarjaj péejchach ajasmiai. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

<sup>10</sup> Ashí írúnna nu Yus najanamun ásar ni wakeramun umiktin ainiawai. Tura ashí ni uchirisha ni shíirmarin pachiinkiarat tusa wakerawai. Tuma asa Yuska Jesukrístun, nu shuaran Uwemtiknia nuna, ni waitsmujaj nekas Uwemtikkiartin awajsamiayi. <sup>11</sup> Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparinti. Nu asamtai Yusa Uchiri nu shuaran “yatsur” títinian natsantatsui. <sup>12</sup> Yus-Papinium núnisañ tawai:

“Ame náarmin winia yatsurun ujakartatjai. Ashí iruntramunam kantampruattajme.”

<sup>13</sup> Ataksha ni shuarijaj métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjaj Yúsan umirkun pujajaj” tawai.

<sup>14</sup> Tura nu uchi aents ásarmatai núnisañ Jesussha aents ajasmiai. Tura aents ajas jaka, iwianchin, jatai nérenniurin, ashí emesramiai. <sup>15</sup> Tura ti untsurí shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant ániawai. <sup>16</sup> Maa, imiá nekasaiti, nayaimpinmaya sun-taran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. <sup>17</sup> Túratin asa penké métek ni yachía áinis ajasmiai. Nujaj in tuke waitnentrampromniaitji. Tuma asa Yúsnan pujurniu uuntri ajas Yúsan tuke penker chichartamsamniaitji. Núnisañ murikiun maa Yus súsatniua áintsañ ni jakamujaj ashí shuara tunaarin tsankurniuiti. <sup>18</sup> Tura imia niniki waitsa asa tura íwianch nekapsamu asa yamaikia iisha wáitiakrincha tura íwianch nekapramkurnisha yainmakminiaitji.

## 3

### *Jesus Muisaisjaisha nankaamantuiti*

<sup>1</sup> Tuma asamtai, penker yatsuru, atumniasha Niiniu atí tusa Yus achirmakuitrume. Tuma asarum Kristu Jesus penker enentáimtustarum. Niisha Yus nekas Akatramuyayi. Tura ashí Yus-shuar ajararua nujaj Yúsnan pujurniu uuntria núnisaiti. <sup>2</sup> Nu atí tusa Yus anaikiamiayi. Túramtai Kristu nuna ti penker takasuiti. Núnisañ Muisais ashí Yusa aentsrin, Israer-shuar armia nuna ti shiir wainkiamiayi. <sup>3</sup> Túrasha Muisaisjaj nankaamas Kristu ti shiir awajnasuiti. Jeajaj nankaamas jea jeamniuka nekas penkerchakait. Núnisañ Kristu Muisaisjaj nankaamas penkeraiti. <sup>4</sup> Kame ashí jean shuar jeamtsuk. Tura Yus ashí írúnna nuna najanaiti. <sup>5</sup> Wats. Muisais Israer-shuaran wáiniuk Yusa Jeen takastinia áintsañ penker takarniuyayi. Tura ni takaak ukunam Yus títiatna nuna etserkatniuyayi. <sup>6</sup> Túrasha Kristu Yusa Jeen takarniuchu asa antsu Yusa Uchiri asa nu ashí akupeawai. Nu jeasha iitji. Tura tuke iniaitsuk kakaram ajarar Yus suramsattaj nu wararsar nákastiniaitji.



### *Yusa shuari shiir pujustin*

<sup>7</sup> Nu asamtai, Yusa Shiir Wakani Yus-Papinium tawai:

“Yamaikia, Yus tana nu antakrumka <sup>8</sup> nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yusan nekapsar akajkarmiayi. <sup>9</sup> Turamtai Yus timiayi “Nui atumi uuntri nekaprusar akajtukarmiayi. Kuarenta (40) uwitin wi kakaram turamun isarsha nakitrurarmiayi. <sup>10</sup> Tuma asarmatai nu shuaran kajerkan tiarmajai “Nu shuar ni enentain tuke awajiniawai. Tura Wi taman umirkatniun nakitiainiawai” timiajai. <sup>11</sup> Tura kajerkan nekas takun “Wijiai shiir pujustinian penke tsankatkachartatjai” timiajai” timiayi Yús.”

Tu áarmaiti.

<sup>12</sup> Anearta, yatsuru. Yajauch enentaimsarum tuke iwiaaku Yus enentaimtutsuk kanakirap. <sup>13</sup> Kame kashinkia tunaajai anannam enentaimin Yúsna nakitrashtapash. Tuma asamtai yamaik tura ashí tsawant ikiakánairatarum. <sup>14</sup> Yámankamtaik Kristu shiir enentaimtusmaj núnisrik tuke iniaitsuk émetekrikia Krístujai shiir tsaninkiar pujustatji.

<sup>15</sup> Nu asamtai Yus-Papí tawai:

“Yamaikia, Yus tana nu antakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

<sup>16</sup> Muisais Ejiptu nunkanmaya jikmia nú shuar Yusa chichamen anturkariat nakitrarmiayi. <sup>17</sup> Tura umiiniachkui kuarenta uwí kajerkarmiayi. Tunaan turawaru ásar untsurí shuar aents atsamunam kajinkiararmiayi. <sup>18</sup> Kame umirkacharunka Yus “Wijiai shiir pujustinian penke tsankatkachartatjai” timiayi. <sup>19</sup> Iis, Yusan enentaimtachu ásar Nijiai shiir pujustinnium wayatniun tujinkiararmiayi.

## 4

<sup>1</sup> Nu asamtai, ii wayatin tsankatkamu áyatar Yusjai shiir pujustinnium páchitkiachu aij tusar aneartiniaitji. <sup>2</sup> Yaunchu nu shuaran ujakarmia núnisan incha Uwempratin Chichaman ujatmakuitji. Nu shuar Yusan enentaimtutsuk antukaru asarmatai nu chicham yaincharmiayi. <sup>3</sup> Antsu iikia ni chichame enentaimta asar Yusjai shiir pujustinnium nekas wayaji. Tura chikichan Yus timiayi:

“Nu asamtai kajerkan nekas takun “Wijiai shiir pujustinian penke tsankatkachartatjai” timiajai” timiayi. Kame Yus jú nunkan najana umik nuyá shiir pujus ayampramiayi. <sup>4</sup> Yus-Chichamnum ayampramun júnis tawai.

“Yus sais tsawant takakmas nuyá tsawantai ayampramiayi.”

<sup>5</sup> Tura ataksha tawai:

“Wijiai shiir pujustinnium wayá ayamprashtatui.”

<sup>6</sup> Shuar nuí wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. <sup>7</sup> Nu asamtai ataksha Yus wayatin tsawantan áanturmaitji. Nusha yamá tsawantaiti. Wats, Israer-shuar ni nunke Yus susamunam wayáwarmiayi. Tura nuna ukunam Uunt Tawit timiajai Yus ni chichamen ujatmaji:

“Yamaikia, Yus tana nu antakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” timiayi.

<sup>8</sup> Kame ni kapitiantri Jusué Israer-shuaran ni nunkeen awayá ayamtikraitkiuinikia Yus ukunam ataksha tsawantan áanturmachaaji. <sup>9</sup> Nujai páantaiti, ashí Yus-shuar Yusjai shiir pujusar ayampratin tuke awai. <sup>10</sup> Yusjai ayampra nu, ni kakarmarijiai takastinian ayampraiti Yus ni takatrijiai ayampramia núnisan. <sup>11</sup> Nu asamtai iisha Yusjai shiir pujustinnium pachiinkiahaj tusar Yus shiir enentaimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

<sup>12</sup> Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentain init wayá ashí ni enentaimmian tura wakeramurin ti paant

awajtawai. <sup>13</sup> Yus najanamuka penké Nin umprukchamniaiti. Ashí írunna nu Yus ímmianum misúa áintsan paant ániawai. Tura ii túramu ashí paant ujakartatji.

*Jesus nekas Yúsnan pujurniu úuntrinti*

<sup>14</sup> Jesus Yusa Uchiri nekas Yúsnan pujurniu uuntri ajas Yusaj wayá iiniun chichartamji. Nu asantai iniaitsuk tuke nekas enentáimtustiniaitji. <sup>15</sup> Niisha iijjai métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrín waitnentranniuitji. Tura Yúsnan pujurniu uuntri asantai <sup>16</sup> Yús-akuptainium shiir enentáijjai sapijmiatsuk jeamniaitji. Tura Yus in anenma asa waitnentramak itiurchat pujajnia nu jainmaktatji.

## 5

<sup>1</sup> Tura Yúsnan pujurniu úuntriakia shuar anaikiamuiti tura ni takatrí jímiaraiti. Yusaj shuaran chicharsatniuiti. Nuyasha Yus suíniamun súsatniuiti tura núnisan namanken maa Yúsan súsatniuiti shuara tunaarín asakátratniun. <sup>2</sup> Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentranniaiti. <sup>3</sup> Tura niisha tujintia asa ni tunaaríncha chíkichnajai métek tsankurnarat namanken maa Yúsan súsatniuiti.

<sup>4</sup> Shuar ni enentáijjaiakia Yúsnan pujurniu uuntri ajaschamniaiti. Antsu Yus nu shuaran anaikiatniuiti. Núnisan Arunkan anaikiamiayi. <sup>5</sup> Núniskete Krístujai. Niisha ni enentáijjai Yúsnan pujurniu uuntri ajaschamiayi. Antsu Yus Nin anak nujai shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakeajme.”

<sup>6</sup> Tura ataksha Yus-Papinium júnis tawai:

“Mirkisetékka Yúsnan pujurin amia núnismek Amesha tuke Yúsnan pujurin átatme.”

<sup>7</sup> Kristu jú nunkanam pujak kakantar úutuk Yúsan ti seamiayi. Nin jákatniunmaya uwentikramnia asantai seamiayi. Tura Yusa wakeramurín tuke enentáijjai enentáimtakui Yus anturak ti yáinmiayi. <sup>8</sup> Nujai Kristu Yusa Uchiríntiat ni wáitsatniujai umirkatniun unuimiarmiayi. <sup>9</sup> Nujai ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsnantikrarminiaiti. <sup>10</sup> Túramtai Yus Nin Yúsnan pujurniu uuntri Mirkisetékjai métek awajsamiayi.

*Anearta. Yusjai kanakchatniuiti.*

<sup>11</sup> Ju ti nukap áujmatsatin awai. Túrasha ántichu asakrumin mashi ujakchamniaitjiarme. <sup>12</sup> Átumka yaunchu mash nekaamaintrume. Túmaitiatrum ataksha yaitiás Yúsnan jintintruat tusarum atsumarme. Warí, kuirchia núniniaitrume. Kátsuram yútsuk muntsu muntsúatniuitrume. <sup>13</sup> Kuírchikia Uwempratin Chichaman áujenak pénger unuimiainiatsui. Tiníamnumia ásar tujintiainiawai. <sup>14</sup> Apatuk kátsurman aya uunt yuámniaiti. Uunt ainia nuka péngkernasha tura yajauchincha apatkar paant nékainiawai.

## 6

<sup>1</sup> Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka unuimiartinia nu ju ániawai: shuar ni tunaarín jákatniunam júana nuna kúntuts enentáimtur Yúsan shiir enentáimtustincha, <sup>2</sup> imiantinnium nekaatniuswai: “Mirkisetékka Yúsnanha, Yus-shuar yainmanum uweje awantsatniusha, jakamunmaya nantaktincha, tura sumantikiatin tsawanta nu nekaatniusha. <sup>3</sup> Tura Yus yáinmakrin nuna nankaamas nekaattaji.

<sup>4</sup> Shuar Yusna nuna nekaanka tura Yus susamun takakkuŋka tura Yusa Shiir Wakaní kakarmarín nekapsaitkiunka <sup>5</sup> tura Yusa chichamencha péngeraiti nekaanka tura Yusa kakarmari ukunam nunka yamarmanum takastatna nuna yamá nekapeakka, <sup>6</sup> nu shuar nuna nakitiak kanakniaka atak ni tunaarín enentáimtak ikiuktinian wakerachuk

tujinkiattawai. Warí, ní enentáijjaj Yusa Uchirín krúsnum máiniaiti túrak ashí íimiainiaí natsanmain awajeawai. <sup>7</sup> Nu shuar yajauch nunka áintsan áiniawai. Yumi yútakui péñker nunka arakan péñker tsapatmakka arakmaun yayawai. Túramtai Yus shiir enentáimiui. <sup>8</sup> Antsu jankí nupan tsapatmakka nu nunka yajauchiiti. Yus áeseak emesrattawai.

### *Yus tsankatramkattajnia nu enentáimtakur kakaram ajaji*

<sup>9</sup> Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme. <sup>10</sup> Yus ti péñker asa átum takasmancha tura ni aneakrum Yus-shuar yainmancha kajinmatkishtatui. Tura yamaisha tuke túrarme. <sup>11</sup> Tura nuik túrarmena núnisrumek tuke iniaitsuk kakaram takasrum ashí Yus tsankatramkatta nu wáinkiatarme. Núnisan atí tusar wakeraji. <sup>12</sup> Nakimtsuk kakaram ajastarum. Niiniua nuna Yus ni shuarín susattawai. Tura shuar Yúsan enentáimtak shiir enentáijjaj nákkaka nuna wainkiattawai. Tu takastarum tusar wakeraji.

<sup>13-14</sup> Yus yaunchu Apraámjaj chichaak “Ti nekas shiir awajsattajme tura ti nukap pam-pamtikrattajme” tímiayi. Nuna taku imiá nekas tajai tusa tura chíkich Niijjaj nankaamas uunt atsakui imia Niñki pachiimias tumammiayi. <sup>15</sup> Tutai Apraám yáitmataik nákas Yus timia nuna wáinkiamiayi. <sup>16</sup> Shuar “nekas tajai Yus írui” tákunka chíkich niijjaj nankaamas úuntan páchiawai. Tura tu chichasmataiñkia nuyánka imiá nekas tana nu nekaamniaiti. <sup>17</sup> Tuma asamtai Yuska “ti nekas yapájítsuk túrattajai” tusa imia Niñki pachiimias tumammiayi. Nujaj ni tsankatkamun júkiartatna nu shuar Yus ti nekas umiktatna nuna nékainiawai. <sup>18</sup> Yus penké wáitruachmin asa áyatik ni tamajaj nekasaiti. Nuna arant nuikia imia Niñki pachiimias ti ikiakátmaji in. Nujaj iisha uwempratai tusar Niini weamkatikia tsankatramkattajnia nu ti shiir enentáimsar wáinkiatin nákkaji. <sup>19</sup> Nu enentáimsar kakaram ajaji. Yusajya in umuchtiamkamnia penké atsawai. Yusaj áchitkia asakrin ti kakaram emettamji. <sup>20</sup> Jesussha emka Yusaj wayá mash iwiarturmaji. Tura Mirkiseték amia núnisan Niisha yamá tuke amuukashtinian Yúsnan pujurniu uuntri ajasuiti.

## 7

### *Mirkiseték amia núnisan Jesussha Yúsnan pujurniu uuntri ajasuiti*

<sup>1</sup> Nu Mirkisetéksha Sarem nunkanam akupniuyayi. Tura ashí nankamas kakaram Yúsnan pujurniuyayi. Apraám chíkich akupniun mesetjaj awakak támatai Mirkiseték jiintiuki inkiun ti shiir awájsámiayi. <sup>2</sup> Túramtai Apraám nupetmakar kuit jukimiun tias (10) akantuk susamiayi. Mirkisetéka naarí tana júka “ti péñker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupín” tawai. <sup>3</sup> Nukurisha aparisha Yus-Chichamnum atsawai. Núnisan ni uuntrisha atsawai. Ni akiiniamuríncha ni jakamuríncha ujaatsui. Tuma asamtai Yusa Uchiría áintsan tuke iniañnakchatniun Yúsnan pujurniu uuntri ajasuiti.

<sup>4</sup> Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi. <sup>5</sup> Tuma asamtai Apraám nankaamas úuntaiti. Muisais akupkamujaj Riwi weeáka Yúsnan pujurin áiniawai. Niisha ashí Israer-shuarjaj métek Apraám weeá áiniawai. Túmaitiat penké Israer-shuar ni warirín tias akantuk Riwi shuaran suu ármiayi. Muisais tu akupkamiayi. <sup>6</sup> Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsankatkamuitiat Mirkisetékan niijjaj uunt asamtai susamiayi. Túram Mirkiseték Apraáman shiir awajsamiai. <sup>7</sup> Imiá nekas Mirkiseték Apraáma nankaamas páantin asa Apraáman shiir awajsamiai. <sup>8</sup> Israer-shuarti tias akankamun súajnia nú shuar aya aents ásar tuke pujuschamin áiniawai. Antsu Mirkiseték jakamun Yus-Chicham penké ujaatsui. <sup>9</sup> Yamái Riwi weeá shuar kuit akankamun achiktin áiniawai. Túrasha Apraám Mirkisetékan súakui

Riwí weeá nujaj susa áiniawai. <sup>10</sup> Apraám weeá ániak ni ayashía áinis enentáimtusmin áiniawai.

<sup>11</sup> Muisais akupkamunam Riwi-shuarnumiá aya Arun weeá shuar Yúsnan pujurin ármiai. Niisha Muisais akupkamu timia nujaj métek penké shuarjaj takasarmiai. Tura Riwi-shuarnumiá Yúsnan pujurniu takatríjaj tunáa nekas asakárminiaitkiuiníka Yúsnan pujurin yamarmak, Arun weeachu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniun anaikiai. Nusha Arun weeachuiti. <sup>12</sup> Tura Yúsnan pujurin yapajniámtai Muisais akupkamusha yapajniátniuiti. <sup>13-14</sup> Nu arantcha, ii Uuntri Jesukrístu Riwi-shuarcha antsu Jutá-shuarauyayi. Tura Muisais akupkamujaj Jutá-shuarnumiá Yúsnan pujurin atsutniuiti. Antsu nuna takatrín penké túrashtiniuyi. Tuma asamtai nújaisha Muisais akupkamu yapajniátniuiti.

<sup>15</sup> Nú páantcha awajsamniaiti. Wats, Yúsnan pujurin yamma nuka Mirkisetékajaj méteketete. <sup>16</sup> Niñkia Riwi shuar asa Yúsnan pujurin ajaschamiayi, antsu jákashtin asa nu kakarmajaj Yúsnan pujurin ajasmiai. <sup>17</sup> Tuma asamtai juna Yus Jesusan áujmatui: “Mirkisetékka Yúsnan pujurin amia núnismek Amesha iniannatsuk Yúsnan tuke pujurin átatme.”

<sup>18</sup> Nujaj yaunchu akupkamu péñkercha ajasmatai japirmaiti. <sup>19</sup> Muisais akupkamuka shuáran péñker awajsachminiuyayi. Antsu Yus in ti shiir awajtamsattajnia nu náka. Nujaj Yusaj ti shiir jeeáitji.

<sup>20</sup> Nunasha Yus “nekas tajaj” tusa Niñki pachimias tumammiai. <sup>21</sup> Riwi-shuarnumiá Yúsnan pujurin Yusa naari pachitsuk anaikiamu ármiai. Antsu jú Yúsnan pujurniunka Yus imia Niñki pachimias anaikiamiai. Tura Nin júnis tímiayi:

“Uuntka imia Niñki pachimias tiniu asa penké yapajjáshatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

<sup>22</sup> Tuma asamtai Jesuska nekas uwentikrattajaj tusa yaunchu amia nujaj nankaamas péñker Chichaman iwiarturuiti. <sup>23</sup> Yaunchu Yúsnan pujurin untsurí ármiai. Chíkich jakamtaí chíkich tuke takaarmiai. <sup>24</sup> Antsu Jesus tuke jákashtin asa chikichan ikiurkishtatui. <sup>25</sup> Tuma asa tuke iwiaaku pujak ni shuarín tuke Yúsan áujtusminiaiti. Tuma asa shuar Nin enentáimtusar Yusaj weankarun tuke uwentikramniaiti.

<sup>26</sup> Tuma asa Jesus Yúsnan péñker pujurin asa ii atsumajnia núketete niisha. Niisha ti shiir asa penké tunaarinchaiti. Ashí tunaariniunmaya kanakniuiti. Tura Yusjaj métek Uunt ajasuiti. <sup>27</sup> Niisha yaunchu Yúsnan pujurniu uuntri armia núnichaiti. Yaunchua nuka murikiun máawar ashí tsawant Yúsan suu ármiai. Nujaj emka ni tunaarín nuyá ashí shuara tunaarín asakátin ármiai. Tura Jesuska jákatniunam chikichkí surumak ashí shuara tunaarín asakátramiayi. <sup>28</sup> Muisais akupkamuka penké shuarnak tuke péñkercha ajin Yúsnan pujurniu úntrin anaikiai. Tura nu ukunmanka Yus, nekas niñki pachimias, ni Uchirín, tuke péñkera nuna, Yúsnan pujurniu úntrin anaikiai.

## 8

### *Nankaamas péñker Chichaman Jesus takartamji*

<sup>1</sup> Nekas juna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuuriní nayaimpiniam pujusuiti. <sup>2</sup> Nekas Yusa Jee nayaimpinma nu aents najanachma antsu Yus najanamuiti. Nuí Jesus Yúsnan pujurui. <sup>3</sup> Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsan ashí súsatin áiniawai. Núnisan Jesukrístusha Yúsan súsatniuiti. <sup>4</sup> Juyá Yúsnan pujurin Muisais timia nuna Yúsan yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai. <sup>5</sup> Yus yaunchu Muisaisan nayaimpiniam írunka nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujaj takainiawai. <sup>6</sup> Antsu Jesus ti nekasa

nujaj nayaimpiniam takaawai. Muisais akupkamuka shuáran péñker awajsachmini-aiti. Antsu Yus in ti péñker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti péñker ániawai. Tuma asamtai nankaamas péñker Chichaman Jesus takartamji.

<sup>7</sup> Kame Emka Chicham, Yus Muisaisjaj yaunchu najanamia nu, nekas péñkeraitkiuin<sub>nkia</sub> Yamaram Chichaman najanachaayi. <sup>8</sup> Antsu péñkercha a<sub>ni</sub>akui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajaj. <sup>9</sup> Yaunchu ju shuara uuntrin Ejiptunmaya yaruakmiaj nu<sub>j</sub> Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajaj.” Núnis tawai Uunt Yus. <sup>10</sup> Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrartatjai. Nuyá ni Yusri ártatjai tura niisha Wíi shuar ártatui. <sup>11</sup> Nu<sub>j</sub>isha Yúsán nekaat tusa jintinnaiyachartatui. Kame ni a<sub>j</sub>isha ni yach<sub>j</sub>isha kame ashí shuar, uchisha uuntcha, ashí nekarawartatui. <sup>12</sup> Tura ashí ni tunaar<sub>j</sub>ncha tsan<sub>k</sub>uraran ni yajauchir<sub>j</sub>n atak péñké enentáimtuschartatjai” tímiayi.” Tu áarmaiti.

<sup>13</sup> Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

## 9

### *Yusa Jee nayaimpinmasha tura ju nun<sub>kan</sub>masha*

<sup>1</sup> Ayu. Yus shiir awajsatniuka Emka Chicham timia nujaj métek túratniuyayi. Tura ju nun<sub>kan</sub>maya Yusa Jee<sub>n</sub> weriar Yús shiir awajsatniuyayi. <sup>2</sup> Nu Je<sub>a</sub>sha júnis tesakmauyayi. Nékatka Shiir Tesaamu tutainti. Nu<sub>j</sub> asuitin ekeemakar tsáapin awajtaisha tura misasha Yus iniaktusma tantajaj pujuyayi. <sup>3</sup> Nuyá-tesaamuka Imiá Shiir Tesaamu tutainti. <sup>4</sup> Nu<sub>j</sub> kun<sub>ku</sub>in ekeemataisha kurij<sub>j</sub>aj kuerma tura Chí<sub>ch</sub>am Aarma Chumpiti-aisha pujuyayi. Nusha ashí kurij<sub>j</sub>aj kuérmauyayi. Tura init kurij<sub>j</sub>aj najanamu ichin<sub>ki</sub>an maná yurumak en<sub>k</sub>emniuyayi. Nuyá Yús<sub>n</sub>an pujurniu uuntri Arun<sub>ka</sub> ushukrutair<sub>j</sub> yaunchu tsapaak jan<sub>k</sub>ukmia nusha en<sub>k</sub>emniuyayi. Nuyá Yus najanamu Chí<sub>ch</sub>am Muisais kayanam aarmasha en<sub>k</sub>emniuyayi. <sup>5</sup> Nuna úkur<sub>j</sub>n Kirup<sub>j</sub>n, nayaimpinmaya suntara nu, kurij<sub>j</sub>aj nakumkamu wajarmiayi. Nusha Yusa shí<sub>r</sub>mar<sub>j</sub>n nakumkarmiayi. Tura ni nanapé<sub>j</sub>aj shuara tunaar<sub>j</sub>n ayamprutain nukúakuyayi. Nuna arantka yamá<sub>i</sub> etserkatin atsumatsji.

<sup>6</sup> Núnis aa asamtai Shiir Tesaamunam ashí Yús<sub>n</sub>an pujurin tuke wá<sub>ni</sub>ak Yús<sub>n</sub>an takasarmiayi. <sup>7</sup> Tura Imiá Shiir Tesaamunman<sub>ka</sub> aya ni uuntrin wá<sub>ni</sub>aiuyayi. Tura niisha ashí uwitin aya chikichik tsawant way<sub>a</sub>miayi. Way<sub>a</sub>k ni tunaar<sub>j</sub>sha tura ashí shuara tunaar<sub>j</sub> tsan<sub>k</sub>urnarat tusa Yus sú<sub>s</sub>atniu naman<sub>ké</sub> numpen juu á<sub>mi</sub>ayi. <sup>8</sup> Yusa Wakan<sub>j</sub> núnis atí tusa nuna mash iwiaramiayi. Tura asa ju<sub>n</sub>a paant awajturmaj<sub>i</sub>. Jú nun<sub>kan</sub>maya Yusa Jee<sub>n</sub> pujakui tura aya nu<sub>j</sub>n Yus shiir awajsamniaitkiuin<sub>nkia</sub> nekas Imiá Shiira nu<sub>j</sub> Yus pujamunam way<sub>a</sub>tin tuke itiurchat ainti. <sup>9</sup> Nusha yamá<sub>i</sub> pujuiniaj nuna enentáimtikrampratniuitji. Shuar Yus shiir enentáimtikratniun naman<sub>ken</sub> maa su<sub>ni</sub>aksha nu shuar ni tunaar<sub>j</sub>aj tuke itit enentáimtumainiawai. <sup>10</sup> Warí, aya yurumát<sub>ni</sub>usha umartincha nijartincha tura ashí núnisan túratniuj<sub>j</sub> aya pátatek asamtai enentáiniam ana nuna iwiarachmin ániawai. Antsu Yus nú túratniunka yapaj<sub>i</sub>át<sub>ni</sub>uyayi. Tuma asamtai yapaj<sub>i</sub>át<sub>s</sub>ain túratin ániawai.

<sup>11</sup> Tura yamaikia Kristu táwiti tura Yús<sub>n</sub>an pujurniu uuntri ajas Yamaram Chichamnum Yus ti péñkeran túrutmatniua nuna pujurturmaj<sub>i</sub>. Niisha ti shiir Yus Jee<sub>n</sub> aents najanachmanum takaawai. Nu Jee<sub>n</sub> ju nun<sub>kan</sub>mayanchuiti. <sup>12</sup> Tura Kristu Imiá Shiir Tesaamunam naman<sub>ke</sub> numpé<sub>j</sub>aj way<sub>a</sub>chuiti antsu ni numpe<sub>j</sub>ain<sub>k</sub> way<sub>a</sub>iti. Tura aya

chikichkí wayá ii tunaarín asakturmar tuke uwentikrampramiaji. <sup>13</sup> Nekas namańké numpesha tura áisamu yuńkunmirisha tunáa shuarnum pátatek ukatkamu aya pátatek shiir awajsamniuyi. <sup>14</sup> Túrasha Kristu numpé ii tunaarín penké asakáruiti. Túramtai yamaikia tunáa jákatniunam júana nujaj itit enentáimtumsuk nekas iwaaku Yus shiir umirkamniaitji. Kristu penké tunaaríncha asa tuke jákashtin Wakaní kakarmaríjjaj jákatniunam Yusaj surumakmiayi.

<sup>15</sup> Nu asamtai Jesukrístu Yamaram Chichaman shiir takarniuiti. Yaunchu Chichamjaj tunáa nekas tsankurachma asamtai Kristu jaka nu tunaancha tsankurarmiayi. Nujaj ashí Yus-shuarti Yus achikma asar Yus tsankatramajnia nu wáinkiar tuke wararsattaji. <sup>16-17</sup> Shuar ni kuítrín akantrattak chichaman najanatniuiti. Tura jáatsain nu kuit akantrastiniaiti. Aya nii jakamtai nu chicham najanamuminkiatniuiti. <sup>18</sup> Nu asamtai Emka Chicham Muisaisjaj najanamusha maamu numpé ukatramujaj akupkamuyayi. Nujajsha naman máatniuyayi. <sup>19</sup> Muisais nu akupkamun ashí shuáran ujakarmiayi. Nuyá ure kapaakujaj tura nupajajsha namańké numpé entsajaj pachimpramujaj ayak akupkamu papincha ashí shuarnasha ukatkarmiayi. <sup>20</sup> Tura tiarmiayi “Ju numpajaj “Chícham Yus akupturmarmena nu nekas umiktiniaiti” tawai.” <sup>21</sup> Nuyá nu numpajaj Yusa Jeencha ashí nu takastin irunmia nunasha ukatkarmiayi. <sup>22</sup> Nu akupkamujaj penké ishichik numpajainchu shiir awajsamniaiti. Túrasha numpajainchu tunáa penké asakárchamniaiti.

### *Kristu jakamujaj tunáa asakárminiaiti*

<sup>23</sup> Tuma asamtai Muisais najanamum nayaimpiniam ana nuna aya nakumkamu ásar namańké numpejaj shiir awajsamu ármiai. Antsu nayaimpiniam nekas írunna nu, nankaamas kakaram numpajaj shiir awajsatin áiniawai. <sup>24</sup> Krístuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmaji. <sup>25</sup> Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wain ármiai. Tura Krístuka untsurí wayachuiti. <sup>26</sup> Kame untsurí wayatniuitkiuinikia ni numpejaink' wayá asa yámankamtaiknumia untsurí jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti. <sup>27</sup> Ashí shuar chikichkí jakar nuyá ni túramun Yusaj nekamatniun nantaktin áiniawai. <sup>28</sup> Núnisan Kristu chikichkí jákatniunam surumak shuara tunaarín asakáruiti. Tura atakka tunaan asakártinian wantinkiashtatui. Antsu ni tátintriń nákania nuna uwentikkratsa wantinkiattawai.

## 10

<sup>1</sup> Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútajjajsha shuara tunaarín asakátrachminiaiti. <sup>2</sup> Kame asakátraka shuar nekas shiir awajsamniaitkiuinikia Yus naman maar súsatniun atsumachuk iniaisaraayi. Iis, mash tsankuramuitkiuinika ni tunaaríjjaj itit enentáimtumascharainti. Túrawar naman maar Yus súsatniun iniaisarainti. <sup>3</sup> Antsu namańken maar ashí uwitin tuke súniak nujaj ni tunaarín tuke enentáimtuiniawai. <sup>4</sup> Warí, namańké numpejaj ii tunaarí penké asakárchamniaiti.

<sup>5</sup> Nu asamtai Kristu jú nunkanam taa Yúsan chicharuk tímiayi:

“Naman maar sútajsha penké nakitráme. Antsu ayash iwiaram surusuitme. <sup>6</sup> Naman áesamusha tura tunaan asakártin naman susamusha wakeratsme. <sup>7</sup> Tuma asamtai “Yusrú, tímiajai. Winia áatrurma núnisnak ame wakeramurmin umiktajtsan táwitjai” tímiajai” tímiayi.

<sup>8</sup> Emka, Muisais akupkamu aín, naman susamuncha, tunaan asakárat tusa naman maar susamuncha, naman áesamuncha Yus ashí nakitraititawai Kristu. <sup>9</sup> Nuyá “Yusrú, ame wakeramurmin umiktajtsan táwitjai” tawai. Nuna taku naman maar sútain

“Asakáiniaiti” tawai. Tura chikichan ikiuawai. <sup>10</sup> Jesukrístu Yúsan umiruk jákatniun chikichkí surumakmatai Yus in tunaarincha shiir awajtamsaitji.

<sup>11</sup> Tura Israer-shuarnumiä Yúsnan pujurin ashí tsawantaj nú namannak máawar tunaan asakáchunak Yúsan ti suu áiniawai. <sup>12</sup> Antsu Jesukrístuka jákatniunam chikichkí surumak ashí shuara tunaarin asakár atakka penké jákashtiniaiti. Nuna tura Yusa untsuurini nekas akupin pujutainium pujusuiti. <sup>13</sup> Tura Yus ni nemasrin nupetak nin umirkarti tusa sústartatna nuna nákwai. <sup>14</sup> Chikichkí jakamujai ni shuarin tuke tunaarincha awajsaruiti. <sup>15</sup> Yusa Wakanisha núnisan tawai. Emka tímiayi:

<sup>16</sup> “Yamaram Chichaman najanattaj nuka júnisan átatui: Wi akupeaj nuna ni enentáin paant enentáimtikrartatjai.” <sup>17</sup> Nuyásha tawai: “Ni yajauch tunáa túramurin penké enentáimtuschatjai.”

<sup>18</sup> Tuma asamtai, ii tunaari tsankuramu asamtai atak in jarutramkatin atsumatsji.

### *Yus tuke shiir enentáimtusar Yusai jeartai*

<sup>19</sup> Tuma asamtai, yatsurú, Jesukrístu numpejai pénger awajsamu asar sapijmiat-suk shiir enentáijjai Imiá Shiira nuí, nekas Yus pujamunam wayamniaitji. <sup>20</sup> Nuí wayatniuka Kristu jaka Yusa Jeen tesaamun júsatniua áintsan ánturmamiaji. Yamaisha tura tuke wayamnia átatui. <sup>21</sup> Jesus Yúsnan pujurniu uuntri asa ashí Yus-shuartin wáitmak pujurtamji. <sup>22</sup> Tuma asamtai, tuke enentáijjai Yus imiá nekas enentáimtusar Yusai jeartai. Ii enentái Kristu numpejai nijiarma asamtai nekas enentáimtakur ii tunaarijai itit enentáimtusamchatniuitji. Tura ii ayashisha pénger entsajai imianniuitji. <sup>23</sup> Yus tsankatramkattajnia nu shiir enentáimtamun iniaitsuk kakaram ajarar tuke emetatniuitji. Yus tsankatramkaitji nuna umiktatui. <sup>24</sup> Pénger anenain tura pénger túrin ajararar tusar mai yainiaikiartiniuitji. <sup>25</sup> Yusa Jeen Yus-shuarjai tuke iruntratniuitji. Chikich iniainiakui sha iikia tuke iruntratniuitji. Nuí irunkurkia ikiakánairtiniuitji. Tura Kristu tátin tsawantri ishichik ajasu asamtai nú nukap túratniuitji.

### *Anearta. Ti tsúumainti iwiaaku Yusa kakarmarijjai asutniátin.*

<sup>26</sup> Túrasa shuar nekas chichaman nékayat wakeramurijjain tunaanum wekaakka Kristu jakamun nakitia asamtai chikich atsawai ni tunaarin asakátratniun. <sup>27</sup> Áyatik ashamak ti tsuumai sumamatin tsawantan nákasminiaiti. Nu tsawantaj Yus ni nemasrin ti kajerak asutiak mash emesrattawai. <sup>28</sup> Shuar Muisais akupkamun umikchamtai tura jímjar shuar menaintiusha etserkarmatai waitnentsuk máatniuyayi. <sup>29</sup> Núnisaitkiuinikia shuar Yusa Uchirin wishikiainiakka ni numpencha nakitiainiakka tura Yus nin anea nuna Wakanincha katsekainiakka nuna nankaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújajsha nii ti pénger awajnastiniuyayi. <sup>30</sup> Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wí shuara tunaarin ti paant nekarattajai.” <sup>31</sup> Ti tsúumainti iwiaaku Yusa kakarmarijjai asutniátin.

<sup>32</sup> Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajararum ashí itiurchat katsuntramarme. <sup>33</sup> Chikichtirmeka katseknakmarme tura ashí ímiainiamunam yajauch awajnasmarum. Chikichcha nu shuarnum pachitkia asarum itit awajnasmarum. <sup>34</sup> Atumsha sepunam pujuinia nusha waitnentrarmum. Tura shiir warasrum kuítrumin atantramainiakui sha katsuntramarme. Nayaimpiniam tuke amuukashtin kuit pachiktin asarum túramarme. <sup>35</sup> Tuma asarum yawetsuk Yus tuke enentáimtusarum kakaram ajastarum. Túrakrum nankaamas akinkiattarme. <sup>36</sup> Atumsha esetra enentáimsarum Yus wakera nu túrakrum Yus atumin amastinia nu wainkiattarme. <sup>37</sup> Kame Yus-Chichamnum áarmaiti: “Tátinia nu ishichik ajarar. Wárik tátatui. <sup>38</sup> Shuar Yúsan nekas enentáimtak pénger wekaak uwemprattawai. Tura iniyaiyakuinikia nin wararsashtatjai.”

<sup>39</sup> Tura iikia iniaisar mesena nú shuarchaitji. Antsu Yus shiir enentáimtusar uwempraitji.

## 11

### *Yus nekas enentáimtustin*

<sup>1</sup> Yus nekas enentáimtakur “nákajnia nuna, Yus nekas suramsattaji” taji. Tura wáinchaitiatar “nekas wainkiattaji” taji. <sup>2</sup> Yaunchu ii uuntri Yúsan nekas enentáimtuiniakui Yus “pénkeraitme” tiarmiayi.

<sup>3</sup> Aya Yus enentáimtakur ju nékaji: Yus aya ni chichamejain ashí nunkan najanamiayi. Túramtai ashí wáiniainiaj nu wáinchataijai najanamu ániawai.

<sup>4</sup> Apir Yúsan nekas enentáimtak Kaínjai nankaamas péñkera nuna Yúsan susamiayi. Túramtai Yus “pénkeraitme” taku shiir yuminsamiayi. Tuma asamtai Apir jákaitiat tuke enentáimtikramji.

<sup>5</sup> Euksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkicharmiayi. Tura Yus-Chichamnum aarma “Euk júnatsuk Yúsan ti shiir enentáimtikniuyayi” tawai. <sup>6</sup> Tura Yus nekas enentáimtachkumka çitiurak Nii shiir enentáimtiksatam? Nekas enentáimjai Yúsan weantuktaj tusam wakerakmeke, emka, Yus iwiaaku pujawai, tu enentáimpratniuitme. Nuyásha, Wi Yúsan eakuñkia Yuska winia yáintkiattawai, tu enentáimsatniuitme.

<sup>7</sup> Yus, ‘amaarkatniun akupkattajai’ tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajai métek uunt kanun najana ni shuarincha uwentikramiayi. Tura Yúsan nekas enentáimta asamtai Yus “pénkeraitme” tímiayi. Tura ni umirkamujai chíkich shuar Yúsan enentáimtachun súmamtekiawarmiayi.

<sup>8</sup> Tura Apraámsha Yúsan nekas enentáimtak Yus “núñkem ikiukim wetá” tutai shiir umikmiayi. Yus tuke nin súsatniua nú nunkanam wémiayi. Turasha ni nunken ikiuak ni jeatniun nékatsuk jüinkimiayi. <sup>9</sup> Yúsan shiir enentáimtak nú nunkanam Yus nin tsankatkamuitiat írara áinis pujusmiayi. Nuap jeanam pujuyayi. Núnisaj ni uchirí Isaksha tura ni tirankí Jakupsha nuñ tsankatkamuitiatan írara núnisar pujuarmiayi. <sup>10</sup> Kame Apraámka nayaimpinmaya ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachminiaiti.

<sup>11</sup> Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi. <sup>12</sup> Tura nujai Apraám ti úuntchitiat ti pampanmiayi. Nii chikichkitiat ni pampanmari ti untsurí ajarar yaajai métek tura náikmijai métek nekapmarchamnia ajararmiayi.

<sup>13</sup> Ashí nu shuar Yus tsankatkamun wáintsuk jákarmiayi. Túrasha Yúsan nekas enentáimtuiniak arantiá wáinkiar warasar shiir enentáimtiarmiayi. Túrawar “ju nunkanam nekas aya íraraitji” tiarmiayi. <sup>14</sup> ‘Íraraitji’ tu chichainiak chíkich nunka eamun páant awajainiawai. <sup>15</sup> Niisha matsatu winíarmia nuí atak waketkitniun wakeruiniakka páchitsuk waketkiaraayi. <sup>16</sup> Tura antsu niisha nuna nankaamas péñker nunkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusrintjai” títinian natsantatsui.

<sup>17</sup> Ataksha Apraám Yúsan nekas enentáimtak “chikichik uchi amasmaj nu, namañkea áitkiasmek maam surusta” takui Apraám Isakan ni uchirín Yus susatniun penké suritkiachmiayi. <sup>18</sup> Kame Yus “Isakjai ti pampanatme” tau asamtai <sup>19</sup> Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsaj wáinkiamiayi.

<sup>20</sup> Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi. <sup>21</sup> Núnisaj Jakup Yúsan nekas enentáimtak jatsuk ni tirankin, Jusé uchirín, shiir túrunattana nuna ujakarmiayi. Tura ti uuntach asa



máshtun<sub>krin</sub> ushukruma Yúsan shiir awajsamiayi. <sup>22</sup> Tura Jusesha jákatniur<sub>i</sub> ishichik ajatesmatai Yúsan nekas enentáimtak Yus ukunam Israer-shuaran Ejiptu nun<sub>kan</sub>maya júkiartatna nuna ujakarmiayi. Tura jíiniainiak ni ukunch<sub>in</sub> júkiar Yus tsan<sub>kat</sub>kamu nun<sub>kan</sub>am iwiarsarat tusa akupkamiayi.

<sup>23</sup> Muisaisa apar<sub>isha</sub> nukur<sub>isha</sub> Yúsan nekas enentáimtuiniak Muisais ti shíirmach asamtai suntar máawarain<sub>n</sub> tusa akiiniamunmaya menaintiu nantu ú<sub>uk</sub>armiayi. Tura uunt akupin akupkamun ashamkacharmiayi. <sup>24</sup> Muisaissha Yúsan shiir enentáimtak uunt ajas Ejiptunmaya uunt akupniu nawantr<sub>i</sub> uchir<sub>i</sub> ajastinian nakitrarmiayi. <sup>25</sup> Antsu Ejiptu nun<sub>kan</sub>am ishichkisha tunaan warartsuk Yusa shuar<sub>ijjai</sub> métek wáitsatniun nan<sub>ka</sub>amas wakerukmiayi. <sup>26</sup> Nujai<sub>i</sub> Krístun yajauch awajsarmia núnisan<sub>n</sub> niisha wáitsatniuuyi. Túrasha ashí Ejiptu nun<sub>kan</sub>am pé<sub>n</sub>ker irunmia nuna nan<sub>ka</sub>amas Yus nin ukunam tsan<sub>kat</sub>katta nuna shiir enentáimtusmiayi. <sup>27</sup> Niisha Yúsan shiir enentáimtak uunt akupin kajeramu a<sub>in</sub> ashamtsuk Ejiptu nun<sub>kan</sub>maya jiinki wémiayi. Yúsan wáinchiat shiir enentáimtamujai<sub>i</sub> wainiua áinis kakaram ajas ashí katsuntrarmiayi.

<sup>28</sup> Muisais Yúsan shiir enentáimtak yámankamtaik paskua namperan najaneak ashí Israer-shuaran numpajai<sub>i</sub> ni wáitir<sub>in</sub> kuérat tusa akupkarmiayi. Nujai<sub>i</sub> Yus timia núnisan<sub>n</sub> nayaimpinmaya suntar nuna iis nu je<sub>an</sub>am iwi<sub>air</sub>in<sub>n</sub> máatsuk nan<sub>ka</sub>ikit tusa tímiayi.

<sup>29</sup> Israer-shuarsha Yúsan shiir enentáimtuinia ásar Kapa<sub>ant</sub>in Entsa nakaakamtai ajapén ti pé<sub>n</sub>ker kukarnum kati<sub>n</sub>kiarmiayi. Ejiptunmaya suntarsha núnisan<sub>n</sub> kati<sub>n</sub>tai tukamá jakerarmiayi.

<sup>30</sup> Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sáaná<sub>km</sub>iai. Nujai<sub>i</sub> ti yúpichuch nupetkarmiayi.

<sup>31</sup> Raapsha nu péprunam pujak<sub>u</sub> Yúsan nekas enentáimtak tsanirmatai<sub>i</sub> áyat Israera suntar<sub>in</sub> mamikmak wekaan ti pé<sub>n</sub>ker itiáa asa chíkich shuar Jerikiúnam matsatua nujai<sub>i</sub> jákachmiayi.

<sup>32</sup> Nu arantcha Yúsan shiir enentáimtin ti írunui. Jeteú<sub>n</sub>sha, Paraksha, Sa<sub>n</sub>sun<sub>sha</sub>, Jiptísha, Tawitcha, Samuersha, Yúsnan etserniusha nu shuar ármiayi. Mash ujaktinian jeatsjai. <sup>33</sup> Niisha ashí Yúsan nekas enentáimtuinia ásar Yusa kakarmar<sub>in</sub> niisháa niisháa iniaktusarmiayi. Nuna túruiniak chíkich chíkich nun<sub>kan</sub>maya aentsun nupetkarmiayi, nuisha pé<sub>n</sub>ker akupkarmiayi, tura Yussha ni timia núnisan<sub>n</sub> ya<sub>in</sub>kiarmiayi. Uunt yawan<sub>cha</sub> kajeche awajsarmiayi, <sup>34</sup> uunt jiniasha ikiajniakarmiayi, puniajai<sub>i</sub> mantamnatniuncha uwemprarmiayi. Kakarmachusha kakaram ajasar mesetnumsha ni nemasr<sub>in</sub>cha nupetkarmiayi. <sup>35</sup> Nuwasha ni uchir<sub>i</sub> jakan iniantkimiun wá<sub>in</sub>kiarmiayi.

Chikichcha wáitias mantam<sub>nawar</sub>miayi. Ti shiir pujustinnium nantaktiai túsar nú tsawantai<sub>i</sub> uwempratniun nakitrarmiayi. <sup>36</sup> Chikichcha katseknakarmiayi, asutniá<sub>warm</sub>iai, jirujai<sub>i</sub> jin<sub>kiawar</sub> sepunam en<sub>kenawar</sub>miayi. <sup>37</sup> Kayajai<sub>i</sub> tukú mantam<sub>nawarm</sub>iai, jímiapetek tsup<sub>inkiar</sub>miayi, Yúsan iniaisarat tusa nekapnasarmiayi, puniajai<sub>i</sub> mantam<sub>nawarm</sub>iai. Aya wékainiarmiayi, kuítr<sub>in</sub>cha ásar nuapen entsararmiayi, shuar nincha áintrar wáitnenmai awajiarmiayi. <sup>38</sup> Atsamunmasha, naincha, wa<sub>an</sub>masha, ashí nun<sub>kan</sub>am wekain ármiayi. Nu shuarjai<sub>in</sub>kia ju nun<sub>kan</sub>maya shuar imiá yajauch ásar niijjai<sub>i</sub> pujumainchu ániawai. <sup>39</sup> Nu shuar Yúsan shiir enentáimtuiniakui Yus “pé<sub>n</sub>keraitrume” tiarmiayi. Túmaitiat ni tsan<sub>kat</sub>kamun wá<sub>in</sub>kiacharmiayi. <sup>40</sup> Yuska nuna nan<sub>ka</sub>amas pé<sub>n</sub>keran iwiarturaru asa tura in yamá<sub>i</sub> pujajnia juna enentáimturma asa niisha iisha mai metek tsan<sub>in</sub>kiar ti pé<sub>n</sub>ker ajasarti tu enentáimsamiayi.

## 12

### *Jesus take enentáimtusar tsékentiai*

<sup>1</sup> Ashí ju nun<sub>kan</sub>am túrajnia nuka shuar nakuruiniak tsékena nujai<sub>i</sub> nakumkamniaiti. Ashí shuar yaunchu Yúsan shiir enentáimtusaruka téntakar írmainiai. Tuma asamtai

ashí kijin ana nusha tura ashí tunaaka itit awajtamaj nusha ajapa iniaisar tura kat-suntrar tsékenkir jeatai. <sup>2</sup> Túmakur Jesus tuke enentáimtusar tsékentiai. Ashí shuarjaj nankaamas Jesus Yúsan ti nekas enentáimtak aya pénkernak túramiayi. Tuke nekas awakmakmiayi. Imiá tunáa shuáran krusnum máatin ajñ núnisan natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurinj akupin pujutainium pujusuiti.

<sup>3</sup> Tunáa shuar Jesusan wáitkiasarmia nu enentáimpratarum. Túrarum pimpitsuk katsuntratarum. <sup>4</sup> Átum tunaajaj máaniakrum Jesus túramia áintsarum numpemsha puárchaitrume tura jákachuitrume. Nuisha katsuntrarum jeatnuitrume. <sup>5-6</sup> Yus nekas ni uchirinj chicharkatniua áinis túramprum nu kajinmatkichmashuram. Júnis tawai:

“Uchirú, wi jintinramajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiwai. Tura ni uchirj ajasat tusa achiana nuna asutiawai.”

<sup>7</sup> Tuma asamtai Yus ni uchiría áinis asutiámkuisha katsuntratarum. Warí, ashí apa ni uchirinj chicharkashtatuak. <sup>8</sup> Tura ashí uchin chicharkatniua núnis Yus atumin chichartamchakrumniñkia nekas ni uchirinchuitrume. Antsu chikichnaitrume. <sup>9</sup> Nu arantcha ii aparj uchich árininj chichartamkurin umirniuyaji. Nu arant nuikia nekas ii Aparj nayaimpiniam pujana nu shiir umirkar tuke shiir pujustin wakerishtajik. <sup>10</sup> Ii aparj ishichik ni enentáijjaj wakeramu chichartamniuyaji. Antsu Yuska ti penker awajtamsataj tusa nekas atsumajnia nujaj métek chichartamji. <sup>11</sup> Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujaj unuimij nuka penker túratniun tura shiir pujustinian yáinmaji.

*Anearta. Yus tana nu nekas antuktiniaiti.*

<sup>12</sup> Nujaj pimpirarusha tura kakarmachu ainia nusha ikiakártarum. <sup>13</sup> Túrarum penker esetsta enentáimsarum wekasatarum. Túrarum tujintiainia nusha shiir wekasatin yaintarum.

<sup>14</sup> Ashí penker túrakrum ashí shuarjaj nawamnaikiarum penker wekasatarum. Tunaan túrinkia Yusaj penké jeashtatui. <sup>15</sup> Aneartarum. Shuar nakitiakuñkia Yus nu shuáran shiir yáintinian tujinkiattawai. Nu shuar yajauch enentáimiuk chíchich shuárnasha itit awajas tunaanum útsukartatui.

<sup>16</sup> Tsanirmawairap.

Yusna nusha nakitirairap. Isaka uchirj Esau pénkera nuna nakitramiayi. Yus “iwiajrin núkap súsatniuiti” timia nuna enentáimtuschamiayi. Tura asa aya ishichik yurumkajaj yapajjámiayi. <sup>17</sup> Tura nuyá ni aparj ukunam túrunattana nuna takui Esau ti penkeran wakerimiayi. Tura ti útkuisha ni aparj nin nakitramiayi tura ni chichasman yapajjátniun tujinkiamiayi.

<sup>18</sup> Atumjainkia Yusna enentáimtusminia nuka yaunchu Israer-shuarjaj ashammain amia núnischaiti. Yáunchuka Yus ni akupkamurinj Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi. <sup>19</sup> Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi. <sup>20</sup> Kame Yus chichaak “Shuarsha tanakusha ishichk-isha nú muranam najarmatai nuka kayajaj tukurar tura nanjikijajisha máatniuiti” tímiayi. Nu akupkamu ti ashammai asamtai “chichaschati” tiarmiayi. <sup>21</sup> Wáinkiarminia nu ti tsuumaí asamtai imia Muisaisha “Ashamakun kuraajaj” tímiayi.

<sup>22</sup> Antsu atumjainkia Yusna enentáimtustin nujaj nankaamas penkeraiti. Átumka nayaimpinmaya Seun náinnium, Jerusaren iwiaaku Yus pujutai péprun nakumeana nu jeeáitrume. Nuisha ti untsurj nayaimpinmaya suntarsha <sup>23</sup> ashí Yus-shuarsha shiir iruntrarú áiniawai. Yus-shuarka ashí nayaimpiniam ni naari anujtukma ásar ni uchirj áiniawai. Nuisha Yus, ashí shuaran ti nékana nu, pujawai. Niisha shuáran ti penker awajsamtai nu shuar jákar ni wakanj nu shiir pujuiniawai. <sup>24</sup> Nuisha Yamaram

Chichaman in takartamajnia nu, Jesus, pujawai. Nuna numpe ukatramujai ashí shiir awajsaiti. Nu numpasha Apira numpejai nankaamas penkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran penker awajsartaj tusa jakamiayi.

<sup>25</sup> Nuka ti penker asamtai Yus chichartamprumna nu nekas anturkatniuitrume. Yaunchu Yus jú nunkanam murá chichaamun anturkachar asutniátniunam uwempracharmiayi. Nuikia Yus nayaimpinmaya chichartamkurin ántachkurkia ishichkisha uwemprashtatji. <sup>26</sup> Yaunchu Yus chichamejai nunkan úurmamtiarmiayi. Tura yamaisha tawai “Ataksha aya núkankechu antsu nayaimpinmasha úurmamtiattajai.” <sup>27</sup> “Ataksha” tana nujai “ashí muchitránia nu amuukartatui” tawai. Tura muchitrahminia nu juakartatui. <sup>28</sup> Yus in akupkatniun tsankatramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. <sup>29</sup> Maa, ii Yúsriñkia kajerkanka uunt jáa nuke áesaa mash emesramniaiti.

## 13

### *Yus shiir enentáimtiksatin*

<sup>1</sup> Nuamtak yachia núnisrum tuke mai anenai ajatarum. <sup>2</sup> Tuke íírar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

<sup>3</sup> Sepunam pujuinia nusha atumsha niijiai pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

<sup>4</sup> Nuatnaikiatin penkeraiti. Shuar ni nuwejai tsaniñ pujustin penkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

<sup>5</sup> Aya kuítiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujai shiir enentáimsam “maakete” titiá.

<sup>6</sup> Tiniu asamtai arantutsuk ju tímíniatjia: “Winia yainnia nuka Uunt Yúsaiti. Nu asamtai shuar túrutamnia nuna ashamkashtajai.”

<sup>7</sup> Atumin Yus-Chichaman jintinramawarmia nu enentáimtustarum. Yúsan shiir enentáimtuiniak penker wekasarmia núnisrumek atumsha túratarum.

<sup>8</sup> Jesukrístuka tuke yapajítsuk nuikiya núnisan yamaisha tura ukunmasha tuke núnisan átatui. <sup>9</sup> Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajai enentáirui kakaram ajastaj táyat penké yáinchaiti. Yurumeaj nújainchu antsu Yusa anenkrattairijiai ii enentáin kakaram ajasminiaitji.

<sup>10</sup> Yáunchu Yúsnan pujurin namañ maar Yus susamunmayan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nu pachiinkiachmin áiniawai. <sup>11</sup> Israer-shuarnumiá Yúsnan pujurniu uuntri tunaan asakártaj tusa namañké numpen júkiar Imiá Shiir Tesaamunam wain ármiayi. Tura nu namañ arant áesatniuyayi. <sup>12</sup> Núnisan Jesussha péprunam arant wáitkianas mantamnamiai. Nujai ashí shuara tunaarin ni numpejai nijiatkai. <sup>13</sup> Núnisrik iisha péprunmaya arant wétinia núnisrik Jesusai weri Niijiai métek wishikmain katsuntutai. <sup>14</sup> Kame ju nunkanam amuukachmin pepru atsawai. Antsu ukunam ti shiir pepru átatna nu nákaji. <sup>15</sup> Tuma asar namañ maar Yus sútsuk antsu shiir chicham súakur tuke Yus shiir yúmiñkijai. Tuke núnisar túratai. <sup>16</sup> Penker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

<sup>17</sup> Yus-shuaran akupin ainia nu umirkarum shiir enentáimtikratarum. Ni takatrin Yúsan ujaktin ásar atumí wakanin shiir wainiainiawai. Niisha itiurchatcha antsu wakerumainian túrawarat tusarum shiir yáintarum. Nu túrachkumka žitiurak yainmakarat?

<sup>18</sup> Incha Yus áuj<sub>s</sub>atarum. Iisha ashí p<sub>e</sub>nker tú<sub>r</sub>atin wakeraji. Tú<sub>r</sub>aji enentáimji. <sup>19</sup> Tura Yus áuj<sub>k</sub>uram Yus ataksha atumj<sub>a</sub>i wainniaikiatniun wari tsan<sub>k</sub>atruk<sub>a</sub>t tusarum seatri<sub>t</sub>iarum.

*Amúak shiir chichaawai*

<sup>20-21</sup> Imiatkinchanum apuj<sub>k</sub>artinia nú Yus, Jesukrístun jakamunmaya iniantkimia nuka, ni numpé kakarmarij<sub>a</sub>i ashí p<sub>e</sub>nker ana nuna suramsarti. Nuj<sub>a</sub>i ni wakeramu tú<sub>r</sub>attarme. Tura Jesukrístu kakarmarij<sub>a</sub>i ashí ni wakeramun in pujurtamas takasti. Ii Uuntri Jesukrístu ashí Yus-shuaran ti penker Wáinniuiti. Tura ni numpej<sub>a</sub>i Yamaram Chichaman kakaram awajsamiayi. Nu Chichamsha tuke men<sub>k</sub>akashtatui. Aya Kristu tuke shiir awajnasti. Nú<sub>n</sub>isan atí.

<sup>22</sup> Yatsurú, kakaram chicharkajrumna ju shiir enentáimj<sub>a</sub>i anturkatarum. Kame ti wárik áatraj<sub>r</sub>ume. <sup>23</sup> Yamaikia ii yachi Timiutéu sepunmaya jiinki an<sub>k</sub>ant ajasai. Nuna ujaaj<sub>r</sub>ume. Wárik tá<sub>m</sub>atain<sub>k</sub>ia atumin í<sub>t</sub>iaj tusan winiakun niij<sub>a</sub>i winittiaj<sub>a</sub>i.

<sup>24</sup> Atumí ún<sub>t</sub>ri<sub>s</sub>ha tura ashí Yus-shuarsha amikmaatarum. Itiaria nun<sub>k</sub>anmaya shuarsha amikmatmainiawai.

<sup>25</sup> Ashí Yus ti shiir yainmakarti. Nuke atí.

## SÁNTIAK papin árar akuptukma

### *Sántiak aarmiania nu*

<sup>1</sup> Wi Sántiak Uunt Yúsán tura núnisañ ii Uuntri Jesukrístun umirin asan ju papin aajai. Ashí Yus-shuartermin ashí nunkanam tsakinmakarum matsatrumna nuna amikmaajrume.

### *Nekatainkia Yúsnumiãiti*

<sup>2</sup> Yatsuru, ashí itiurchat wáinkiuimesha tuke warastarum. <sup>3</sup> Iis, itiurchatnum pu-jakrum nekas Yus enentáimtaitkiurmeka katsuntratin unuimiartatrum. <sup>4</sup> Tura tuke páchiachkuram, tuke katsunteakrum, nuikia Yúsjaí ti penker katsuartatrum. Penké atsumashtatrum.

<sup>5</sup> Átum nánkamsarmek nekaatin tujintiakrumka Yusa nekatairi seata. Shuar seakuí Yuska kajetsuk tura ementutsuk antsu patatas súawai. Tuma asamtai seakminkia suramsattawai. <sup>6</sup> Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ántam seame. Nayaantsa tsukaturí juní taa, atúu waketki ajatsuk. Amesha áintsamek túmame. <sup>7</sup> Enentáimiin núnisketkuinkia, seamna nuna Yus penké suramsashtatui. <sup>8</sup> Shuar jimiará enentáimna nuka shiir wekasatniun tujintiawai.

<sup>9</sup> Yus-shuar, ju nunkanam kuítríncha ainia nu, Yus shiir awajsamu nujai warasti. <sup>10-11</sup> Tura Yus-shuar kuítrinniitkuisha péejchach enentáimtikramsha warasti. Iis, nupa kuánkam tura nantu ti sukuam kaar miniatsuk. Kuítrinniuka ántska ántam seame. Nayaantsa tsukaturí juní taa, atúu waketki ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

### *Ii itiurchatrí ana nu*

<sup>12</sup> Shiiraiti shuar ni itiurchatríin nekas katsunteana nuka. Nekapsam jíinkiuñka akinkiatniun wáinkiattawai. Iwiaaku átinian, tawasap achiktinia núnisan, wáinkiattawai Yus ni aneam tsankatka nuna. <sup>13</sup> Shuar tunáa túramnia nekapeakka “Yus nuna útsutrutui” tu enentáimprashtiniaiti. Yuska yajauch túramnia enentáimtsui túrasha Niisha penké chichinkimesha tunaanum útsuchuiti. <sup>14</sup> Antsu ni wakeramurijiaín aents tunaan niñki ikiatmamkaiti yajauch túratniun. Nújainkia tunaanum útsukmaiti. <sup>15</sup> Nu yajauch wakeramunmayá tunáa akiiniui. Tura nu tunáa mash amuukamtaí jákatin akiiniui.

<sup>16</sup> Yatsuru, aneakun tájarne, anañmamawairap. <sup>17</sup> Ashí penker ana nu, ashí shiir ana nusha nayaimpinmayá Yusak amasuiti. Yus ashí tsáapnia nuna najanaiti. Tura Niin kiritin atsain yapajítsuk tuke tsáapniiti. <sup>18</sup> Nii wakera asa ni nekas chichamea nujai ni uchiri najatmamji. Tura ashí ukunam átatna nujai ii émkaitji.

### *Yus nekas shiir awajatin*

<sup>19</sup> Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisañ wárik kajekaip. <sup>20</sup> Kajena nuka Yus penker wakeramun túratsui. <sup>21</sup> Nu asamtai, ashí penkercha nu tura ashí yajauch írúnna nusha iniaisata. Tura tuke enentáijiai Yus-Chicham ame enentáimin araamu anturkata. Tura nu Chicham kakarmaiti uwentikrampratniun.

<sup>22</sup> Yus-Chicham umikta. Aya ántukaip. Aya ántakmeka amek anañmamattame. <sup>23-24</sup> Shuar íspikia íimiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujai métekete. <sup>25</sup> Yus tana nujai ankant ajasminiaiti. Shuar íspikia iimia áintsan nekas Yus

pénker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

<sup>26</sup> “Nekas Yúsan shiir umirjai” tana nu tura eseer chichaachkunka imia nínki ananmamui tura “Yúsan shiir umirjai” tana nuna ántar tawai. <sup>27</sup> Nekas Yus Apa awajitsuk shiir umirkatin júiti: mitiaikiasha wajesha itiurchatnum pujuiniakuisha yáintiniaiti tura ju nunkanam ashí tunáa ana nújaisha máatrashtiniaiti.

## 2

### *Shuar antra akantrashtin*

<sup>1</sup> Yatsuru, ii Uuntrí Jesukrístu ti shiir nankaamantua nu enentaimtatirmeka shuar akantratin enentáimsairap. Shuara enentái enentáimtsuk antsu aya pátatke wáinmena nujai aents akantram niisháa enentáimturairap. <sup>2</sup> Iis, iruntrumna nuí shuar kuítrintin kurí aniyu aweera tura pénker iwiarmampra wayashtimpiash. Tura núnisan chíkich kuítrincha aruta entsaru wayashtimpiash. <sup>3</sup> Tura kuítrinnia nu “Pénkera juí pujusta” tíchatameash. Tura kuítrinchaka “Atu wajauta, túrachkumsha juí nunkansha pujusta” tíchatameash. <sup>4</sup> Nu tákumka yajauch enentáimpram jimiará enentáijjai aents enentáimtame.

<sup>5</sup> Aneamu yatsuru, antuktaram. Ju nunkanam kuítrincha ainia nuna Yus achikiuiti Ní shuar ajasar Nin nekas enentaimtin ajasartinian. Tura ashí nayaimpiniam íranna nunasha Yus nin tsanatkattawai. Ashí shuar Yúsan aneena nuna anajmatra asa nin tsanatkattawai. <sup>6</sup> Átum antsu kuítrincha natsant awajearme. Iista, kuítrinnia nuka timiá itiurchat awajtamainiatsuk. ¿Nuikia níchuk ainia achirmak kapitiánnium japiki júramprumna nu? <sup>7</sup> ¿Nínkichuk ainia Kristu naari shiira nuna ántar pachikiar penké yajauch áujmatainia nu? Tura átumka nuna naari tuke shiir awajkurmin, ashí shuar “Kristu shuari” túramainiawai.

<sup>8</sup> Yus-Chichamnum ju akupeamu nekas pénkeraiti: “Ame ayashim aneamna núnismek ame írutramuram aneeta.” Nu nekas umirniuitkiurmeka maak. <sup>9</sup> Nú enentáijjai kuítrinniajuí chichasminiaiti. Tura nuyá kuítrinchajai shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurijjai amek sumamame. <sup>10</sup> Chíkich akupkamu íranna nu ashí umikiam tura aya chikichik akupkamu umikchamka nuikia ashí akupkamu umircha ajasume. <sup>11</sup> Iis, Nínki Yúsak chichaak tíchamka “tsanirmawaip.” Tura chikichnasha “mankartuawaip” tímiayi. Nu asamtai, shuar tsanirmatsuk túrasha mankartakka ni wakeramun umirtsui. <sup>12</sup> Kristu ankant awajtamsamtaí ii yamáí ni akupeamurí yúpichuch umirkamniaitji. Nu asamtai nu akupkamujai métek wekakurnínkia Yus “pénker túraitme” turamatji. Tura umikchakriníka “pénker umikchaitme” turamatji. Tura nu enentáimsar pénker chichasar takasar wekasatniuitji. <sup>13</sup> Chikichan waitnentachkunka waitnennatsuk asutniáttawai. Tura waitnenkratniuitkiurnínkia tsawant jeamtaí Yus in waitnentramprattaji.

### *Yus enentáimtustin tura umirkatniusha*

<sup>14</sup> Yatsuru, shuar “Yusan shiir enentáimtajai” táyat tura pénker túrachkuínkia pénkerashit. Nujai uwemprattawak. <sup>15</sup> Wátskea, Yus-shuar, áishmansha nuwasha, entsátáirin tura yurumken atsumashtimpiash. <sup>16</sup> Tura ame nékayatmek ayashí atsumana nu sútsuk tíchatapash “Pénker wetá, entsatai entsaram túram pénker yurumáta.” ¿Nu sútsuk tákum pénkerkait? <sup>17</sup> Núnisan takatsuk Yus enentáimtustin ántraití.

<sup>18</sup> Tura shuar tíchanpiash, “Chíkich takaawai tura chikichcha Yúsan shiir enentáimtai. Mai pénkerchakait” tichanpiash. Wats, ame Yus enentáimtamun takatsuk paant inaktusminiashtiam. Tura wi antsu pénker takatrujai Yus enentáimtamun paant inaktustatjai. <sup>19</sup> Nekas Yus chikichkiiti tu enentáimtame. Nuka pénker túrame. Túrasha iwianchcha nunasha nékainiawai. Tura umircha ásar ashamainiawai. <sup>20</sup> Netse enentáimpraip. Ashí Yus wakera nu takaachkumka, Yus enentáimtustin ántraití. ¿Nu nekaatin wakeramek?

lista. <sup>21</sup> Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pénkeraitme” tímiayi Apraáman. <sup>22</sup> Páantchakait. Apraám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiaayi. Tura umirak Yus enentáimtamun umikmiayi. <sup>23</sup> Nujaj Yus-Chicham aarma nu uminkiamiayi. Juiti: Apraám Yúsan shiir enentáimtusmiayi tura Yus chicharuk tímiayi “Máakete. Nújainkia tuke péñker túraitme Wijjai” tímiayi. Apraámsha nekas “Yusa Amikri” tu náamkamiayi.

<sup>24</sup> Páantchakait. Shuar aya Yúsan shiir enentáimtamujainchuk tura péñker takas-majajsha Yus nin shiir enentáimtawai. <sup>25</sup> Núnisan Raap tsanirmataiyayi. Túmaitiat Israeran suntarin mamikmauta tusar akupkamun ni jeen itiaawar tura úukar chíkich jántianam akupak uwentikrarmiayi. Nuna túramtai Yus “pénkeraitme” tímiayi nincha. <sup>26</sup> Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ántraitji.

### 3

#### *Ii iniaj*

<sup>1</sup> Atum untsurí jintiníkiartin ajastin wakerukairap. Yus in, jintiníkiartin ájinia núnaka, nankaamas neka asar, awajiakrin nankaamas Yus asutiámattaji. <sup>2</sup> Iis, ashí mash ti awajiatsjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashúisha tuke péñker ana nuna túriniaiti. <sup>3</sup> Kawaisha enentáimpratai. Jiru wenuchiniam ikiursam ni ayashí ashí ayantaatsuk. <sup>4</sup> Kanusha ti úuntaitiat tura kakaram wéayat ishitiapach wiantajijai shuar wakera nuí ayantarmini-aiti. <sup>5</sup> Núniskete ii iniaj. Timiá ishitiapchitiat awakmaktinia tímianu chichaatsuk. Ji ishichik kapaajaj ashí numi tsaruaku ekeemakchamniakait. <sup>6</sup> Ii iniajsha jijjai méteketete. Ashí tunáa piákuíti. Tura ii ayashín tunáa túratniun útsutmaji. Túñkuranmaya jijjai ikiapármaiti tura ashí ii wekajnia nuí émesewai. <sup>7</sup> Shuar ashí yajasman nawamkamin áiniawai. Ashí kajen írúnna nunasha, nanamtincha, napincha, tura entsayanacha ashí nawamkaruiti. <sup>8</sup> Tura iniaikia penké nawamkachminiaiti. Ti yajauch asa penké nu-petkachminiaiti. Iniaikia ti taráa tseasaiti. <sup>9</sup> Nu iniaijjai Yus Apa shiir awajeaji tura nu iniaijjain aentsti yajauch chichárnaiyaji. Áentsun Yus Nijjai métek-taku najanamaitiatar yajauch chicharnaiyaji. <sup>10</sup> Nu iniaijjain péñkersha tura yajauchisha chichaaji. Yatsuru, nuka penké atsutniuiti. <sup>11</sup> ¿Púkuninmaya entsa sáawijjai kusuku jínkimniakait? <sup>12</sup> Yatsuru, ¿Kushiníkiap shuinian nereawak. Munchisha kushiníkiapen nerektatuak? Núnisan púkuninmaya entsa sáawijjai kusuku jínkichminiaiti. Ii iniaijjai núnisan aya péñkera nu chichastiniaitji.

#### *Yusa nekatairi*

<sup>13</sup> Shuar ti neka enentái takakna nu, péñker túrattawai. Nekas nékaitkiunka péejchachia núnis tuke péñker ana nuna túrattawai. <sup>14</sup> Antsu atumí enentáijjai penké yajauch enentáimtunairum tura atumek péñker pujustin enentáimtumarum, nékaitiatam péñker túrachiatam “pénkeraitjai” tiip. Nuka wáitrame. Nekaska núchaiti. <sup>15</sup> Nú enentaikia Yúsaiyanchuiti. Antsu ju nunkanmayaiti, shuara enentáiyaiti, núnisan iwianchnumiaiti nú enentaikia. <sup>16</sup> Shuarsha yajauch enentáimtunairar tura niníki enentáimtumainiakui, nujaj ashí meseawai tura ashí yajauch ti awai. <sup>17</sup> Antsu Yusaiya enentái takakua nu júnisaiti: ashí nankaamas emka eseeratin, nuyá nawamkartin, shiir ajá, péñker anturnain, waitnenkratin, ashí péñker takáa tura anantsuk naka chichamtin. <sup>18</sup> Eseera enentáimsatniusha shiir takawai ashí shuar péñker ana nuna túrawarti tusa.

### 4

#### *Ju nunkanam írúnna nu aneashtin*

<sup>1</sup> ¿Urukamtaitsuk tuke kajernaikiarum ti máanaisrum pujarum. Mesetnumsha urukam-tai wéarum? Júnisaiti: Atumin yajauch enentái katsuntrachmin útsutmakrumin tuke máaniarme. <sup>2</sup> Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujaj itit enentáimtuniarme tura atajtin tujinkiam máanaitrume. Wakerarmena nusha Yus seachu asarum wáintsurme. <sup>3</sup> Tura seakrumsha yajauch searme. Atumí péñkerijijaj warastin enentáimiu asarum searmena nusha wáintsurme. <sup>4</sup> Jú nunkanmaya wakerakum Yusa nemasrijijaj tsanirma áintsan\_ketrume. Nékatsumek atumsha. Ju nunkanmaya\_wakerakria Yusa nemasrintji. Shuar ju nunkanmaya\_wakerakka Yusa nemasri\_ajawai. <sup>5</sup> Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántrankeash ta? <sup>6</sup> Tura anenma asa ti yáinmaji. Tuma asantai Yus-Chicham tawai:

Kajemtinian Yus ístatui tura péejchachin Yus nin aneak ti shiir yáintatui, tawai.

<sup>7</sup> Yusaj ikiumastarum, tura íwianch taritratatum. Túrakrumin íwianch ikiurmaktiatui.

<sup>8</sup> Yúsainí weamkata tura Nii atumin wearmaktatrume. Tunáa shuartiram Kristu numpejaj nijiamartarum. Tura átum, Yussha tura ju nunkanmayasha mai métek wakerarmena nu, atumí enentái naka eseeratarum. <sup>9</sup> Atumí tunaari enentáimsarum kúntuts enentáimpratarum. Nu kúntutsaj ti úuttiarum. Nuik shiir enentáimprarum wishik-miarumna nuka iniaisarum kúntuts enentáimprarum úuttiarum. <sup>10</sup> Yusjaj péejchach ajasta, túrakmin shiir awajtamsattawai.

### *“Yajauchiitme” tunaichatin*

<sup>11</sup> Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaari tuke áujmatuk Yus “aneniatarum” tana nuna umichuítí. Antsu umichu asa “nu akupkamu ántraiti, umirkashtiniaiti” tawai nu shuar. Nujaj nu shuar umirtsuk Yus akupkamu nankaamas enentáimtumawai. <sup>12</sup> Yus Niñki akupkamu najana asa Niñki nu akupkamu umirkamun nekas nekaamniaiti tunaashit tusa. Niñkiti uwemtikratniun tura emesratniunam akupkatin jea nu. Amesha yáitiam chikicha tunaari ístincha.

### *Kashin átatna nuna Yusak nékawai*

<sup>13</sup> Watsek, átum áujmateakrum “Arumsha kashincha nu péprunam weri nuñ chikichik uwí takasar kuit achiktatji” tíchattarpash. <sup>14</sup> Ishichkisha penké nékatsume kashin átatna nu. Ju nunkanam ii iwiaakmarí wárik amúatsuk. Yurañkim utsanar tura nantu sukuam mash wárik menkaatsuk. Núnisketji. <sup>15</sup> Antsu júnis tíminiaitrume: “Yus wakerakuñkia iwiaaku pujakria nusha túrattaji” titiarum. <sup>16</sup> Túrachkurmeka átumka Yusjaj nankaamantu enentáimprume. Tura ashí nu enentáikia yajauchiiti. <sup>17</sup> Shuar péñker túratniun nékyat, túrachkuñkia, nuka tunaiti.

## 5

### *Kuítrintin enentáimpratniua nu*

<sup>1</sup> Kuítrinniutiram ju antuktatum. Ti úuttiarum. Ti wáitsatin asarum ti kakantra úuttiarum. <sup>2</sup> Kuítrum mash mamukarai tura iwiamampramurmesha mash tin\_kishap yúkayi. <sup>3</sup> Kurirmesha tura kuítrumsha ashí ijiakmamkarai. Ijiakmampramurisha ame péñkercha túram nuna paant iniakmawai. Tura jinium áesamua áintsan\_ame kuítrum yajauch awajtamsattawai ayashmijn. Amuukatin tsawant jeamunam anearchamame antsu ame kuítrum ikiaun\_kamame. <sup>4</sup> Ame takat iniararam ementushim akirarmamna nu “akirkati” turamainiawai. Anearta. Yakjyá Yus, nayaimpinmaya\_suntara uuntri, nu takartamniu chichamen antukai. <sup>5</sup> Ashí ju nunkanam írúnna nu wararsaruitrume. Tuma asarum kapun\_ka nuke machararme tura yamaikia máatin tsawant jeayi. <sup>6</sup> “Nu



shuar tunaiti” tírum tunaachu tsanumprurum máamarme, tura nin<sub>̄</sub>kia surimiakcharmai.

*Yawetsuk takastin tura Yus áuj<sub>̄</sub>satin*

<sup>7</sup> Nu asamtai, yatsuru, nu páchitsuk ii Uuntr<sub>̄</sub>i Kristu tatin nákastarum. Arakmausha ni arak<sub>̄</sub>r<sub>̄</sub>i pé<sub>̄</sub>nker tsapaiti tusa yumi yutuktinian shiir enentaij<sub>̄</sub>ai nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk. <sup>8</sup> Núnisan atumsha katsuntsatarum tura yawe<sub>̄</sub>kiirap. Kristu tatin yuntumtemayi. <sup>9</sup> Yatsuru, nuám<sub>̄</sub>tak “ju yajauch túrutui” tunainirap. Tákurminkia Yus írmastatrum. Nín<sub>̄</sub>kichukait nuna íistin tura anearta nu Yúsak tíj<sub>̄</sub>uch wajatramui. <sup>10</sup> Yatsuru, yaunchu Yús<sub>̄</sub>nan etserin enentáimpratarum. Tuke ii Uuntr<sub>̄</sub>i Yus timia nuna shiir etserkarmiayi. Túmaitiat wáitsarmiayi túrasha pachischarmiayi. Núnisrumek enentáimsatarum. <sup>11</sup> Itiurchatan katsuntainia nuka nekas shíiraiti, tu enentáim<sub>̄</sub>ji. Shuar itiurchatan ti katsuntin ámiayi, ni naar<sub>̄</sub>i Jup. Tura ni itiurchatr<sub>̄</sub>i nan<sub>̄</sub>kaasmatai Yus ti núkap kuítr<sub>̄</sub>in susamiayi. Nu nékatsrumek. Ii Uuntr<sub>̄</sub>i Yus ti waitnen<sub>̄</sub>kratchakait.

<sup>12</sup> Ju ashí nan<sub>̄</sub>kaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chícham chichaachkumnin<sub>̄</sub>kia Yus írmastatui. Nu asamtai nayaimsha nun<sub>̄</sub>kasha ashí írunna nusha páchitsuk, aya támena nu tuke nekas atí.

<sup>13</sup> Wáitakme<sub>̄</sub>ka Yus áuj<sub>̄</sub>sata. Waraakme<sub>̄</sub>ka, warasam kantamám Yus shiir awaj<sub>̄</sub>sata. <sup>14</sup> Yus-shuartiram, shuar jáakka, Yus-shuara úuntr<sub>̄</sub>in untsukti. Tura niisha taarti. Tura Jesusa naar<sub>̄</sub>i pachikiar asuitij<sub>̄</sub>ai jaa shuaran ishichik kuerarti. Túrawar Yús<sub>̄</sub>an áujtusarti nu shuaran. <sup>15</sup> Tura “Yus nuna nekas anturtamkattaji” tu enentáimsar áuj<sub>̄</sub>sarti. Túrawarmatai jaa shuar pé<sub>̄</sub>nker ajastatui. Yus nin tsuártatui. Tura tunaan tura asa jáakuin<sub>̄</sub>kia Yus nu tunaan tsan<sub>̄</sub>kurattawai. <sup>16</sup> Nu asamtai, atumí tunaar<sub>̄</sub>i paant etsertunaiktarum. Túrarum Yus áujtunaistarum atumí tunaar<sub>̄</sub>i tsan<sub>̄</sub>kurnarat tuserum. Pé<sub>̄</sub>nker shuar Yús<sub>̄</sub>an tuke enentáij<sub>̄</sub>ai áujeamuri<sub>̄</sub>n<sub>̄</sub>kia ti kakarmaiti. <sup>17</sup> Yaunchu Yus-Chichaman etserin ámiayi, ni naar<sub>̄</sub>i Erías. Niisha iij<sub>̄</sub>ai méteketiat yumi yutukaj<sub>̄</sub> tusa Yusa áuj<sub>̄</sub>sam<sub>̄</sub>tai menaintiu uwí nuyá nan<sub>̄</sub>kaamas yutukchamiayi. <sup>18</sup> Ataksha yutukti tu áuj<sub>̄</sub>sam<sub>̄</sub>tai ataksha yutukmiayi tura araksha ataksha tsapainiarmiayi.

<sup>19</sup> Yatsuru, shuar eseera wekatinmaya kanaakuin<sub>̄</sub>kia chíkich nin waketkitniun yainti. <sup>20</sup> Shuar tunáa shuaran yajauch wekaan awakeakka jákatniunmaya uwemtikrat-tawai tura ti untsur<sub>̄</sub>i tunaar<sub>̄</sub>i tsan<sub>̄</sub>kurnartatui.

## PÍTIUR Emka papin aar akupkamu

### *Pítiur Yus-shuaran áatramiania nu*

<sup>1</sup> Wis̄ha ju papin aajna nu Pítruitjai. Wis̄ha Jesukrístu akatramurintjai. Israer-shuar Yus-shuar árum nuna atumin an̄kant an̄kant tsakinmakarum chíkich chíkich nun̄kanam matsatrumna nuna áatjarme. Puntu nun̄kanmasha, Karasea nun̄kanmasha, Kapatúsea nun̄kanmasha, Asia nun̄kanmasha, Pitinia nun̄kanmasha pujarmena nuna áatjarme. <sup>2</sup> Yaunchu Apa Yus, “uwentikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejaisha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

### *Shiir enentáimsar pujustin*

<sup>3</sup> Wats, Yus, ii Uuntrj Jesukrístu Aparj ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniaitajnia nu arutramji. <sup>4</sup> Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiiti. Tura nussha yajauchichuiti. <sup>5</sup> Yus nekas enentáimta asakrumin ni kakarmarijjai wearmarme. Tura tuke uwentikrampratniun, nun̄ka amuuamunam paant iniakmastatna nu achikmintrum tusa tuke tsawant ni kakarmarijjai wáitmarme.

<sup>6</sup> Nu enentáimsarum wararme. Kame ju nun̄kanam pujakrum itiurchat wáinkiashtarmeash. Tura ju nun̄kanam pujustin ishichkichukait. Ukunam péñker pujustaj tu enentáimsarum wararme. <sup>7</sup> Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia aijn túruiniawai. Atumsha, itiurchat wáinkiarmana nujai, Yusan nekas enentáimtusartimpiash tusa nekapsamuitrume. Nu enentáimtamurijjai nan̄kaamas péñkeraiti. Ukunam, Jesukrístu támatai, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nun̄kanam nekapsamuitrume, itiurchat wáintrumna nujai.

<sup>8</sup> Jesukrístu wáinchaiatrum anearme. Tura yamá wáinchiatrumek nekas enentáimtarme. Tuma asarum ti wararme. Nu warastin nayaimpiniam warastatjinia núniskete; nuka paant titin jeatsji. <sup>9</sup> Iimiatarum. Uwentikrurat tusarum Yus umirkachurmek. Nu uwempratin wainiu asarum waraarme.

### *Krístujai ii uwempratniun yaunchu etserkarmiayi*

<sup>10-11</sup> Yus áentsun waitnenta asa, uwentikrataj tusa tuke wakerimiayi. Núnaka Yúsnan etserin etseriarmiayi. Kristu Wakanj ni enentáin pujuriarmia nu, túruntsajin Kristu wáitsatniurin jintiarmiayi. Tura ukunam ni ti shiir pujustintrincha etseriarmiayi. Túrusha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi. <sup>12</sup> Tura nii pujuiniajinkia túrunashtinian, antsu ti ukunam, ii pujajnia juj túrunatniun Yus nekaamtikiarmiayi. Núnaka Yusa shiir chichamen ujatmakarmia nú shuar nekaprutmarme. Nú shuar Yusa Wakanj, nayaimpinmaya akupkamu ana nuna nekatairijjai ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrusha tujintiainiawai.

### *Péñker wekasatin*

<sup>13</sup> Tuma asamtai, pé<sub>n</sub>ker enentáimsarum tura pé<sub>n</sub>ker ímiasrum wekasatarum. Tura Jesukrístu ukunam wantiniak waitnentramp Prattana nu yawetsuk nákastarum. <sup>14</sup> Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. <sup>15</sup> Ashí túramurmijjají timiá pé<sub>n</sub>ker wekasatarum. Yus, untsurmakuana nu, pé<sub>n</sub>ker asamtai, á<sub>t</sub>umka ni shuari asarum pé<sub>n</sub>ker wekasatarum. <sup>16</sup> “Wi pé<sub>n</sub>ker asamtai atumsha pé<sub>n</sub>ker wekasatarum” Yus tana nu ni Papiriin áarchamukait.

<sup>17</sup> “Yus winia Aparuiti” tárúmna nu aneartarum. Ashí aentsu túrutairin métek Yus nekaattawai. Nu neka asarum, ju nunkanam pujarmena juí Yus ashamkatarum. <sup>18</sup> Warí, á<sub>n</sub>tra wekasatniun atumí uuntri jintinramarmena nuyá Yus uwentikramprarme. Tú<sub>r</sub>asha kurisha kuitcha amuukamnia ainia nujají uwentikrachmaitrume. <sup>19</sup> Antsu Kristu numpe ti shiira nujají uwentikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarín tsan<sub>k</sub>urattajai” tíniuyayi. Núnisan Kristu in jarutramka asa ii tunaaríniá uwentikrampraitji. <sup>20</sup> Nunkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, á<sub>t</sub>um pujarmin, pé<sub>n</sub>ker pujusúk tusa wakerak, atumin jarutramkat tusa Krístun akupkamiayi. <sup>21</sup> Nijjají á<sub>t</sub>umka Yus umiirume. Yuska Krístun jakamunmayan iniantki nan<sub>k</sub>aamantu awajsamiayi. Yus nekas enentáimtakrum, aya pé<sub>n</sub>kernak túrawai titiarum tusa túraiti. <sup>22</sup> Yus nekas tana nuna, Yusa Wakani yainmakui, umirka asarum atumí wakaníin pé<sub>n</sub>ker ajasuitrume. Yus-shuarjají yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. <sup>23</sup> Nekaatarum. Yusa chichame umirka asarum atak akiiniaitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjají tuke iwiaaku á<sub>t</sub>iniaitrum.

<sup>24</sup> Ju ayash tuke pujuschamniaiti. Yusa Papiriin junis áarmaiti: Ashí aentsti nupáa áaniuitji. Ii pé<sub>n</sub>kerisha kukujja áaniuiti. Nupa wárik kaawai. Kukujsha núnisan wárik iniaawai. <sup>25</sup> Tura Yusa chichamesha tuke amuukachminiaiti. Nu Chichamjají uwemprannia asamtai atumin etsernakuiti.

## 2

<sup>1</sup> Tuma asamtai, ashí yajauch ana nu iniaisatarum. Ana<sub>n</sub>katin, á<sub>n</sub>tar-chichamtin á<sub>t</sub>in, chikichna wakeruktin, ashí tsanumpratniusha iniaisatarum. <sup>2-3</sup> Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya pé<sub>n</sub>kerkea nu ti wakeruktarum. Yusa chichamejají tuke tsawant tsakakrum tuke uwemprami tusarum tú<sub>r</sub>atarum.

### *Iwiaaku kaya*

<sup>4</sup> Ii Uuntri Kristu kayáa áantsan<sub>k</sub>ete. Tura shuar kayan yajauchin nakitiainia núnisan Jesukrístun nakitrarmiayi. Tura kayan ti pé<sub>n</sub>keran wakeruinia núnisan, Yuska, “winia Uchir ti pé<sub>n</sub>keraiti” tusa Jesukrístun achikmiayi. Atumsha Jesukrístu weantuktarum. Nii iwiaaku kayaiti. <sup>5</sup> Atumsha iwiaaku kaya áantsan<sub>k</sub>etrume. Tuma asarum Yus wijjají ni jeen jeamti tusarum tsan<sub>k</sub>amaktarum. Tura nútiksarmek Jesukrístují atumí iwiaakmarí tsan<sub>k</sub>amaktarum, Yus wakera nuna túrutati tusarum. Jesukrístujají tura asarum Yus shiir enentáimtikrume. <sup>6</sup> Jesukrístunun Yusa Papiriin junis áarmaiti: “Iistarum. Kayan ti pé<sub>n</sub>keran achikjai” Yus tímiayi. Jeen emka apujtuamurí atí tusan Seunnum apujeajai.

Nin enentáimtana nu á<sub>n</sub>tar enentáimtatsui. Aarma ana nu pé<sub>n</sub>ké kayan chichaatsui. Antsu Jesukrístun tawai. <sup>7</sup> Yus umirkaitrumna nu, “kaya ti pé<sub>n</sub>keraiti” tarume. Tura Yusan umirainiatsna nuka Yusa Papiriin tana nujají métek á<sub>n</sub>iniawai. Ju áarmaiti: Jeen jeamin nakitrarmia nú kaya jeen emka apujtuamurí atí tusa apujamuiti.

<sup>8</sup> Tura jusha aarma awai:

Tukumak iniaartin kayaiti.

Kame shuar Jesukrístunun etserkamun nakitiakka, ¿enentáinium itiur péñker wekasat? Wats, nú shuar, Krístun umirainiachu ásar, tuke túrunatin asamtai tukumainiawai.

### *Yusna ajasaru ainia nu*

<sup>9</sup> Tura átumka Yus achikmaitrume. Tura, wínian pujurtursarat tusa yajauchinmaya Uunt Yus akantamkairume. Yusna asarum péñker enentáimin ajasurme. Tura Yus sumakmaitrume. Niisha winia péñkerun etserturkarat tusa túrait. Kame kiritni-unmaya jíinkirum ni tsáapnintrin wekasatniun achirmakurme. <sup>10</sup> Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumniñ, ¿ya waitnentrampromia? Antsu yamaikia Yus waitnentrampromi.

### *“Yúsnaítjai” tu enentáimsatin*

<sup>11</sup> Yatsurtirmin tájarme, Yusna ajasrum, ju nuñkanam írar matsatu asarum, atumí ayashí wakerana nu tsankatkairap. Ayashim wakerana nu túrakmiñkia ame enentáim nujai yajauch ajastatui. <sup>12</sup> Yus-shuarchanum péñker wekasatarum. Túrakrumniñkia niisha yamá “Yus-shuar yajauch túruiniawai” ántar tuíniayatan, ukunmanka, Yusjai inkiunaiktin tsawant jeamtai, péñker wekarmena nuna enentáimturmasar, nú shuarsha Yúsan shiir awajsartatui.

<sup>13</sup> Kristu atumí Uuntri asamtai, ju nuñkanam akupin áiniana nusha umirkatniuitrume. Uunt akupin ashí akupin asamtai umirkatarum. <sup>14</sup> Tura ni akupeamuri ainia nusha tunaan túruinia núnaka asutiáti tura péñkeran túruinia núnaka shiir awajsati tusa uunt akupin akupkamu ásarmatai umirkatarum. <sup>15</sup> Nekas péñker wekaamurmijiai enentáimcha ainia nu netse chichaamuri itiatmamtikiatarum tusa Yus wakerawai.

<sup>16</sup> Tunaanumiá ankant ajasru asarum péñker wekasatarum. Túrasha wi ankant ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum. <sup>17</sup> Chíkichcha shiir enentáimtustarum. Yus-shuar ainia nusha aneetarum. Yus péñker asamtai ashamkatarum. Uunt akupin shiir awajsatarum.

### *Yus-shuarti katsuntratin*

<sup>18</sup> Takarniutirmesha ame úuntrum péñker shiir enentáimturmakuiasha tura yajauchi-itkuisha umirkatarum. <sup>19</sup> Nekaatarum. Ántar wáitkiarmainia nuñ, “Yus iirui” tu enentáimsa katsunteakrumka, ti penkeraiti. <sup>20</sup> Yajauch túrawakmin asutiámamtaí katsunteakmekka nuisha warin ati. Antsu péñker túrawakmin asutiámamtaí katsunteakmekka júka ti penker túrame Yusai. <sup>21</sup> Núnisan túrunatin achikmaitrume. Kristu waitrutmasmiarme nuñ, Wi túraj núnisan túrawarmi tusar wáitsamiayi. <sup>22</sup> Krístuka tunaan penké túrachmiayi. Tura chikichkinkesha penké anankachmiayi. <sup>23</sup> Kátsekeamsha Niñkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iísti’ tímiayi, Yus péñker túrin asamtai. <sup>24</sup> Kristu Niñki ni ayashíin ii tunaarin entsaki krúsnum jarutramkamiayi. Tunáa enentáimtusairum tusa, antsu Yusai péñker wekasamniuram tusa jarutramkamiayi. Atumí enentáin tsuártaj tusa Kristu asutniámiayi. <sup>25</sup> Murik ni pujutairiñ waketkitniun nékatsna ántsarmek atumsha menkaka wekaimiarme. Tura yamaikia atumí wáitmauriñ waketkintrume. Atumí wáitmau Krístuiti, atumí enentáin wáinnia nu.

## 3

### *Nuatnaikiaru itiur túratniuit*

<sup>1-2</sup> Tuma asamtai, nuwatiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámekka chichaatsminiñ, niisha Yus-shuar ajastinian wakerittiawai. <sup>3</sup> Nu asamtai aya pátatek iwiarmampratniusha ti enentáimtusairap. Intiash ti penker iwiaratniusha, kurijiai

iwiarmampratniusha, pushí ti kuitjaj entsartincha ti enentáimtusairap. <sup>4</sup> Antsu, “nekas shírmach ajastaj” tákumka, enentáimin “shiir kajeche átajai” tu enentáimsatarum. Nuka sakarchattawai. Tura nuka Yúsnumka ti penkeraiti. <sup>5</sup> Yaunchu núnisaran nuwa Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirkar nujaj ni enentáin shírmach ajarar pujuarmiayi. <sup>6</sup> Atumí weatri Sara ni áishrin Apráaman umirmiayi. Umirin asa, “winia uuntru” tñiuyayi nin. Atumsha penker túrakrumka tura sapijmiatsuk wekaakrumka, Sarajaj métek átatrume.

<sup>7</sup> Tura áishmantirmesha Yus wakerana nu nekaarum atumí nuwe shiir enentáimtusarum tsanintarum. Nuwemsha, nuwa asa, áishmanjaj métek katsuntrach-miniaiti. Tura niisha, ámijijaj métek Yusa waitnenkartutairijijaj tuke iwiaaku átinian takusminiaiti. Tu enentáimta asam ame núwem shiir enentáimtustá. Yus áujkuram iturchat atsuti tusarum túratarum.

### *Yúsnum penker wekasatin*

<sup>8</sup> Nuyasha ashí Yús-shuartirmin tájarme, aya chikichík enentaik atí. Waitnen-nairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum. <sup>9</sup> Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu penker awajsatarum. <sup>10-12</sup> Yus-Chichamnum júnis aarma asamtai nu túratarum:

Uunt Yus penker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákunka tura tuke tsawant warastinian wakerana nu, penker íimiastí, yajauch chichakajj tusa tura wáitruawajj tusa. Tunaanumiá kanakí penkeran túratí. Tuke enentáijijaj shiir átinian eakti.

Tu áarmaiti.

### *Itiurchat aijn penker túratin*

<sup>13</sup> ¿Yaki yajauch túrutmat penker turamnisha? <sup>14</sup> Túrasha penker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniutrume. <sup>15</sup> Tura “Kristu winia Úuntruiti” tu enentáimtusarum. Tura “¿urukamtia Yus-shuar ajasuitiam?” turamainiakuisha, penker áimkiamnium iwiarnarum pujustarum. Waantu enentáimtumsuk, nin penker enentáimtikrataj tusam túrata. <sup>16</sup> “Yúsaj penker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaararat tusarum Yusaj penker wekasatarum. <sup>17</sup> Yajauch túrakur wáitsatniujajnkia nankaamas, Yus wakerakuinkia penker túrakur wáitsatniuka ti penkeraiti.

<sup>18</sup> Kristu ii tunaarin asakártaj tusa jarutramkamiaji. Ashí asakárma asamtai atak tu-naan jarukchatniuiti. Niisha tunaan penké túrichuitiat, ii tunáa asakrin wáitrutmasmijaji, Yúsnum ejetamta tusa. Ayashiinkia jakayat ni wakanijijaj ni ayashí ataksha iwiaaku ajasmiai. <sup>19</sup> Ni wakanijijaj jakáa wakanin emetamu armia nuna etserkataj tusa wémiayi. <sup>20</sup> Nusha yaunchu Nuai uunt kanun nájanuk sianu painti (120) uwi pujurmia nuj Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijijaj uwemtikrarmiayi. <sup>21</sup> Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentáin penker atí tusar Yus sear imianji. Nujaj iisha uwemji. Jesukristu nantakin asamtai, nujaj uwempraitji. <sup>22</sup> Tura Niisha nayaimpiniam we akupin pujutainium Yusa untsuurjini apujsamuiti. Túramtai nayaimpinmayá suntarsha, tura ashí kakaram akupin áiniana nusha Jesukristun umirainiawai.

## 4

*Ju nunkanam wáitsatin*

<sup>1</sup> Kristu ni ayashíin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashíin wáitiana nú shuar yajauchin páchiatsui. <sup>2</sup> Antsu “iwiaakjana nuikia Yusa wakeramurín tuke umirkatjai” tu enentáimui. Ni ayashí wakerana nuna yamaikia páchiatsui. <sup>3</sup> Warí, Yúsan nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekum ti yurumárum, enentáincha ajasrum charatum ajatniusha, ántar-yusa namperiin yajauch ana nu najanatniusha nusha ashí wakerimiarme. <sup>4</sup> Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtai iniaisara?” tusar yajauch áujmatramprume. <sup>5</sup> Túrasha ukunam nu aents ni túramurín etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui. <sup>6</sup> Túrasha jaka armia nu Yusa shiir chichame ujankarmiayi. Ni ayashíin ashí shuarjai métek jakamniaitiatan Yus iwiaaku pujana núnisan ni wakaní iwiaaku pujusarat tusa ujankarmiayi.

*Shuar yáintinaitji*

<sup>7</sup> Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujatarum. <sup>8</sup> Aneniamujai untsurí tunaasha tsankuratin awai. Tuma asamtai ashí nankaamas nuamtak anenaistarum. <sup>9</sup> Kajé-kajejainchu atumí jeen itiaaniátarum. <sup>10</sup> In ankant ankant shiir awajtamsatniun Yus ti núkap takakui. Tura in shiir awajtamsamujai chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujai ame írutramuram yaintá. <sup>11</sup> Etserkatniun Yus amasuitkiuinikia ame tamena nu, Yus tana nujai métek atí. Chíkich shuar yáintinaitkiumka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náaríjjai túrata. Jesukrístun ashí aents shiir enentáimtusartí. Tura ashí áentsnum ni kakarmari tuke atí. Nuna tajai.

*Yus-shuarti wáitsatin*

<sup>12</sup> Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti. <sup>13</sup> Tuma aijn shiir enentáimsatarum. “Kristu wáitsamurín métektaku wáitiakun péñkeraiti” tu enentáimsatarum. Ukunam Kristu winchari wáinkiarum timiá warasmi tusarum túratarum. <sup>14</sup> Krístunu asakrumin katsekkramkachartimpiash. Túmaitkiuisha Yusa Wakaní shiir ana nu atumíin pujurtamkui shiir awajsamuitrume. Katsekkramainia nú shuar imia Yusa Wakanin yajauch áujmatainiawai. Tura átumka Yusa Wakaní shiir awajearme. <sup>15</sup> Túra atumsha yajauch túrawairum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjainkia nu wáitsatniuka atsutí. <sup>16</sup> Tura antsu Krístunuiti tusar wishikramuk wáitkiarmainiakui natsaarairap. Krístunu asam wáitiatmek, natsamtsuk Kristu naari shiir awajsata.

<sup>17</sup> Yuska ni shuarin nekapratsajtsa nanamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartin. Ti asutniáwartatui. <sup>18</sup> Imia Yus umirjinia nu uwempratniuri iturchataitkiuisha tunaan túruiniana nusha urukawartin. <sup>19</sup> Tuma asamtai Yus wakeramujai wáitainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

## 5

*Yus-shuara uuntri túratin*

<sup>1</sup> Yamaikia Yus-shuara uuntritiram, jintintjiarme. Wisha núnisnak Yus-shuara uuntritjai. Kristu wáitsamurín wáinkiaitjai wisha. Tura ukunam ti shiir átatna

nui chíkich Yus-shuara uuntria núnisnak wisha pachiinkiattajai. <sup>2</sup> Yus-shuar ame ístiniatmena nu, péñker iistá, murikiu wáinin ni murikrjn wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrattajai” tútsuk tura nujai kuítrintin ajastin enentáimtsuk nekas wakeritia, Yusa takatrj asamtai. <sup>3</sup> Turasha, “Yús-shuara uuntri ajasan, Yus-shuaran akuptiaj” tu enentáimsaip. Antsu shiir túramurmijiai Yusa murikrj jintintiata. <sup>4</sup> Nuñkia murikiu wainniu Uuntri taa wantiniak iwiarmamtai tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úuntrum ámin suramsattana nuka penké mamurchattawai.

### *Yus-shuarti umirnaikiatin*

<sup>5</sup> Tura natsatirmesha atumí uuntri umirkatarum. Kame yaunchu Yús-Papinium aarma asamtai ashí Yus-shuartiram nankaamantu enentáimtumatsuk umirnaikiatarum. Waantu enentáimtuma núnaka Yus nakittiawai. Antsu nankaamantuchu enentáimtuma nuna Yus waitnentak yayawai. Tu aarmaiti.

<sup>6</sup> Wats, Yus timiá kakaram asamtai, amek nekamam, péjchach enentáijiai enentáimtumasta. Nuñkia tsawant jeamtai ni wakerak Yus ámin penkerj awajtamsattawai. <sup>7</sup> Yus ámin ti enentáimturmakui ame itiurchatrum ainia nu Yus ashí iiktusta.

<sup>8</sup> Aneartarum tura ímiastarum. Íwianch atumí nemasrj ana nu, uunt yawáa nuke, yanak emesraintiaj tusa eaak tentaa wekaawai. <sup>9</sup> Tura tuke Yus nekas enentáimtusrum surimiaktarum. Ashí nunkanam Yusnum atumí yachj ainia nu átum wáitiarmena núnisarañ wáitiainiawai. Nusha kajinmakchatniuitrume. <sup>10</sup> Wats, ishichik tsawant wáitsarmena nu nankaasmatai Yus ataksha péñker awajtamsattarme. Tura numi wewe wajana núnisarañ ikiakátmartatrume. Tura Yus ikiakárma asarum ni jintijn tuke péñker wekasattarme. Ju Yus tuke in waitnentrantsujik. Tura iisha Jesukrístunu asakrin Niijiai métek Yus ni shiir pujutainium tuke shiir pujusmintrum tusa achirmakuitji. <sup>11</sup> Nú Yúsnasha ashí aents shiir enentáimtusartí. Tura ashí áentsnum ni kakarmarj tuke atí. Nuke ati.

### *Amiak áujmamsamu*

<sup>12</sup> Serpanujai ju papin ishichik áarmaj nuna akupeajai. Serpanu Yusjai péñker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijiai. Tura tuke ni waitnenkartutairijn wekasatarum tájarme.

<sup>13</sup> Papirúnianmaya atumjai métek Yus achikma áinia nu amikmaatmarme. Winia uchir Markus núnisarañ amikmaatmawai.

<sup>14</sup> Yusaj yachj ajasu asarum anenaisrum shiir awajnaisatarum. Jesukrístunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

## PÍTIUR Ataksha papin áarar akupkamu

### *Pitiur Yus-shuaran áatramiania nu*

<sup>1</sup> Wikia ju papin aajna ju Semun Pítruitjai. Jesukrístu akatramu asan ni takarniurintjai. Ii Yusrj tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijiai métek Niiniu ajasurme. Nuka ti penkeraiti. <sup>2</sup> Yus, tura ii Uuntri Jesussha nékarmena nú nukap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajume.

### *Yusaj páchitkia atin*

<sup>3</sup> Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. <sup>4</sup> Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashj yajauch wakerana nuyá uwemprarum, Yusaj páchitkia átinian suramsaitrume. <sup>5</sup> Yus umirkarme. Yamaikia juna túrataj tusarum kakartiniaitrume. Ti penker wekasatniuitrume. Nuyá Yusna nekaatniuitrume. <sup>6</sup> Nuyá yayauch túrashtin ímiastiniaitrume. Nuyá katsuntratniuitrume. Nuyá Yus shiir enentáimtusurum wekasatniuitrume. <sup>7</sup> Tura nuyá ashí shuar shiir enentáimtustiniaitrume. Tura nu nankaamas ashí shuar aneatniuitrume.

<sup>8</sup> Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesurum takastatrum. Tura ii Uuntri Jesukrístu nekas nekaattarme. <sup>9</sup> Tura nuna túruiniatsna nuka, kusurua áanin áiniawai. Jesukrístu wakeramurj enentáimtuiniatsui. Ni tunaariya uwemprarmia nuna kajinmatainiawai. <sup>10</sup> Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. <sup>11</sup> Tura ii Uuntri Jesukrístu uwemtikramprajnia nu, Nii tuke akupeana nu, nakittsuk shiir awaintiamattarme.

<sup>12</sup> Tuma asamtai nékarminiñ tura Yusna nekas ana nuyá kanaatsrumniñ tuke enentáimtikratjarme. <sup>13-14</sup> Nekaatarum. Winia jákatniurun jeatema nuna ii Uuntri Jesukrístu ujat kayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai. <sup>15</sup> Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

### *Kristu waantu ajasun wáinkiarminia nu*

<sup>16</sup> Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchayui. Antsu imia ii jiiijai Uunt Jesukrístu waantu ajasu wáinkia asar ujakmajrume. <sup>17</sup> Tura Apa Yus Jesukristun shiir waantu awajsamia nu, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.” <sup>18</sup> Iisha naint “Yusna” tájinia nu Niiijai pujá asar nu nayaimpinmaya chichaamu paant antukmaji.

<sup>19</sup> Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asamtai, penker enentáimta asarum penker túrarme. Tura Kristu taa, yanquam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke penker enentáimtustarum. <sup>20</sup> Tura ju emka nekaatarum. Shuar aya ni enentáimmiarijain, Yusa Wakanjiainchu, Yus-Chicham urukamtai tu chicháa nuna



nekaatniun jeatsui. <sup>21</sup> Warí, Yúsnan etserin yaunchu etserkarmia nu, aya ni wakera-murijjain tícharmiaiyi. Nu áishmankan enentáin Yus pujursarmiaiyi. Tuma asa ni tiarmia nuna Yusa Wakanj jintintiam tiarmiaiyi.

## 2

### *Wait chichaman unuiniainia nu (Jútas 4-13)*

<sup>1</sup> Tura Israer-shuarnum wait chichaman etserniusha páchitkiarmiaiyi. Atumjincha wait chichaman unuiniiau páchitkia ártatui. Niisha awajimtikrampratniun wakeruiniak wáitian ti yajauchin uukar unuiniarartatui. Tura “Uunt Jesus uwemtikrurmia nusha ántrai” tiartatui. Nuna takui ni amuukatniurisha wárik jeartiatui. <sup>2</sup> Tura untsurí shuar ni yajauch túruiniamurín írsar métek túrawartatui. Iis, “Yus-Chichaman unuiniait-jai” tuíniayatan imiá yajauch túruiniakui untsurí aents “Yus-Chicham ántrai” tiartatui. <sup>3</sup> Kuítian ti wakeruiniá ásar, wait chichaman unuitiamprar akíam kuítriniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantri jeatemai. <sup>4</sup> ¿Warí? Yuska ni suntari nayaimpiniam pujuarmia nunasha penké tsankurachmiyai. Antsu nayaimpinmaya jinium akupkarmiaiyi. Tura nekapsatin tsawant jeatsain kiritniunam jinkiamu emetamu pujuiniawai. <sup>5</sup> Yáunchuya shuar-nasha Yus tsankurachmiyai. Antsu amuukarat tusa amaarkatniun akuptukarmiaiyi. Antsu aya Nuain, Yusjai wekasatniun etserin asamtai ni shuari siati armia nujai uwemtikramiaiyi. <sup>6</sup> Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiyai. Aya yúnkunmik awajsamiyai. Ukunam nu túrunamun nekaawar, shuar tunáa túratin tsúumainian nekaawarat tusa túramiaiyi. <sup>7</sup> Tura Yus Ráutan uwemtikramiaiyi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiyai. <sup>8</sup> Péñker áishman asa, nuyá shuara yajauchirín wáitiainiak, ni enentái péñker asamtai tuke tsawant kúntuts enentáimiuk wáitmiyai. <sup>9</sup> Tura incha tunaan iniakturmakrin, nu tunaanum nupet-nakchati tusa Uunt Yus uwemtikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

<sup>10</sup> Tura Yus akupeana nuna umirkatniun nakitrar ni yajauch wakeramurín túruinia nunasha Yuska nekas asutiáttawai. Enentáimcha ániawai. Tura ni wakeramuriniak wakeruiniawai. Nijjai nankaamas akupin ainia nuna yajauch áujmatainiawai. <sup>11</sup> Warí, imia Yusa suntari Yusai matsatainia nu, nuna túratniun tsúumainiawai. Nankaamas kakaram tura nankaamas uunt ániayat nu akupniun katsekainiatsui.

<sup>12</sup> Nu áishmansha enentáincha yajasma núnin ániawai. Achikiar mantamnatniuk akiinia ániawai. Enentáimtsuk náñkamsar yajauchin chichainiawai. Tuma ásar yajasma núnisan jákartatui. <sup>13</sup> Chikichan wáitkiamia áintsan wáitsartatui. Tuke tsawant ni waker-amunak túruiniak “waraajai” tuiniawai. Tura atumjai irunar yurumáiniayatan atumin anañkramawar warainiawai. Nuka natsantaiti.

<sup>14</sup> Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru ániawai. <sup>15</sup> Yúsnumaanj naka wétsuk awajirarai. Peura uchirí Paraam Yúsnan etserniuitiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiyai. <sup>16</sup> Tura niisha tunáa túratajtsa weaj Yuska umpuurun chichachun aents chichaana nujai métek chichamtiki-amiaiyi. Nuiñkia umpuuru timia nujai Yúsnan etserin ni netse túratniurín enentáimiar iniaisamiyai.

<sup>17</sup> Nu áishmansha yumirmat kuyua núnis ániawai. Tura núnisan yuranmisha kíariat nase umpuim menkaana nu, yumi ajuaracha ásar, penké ántar ániawai. Warí, Yus-Chichamjai áentsun yainiainiatsui. Niisha imiá kirit ámanum tuke pujustin ániawai.

18 Niisha ti chichainiyat ántar chichainiawai. Yajauch túratniujai tura ayash wakera nújaisa páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. 19 “Iiya núnis túrakrumka ankant átratume” tu wénawai. Túrasha imia níñki ni tunaarijn emetamu áiniawai. Páantchakait. Shuar warí tunaajaim nupetnaka, nuna emetamurinti. 20 Kame shuar, uunt Jesukrístu uwemtikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújainkia nankaamas yamá imiá yajauch pujuiniawai. 21 Yusa akupkamurin imiá péñkera nuna Yus nú shuarnasha súarmiayi. Túrasha nékainiyat tunaanum waketkiaru ásar ti asutniáwartatui. Tuma asamtai, nekas jintia nekaachuitkiunka maak árainti. 22 Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajkimiu.” Nu áishmansha núnisan yajauchiniam ataksha wáketainiawai.

### 3

#### *Uunta tátintri*

1 Aneamu yatsurtiram ju papin jimiará áatjarme. Mai papinium winia jintintiamurjai atumí chamir enentáin enentáimtikratjarum tusan wakerajrume. 2 Yúsnan etserin, péñker wekain armia nuna etserkamuri enentáimturarum. Tura ii Uuntri akupkamurin ni akatramurijjai ujatmakarmia nusha enentáimpratarum. Jesukrístu uwentikrampramaj nuna chichamen tajai.

3 Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurin túrusar wekasartatui. 4 Tura juna tiartatui. “¿Kóstuka “wi atak tátatjai” timia nusha urukuit? Warí, ii uuntri yaunchu kajinikarmia nuyá yapajiáchmaiti. Yus yaunchu ju nunkan najanamia nuyá yamaisha tuke núniskete” tiartatui. 5 Túrasha nunkancha nayaimpincha Yus yaunchu najanamia nuna nekaatniun nakitiainiawai. Yusa chichamejai nunka entsaya jiinkimiayi tura nunkasha entsá nanatrawai, Yus timia nujai métek. 6 Tura ukunam nu nunkan amaarkamujai Yus emesramiayi. Ashí nuna nekaatniun nakitiainiawai. 7 Tura Yus tiniu asamtai nayaimpisha nunkasha yamáiya nuka jijjai emesnarat tusa ikiusma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nunkancha nayaimpincha áesattawai.

8 Tura jusha, aneamu yatsurtiram, enentáimsatarum. Uunt Krístujainkia chikichík tsawant mir uwiya núniskete; mir uwisha chikichík tsawanta núniskete. 9 Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai wau taatsua? In áentstin nákmaji. Shuar chikichíksha menkakin tusa nakitiawai. Antsu ashí shuar enentáin yapajiáwarat tusa wakerawai. 10 Túrasha Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nuj ashí írúnna núurtiuk esaawartatui. Tura nunkasha tura ashí írúnna nusha esaawartatui.

11 Ashí nu emesnartin neka asarum atumsha imiá nekas Yus tuke enentáimtusurum, takamtsuk umirkarum wekasatniuitrume. 12 Yusa tsawantri wárik tati tusar, jintiá ímprusar nákastiniaitji. Nu tsawantaj nayaimpisha esáa emesnartatui, tura ashí írúnna núurtiuk ti tsuer ajas entsamnattawai. 13 Tura iikia yamaram nayaimpisha, yamaram nunkasha ati tusar nákaji. Nu átatui, tímiayi Yus. Tura nuisha aya péñkerak átatui.

14 Nu tuma asamtai, aneamu yatsurtiram, ju túrunati tusarum nákmarena nuj, imiatkinchanum wekasam chamir enentáimjai makuuchmin Yus wáitkiati tusarum wekasatarum. 15 Ju nekaatarum. In uwentikramprataj tusa Yus ti nákmaji. Ii aneamu yachi Páprusha núnisan Yus ni nekatairin susamia tímiatrusan áatramprarmame. 16 Ashí papí aarmia nuj Pápruka wi tajana nuna chichaawai. Kame ni áarmari chikichka ishichik

nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajiáwar nusháa jintintiainiawai. Tura chíkich chichamsha Yus-Chichamnumiá ana nuna núnisañ túruiniawai. Túmainiakka niñki emesmamainiawai.

<sup>17</sup> Wátsek, aneamu yatsurtiram, túruntsa<sub>in</sub> ujakjarmena nu neka asarum, yajauch shuar anañkramattsa wakerutmainiak awajimtikrura<sub>in</sub> tusarum, tura Yusa<sub>i</sub> tariarurmena nuyá iniar<sub>aj</sub> tusarum anearum wekasatarum. <sup>18</sup> Tura ii Uuntri<sub>j</sub> Jesukrístu in Uwemtikkiartin ana nu, yamáí nékarmena nú nan<sub>ka</sub>amas nekaatarum. Tura enentáimin nú nan<sub>ka</sub>amas tariarum wetarum. Yamaisha tura tuke, ii Uuntri<sub>j</sub> Jesukristu náar<sub>in</sub> uunt awájsartí. Nu atí.

## JUAN

### Emka papin áarar akupkamu

#### *Tuke iwaaku átinia nérentin Chicham ana nu*

<sup>1</sup> Ashí nankamamia nú yaunchu Yusa Uchiri tuke pujuuyayi. Nusha iisha anturkaitji. Nekas ii jiiijai wáinkiaitji. Wáinkiarsha ii uwejejaisha antinkiuítji. Niisha Yúsan ti paant awajeaku, Chícham tímíniaiti. Tura tuke iwiaaku átinia nérennuiti. Nuna áateajrume. <sup>2</sup> Iwiaaku átinia nérenniusha paant nekanamiayi, nusha Jesukristuíti. Iisha Nii wáinkia asar nu étsereaji. Tura tuke iwiaaku átinia nérenniuri asa tuke Yus Apajai pujuyayi. Tura yamaikia iini paant ajatramsakrin atumniasha ujaajrume. <sup>3</sup> Ii Yus Apajaisha ni Uchiri Jesukristujajisha tsaninkiar nekas chikichik ajaji. Tura atumsha núnisrumek iijiai chikichik ajasuk tusar wáinkiamajnia nuna anturkamajnia nunasha ujaajrume. <sup>4</sup> Ti shiir warastarum tusan juna áatjarne.

#### *Yus tsáapniniaiti*

<sup>5</sup> Yus imiá tsáapnin asamtai kiritin Niinkia penké atsawai. Nu chichaman Jesukristu in unuitiamprakrin nuna atumniasha ujaajrume. <sup>6</sup> “Niiijai tsaninkia pujaji” táyatar kiritniunam pujustinia áintsar tunaanum pujakrikiá wáittraji tura nekas péñker ana nu túratsji. <sup>7</sup> Yuska tuke tsáapninium pujuwiti. Iisha núnisrik tuke tsáapninium pujakrikiá nuámtak nawamnaikiar pujuiniaiji. Túrakrin Yus ni Uchiri Jesukristu numpéjai ashí ii tunaari japirtamji.

<sup>8</sup> “Wi tunaan túrichuitjai” tákurkia ímia iik anañmamaji. Nekas ana nu nékatsji. <sup>9</sup> Antsu ii tunári Yus paant ujakrinkia Yuska tsankurtamprattaji. Tura ii tunaarin asakátramprattaji. Yuska ti penker asa Nii tana nuna tímiatrusañ umikmin asa túrattawai. <sup>10</sup> Kame “Tunaan túrichuitjai” tákurkia nujai “Yus wáittriniaiti” taji. Ni chichamesha ii enentáin pujurtamtsuji.

## 2

#### *Jesukristu in Yúsan áujturmaidji*

<sup>1</sup> Yus-shuartiram, tunaanum iniaarairum tusan ju papí áateajrume. Túrasha Yus-shuar tunáa túramtáinkia Apa Yusan ii áujturmau awai. Nuka Jesukristuíti. Niisha ti penkeraiti. Niisha Yúsan áujturmakui Yusjai ataksha iwiaarar pujustatji. <sup>2</sup> Jesukristu ii tunaarin asakártaj tusa jarutramkamiaiji. Túrasha aya íniunkechu antsu ashí shuara tunaarin asakártaj tusa jarukmiaiji.

<sup>3</sup> Yus tana nu umirkurkia nuikia Yus nekas nékaitji. <sup>4</sup> Tura shuar “Yúsan nékaitjai” tayat Yus tana nuna umirchakka wáitrawai. Nekasa nuka ni enentáin atsawai. <sup>5</sup> Antsu shuar Yus tana nuna umireakka Yúsan ti shiir aneawai. Túrakur Niiijai tsaninkiar pujamu nékaji. <sup>6</sup> “Yusjai tsaninkia wekaajai” tana nú shuar Jesukristu wekasamia núnisañ wekasatniuiti.

#### *Yamaram akupkamu*

<sup>7</sup> Yatsuru, yamaram akupkamun áattsujrume. Áyatik yámankamtaiknumia antukmiarum nunak tájarne. Ashí atumin jintintiamu yaunchu akupkamuiti. <sup>8</sup> Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumiincha nu akupkamu nekas paant awajsamuiti. Nujai kiritin menkaatemka asamtai tura nekas tsaapninkia paant tsaapnirtasa pujakuí nu akupkamun ataksháa áateajrume.

<sup>9</sup> Shuar “tsáapninium pujajai” táyat chikich Yus-shuaran nakitiakka tuke kiritniunam wekaawai. <sup>10</sup> Yus-shuaran aneana nu nekas tsáapninium pujawai. Niisha iniaatsuk

chikichnasha tunaanum ajuarchamniaiti. <sup>11</sup> Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa itiuraani wea nuna nékatsui.

<sup>12</sup> Uchitirmincha, Jesukrístu jakamujai atumí tunaari tsan̄kurnaru asakrumin juna áateajrume. <sup>13</sup> Úuntirmincha yámankamtaiknumia tuke pujuuya nu nekáa asakrumin juna áateajrume. Úunmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. <sup>14</sup> Úuntirmincha yámankamtaiknumia tuke pujuuya nu nekáa asakrumin juna áatjarme. Úunmarutirmincha atumí enentájjiai Yus-Chicham umirkarum kakaram asarum íwianch nupetka asakrumin juna áatjarme.

<sup>15-17</sup> Aya áentsnumia ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nan̄kaamantu ajastin. Nuka ju nun̄kanmaya áiniawai. Shuar aya nunak wakerak Yúsnaka aneatsui. Kame ju nun̄kasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurin umiana nu tuke iwiaaku pujustatui Yusjai. Nu asantai atumsha ju nun̄kanam ana nu pachikiairap. Tura aya juyá ana nu aya tákustin enentáimsáip.

### *Nekas chicham tura wait chicham*

<sup>18</sup> Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkirmatai amuukatin tsawant jeatemayi. <sup>19</sup> Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijjai irunar pujuaraayi. Tura jíinkirmatai nekas Yus-shuarcha ainia nu paant nekanamniaiti.

<sup>20</sup> Antsu atumniaka Yusa Shiir Wakanin Kristu suramsantai ashí paant nékarme. <sup>21</sup> Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha pen̄ké nushaachuk ainia.

<sup>22</sup> Wáittrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchirincha nakitia asa Kristu nemasrinti. <sup>23</sup> Yusa Uchirin nakitiainia nu Yus Apajaisha tsanin̄ pujatsui. Tura Yusa Uchirin shiir awajea nu, Yus Apajaisha tsanin̄ pujawai.

<sup>24</sup> Yámankamtaiknumia antukmiarum nu atumí enentáin pujurtamsati. Nu túrakrum atumsha Yusa Uchirijjaisha Yus Apajaisha tuke tsanin̄krum pujustatrume. <sup>25</sup> Jesukrístusha Niijjai tuke iwiaaku pujustinian tsan̄katramkaitji.

<sup>26</sup> Anañkartin írunkui juna áatjarme. <sup>27</sup> Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakaní ashí jintintramprume. Ni jintintrammasha imiá nekas asa wáitchaiti. Tuma asantai Nii jintintramna áintsarum Krístujai tuke tsanin̄krum pujustarum.

<sup>28</sup> Yamaikia, uchiru, Krístujai tuke tsanin̄krum wekasatarum. Nu túrakrikia Nii támatai natsamtsuk ti shiir in̄kiunaiktatji. <sup>29</sup> Atumsha Jesukrístu ti pen̄kera nu nékarme. Núnisan ashí shuar pen̄keran túruinia nuka Yusa uchirí áiniawai. Nusha nekaatarum.

## 3

### *Yusa uchiri áiniana nu*

<sup>1</sup> Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin jú nun̄kanmaya Yús-shuarcha nekarmainiatsji. Kame Yushasha nékainiatsui. <sup>2</sup> Aneamu yatsurtirmea, juna tájarme: nekas Yusa uchirí ajasuitji. Kame ukunam urukuk átaji nusha nékatsji. Túrasha ju paant nékaji: Jesukrístu támatai imia Nii paant wáinkiar Niijjai métek ajastatji. <sup>3</sup> Tura shuar shiir enentájjiai nuna náakka imia nin̄ki shiir awajmamui Jesukrístujai métek shiir atajai tusa.

<sup>4</sup> Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. <sup>5</sup> Jesukrístu ii tunaari asakártaj tusa ju nunkanam támia nu nékarme. Tura Niñkia tunaan túrichuyayi. <sup>6</sup> Tuma asamtai shuar Niijjai tsaniñ wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisan nékachuiti. <sup>7</sup> Uchiru, shuar anañkramawairap. Péñker túrinkia Krístu ti penker asamtai niisha péñkeraiti. <sup>8</sup> Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchiri ju nunkanam táwiti ashí íwianch túramun emesrataj tusa.

<sup>9</sup> Shuar nekas Yusjai akiinia nu tunaanum wekaatsui. Yusa uchiri asa Yusa iwiaakmarijjai wekaawai. Tuma asa tunaanum tuke wekaatsui. <sup>10</sup> Shuar péñker túratsna nuka tura Yus-shuaran kajera nuka Yus-shuarchaiti. Nujai Yusa uchiri ainia nusha tura iwianchi uchiri ainia nusha paant nekaamniaiti.

### *Mai anenai ajatin*

<sup>11</sup> Atumsha yámankamtaikniumiá chicham antukmiarum nu júiti: mai anenai ajartin. <sup>12</sup> Iisha Kañkia áanin áchatnuiitji. Íwianch-shuar asa ni yachin máamiayi. Tura çurukamta maamia? Enentaimprata. Nii yajauch asa tura ni yachi péñker asamtai máamiayi.

<sup>13</sup> Yatsurtiram, ju nunkanmaya shuar nakitramainiakui ti enentáimsairap. <sup>14</sup> Iikia jákatniunmaya uwempra asari nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatniunam wekaawai. <sup>15</sup> Shuar Yus-shuaran nakitiakka mañkartinia núnisaiti. Tura mañkartinkia tuke amuicha iwiaakmanum pujuiniatsui. Nuka nékaji. <sup>16</sup> Jesukrístu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakur ni yañtai tusar jarukmin átiniaitji. <sup>17</sup> Túrasha shuar chíkich Yus-shuar atsumana nuna takakiat waitnentachkunka nekas ni enentáijjai Yúsan aneawash. <sup>18</sup> Uchiru, aya chíchamjain anenain áchatnuiitji antsu nekas aneniakur péñker túrar yáiniaiktiniaitji.

### *Yusai natsamtsuk jeamniaitji*

<sup>19</sup> Jujai ii Yúсай sapijmiatsuk jeatniusha tura nekas Yus-shuaraitji nu nekaatniusha nekapmampramniaitji. <sup>20</sup> Ii enentái yajauch túramun enentáimtikramkurnisha Yus iijjai nankaamas ashí mash nékatsuk. <sup>21</sup> Tura, aneamu yatsurtiram, ii enentái yajauch túramun enentáimtikramchakrinkia Yúсай sapijmiatsuk jeamniaitji. <sup>22</sup> Tura ni wakeramu túrakrikia tura ni chichamesha umiru asakrin ashí ii seaj nuna suramsattaji. <sup>23</sup> Júiti Yus akupkamu: ni Uchiri Jesukrístu nekas enentáimtustin tura Krístu timia áintsarik shuar-tisha mai anenai ajartin. <sup>24</sup> Shuar ni chichamen umía nuka Yusjai tsaniñ wekaawai tura Yus niijjai tsaniñ wekaawai. Mai chikichik ajasu ániawai. Tura Yusa Wakaní ii enentáin pujá asamtai nujai Yus iijjai tsaniñ wekaana nu nékaji.

## 4

### *Yusa Wakanísha tura Krístu nemasri wakancha*

<sup>1</sup> Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaajai” tuinia nu péñker nekapsuk enentáimtusairap. Antsu ísrum nekas Yusa Wakanímpiashit tura chíkich wakaniashit nu nekaatarum. <sup>2</sup> Jujai nekapsarum ya nekas Yusa Wakanin takaka nu nekaattarme: Shuar “Jesus Yusa Uchiri Krístuítat nekas aents ajas ayashimkiamiayi” tana nu Yusa Wakanin nekas takakui. <sup>3</sup> Tura Jesusan tu enentáimtsatsna nuka Yusa Wakanin takaktsui antsu Krístu nemasri wakanin takakui. Kame Krístu nemasri wakan tátin tama ántichukaitrum. Nu wakan yamaikia ju nunkanam táwiti.

<sup>4</sup> Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumijn pujana nuka niijjai nankaamas kakaram

asamtaí wáitřin ainia nu nupetkaitrume. <sup>5</sup> Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. <sup>6</sup> Antsu iikia Yúsnaitji. Tuma asakřin Yúsan nékainia nu anturtamainiaji. Tura Yúsnachu ainia nu anturtamainiatsji. Nujaj nekas Wakanin takakusha tura wáitřin wakanin takakusha nekaamniaiti.

### *Yus tuke anekratniuiti*

<sup>7</sup> Aneamu yatsuru, anenaitin Yúsnumia asamtaí mai anenai ajartai. Shuar anekratniua nuka Yusa uchirj asa Yúsnancha nékawai. <sup>8</sup> Shuar anekratcha nuka Yúsnanka nékatsui. Kame Yuska tuke anekratniuiti. <sup>9</sup> Tuma asa ni Uchirj chikichkiniak ju nunkanam akupturmakmiaji. Iisha ni túrunamujaj nekas iwiaaku pujaji. Nujaj Yus in yáinmak ni anekrattain paant iniakturmasmiaji. <sup>10</sup> Jujaj nekas anekrattainkia paant nekanamniaiti: ii Yus aneaj núchaiti. Antsu ii ti tunáa ářinij Nii aneachmaitiatan Yuska ti anenma asa ni Uchirj in ii tunaarin asakárat tusa akupturmakmiaj nujaj nekas nekanamniaiti.

<sup>11</sup> Aneamu yatsuru, Yus núnis anenma asakřin iisha núnisřik mai anenai ajartai. <sup>12</sup> Chikichkisha Yúsan wáinkichuuiti. Túmaitiat mai anenai ajakřikia Yus ii enentáin pujurtamkui Nijjaj métek anekratin ajaji. <sup>13</sup> Yus ni Wakanin suramsa asakřin Yus iijjaj tsanin wekaana nusha tura ii Nijjaj tsaninkia wekaajnia nusha, nujaj nékaji. <sup>14</sup> Yus Apa ni Uchirj in ashí shuaran uwentikřarat tusa ju nunkanam akupkama nu wáinkia asar<sup>i</sup> étsereaji. <sup>15</sup> “Jesus Yusa Uchirjinti” tana nu shuarjaj Yus tsanin wekaawai tura niisha Yusjaj tsanin wekaawai. Mai chikichik ajasu áiniawai.

<sup>16</sup> Yus in anenmajnia nu ti nekas nékaji. Yus tuke anekratniuiti. Tuma asamtaí shuar anekartakka Yusjaj tsanin wekaawai tura Yussha nijjaj tsanin wekaawai. Mai chikichik ajasu áiniawai. <sup>17</sup> Núnisar ti penker anekartin ajaji. Túrar<sup>i</sup> súmamtikiatin tsawantaj natsamtsuk wajastatji. Kame ju nunkanam pujayatrik Jesukřistujaj méteketji. <sup>18</sup> Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaktinaiti. Tuma asamtaí ántar sapijmiana nu nekas anekratchaiti.

<sup>19</sup> Yus emka in anenma asakřin iisha Nii aneaji. <sup>20</sup> Tura shuar “wi Yúsan aneajai” táyat chíkich Yus-shuaran nakitiakka nuka wáitřinaiiti. Kame Yus-shuaran tuke wainnia nuna aneachkunka ĵitiurak Yusan wáinchasha aneat? <sup>21</sup> Yus incha juna turammiaji: Yúsan anea nu shuar chíkich Yus-shuarnasha aneatniuiti.

## 5

### *Ju nunkanmaya írúnna nu núpetejaji*

<sup>1</sup> Ashí “Jesus Yusa Uchirj Křistuiti” tu enentáimtana nú shuar Yusa uchirjinti. Tura aparj anekřikia ni uchirjsha aneattaji. <sup>2</sup> Yus Apa anekur tura Nii wakera nu umirkur Yusa uchirjsha ashí aneattaji. <sup>3-4</sup> Yus anekur Nii tana nu umiktatji. Ashí Yusa uchirjya nu Yúsan nekas enentáimta asa, ashí ju nunkanmaya írúnna nuna núpeteawai. Nu asamtaí Yus tana nu umirkatin itiurchatchaiti. <sup>5</sup> Aya “Jesus Yusa Uchirjinti” tu enentáimtana nú shuar ju nunkanmaya ana nuna awakkamniaiti.

### *Jesukřistu “Yusa Uchirjinti” tu etserainia nu*

<sup>6</sup> Jesukřistu jú nunkanam taa entsajaj imiankui Yus nayaimpinmaya chichaak “Juka winia aneamu Uchiruiti” tímiayi. Tura nuyá Jesus jakamtaí ni numpé puarmiayi. Entsajaj imianin ni takatřin nankamamiayi túřasha in jarutramak ni takatřin amukmiayi ju nunkanam. Chikichkinkia túřutsuk mai metek túra asamtaí Yusa Uchirjya nu paant nekanamniaiti. Yusa Wakanisha tuke nekas tiniua nu métek tawai. <sup>7-8</sup> Nu asamtaí menaint “Yusa Uchirjinti” Jesusan tuiniawai: Nayaimpiniam Yus Apa tura Jesukřistu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai. <sup>9</sup> Aents étserainiakui ántureaji. Nuna nankaamas

Yus ni Uchir<sub>i</sub>n tana nu nekas anturkatniuitji. <sup>10</sup> Yusa Uchir<sub>i</sub>n enentáimtana nú shuar ni enentáincha nékawai. Antsu Yus ni Uchir<sub>i</sub>n timian enentáimtatsna nú shuar Yúsan enentáimtachu asa Yúsan “wáitriniaiti” tawai. <sup>11</sup> Yus ni Uchir<sub>i</sub>n timia júiti: Tuke iwiaaku pujutai nérenniuiti tura nu iwiaakmancha in suramsaitji. <sup>12</sup> Yusa Uchir<sub>i</sub>j<sub>i</sub>j<sub>i</sub> tsaniñ wekaana nú shuar, nu iwiaakmaj<sub>i</sub> iwiaaku pujuiniawai. Tura Yusa Uchir<sub>i</sub>j<sub>i</sub>j<sub>i</sub> tsaniñ wekaatsna nú shuar, nu iwiaaku átinnium pujatsui.

*Amuak Yus nekas enentáimtustinian áarmiania nu*

<sup>13</sup> Yusa Uchir<sub>i</sub> nekas enentáimtakrum tuke amuicha iwiaakmaj<sub>i</sub> iwiaaku pujarme. Nu nekaatarum tusan júna áatjarne.

<sup>14-15</sup> Yus wakeramuj<sub>i</sub> métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtaji.

<sup>16</sup> Tunáa awai jákatniunam júana nu. Shuar nu tunaan túramtain<sub>i</sub>nia Yus áujtustin ántrai. Tura shuar chíkich tunaan túra<sub>i</sub>kuin<sub>i</sub>nia nuka nekas Yus áujtustiniaiti. Nekas jákatniunam júatsna nú tunaan túraitkiuin<sub>i</sub>nia iwiaaku átinian Yus susattawai. <sup>17</sup> Ashí yajauch<sup>i</sup> ana nuka tunaiti. Tura jákatniunam júatsna nú tunaasha awai.

<sup>18</sup> Nekas Yusj<sub>i</sub> akiinia nú shuar tunaanum tuke wekaatsui. Antsu Yusa Uchir<sub>i</sub> nin ti penker wainkiui íwianch antiñkiachminiaiti.

<sup>19</sup> Iikia nekas Yúsnaitji tura ashí jú nun<sub>i</sub>kanmaya shuar iwianchnia áiniawai. <sup>20</sup> Yusa Uchir<sub>i</sub> jú nun<sub>i</sub>kanam taa nekas-Yus aa nuna paant jintinramji. Yusa Uchir<sub>i</sub> Jesukrístuj<sub>i</sub> tsaniñkia wekaakur nekas-Yusa nuj<sub>i</sub>aisha tsaniñkiar wekaaji. Nekas-Yus asa tuke iwiaaku átinia nuna nérenniuiti. <sup>21</sup> Uchir<sub>i</sub>, ántar-yus ír<sub>i</sub>runna nú pachiinkiairap. Antsu nuj<sub>i</sub> aneartarum.

Nuke atí.



## JUAN

### Ataksha papin aar akupkamu

#### *Nekasa nunasha tura anenaitniuncha ujaawai*

<sup>1</sup> Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. <sup>2</sup> Nekas-chicham tuke amuutsuk ii enentáin pujá asantai aneajrume. <sup>3</sup> Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittiarme.

<sup>4</sup> Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. <sup>5</sup> Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame. <sup>6</sup> Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaiknumia antukuitrume.

#### *Anankartincha írunui*

<sup>7</sup> Ju nunkanam anankartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anankartin ásar Kristu nemasri áiniawai. <sup>8</sup> Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

<sup>9</sup> Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umiana nu shuar Yus Apajaisha tura ni Uchirijaisha mai tsaniñ pujawai. <sup>10</sup> Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap. <sup>11</sup> Kame nu shuar “shiir taume” tákumka nu shuar yajauch jintíamu jímiareame.

#### *Umíamu chicham*

<sup>12</sup> Ti nukap atumjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjai. Nuyá naka chichasar ti shiir warastatji.

<sup>13</sup> Ame kaim Yus achikma nuna uchiri amikmaatmainiawai.  
Nuke atí.

## JUAN

### Nuyá Ukunam papin aar akupkamu

#### *Kayu ti penker shuaraiti*

<sup>1</sup> Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. <sup>2</sup> Aneamu yatsurú, Yusjaj penker wekaakum ame wakanim penker pujana núnisan ame ayashmisha penker atí tusan Yúsan áujtajme. <sup>3</sup> Ame nekas chicham umirman shuar jui taar ujakarmayi. Tura nuna antukan ti warasmajai. <sup>4</sup> Yus-shuar nekas chichaman umiiniakui imiá shiir enentáimtuinijai.

<sup>5</sup> Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu penkeraiti. <sup>6</sup> Nu shuar ame nekas anenamun jui taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame. <sup>7</sup> Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijjai yurumátniun nakitrarmatai <sup>8</sup> ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

#### *Tiútrepes yajauch túriniaiti*

<sup>9</sup> Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai. <sup>10</sup> Nu asantai nuí jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

<sup>11</sup> Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

#### *Timitriu penker túriniaiti*

<sup>12</sup> Imiá nekas penker shuar asantai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

#### *Umíamu chicham*

<sup>13</sup> Wi ti nukap titinian wakerajme. Túrasha ju papinium mashi áatrashtajame <sup>14</sup> wárik ítin asan. Nuí jean chichasmi.

<sup>15</sup> Shiir pujustá. Juyá amikrum amikmaatmainiawai. Ii amikrishá chikichik chikichik amikmaatruata.

## JÚTAS papin árar akuptukma

### *Jútas Yus-shuaran papin áateawai*

<sup>1</sup> Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninkiaru ásarmatai Yus nin wainiainiawai niijiai kanakchatniun. <sup>2</sup> Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

### *Ti tunáa shuar írunui (2 Pítiur 2.1-17)*

<sup>3-4</sup> Aneamu yatsurú, iikia mai metek Yus-shuar asar ju uwempratín chichaman áatratniun wakerukjarme. Túrasha ti yajauch shuar anankramawar atumín pachi-inkiarmai. Niisha “Yus ti anenkartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarne “Tuke Yus-Chicham yapajíashtinian ashí Yus-shuar akasmatkarat tusar susamuiti. Wátsek, kakaram ajastarum” tájarne.

<sup>5</sup> Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi. <sup>6</sup> Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jinikiá sepunam apujas pujurainiawai. Tura Uunt Tsawant jeantai súmamtikiawartatui. <sup>7</sup> Núnisan Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan penké túrachmin ana nunasha túrin ármiai. Túmainiakui ashí shuar ashamkarat tusa Yus amuicha jinium asutiáwarmiayi.

<sup>8</sup> Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai. <sup>9</sup> Antsu Mikiar, nayaimpinmaya suntara kapitíántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi. <sup>10</sup> Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújaisha imia niniki yajauch emesmamainiawai.

<sup>11</sup> Maa, anearartí. Kaín yajauchin túramia núnis tura ásar jákartatui. Tura Parama áinis kuítian ti wakeruiniak imia niniki tunaanum tsankamaku áiniawai. Tura Kurea áinis ashí akupniun nakitin ániak kajinkiertatui. <sup>12</sup> Átum nuamtak anenaitiai-jisat nájankurmin nu shuar chikichan enentáimtutsuk Yusnasha ashamtsuk imia niniki enentáimtumainiawai. Penké ántar ániak yumi kiar tee ajasua núnin áiniawai. Tura nase umpuim yútutsuk nankamainiawai. Árak nerektin nantutin nerechua áanin áiniawai. Tuma ásar uwemu penké jaka áanin áiniawai. <sup>13</sup> Entsa nujan Krak saurín ajekeawai. Nu shuarsha núnisar ni natsantrín natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke menkakatin áiniawai.

<sup>14</sup> Atańka tiranqiyayi Eruk. Ti penker Yúsnan etserin asa juna tímiayi “Uunt Yus ti untsurí ni shuarijjai winittiawai. <sup>15</sup> Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nujai tura Yúsan yajauch áujmatsarua nújaisha súmamtikiawartatui” tímiayi Eruk. <sup>16</sup> Nu shuarka penkera nujai waratsuk “yajauchiiti” tuiniawai. Aya ni ayashí wakeramunak wakeruiniawai. Nankaamantu

enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa péñker chichainiawai.

*Yus-shuar enentáimtikratin*

<sup>17</sup> Tura atumsha, aneamu yatsurú, ii Uuntri Jesukrístu akatramuri yáunchu “an-eartarum” tiarmiania nusha enentáimtustarum. <sup>18</sup> “Amúamu tsawant ishichik ajates-matai shuar Yúsnan wishikrar nakitrartatui. Tura ni yajauch wakeramuriniak umíi pu-juartatui” tiarmiayi. <sup>19</sup> Nu yajauch shuar atumín akantamenawai. Ju nuñkanmayanak páchiniak Yusa Wakanin takakainiatsui.

<sup>20</sup> Tura átumka, aneamu yatsurú, tuke Yus nekas enentáimtusrum kakaram ajastarum. Yusa Wakaní kakarmarijiaí ashí Yus seatarum. <sup>21</sup> Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntri Jesukrístu in waitnentrana asa tuke shiir Niijiaí pujustinian amastatji. Nu tsawant naká pujutarum.

<sup>22</sup> Mai yapaji ajá ainia nu naka enentáimtikratarum. <sup>23</sup> Chíkich shuarsha jiniumia júsatniua áitkiasrum uwemtikratarum. Tura chikichcha ti yajauch ásarmatai anearum waitnentratarum. Tura ni pushirisha ni tunaarijiaí maatra asantai muíkiatniuiti.

*Yusan shiir awajeawai*

<sup>24-25</sup> Yus chikichkiiti. Ti nekaiti. In uwemtikkiartin asa ni kakarmarijiaí yain-makminiaiiti tunaanum iniarchatniun. Tuma asa tunaajai máatrachu awajtamas ni ti shíirmarin ejetamtatrome. Túrutma ti waramtikramsattarme. Ii Uuntri Jesukrístu túrunamujai Yuska Nínki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

## APUKARÍPSIS

### Jesukrístu Juánkan paant iniaktusma

#### *Jesukristu paant awajsamu*

<sup>1</sup> Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukrístu ni suntarin akupak ashí winia paant awajtursamai. Wisha Juánkaitjai. <sup>2</sup> Yus timia nunasha tura Jesukrístu ujatkamia nunasha tura wi íismaj nunasha ti paant aya nekasa nuna tájai. Penké wáitratsjai.

<sup>3</sup> Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

#### *Juan siati péprunam Yus-shuar írunun juna áateawai*

<sup>4</sup> Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti. <sup>5</sup> Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji. <sup>6</sup> Túrutma akupin awajtamsaitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

<sup>7</sup> Wats, Krístuka yuranmijai winittiwai. Tura íjuarmia nusha tura ashí shuarsha nuna wáinkíartatui. Túrawar ashí sapijmianiak útiartatui. Maa, nekas nunis átatui.

<sup>8</sup> Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

#### *Kristu ti shiir wincha ajasun Juan wainkiamiania nu*

<sup>9</sup> Wi Juan atumjai métek waitia asan atumí yachintjai. Núnisan nayaimpiniam, Yus akupeana nuj, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun nayaantsa ajapén atentrangunam Pátmus nunkanam sepunam apujsamua núnisan pujumjai. <sup>10</sup> Tumai tumin tsawantai Yusa Wakanj pujurtakuí winia úkuruiní kakantar untsumman antukmajai. Kachu umpúamua núnis ti kakarmauyayi.

<sup>11</sup> Tura turutmiai “Wiitjai. Yámankamtaiknumia amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nuj akuptukarta. Ju peprunam akupkarta: Ipisiusha, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

<sup>12</sup> Túrutkui yaki túruta tusan apajasan íkman siati shirikip ikiutain kurijai najanamun wainkiamjai. <sup>13</sup> Tura nuj ajapén Aents Ajasua núninan wajan wáinkiamjai. Tura pushirísha nawea timiai nuntuaru entsaruyi. Emenmamkesha kúriniak netsepnum emenmamauyi. <sup>14</sup> Tura ni muuke intiashísha murikiu uré nijiamua núnisan tura micha núnisan ti puju chíarauyi. Tura ni jiisha jiya núniskeyi. <sup>15</sup> Ni nawesha ti wincha asa jiru yanikutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. <sup>16</sup> Ni untsuurinj siati yaan takakuyi. Tura ni weneniasha puniá áinis tsakatskat mai ere awajsamu jínmiai. Ni yapísha etsa ti etsantuk íschamnia núnisauyi.

<sup>17</sup> Nuna wáinkian jaka áintsanak naween iniaarmajai. Túrusha ni untsuurí uwejen awaantrus turutmiai, “Ashamkaip. Wiitjai. Yámankamtaiknumia amúamunmasha tuke

pujuwitjai, timiai. <sup>18</sup>Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirín takakkun nérenniuitjai, timiai. <sup>19</sup>Tuma asamtaí wáinkiamna júsha, yamáí wáinmena nusha, tura ukunam átatna nusha aartá, timiai. <sup>20</sup>Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuuruini siati yaa wainkiam nu, siati péprunmaya Yus-shuaran wáinniun nakumenawai, turutmiai.

## 2

### *Ipisiunam chícham áatramu*

<sup>1</sup>Nuyá turutmiai 'Ipisiunmaya Yus-shuaran wáinin jú áatratá: Siati yaan untsuurnum takakna nu tura núnisañ siati shirikip-ikiutai kúrinman ajapén atenta wekáa nu, tawai: <sup>2</sup>“Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaarmeme. Wáitrania nusha nékaitme. <sup>3</sup>Ti wáitiatmek katsuntram yawetsuk Winia ti takartusuitme. <sup>4</sup>Túrin áminin júna títiatjame. Yus aneakum yámankamtaik ti penker wekainiuyam núnisam túratsme. <sup>5</sup>Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustatjame. <sup>6</sup>Tura jú penker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitiajai. <sup>7</sup>Kuíshtinia nu shuar Yusa Wakaní ashí Yus-shuaran timian antukti: Nupetmakunka tuke iwiaaku pujutai numi nerén yúatniun tsankatkattajai. Nu numi Yus pujana nuí wajaawai.” Tu áartá' turutmiai.

### *Ismirnanam chícham áatramu*

<sup>8</sup>Nuyá turutmiai 'Ismirnanmaya Yus-shuaran wáinin jú áatratá: Yámankamtaiknumia amúamunam tuke pujuwa nu tura núnisañ jaka nantakmia nu, tawai: <sup>9</sup>“Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusajinkia ti kuítrinniuitme. Tura shuar uunt iwianch Satanása shuarí ániayat “Israer-shuaraitjai” tuíniak yajauch áujmatramena nuna nékajai. <sup>10</sup>Ti wáitsattamna nu ashamkaip. Íwianch ashí nekaprimsataj tusa atumijiniñ sepunam enkeattawai. Nuí tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. <sup>11</sup>Kuíshtinia nu shuar Yusa Wakaní ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá' turutmiai.

### *Pirkamunam chícham áatramu*

<sup>12</sup>Nuyá turutmiai 'Pirkamunmaya Yus-shuaran wáinin jú áatratá: Puniá áinis tsakatskat mai ere awajsamun takakna nu, tawai: <sup>13</sup>“Ashí ame túram nuna nékajai. Uunt iwianch Satanás akupea nuí pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai. <sup>14</sup>Túrin áminin júna títiatjame. Atumijiniñ shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitíán Parakan unuiniarmiayi. Nuyá Parak Yus-sutai namañken maar yúatniun Israer-shuaran jintintiamiayi. Núnisañ ti tsanirmatniun jintintiamiayi. <sup>15</sup>Atumijiniñ shuarsha Nikiurás jintíamuncha, Wi nakitiaj nuna, iniaisatniun nakitiainiawai. <sup>16</sup>Wats, enentáimpram iniaisata. Túrachakminkia Wi wari winin winia wenurujiya puniá jiinia nujai máaniaktajai. <sup>17</sup>Kuíshtinia nu shuar Yusa Wakaní ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naarí aarma átatui. Nunasha chíkich shuarka penké nékatsain aya achía nuke nekaattawai.” Tu aartá' turutmiai.

### *Tiatiranam chícham áatramu*

18 Nuyá turutmiai ‘Tiatiranmaya Yus-shuaran wáinin ju áatratá: Yusa Uchirí jii jijjái métek keena nu tura núnisan nawe jiru yan\_kutaku jiamua núnis néwar ajawa nu, tawai: 19 “Ashí ame túram nuna nékajai. Yus shiir enentáimtakum aneam nuna nékajai. Tura katsuntram pé\_nker takaamna nuna nékajai. Yáunchujai nan\_kaamas pé\_nker túrame yamaikia. 20 Túrin áminin juna títiatjame. Nu nuwa Jesapír awematsme. “Yúsnan unuiniajai” tinia Wíi shuaran ti anan\_kenawai. Tura ti tsanirmatniuncha tura ántar-yus-sutai naman\_ken maar yúatniun jintintiiniawai. 21 Niisha ni tunaar\_in enentáimiar iniaisat tusan nákasuitjai. Tura nakitiawai. 22 Wátsek, sun\_kurmatkiakan peaknum áepsattajai. Tura chíkichcha niijjái tsanirma ainia nunasha niijjái métek ti wáitkiastatjai. Ni tunaar\_in enentáimiar iniaisacharmatain\_kia túrattajai. 23 Ni uchir\_incha mantúattajai. Nujái ashí Yus-shuar Wi nekas shuara enentáin nékaitjia nuna nekaawartatui. Atum-niasha chikichik chikichik takasmajái métek akiktatjarme. 24 Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútaiya nu nékachu asakrumin atakka túratniun patatkashtatjarme. 25 Tura Wi jeatsain takakrum nu emetatarum. 26 Nupetmakunka Wi wakeraj nunak tuke initsuk túrana nuna untsurí nun\_kanam akupkatniun tsan\_katkattajai. 27 Winia Apar tsan\_katrukmiá núnisnak akupkatniun tsan\_katkattajai. Tura nuwe najanamu jirujái awati ijiakratniua áinis ti kakarmajái akupkattawai. 28 Yán\_kuam káshik jiinia nuna susattajai. 29 Kuíshtinia nu shuar Yusa Wakaní ashí Yus-shuaran timian antukti.” Tu aartá’ turutmiai.

### 3

#### *Sártisnum chícham áatramu*

1 Nuyá turutmiai ‘Sártisnumiá Yus-shuaran wáinin ju áatratá: Siati Yusa Wakanin takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wíjiainkia jákaitme. 2 Shintiarta. Kajinia nu umpuím ekeemakta. Kame Yusjai ísam pé\_nker túrichuitme. 3 Yus-Chicham ti shiir enentáijjái emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumni\_kia kasa núnisnak nékatsmin jeartiatjame. 4 Tura Sártisnum shuar ishichik pushirí wapik máacharu pujuiniawai. Nusha ti pé\_nker áiniak pushí pújun entsarar Wijjái wekasartatui. 5 Nupetmakuka pushí pújun entsartatui. Tura iwiaaku átinia nu papiniumiá ni naari áarman japirashtatjai. Antsu winia Apar tura ashí nayaimpinmaya suntar ímmianum shiir áujmattsattajai. 6 Kuíshtinia nu shuar Yusa Wakaní ashí Yus-shuaran timian antukti.” Tu aartá,” turutmiai.

#### *Piratírpianam chícham áatramu*

7 Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasana tana nu, uunt akupin Tawitia yawirí takaku asa uraimtai chíkich pé\_nké epenchamniaiti. Tura epenmiatai chíkich pé\_nké uraichminiaiti. Juna tawai: 8 “Ashí ame túram nuna nékajai. Kakarmachuitatmek winia chichamur shiir enentáimtakum Winia initieschaitme. Tuma asakmin wáitin uratjame. Nuna chíkich pé\_nké epenchamniaiti. 9 Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuáran, nekas ámin aneajna nuna nekaawarat tusan amiini tikishmatkiarartatjai. 10 Katsuntrata tímiaj nu, shiir umirka asakmin Wissha ti wáitsatin ashí nun\_kanam átatna nuyá uwemtikrattajme. Nu wáitsatniujái ashí nun\_kanmaya shuar nekapnasartatui. 11 Wárik winittiajai. Takakmena nu emetata. Akinkiatniuitmena nuna chíkich shuar atantramkiarain. 12 Nupetmakunka winia Yusru jee tan\_kirin awajsattajai. Tura nuyá pé\_nké jín\_kichartatui. Tura niin winia Yusru náar\_in áatrattajai. Tura winia Yusru péprurí náar\_incha áatrattajai. Nu pépruka nayaimpinmaya yamaram Jerusarenka Yúsnumiá tara núiti. Núnisan winia yamaram náarun niin áatrattajai.

13 Kuíshtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

*Rautiséanam chícham áatramu*

14 Nuyá turutmiai ‘Rautiséanmayá Yus-shuaran wáinin ju áatratá: Wáitrutsuk nekasa nunak tiniua nu tura núnisan ashí Yus najanamun Úntriya nu, tawai: 15 “Ashí ame túram nuna nékajai. Tura michaash míchachuitme. Núnisan tsuersha tsuérchaitme. Míchaitkiumsha tura tsuéraitkiumsha maak. 16 Kame míchachu tsuercha antsu aya tsuétsetak asakmin imiutkattajme. 17 Iis, “Kuítrinniuitjai, ti irumpraitjai, warinkisha atsumatsjai” tame. Túrasha ashí yajauch, wáitnenmai, kuítrincha, kusuru, tura misú iyajme. 18 Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Péñker ímprataj tusam jiniium enketai enkeeta. 19 Aneajna nuna chichareajai. Nu asantai kakaram ajasma tunaarum enentáimpram iniaisata. 20 Enentáimprata. Shuar wáitiniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijiai yurumáttajai. Tura amesha Wijiai yurumáttame. 21 Nupetmakuka akupin pujutainium Wijiai pujustatui. Wisha núnisnak nupetmaku asan winia Aparjai akupin pujutainium pujusuitjai. 22 Kuíshtinia nu shuar Yusa Wakanj ashí Yus-shuaran timian antukti.” Tu áartá,” turutmiai.

## 4

*Nayaimpiniam Yúsan shiir awajenawai*

1 Nu nankaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam átatna nuna iniaktustajme” turutmiai.

2 Nu chichamaik Yusa Wakanj akantukmiai. Túrutamtai nayaimpiniam akupin pujutainium pujan wainkiamjai. 3 Niisha jaspi kayasha tura kurnarínia kayasha nujai métek ti wínchauyi. Akupin pujutain tuntiak téntakuyi. Nusha ismirarta kayajai métekeyi. 4 Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakainian, nu pujuinian wainkiamjai. 5 Akuptainiumia peemsha ipiamtasha untsummasha jiniarmai. Tura nu pujutainium naka siati shirikip kearmai. Nusha siati Yusa Wakanjinti. 6 Núnisan nu pujutainium naka nayaantsa áanin ti saar amai.

Nu pujutainium wakenmaanisha niisháa tanqu kuatru téntakar ármiai. Ukurinisha tura eemsha jii irunmiai. 7 Emka tanqu úunt yawaa áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi. 8 Nusha sais nanamtin ármiai. Tura jiiisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nankaamas kakarmaiti. Tuke yaunchu pujuyayi. Núnisan yamaisha pujawai. Tura ataksha juke winittiawai” tiniu armai.

9 Tura uunt pujutainium pujana nu tuke iwiaaku pujú asantai nu tanku ti shiir awajsar yúminikiak pujuriarmai. 10 Túruiniakui paintikuatru uunt tuke iwiaaku pujun tikishmatainiak ni etsenkrutairin naka áepuiniak tuiniawai:

11 “Úuntá, ii Yúsrinme. Tuke shiir awajmainme. Ashí nankaamas kakarmaitme. Amek ashí írunna nu najanaitme. Tura aya wakerakum najanamame. Ame wakerakmin irunainiawai” tuiniawai.

## 5

*Murikkia papin urakminiaiti*



<sup>1</sup> Nuyá akupin pujutainium pujuya nuna untsuurín papí penuarma áanniun wainkiamjai. Nu papisha initiaanísha tura páatkesha áarmauyi. Tura urakchamnia atí tusa siati anujtukmajai kaki peekmauyi. <sup>2</sup> Tura nayaimpinmaya suntar ti kakarma nu, ti kakantar inintran wainkiamjai. Niisha tímiyai “¿Ya akupniuk ju papin kaki anujkamun jaak urakminiait?” <sup>3</sup> Tura nayaimpinmayasha nunkanmayasha tura jakamunmayasha chikichikisha nu papin urakmin atsumiayi. Áujtsuk íistiníasha tujinkiarmai. Tímianu akupin atsumai. <sup>4</sup> Nu papin uraktincha tura áujtsatniusha, kame íistincha atsakui ti úutmiajai. <sup>5</sup> Nuyá chikichik uunt turutmiai “Ti úutíp. Israer-shuarnumiá Úunt-yawa, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

<sup>6</sup> Nuyá uunt pujutaiya nu tura kuaru tañkunam ajapén tura úuntnum ajapén Murik wajan wainkiamjai. Maamua áintsan ketiat iwiaakuyi. Kachurísha siátiyi. Ni jiiisha siátiyi. Nusha Yusa Wakani siati ashí nunkanam akupramua nuuyi. <sup>7</sup> Nu Murik we nekas uunt Akupniun untsuurínian nu papin achikmiayi. <sup>8</sup> Tura papin achikmatai kuaru tañkusha tura paintikuatru uunt arma nusha Murikiun tikishmatrarmiayi. Ashí uunt arpa tuntuitiain takaku armai. Tura ashí kunkuin enketain kuri najanamun takaku armai. Nu kunkuin Yus-shuar áujsamuiti. <sup>9</sup> Ju yamaram kantancha kantampriarmai:

“Amek imiá nankaamas akupniuitme. Amek papí achikiam anujtukmarí jaakminiaitme. Yus-sutai namankeá áinis mantamna asam túramniaitme. Ashí nunkanmaya shuarnumiásha Yusna árat tusam ame numpemjai in sumakmiame.

<sup>10</sup> Turam akupin awajkartusuitme tura núnisan ii Yúsrínian pujurin awajkartusuitme. Tuma asakmin akupin ajarar ju nunkanam akupkattaji.” Tu kantamainiawai.

<sup>11</sup> Tura untsurí nayaimpinmaya suntar uunt pujutaincha tañkuncha tura úuntnasha éñkekawarun wainkiamjai. Nusha nekapmarchamnia ti untsurí armia nu <sup>12</sup> kakantar tiarmai:

“Murik mantamnamia nu akupin ajas ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yuminsar Nin ti shiir awajsatin áiniawai.” Tu tiarmai.

<sup>13</sup> Núnisan ashí Yus najanamu, nayaimpiniam írunna nusha, nunkanam írunna nusha, nunká inít írunna nusha, nayaantsanam írunna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

<sup>14</sup> Tura kuaru tañkusha “Tuke núnisan atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

## 6

### *Murikkia siati anujtukman jaakmai*

<sup>1</sup> Wi iyakui Murikkia chikichík anujtukman jaakmai. Túramtai chikichík tañku ipiamtajai métek kakantar untsurun antukmajai. “Winim íitiá” turutmiai. <sup>2</sup> Túrutkui kaway pújun wainkiamjai. Nu ekeemia nu tíshimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

<sup>3</sup> Nuyá Murik anujtukma jímiaran jáakmatai tañku jímiara nu “Winim íitiá” turutmiai.

<sup>4</sup> Túrutkui chikich kawai kapaakun wainkiamjai. Nu ekeemia nuna puniá úuntan susamuyi. Nusha shiir pujuscharat tusa ashí jú nunkanmaya shuaran máanaimtikiatniun akupkamuyi.

<sup>5</sup> Nuyá Murik anujtukma menaintiun jáakmatai tañku menaintiua nu “Winim íitiá” turutmiai. Túrutkui kaway mukusan wainkiamjai. Nu ekeemia nusha kijin nekapmatain takakuyi. <sup>6</sup> Tura kuaru tañku ajapénia chichaamun antukmajai. “Tsawant

takamtsuk takaakmesha apatkuka penké ishichik sumakmin átatme. Tura núnisan machasha nijiamchisha amuukacharat tusam péñker wáinkiaata.” Tu timiai.

<sup>7</sup> Nuyá Murik anujtukma kuátrun jáakmatai tañku kuarua nu “Winim iitiá” turut-miai. <sup>8</sup> Túrutkui kaway yan̄kun wainkiamjai. Nui ekeemia nusha Jákatin náartiniuyi. Tura nuna úkurin Jatai nemarak winimiai. Nusha ashí nuñkanmaya shuar kuaru akankamunmaya chikichkin máatniun akupkarmauyi. Nusha mesetjaisha tsukajaisha sun̄kurjaisha tura yajasmajai máawarmai.

<sup>9</sup> Nuyá Murik anujtukma sénkun jáakmatai Yus-sutai kuñkuin ekemtai wakenmaani íismajai. Túran Yus-Chichaman etserainiakui máawarma wakanin wainkiamjai.

<sup>10</sup> Nusha kakantar unsumainiak tiarmai “Uuntá, ti penker asam támena nu umíatsmek. ¿Urutiak nuñká pujuinia nú shuar ii mantamnamunam yapajmíátruktam?” tiarmai.

<sup>11</sup> Tuíniakui pushí pújun susar tiarmai “Chikichcha Krístunun etserainiakui mantam-natin ániawai. Nu nákakrum ishichik ayampratarum” tiarmai.

<sup>12</sup> Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchat ajasua áintsan mukusa ajasmai. Kashí-nantusha numpá áintsan ajasmai. <sup>13</sup> Tura yaasha wampú nere nase umpuim ti majüwa áintsan kákekarmai. <sup>14</sup> Nayaimpisha papí penuara júamua áintsan menkakamai. Tura naintcha yajá apuj-nasarmai. Tura nuñkasha nayaantsanam ajapén atentrainia nusha yajá apujnasarmai. <sup>15</sup> Tura jú nuñkanam akupin ainia nusha náinnium wear kayá wáanam uumkarmai. Nijiaisha ashí shuar, uuntcha, kuítriniusha, suntara kapitíántrisha, ashí kakaram ainia nusha, tura takarniusha an̄kant ainia nujai náinnium wearmai. <sup>16-17</sup> Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

## 7

### *Israer-shuarnumiá anujturma armia nu*

<sup>1</sup> Nu nan̄kaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunni-unmasha nasenkacharat tusar wajatiarmai. <sup>2</sup> Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaania winian wainkiamjai. Tuke iwiaaku Yusa anujtutairin takakaui. Nusha kuaru sun-taran kakantar untsuak tímiai, <sup>3</sup> “Ii Yusri takarin ainia nu nijiainiun áarar anujtatsrinin kukarsha, nayaantsasha, tura kampunniusha nasejai yajauch awajsairap” timiai.

<sup>4</sup> Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik siantu kuarenta kuaru mir (144.000) armai. <sup>5</sup> Jutá weean-maya tuse mir (12.000) anujtukma armai. Rupin weeanmayasha tuse mir anujtukma armai. Kat weeanmayasha tuse mir anujtukma armai. <sup>6</sup> Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai. <sup>7</sup> Semeun weeanmayasha tuse mir anuj-tukma armai. Riwi weeanmayasha tuse mir anujtukma armai. Ísakar weeanmayasha tuse mir anujtukma armai. <sup>8</sup> Sapurún weeanmayasha tuse mir anujtukma armai. Jusé weeanmayasha tuse mir anujtukma armai. Pinjamín weeanmayasha tuse mir anujtukma armai.

### *Ti untsurí shuar pújun entsararu*

<sup>9</sup> Nuyá ti untsurí shuaran wainkiamjai. Ashí nuñkanmaya nusháa shuaraim irun-traru ásar nekapmarchamnia armai. Tura nusha uunt akupin pujutainium tura

Muriknium naka wajaarmai. Tintiuki nukēa áaniun takaku armai. Tura ashí pújun entsaru armai. <sup>10</sup> Ashí kakantar untsumainiak tiarmai:

“Íi Yusrĭ uunt akupin pujutainium eketna au tura Muriksha imia Niŋki Uwentikin áiniawai” tiarmai.

<sup>11</sup> Tura nayaimpinmaya suntarsha uunt akupin pujutaincha, kuaru tanċkuncha, tura úuntnasha téntatkar armia nu piniakum nuŋká tepersar Yúsan shiir awajsar <sup>12</sup> tiarmai “Nekasaiti. Tuke iniaitsuk ii Yusrĭ ti shiir awajsatniuiti. Niŋki ti neka, ti kakaram, ti akupin, tura ti peŋker asamtai tuke yumiŋsatniuiti. Núnisaŋ atí.”

<sup>13</sup> Nuyá chikichik uunt inintsamai “Pújun entsaru ainia juŋsha ċya ainia tura tuyá ainia?”

<sup>14</sup> Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushiri nijiamawar puju awajsaru áiniawai. <sup>15</sup> Nuna túrawaru ásar yamaikia Yusai naka pujusar tsawaisha káshisha Yúsnan ni Jēen takainiawai. Tura akupin pujutainium eketna au tuke wainkiartatui. <sup>16</sup> Yamaikia tsukajaisha kitiakjaisha wáitsachartatui. Tura etsasha sukuiniak yajauch awajsachartatui. <sup>17</sup> Murik, akupin pujutainium naka wajana au, ni murikrĭn wáiniuk áyureak ti peŋker púkuni entsa waana nuĭ apujsartatui. Tura Yus ni neajkincha ukuĭtiurartatui.” Tu túrutmiai.

## 8

### *Anujtukma siatia nu jaakma tura kuŋkuin ekeemataijjai túrunamu*

<sup>1</sup> Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. <sup>2</sup> Nuyá siati suntar Yusai naka wajainia nuna wainkiamjai. Nusha siati kachun susamu armai. <sup>3</sup> Nuyá chíkich suntar kuŋkuin eŋketain kurijjai najanamun itiamai. Tura Yus-sútainium ayamas wajasmatai núkap kuŋkuin sunasmai. Nu kuŋkuin ashí Yus-shuar áujsamujai métek kuŋkuin ekeematainimum ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. <sup>4</sup> Tura suntar ekeemakmatai kuŋkuinia mukuintiuri Yus-shuar áujsamujai métek Yúsan amainkiamai. <sup>5</sup> Nuyá nu kuŋkuin eŋketain suntar achik ekeematainimaya ji kapaan káirĭn áimiak ju nuŋkanam ukaamai. Túramtai ipiamtasha untsummasha, peemsha, tura uŋsha armai.

### *Kachu umpuarma*

<sup>6</sup> Nuyá siati suntar kachun takakainia nu umpuarta tusar iwiarnararmai.

<sup>7</sup> Emka suntar kachun umpuarmatai micha kákekamai. Nunasha ji numpajai pachimpramuncha nuŋkanam ajapawarmai. Túmakui menaintiu nakakma jeeán numincha tura ashí íranna nuĭ ekeemakmai. Tura ashí nuŋkanam chírichrin takamtsuk ekeemakmai.

<sup>8</sup> Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. <sup>9</sup> Núnisaŋ menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

<sup>10</sup> Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura entsasha tura púkuniŋmasha menaint nakakam jeeánun kákekamai. <sup>11</sup> Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurĭ shuar nu entsa yapá ajasmájai jákarmai.

<sup>12</sup> Nuyá suntar kuarua nu kachun umpuarmatai menaintiu nakakam jeeá tsawaínantusha kashí-nantusha tura yaasha emesnarar ajapén tee ajasarmai. Túrunawar tsawaisha káshisha menaintiu nakakam jeeánun tsáapnircharmai.

<sup>13</sup> Nuyá chíkich suntar nayaimpiniam nanamun wainkiamjai. Nusha kakantar untsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

## 9

<sup>1</sup> Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtaí yawirín susamuyi. <sup>2</sup> Tura uraimtai nu nánkatkachu wáanmaya ti mukuint jijnmíai uunt jiníumiá áintsan. Tura etsancha tee awajsamai, yuranmincha tee awajsamai. <sup>3</sup> Nuyá nu mukuintiummaya manchi jíntrar nunká ti yujaarmai. Tura ju nunkanmaya titinkia áinis najamin ajastinian susamu armai. <sup>4</sup> Chíríchrincha ashí arakmancha ashí numincha yajauch awajsatin suritkiamuyi. Antsu áyatik shuar nijaiiníum Yusa naari árar anujtukchamunak yajauch awajsatin armai. <sup>5</sup> Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweatin susamu armai. <sup>6</sup> Nují shuar wari jakataj tuíníayatan jákachartatui. Ti wakeruiniayatan jákatniun tujjinkiartatui.

<sup>7</sup> Manchisha íisam mesetnum weena nu kawaiya áinis armai. Kurí tawaspa áinis etsenkraku armai. Yapísha shuarna áinis armai. <sup>8</sup> Intiashísha nuwanua núnis armai. Naísha úunt yawá naiya núnis armai. <sup>9</sup> Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai. <sup>10</sup> Ujukésha titinki ujukea áinis asa janki ajakin armai. Nujai tuke senku nantu yujarsar shuaran íjuar wáitkiastin armai. <sup>11</sup> Ni uuntrisha nánkatkachu wáa uraimia nuyaiti. Nusha Israer-chichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

<sup>12</sup> Jujai emka wáitsatin nankaamasai. Túrasha tuke jímiar taasai.

<sup>13</sup> Nuyá suntar saisa nu kachun umpuarmatai chichaman antukmajai. Yusaj naka kunkuin ekeemaka Yus-sutai kurimpramu amai. Tura ni kuaru yantame kachu jijnmíai. Tura nuyá chichaak <sup>14</sup> suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.” <sup>15</sup> Túramtai nu kuaru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atíatin ikiusma armai. <sup>16</sup> Tura suntarnasha kawainium eketainian wainkiamjai. Tura timiá untsurí nekapmarchamnia asamtaí aya núnirurín antukmajai. Nusha jimíará sianu miyun (200.000.000) armai.

<sup>17</sup> Tura íimiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku wínkia tura yanjú armai. Tura kawaiya úunt yawáa muuke áinin armai. Tura ni wenyasha jisha, mukuintiusha, asuprisha ti tsuer keá nu jíniarmai. <sup>18</sup> Nu menaintiu ti yajauch wáitsamujai menaintiu nakakam shuar untsurí jákarmai. Jijiaísha, mukuintiujaísha, asuprijaísha jákarmai. <sup>19</sup> Nujai nu kaway ni wenejai shuaran wáitkiasarmai. Tura ni ujuké napí múukeya áinin áрмаi. Nújaísha shuaran wáitkiasarmai.

<sup>20</sup> Tura nujaiísha jákacharmia nú shuar tuke tunáa túratniun iniaisacharmai. Tura yajauch wakanníasha tura ántar-yusnasha tikishmatratniun iniaisacharmai. Nu ántar-yus kurijiaísha, kuítjaísha, jiru yanikutakujaiísha, kayajaiísha, numijiaísha najanamu ásar wainmaktinniasha, antuktinniasha, tura wekasatniuncha tujintiainiawai. <sup>21</sup> Núnisan mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

## 10

### *Papichin suntar takusmia nu*

<sup>1</sup> Nuyá chíkich kakaram suntar nayaimpinmaya táarun wainkiamjai. Nusha yurankim amúamu tura múuknum tuntíak téntakmauyi. Yapísha etsajai métek wínchauyi. Tura

kujapés<sub>h</sub>a ji keá áintsan<sub>keyi</sub>. <sup>2</sup> Nusha papin urak takakauyi. Tura imiá uunt asamtai ni nawé untsuurnuman<sub>i</sub> nayaantsanam tura menar<sub>i</sub>n<sub>i</sub> kukar tarimias wajasmai. <sup>3</sup> Tura úunt yawá kakar shiniak chicháa áinis ti kakaram untsumkamai. Nuj<sub>ai</sub> siati (7) ipiamtasha chichasarmai. <sup>4</sup> Nii chichasarmatai ni chichamen áartiniujai tura nayaimp-inmaya chichartak “Áaráip, túrutmiai. Juka nekanashti” túrutmiai.

<sup>5</sup> Tura nuyá, suntar nayaantsanmasha tura kukarsha tarimias wajama nu ni uweje untsuur<sub>i</sub>n nayaimpinmaan<sub>i</sub> takuimiai. <sup>6-7</sup> Tura timiai “Pe<sub>nké</sub> ishichik ajasai. Suntar siatia nu umpúaku<sub>i</sub>nkia Yus ashí yaunchu enentáimpramia nu uminkiattawai. Emka ujatsuk ukunam ni shuar<sub>i</sub>n Yús<sub>nan</sub> etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nun<sub>k</sub>ancha, nayaantsancha, tura ashí nu<sub>i</sub> ír<sub>unna</sub> nunasha najanaiti” timiai.

<sup>8</sup> Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuur<sub>i</sub>n<sub>i</sub> papin urak takakna nu achiktá” turutmiai. <sup>9</sup> Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakem<sub>i</sub>nkia yapamprattame” túrutmiai. <sup>10</sup> Nuyá papichin suntarnumiá jukin yuamjai. Tura nii turutmia nú<sub>nisa</sub>n wenuru<sub>i</sub>nkia ti yumin nekapramjai. Tura antsu yuan wakeru<sub>i</sub>nkia yapampramjai.

<sup>11</sup> Tura nuyá turutiarmai “Waketkim ataksha ashí nun<sub>k</sub>anmaya shuaran tura ni kapitíantr<sub>i</sub>ncha Yus tana nu ujakartiniaitme.” Tu túrutmiai.

## 11

### *Jimiará shuar Yusaiya akupkamu*

<sup>1</sup> Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram nama<sub>n</sub>-maa-Yus-sutaisha nekapmartá. Tura nu<sub>i</sub> Yús<sub>an</sub> shiir awajeena nusha nekapmartá. <sup>2</sup> Antsu jea áar<sub>i</sub>nkia yajaya shuar susamu asamtai nekapmatsuk ikiuktiá. Nu shuar ti shiir pé<sub>prun</sub> Jerusarén<sub>kan</sub> kuarentitús (42) nantu nu<sub>i</sub> akupeenak mash yajauch awajsartatui. <sup>3</sup> Túruiniakui Wikia Wii-shuaran jímiar<sub>an</sub> akatran akupkattajai. Nusha chikichik mir jimiará sia<sub>ntu</sub> sesenta (1.260) tsawant pujasar Winian etserkartatui. Nuka menaintiu uwí nan<sub>k</sub>aamasaiti. Úutkur-entsatai pushin entsaru ártatui.” Tu turutiarmai.

<sup>4</sup> Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nun<sub>k</sub>á Uuntr<sub>i</sub> Yusai<sub>j</sub> wajainiak, jímiar akatramua nú shuaran nakumainiawai. <sup>5</sup> Shuar nin yajauch awajsataj tutai ni weneniá jinia j<sub>i</sub>ki nemasr<sub>i</sub> ashí áesatniuiti. Nú<sub>nisa</sub>n nin yajauch awajsatniun wakera nuka jákartatui. <sup>6</sup> Nu aentska Yús<sub>nan</sub> áujmatainiak yumi yutukaj<sub>p</sub> titinian kakarman takakainiawai. Nú<sub>nisa</sub>n entsancha numpa awajsatniun kakarman takakainiawai. Tura ashí yajauchia nuj<sub>ai</sub> aentsun wáitkistinian takakainiawai. Nuna ashí ni wakeruinia nu<sub>i</sub> páchitsuk túramin áiniawai. <sup>7</sup> Tura ni takatr<sub>i</sub>n umikiarmatai Ti Kajen Yajasma ná<sub>nk</sub>atkachu wa<sub>an</sub>maya j<sub>i</sub>inia nu mesetan najata nupetak máawartatui. <sup>8</sup> Tura iwiarnatsuk ni ayash<sub>i</sub> uunt pep<sub>ru</sub> jinti<sub>n</sub> ajapén tepeartatui. Nu pé<sub>prun</sub>masha ii Uuntr<sub>i</sub> Jesukrístuncha máawarmiayi. Nu pé<sub>prun</sub>maya shuar tuke tunaan túrin áarmatai Ejiptu tuíniak tura nú<sub>nisa</sub>n Sutuma tuíniak nu pé<sub>prun</sub> páchiiniawai. <sup>9</sup> Tura menaintiu tsawant nuyá nan<sub>k</sub>aamas ashí nun<sub>k</sub>anmaya shuar jaka tepan ísar iwiarnascharti tiártatui. <sup>10</sup> Nu jákarmatai ashí nun<sub>k</sub>anam pujuinia nú shuar ni jakamun ti wararainiak mai sunai ajartatui. Kame nu jimiará aents Yús<sub>nan</sub> áujmatenak ashí shuaran wáitkiasaru áarmatai ti warasarmai. <sup>11</sup> Nuyá menaintiú tsawant nuyá nan<sub>k</sub>aamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

<sup>12</sup> Nuyá nu nantakiaru nayaimpinmaya kakaram untsunman antukarmai: “Jui yaki wakatarum.” Tu untsunmiai. Tutai ashí ni nemasri íimiainiañ yurañkim amuam nayaimpiniam wákarmai. <sup>13</sup> Túmainiañ ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajsarmai.

<sup>14</sup> Jímiar wáitsatin nankaamasai. Chikichik ajasua nu túrunatin ishichik ajasai.

### *Suntar siatia nu kachun umpuarmai*

<sup>15</sup> Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi: “Yamaikia ii Uuntri Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

<sup>16</sup> Nuyá paintikuatru uuntka akupin pujutainium Yusai naka pujuarmia nu piniakum tepersar Yúsan shiir awajenak tiarmai:

<sup>17</sup> “Uunt Yusá, ti kakaram asam Ámijjai tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijjai nekas akupkatin juarme yamaikia. Tuma asakmin yuminsajme, tiarmai. <sup>18</sup> Ashí shuar kajertamkaru añ yamaikia amesha kajerkatin tsawant jeayi. Jákarusha iniantkim ni túramuri íisartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

<sup>19</sup> Tuíniakui Yusa Uunt Jee nayaimpiniam ana nu uranmiatai wakenmaanñ Chícham Aarma Chumpitiai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

## 12

### *Nuwasha tura Ti Kajen Yajasmasha*

<sup>1</sup> Nuyá nakumkamu ti enentáimpramnia nayaimpiniam wantinkiamai. Nuwa etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. <sup>2</sup> Nu nuwa ajamtin asa jurertaj tusa wáitiak ti kakantar uutmiai.

<sup>3</sup> Tumai ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukesha siati asa siati akuptai tawaspan etsenkraku áрмаi. Tura kachurisha tiásauyi. <sup>4</sup> Menaintiu nakakam jeeán yaan ni ujukéjai japiki akakermai. Tura nunká utsamai. Nu Ti Kajen Yajasma nu nuwa jatema nuñ wajasmai. Júremataik yuruataj tusa wajattsamai. <sup>5</sup> Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nuñ junakmiai. <sup>6</sup> Tura núwaka atsamunam pisarmai. Nuñ pujustinian Yus iwiarturmai. Tura chikichik mir jimiará siantu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

<sup>7</sup> Nuyá nayaimpiniam meset amai. Nayaimpinmaya suntara kapitiantri Mikiar ni suntarijjai Ti Kajen Yajasmajai máanaikiarmai. Ti Kajen Yajasmasha ni suntarijjai ti máanaikiarsha <sup>8</sup> nupetmakcharmai. Túramtai nayaimpinmaya jiki akupkamuyi. <sup>9</sup> Núnisan Ti Kajen Yajasma ashí ni suntarijjai nunká akupnakmai. Nu Yajasmasha iwianchi kapitiantri Satanás tutainti. Yáunchuya-napiiti niisha. Ashí nunkanmaya shuáran anañniuiti.

<sup>10</sup> Nuyá nayaimpinmaya kakaram untsunman antukmajai. Tura timiai: “Uunt iwianch ii yachin yajauch áujmatin jiki akupkamu asamtai yamaikia ii Yusri uwemtikratniusha tura ni kakarmarin iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch

ii yachin tsawajsha káshisha iniaitsuk Yusaj yajauch áujmatniua nuna <sup>11</sup> íksan ii yachi nupetmakarai. Yus-susamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajsha uunt iwianchin nupetkarmai. <sup>12</sup> Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

<sup>13</sup> Nuyá Ti Kajen Yajasma nunká ajapna nuwa áishmankan jurerma nuna áintraimai.

<sup>14</sup> Turakui nuwan uunt nanapen churuwia nanapea áinis sunasmai. Nujai nanamuk yáunchuya-napiya pisar atsamunam wemai. Tura ni ayuratniunam menaintiu uwí nuyá sais nantu pujusmai. <sup>15</sup> Nuyá nu napi ni weneya entsá jiiiki nujan\_krumamai nuwan ajekrataj tusa. <sup>16</sup> Túrasha nunka nuwan yayak nakaak nu entsan mash ukuyámai. <sup>17-18</sup> Túramtai nuwan ti kajerak ni weeá chikich írunna nujai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijiai máaniaktaj tawai.

## 13

### *Nuyá Yajasma jimiara nu*

<sup>1</sup> Nuyá nayaantsa káanmatkariin wajasan nayaantsanmaya Yajasma jiniun wainkiamjai. Muukésha siátitiat kachuri tias tura akuptai tawaspasha tias armai. Ashí muuken Yúsan yajauch chicharin tu áarmauyi. <sup>2</sup> Nuí wáinkiamaj nu Yajasma nekas uunt yawáa áinniuitiat nawenka chaj nawea áinniuyi. Wenésha nekas kajen yawáa áinniuyi. Tura Ti Kajen Yajasma Entsayá Yajasma ni kakarmarincha tura ni akupkatniurincha susamai nujai ti kakaram akupkati tusa. <sup>3</sup> Entsayá Yajasma muuké chikichkin jakamnia awatmian wainkiamjai. Túrasha pénger awajnasmai. Túramtai ashí nunkanmaya shuar nuna ísar ti enentáimturar nemarsarmai. <sup>4</sup> Túrawar nin tikishmatrar shiir awajsar “¿Yaki jujajsha jeá. Imiá kakaram asamtai yaki niijiai máanaikminiait?” tiarmai. Tura Ti Kajen Yajasma ni kakarmarin Entsayá Yajasma susa asamtai ashí shuar nincha tikishmatrarmai.

<sup>5</sup> Núnisan nu Entsayá Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. <sup>6</sup> Núnisan túrak Yúsan yajauch áujmatuk ni náarincha ni Jeecha tura ashí ni shuari nayaimpiniam pujuinia nunasha katsekkarmai. <sup>7</sup> Tura Yusna ainia nujai mesetan najana nupetkatniun tsankatnakmai. Tura ashí nunkanmaya shuaran akupkatniun tsankatnakmai. <sup>8</sup> Túramtai ashí shuar tuke iwiaaku átinia nu papinium ni naari yámankamtaiknumiá anujkamu atsúarma nuka nu Yajasma tikishmatrarmai. Nu papincha Murik jaka nantakmia nu takakui.

<sup>9</sup> Shuar juna ántakka enentáimprati:

<sup>10</sup> “Shuaran emetá juinia nusha emetnattawai.

Núnisan shuaran nan\_kijiai mainia nusha nan\_kijiai mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

<sup>11</sup> Nuyá chikich Yajasma kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi. <sup>12</sup> Niisha Entsayá Yajasma kakarmarin súam akupniuyi. Tura ashí nunkanmaya shuaran “Entsayá Yajasma penké jaa tsuarma nu, shiir awajnasti” timiai. <sup>13</sup> Núnisan shuarti túrachminian ti turin asa ashí shuar ímiainain nayaimpinmaya jinia nunká ajuarmai. <sup>14</sup> Tura Entsayá Yajasma súam aents túrachminian ti turak ashí nunkanmaya shuaran ana\_kawarmai. Túrak Entsayá Yajasma nakumkamurin najanawarat tusa akupkamai. Túramtai pu\_niajai penké jakamnia awatmia pénger ajasma nuna nakumkamurin najanawarmai.

15 Kukaria Yajasma kakaram sunasmai. Nujai Entsayá Yajasma najanamun iwiaaku awajsatniua áintsan ichachkiamai. Túram ashí níniak shiir awajeacham máatniun susamai. 16 Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha ankantcha ankantchasha ashí ni nijiaíncha tura wakerakka untsuuríncha anujtuktiniuyi. 17 Entsayá Yajasma náarin tura wakerakka ni náari númirurín anujtuktiniuyi. Túrachuka sumatnasha sumakchamniuyi, surutnasha surukchamniuyi. 18 Wats, wi tájana ju nekaatniuka ti nekas enentáimtustiniaiti: Entsayá Yajasma númirurí áishmanka númirurí asa sais sian̄tu seséntisáisaiti (666). Ashí ti neka ainia nú shuar Entsayá Yajasma númirurín nekapmar nin nekaati.

## 14

### *144.000 shuar Yúsan kantampruawarma*

1 Nuyá Murikiun Seun náinnium wajan wainkiamjai. Níjiaísha sian̄tu kuaréntikuátru mir (144.000) shuar wajaarmai. Nusha nijiaí Murikiu náarincha tura ni Aparí náarincha anujtukma aarmai. 2 Ti untsurí árpan nayaimpiniam túntuiniak teer awajenak kanusa uuntri nujan̄krak téter ajá núnisan̄ antukmajai. Ti kakaram ipiamta núnis amai. 3 Nu tuntuiyamujai sian̄tu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuaru tan̄kunmasha tura paintikuatru uunt-numsha naka wajasar kantamáwarmai. Nu kántanka chíkichka nekaachmin armai. Aya nu sian̄tu kuaréntikuátru mir shuar ka jú nun̄kanmaya shuarnumiá uwempraru ásar nu kántan kantamiarmai. 4 Nu shuarsha nuwajai yajauch ajascharu ásar ti shiir ániawai. Túrawar Murik weana nuj nemarainiawai. Ju nun̄kanmaya shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisan̄ armai. 5 Nu shuar pen̄ké wáitruachu ásar Yúsaísha ti shiir tunáa máatrachu armai.

### *Menaintiu suntar chichaman etserainiawai*

6 Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nun̄kanam pujuinia nú shuaran ujakartiniuyi. 7 Nusha ti kakantar untsumuk timiai: “Yus ashamkatarum. Niñki shiir awajatarum. Yamaikia ashí shuaran súmamtikiawartin tsawant jeayi. Nayaimpincha nun̄kancha nayaantsancha ashí entsancha najana asamtai shiir awajatarum.”

8 Nuyá chíkich suntar, jímiara nu, taa timiai: “Pai, Uunt Papirúnia pépruka pen̄ké meserai. Niisha tuke tsanirmaua núnisan̄ ashí shuaran anampratniua núnisan̄ utsuurmai. Tuma asa niisha nú shuarjai nupetnak tuke emesnarai.”

9 Nuyá chíkich suntar, menaintiua nu, taa timiai: “Shuar Entsayá Yajasma tura ni nakumkamuríncha shiir awajeakuínka tura nijiaíniumsha uwejniumsha ni naari anujtukmaitkuínka 10 Yus nin kajerak ti asutiáttawai. Yapá pachimprachman áartinia áintsan̄ ti kajerkattawai. Túramtai asupri ti tsúer keá nujai jinium wáitsartatui. Yusa suntari tura Murik íimmianum apenáwar jinium wáitsartatui. 11 Ni wáitsatniuri ji esaak kajintsuk tuke mukuintia nuniskete. Entsayá yajasma tura ni nakumkamurin shiir awajeenak ni naari anujmamainia nuka tsawaísha káshisha ayamtsuk wáitsartatui. 12 Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantai itiurchatnum pujuiniak katsuntratin ániawai.”

13 Nuyá nayaimpinimaya chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

‘Núnisan̄ Yusa Wakaní tawai. “Eta, ti takasaru ásar jakar yawerman ayamprartatui. Tura ti pen̄ker túrawar akinkiertatui” tawai” turutmiai.

### *Jú nun̄kanam arakma juukma*



<sup>14</sup> Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijijai najanamu etsenkrakuyi. Tura machitian éren takakuyi.

<sup>15</sup> Tura chíkich suntar Yusa Uunt Jeenja jiinki yurañminiam eketun kakantar chicharuk tímiai “Árak júuktin tsawant jeayi. Machitrumjai tsupiram juuktá.” <sup>16</sup> Tutai yurañminiam eketu ni machitrijijai nunká arakman tsupir juukmai.

<sup>17</sup> Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi. <sup>18</sup> Tura chíkich suntar naman maar Yus-sútainmaya jíinkimiai. Niisha jinia wáinniuyi. Tura máchit ti éren takakun kakantar chicharuk tímiai “Machitrum ti érea nujai uwa nunká arakma nu tsupiram juuktá. Mash tsamakarai.” <sup>19</sup> Tutai suntar ni machitrijijai ashí nunkanmaya uwa nerén tsupir juukmai. Tura neketainiam chumpiamai. Nu neketai Yus ti kakerak shuáran ti asutiátta nuna nakumeawai. <sup>20</sup> Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres sianu (300) kirumitrua nu pajamar kawayu nujijai métek ajasmai.

## 15

### *Nayaimpinmaya suntar amúamunam wáitkiastinia nuna pininnumian ukainiawai*

<sup>1</sup> Nuyá ašammain ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

<sup>2</sup> Nuyá antumianka áiv 20 Tura uunt péprunmaya aranntsán ti saar jijai pachimpramun wainkiamjai. Ni káanmatkarincha Entsayá Yajasman tura ni nakumkamurincha nupetkarma nu nu wajaarmai. Tura nin arpa tuntuitiain Yus súsarmai. <sup>3</sup> Túramtai kantamáwarmai. Yusa yaintri Muisaisa kantarincha tura Murikiu kantarincha kanta-mainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha pénkera nu túriniaitme. <sup>4</sup> Uuntá, ¿yaki ašampromkachat? Tura yaki ti shiir awajtamsachat? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

<sup>5</sup> Nuyá atak Yusa Uunt Jee íisan, Ti Shiir Tesaamun uranniun wainkiamjai. <sup>6</sup> Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armai. Netsepnumsha kurin emenmama armai. <sup>7</sup> Nuyá kuaru tanjunmaya chikichik kurí pininjian súsarmai. Nu pinin tuke iwiaaku Yusa kajetairijijai piaku armai. <sup>8</sup> Tura Yusa kakarmari ti ašammai Ti Shiir Tesaamunam mukuintiuá núnis piakmai. Túramtai nu siati suntar wáitkiastinian ukarar amuiniatsain Yusa Jee wayachminiuyi.

## 16

### *Wáitkiastin pinin ukararma*

<sup>1</sup> Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati pininnum ana nu ashí ukartarum.”

<sup>2</sup> Tutai emka suntar we, pininnumia kukar ukarmai. Túramtai ashí shuar Entsayá Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

<sup>3</sup> Nuyá chíkich suntar jímiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nu pjuinia nu kajinjiarmai.

<sup>4</sup> Nuyá suntar menaintiuá nu, entsanam tura púkuninmasha ukarmai. Túramtai ashí numpa ajasarmai. <sup>5</sup> Nuyá suntar entsá wáinniuá nuna chichamen antukmajai. “Uuntá, amek ti penker Yus asam jútikiamé. Yáunchusha tuke pujú asam ti shíraitme. <sup>6</sup> Iis,

nu shuar amée shuárumincha tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

<sup>7</sup> Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

<sup>8</sup> Nuyá suntar kuatrua nu, tsawai nantunam ukarmai. Túramtai jijjai shuáran esaamujai wáitkiastin kakaram sunasmai. <sup>9</sup> Tura shuar ti sukuám wáitiarmia nu, nu wáitkiastinian nérenniun Yusan yajauch chicharkarmai. Tura ni tunaarín enentáimtsuk Nin shiir awajsatniuncha penké nakitrarmai.

<sup>10</sup> Nuyá suntar senkua nu, Entsayá Yajasma akupin pujutairín ukarmai. Túramtai ni nunkeen ashí kashi ajasmai. Tura shuar ti najaimiainiak iniaíncha esamiarmai.

<sup>11</sup> Tura nújaisha yajauch túratniuncha iniaisacharmai. Antsu kuchapríjjaisha tura ti najaimiainiak wáitiainiak nayaimpinmaya Yusan ti yajauch chicharkarmai.

<sup>12</sup> Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaania akupin taarti tusa jintiamnamai.

<sup>13</sup> Tura nuyá júna wainkiamjai. Ti Kajen Yajasma weneyasha, Entsayá Yajasma weneyasha tura núnisan penké Kukaria Yajasma ántar yúsnan etserniua nuna weneyasha puachia núnin yajauch wakan menaint jíniarmai. <sup>14</sup> Íwianch áiniak aents tujintiamun túruiniak ashí nunkanmaya akupniun irurarmai. Ti Tujincha-Yusai ni uunt tsawantri jeamtai mesetan najanatai tusar weriarmai. <sup>15</sup> (Yamáí Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín penker wáinia nú shuar ti shiir átatui. Misuchu asa natsaarchattawai.” Tu tawai.) <sup>16</sup> Tura yajauch wakan uunt akupin ánian Armajetún nunkanam irurarmai. Israer-chichamnum nu nunka tu anaikiamuiti.

<sup>17</sup> Nuyá suntar siatia nu, nasenam ukarmai. Túramtai nayaimpinmaya Yusa Uunt Jeenia ti kakaram chicham Yus akupin pujutainmaya chichaak “Mash uminkiai” timiai.

<sup>18</sup> Tura nuyanka peemsha, chárpisha, ipiamtasha ajamai. Tura nunkasha ti kakaram úurkamai. Maa, aents jú nunkanam yámankamtaik pujuarmia nuyá júnis úurkamuka atsuwiti. <sup>19</sup> Ti Uunt Péprusha menaint nakantramai. Ashí nunkanmaya péprusha saanakiarmai. Nujsha Yus ti kakerak Papirúnia pépruncha kajinmattsuk ni kajetairín yapá umutaia áintsan aarmai. <sup>20</sup> Entsá ajapén atentrasha tura murasha menkaramai. <sup>21</sup> Núnisan nayaimpinmaya uunt kaya núnisan micha kákeramai. Ti uunt áiniak kintiarjai métek kijin armai. Shuarsha nujai ti wáitiainiayatan áyatik Yusan yajauch chicharkarmai.

## 17

### *Tsanirmatai nuwá asutiámu*

<sup>1</sup> Nuyá siati suntarnumia chikichik taruti turutmiai “Winitiá. Tsanirmatai nuwá ti asutiátniun iniaktustatjame. Nu nuwá nayaantsanam uku eketui. <sup>2</sup> Ashí jú nunkanmaya akupin nijjai tsanirmawaru áiniawai. Núnisan ashí jú nunkanmaya shuar, nu nuwá tsanirmatniun tsankateam, nijiamanch umartinia áintsar nijjai ti yajauch túrawar nampekarmai.” Nuna taku Yusnumia kanaktinian nakumkamai. <sup>3</sup> Nuyá mesekranam kampuntin atsamunam jurukmiai. Tura nuj Yajasma kapaakunam nuwá eketun wainkiamjai. Nu Yajasma nasha ashí Yusan yajauch chichareamu áatramuyi. Muuke siátitiat kachuri tiásauyi. <sup>4</sup> Nu nuwasha tarachin yamakai kapaakujajisha ti shiir iwiarmamar entsaruyi. Kurijajisha, shíirmach kayajajisha, ti shiir sháukjajisha iwiarmamprauyi. Kuri pinínkian mujmiainniasha tura ashí ni tsanirmatairi imiá yajauch armia nunasha piakun ajaamak takakauyi. <sup>5</sup> Nijjainiumsha ni naarja áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Jú Nunkanam

Muǵmiainian Túrinia Nunasha Nukurinti. <sup>6</sup> Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai. <sup>7</sup> Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukeshá siátichukait tura kachurisha tiáschak áinia. <sup>8</sup> Nu yajasma wáinkiam nuka yaunchu pujuwiti tura yamaikia juǵi pujachiat amúamunam tuke játsuk nánkatkachu wáanmaya jíinkítiiwai. Shuar nuna wáinkiar ni naari tuke iwiaaku pujutai papinium yámankamtaiknumiá anujtukchamua nuka nu yajasma ashamkartatui. Nu yajasma yaunchu pujú yamaikia atsayat atak wantinkiattawai’ turutmiai.

<sup>9</sup> ‘Nekas neka ainia nu júna enentáimturarti: Siati muukenka siati náintian nakumui. Nu nuwá nuǵi eketui. <sup>10</sup> Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chíkichka tuke taatsui. Nii taasha núkap tsawant akupkashtatui. <sup>11</sup> Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chíkich siati akupniujai iruram métek enentáimpramniati. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

<sup>12</sup> ‘Tias kachuri wáinkiam nuka tias akupin tuke akupeenatsna núiti. Niisha nu yajasmajai métek penké ishichik tsawant akupin ajastatui. <sup>13</sup> Ju tias akupniusha métekrak enentáimiainiak ni kakarmarin yajasma súsartatui nújaisha akupkat tusar. <sup>14</sup> Murikjaisha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Niijai írutraa nu, Yus Winia atí tusa achikma ásar tura Nin tuke umirin ásar Niijai nupetmakartatui.’

<sup>15</sup> Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuáran nakumeawai. <sup>16</sup> Tura tias káchuka yajasma num wáinkiam nu, tsanirmatai nuwan nakitrar ajapawar misú ik-iukiartatui. Ni ayashíncha yuawartatui tura áesawartatui. <sup>17</sup> Nu akupniu enentáin Yuska ni wakeramurin apujsaiti. Nii timia nu umintsain akupniusha métekrak enentáimprar ni kakarmarin takamtsuk yajasma súsatniun enentáimtikramai. <sup>18</sup> Nuwá wáinkiam nuka ashí nunkanmaya akupniun akupeana nu pépruiti.”

## 18

### *Papirúnia emesramuiti*

<sup>1</sup> Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. <sup>2</sup> Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakanǵi pujutairisha ajasai. Muǵmiai nanamtincha tura ashí yajauch nanamtin ainia nusha nuǵi pasunmainiawai. <sup>3</sup> Nu péprunmaya shuar tuke tsanirmawua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsan iniaisar niijai tsanirmawarua áinis áiniawai. Tura shuarsha ni yajauch wararmajai ti kuítrintin ajasaruiti.” Tu timiai.

<sup>4</sup> Nuyá nayaimpinmaya ti kakantar chichaman antukmajai. “Wíi shuaraitrumna nuka nú peprunmaya jíinkítiarum. Túrachkurmeka ni tunaari jumamkirum ni wáitsatniuríncha pachíinkiatarme. <sup>5</sup> Ni tunaarisha ti piak nayaimpiniam jeastatuk ajasai. Tuma asantai Yus ni tunaarin kajinmatkichuiti. <sup>6</sup> Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata. <sup>7</sup> Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaiat ni enentáinkia enentáimias “Uunt Akupniuitjai. Wajechu asan

penké wáitsashtiniaitjai” tu enentáimtumawai. <sup>8</sup>Tuma asantai ti wárik chikichik tsawantai ni wáitsatniuri tarittiawai. Jákatniusha ti wáitsatniusha tura tsukasha tarí ashí jijjiai ekeemankattawai. Uunt Yus ashí Tujincha nu kajerkamu asa nujai asutniáttawai.” Tu timiai.

<sup>9</sup> Ashí nunkanmaya akupin niijjai tsanirmawaru ainia nu ashí yajauchin niijjai wararsaru ásar nu pepru esaak múkuint ajakui eáramai. <sup>10</sup> Ti esaak wáitiakui nuji pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruiat nekas wáitnenmai ajawai. Imiá wárik ni wáitsatniuri tarini.”

<sup>11</sup> Núnisan ashí nunkanam súrin ainia nusha nu péprun ti kuntuts enentáimturar eartartatui. Ni surutain itiamun ¿yaki sumarkat? <sup>12</sup> Kame juna itiaru ániawai: kurincha, kuítniasha, kaya shíirmachincha, ti shiir sháuknasha, ti péñker tarachniasha, akupin entsatai shiirmachin yamakaincha kapaaniuncha, sétancha, itiaru ániawai. Núnisan ashí kunkuin numincha, ti shiir awara najanamuncha, ti shíiram numincha, yanjú jiruncha, penké jiruncha, mármur kayancha itiaru ániawai. <sup>13</sup> Núnisan ishpinnasha, nusháa kunkuinniasha, mira kunkuinniasha, umutaincha, asuitincha, trikiu nerenchá, tura trikiu ti péñker nekenmancha itiaru ániawai. Núnisan áintstai tanuncha, murikniasha, kawaincha ni káruirijjai, tura nú arantka shuárnasha suruktinian itiaru ániawai.

<sup>14</sup> Tura nu péprun tiarmai “Numí nerén ti wakeruk súmauya nu yamaikia nuji atsawai. Ashí ni kuítrisha tura ashí ni péñkerisha tuke penké amuukayi.” Tu tiarmai.

<sup>15</sup> Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar eartartatui. <sup>16</sup> Túrawar tiartatui “Maa, uunt pépruiat ti wáitnenmai ajakai. Nuwa ti péñker iwiarmampra ánis nuyá shuar akuptai tarachin yamakaijjai kapaaku entsarmai. Kurijjaisha kaya ti shíirmachijjaisha tura ti péñker sháukjaisha ti shiir iwiarmampraruyi. <sup>17</sup> Ti wárik ashí ju kuit amukaiti.” Tu tiarmai.

Ashí uunt kanú kapitántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. <sup>18</sup> Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” <sup>19</sup> Tiar ti kuntuts pujuiniak awatmamar kakantar úutainiak tiarmai “Maa, ti uunt pépruiat ti wáitnenmai ajakai. Ashí uunt kanu nérentin nayaantsanam niijjai takasar kuítrintin ajasarmai. Tura ti wárik mash emesnarai.” Tu tiarmai.

<sup>20</sup> Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

<sup>21</sup> Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisan uunt pepru Papirúnia emesnar atakka wainniakchatin tuke menkakattawai. <sup>22</sup> Tura atakka jantsemma pinquiusha tampursha shakapsha antunkashtatui. Nu arantcha nuñkia shuar penké takakmaschartatui. Túramtai nekeamusha antunkashtatui. Ashí mitia átatui. <sup>23</sup> Shiripkincha ekeemakchartatui. Nu-atma nampersha antunkashtatui. Nuikkia ni shuari súrin arma nu ashí nunkanam nankaamantu armai. Tura ashí nunkanmaya shuaran waweatniua áintsan níiya núnis ajasarat tusa anañkawarmai. Túrasha núnisan ti kakarmaitiat ju mash túrunayi.” Tu timiai.

<sup>24</sup> Kame ni akupkamujai péñker shuar ti mantamawaru asantai nu péprunam ashí yaunchu Yusna etserniu numpesha, ashí Yus-shuara numpesha tura péñker shuar ashí nunkanam maamu ainia nuna numpesha nuji paant wáinkiamniaiti.

## 19

<sup>1</sup> Nuyá nayaimpinmaya ti untsurí aents kakantar untsuainian antukmajai. “Ju ti shiir enentáimtumainti. Yuska uwempratniuncha, nekas shiir átinniasha, nankaamaku átinniasha, tura ashí kakarmancha nekas nérenniuiti. <sup>2</sup> Niisha aya nekas péñker túratniua nuna túrin asa ti nukap tsanirmaun ashí shuaran

tsanirijjai utsuun ti asutiáyi. Nin ti wáitkias ashí ni shuari máawarman yapájamiátkaiti” tiarmai.

<sup>3</sup> Ataksha kakantar unsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

<sup>4</sup> Tuíniakui paintikuatru uunta nu tura kuaru tañkusha nunká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. <sup>5</sup> Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitánitkiurmesha péejchachitkiurmesha, ii Yusri tuke shiir awajsatarum.” Tu timiai.

### *Murik nuatnaikiatin namperi*

<sup>6</sup> Nuyá ti untsurí aents chichainiak kanusa uuntri nujanrak téter ajá núnisan antukmajai. Ti kakaram ipiamta núnis amai.

“Tí shiiraiti, tiarmai. Ii Uuntri Yus ashí tujincha asa ashí akupkatniun nankaamayi.

<sup>7</sup> Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai. <sup>8</sup> Murikiu anajmarmariñkia iwiarnarti tusa ti shiir pushí sunasmai.

Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

<sup>9</sup> Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Juکا Yus timia asa imiá nekasaiti.”

<sup>10</sup> Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintrintjai ámijjai métek tura yatsumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

### *Kaway pújunam eketna nu*

<sup>11</sup> Nuyá nayaimp uranniun wainkiamjai. Nui kaway puju wantinkiamai. Nu kawaynium ekeema nuna naari Ti Peñker Umin tutajyi. Núnisan Ti Nekas Turin tutajyi. Ti peñker Akupin asa aya nekas péñker túrak mesetan najanaiti. <sup>12-13</sup> Ni jíisha jíijai métek keearmai. Múuknumsha akuptai tawaspan untsurí etsenkrakuyi. Nui ni naari Yus Chicham áarmauyi. Túrasha tana nuna Niñki takamtsuk nekaamai. Numpajai enkerman entsaruyi. <sup>14</sup> Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai. <sup>15</sup> Nu suntara Uuntri weneeya, ashí nunkanmaya yajauch shuaran máatin, puniá mai ere tsakatskatin jíinmiai. Tura jirujai asutiátنيا áintsan ti kakaram akupkattawai. Túrak Ashí Tujincha Yusa kajetairi ti kakarma nujai shuáran asutiáttawai. Uwa nekenkar ijiuratnia áitkiasan wáitkiasartatui. <sup>16</sup> Ni pushirincha makuincha ni naari áarmauyi: Ashí Akupniun Akupin tura Ashí Uunta Uuntri.

<sup>17</sup> Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumáitarum.

<sup>18</sup> Akupniu namañkéssha yuítarum. Suntara kapitántri namañkéssha, kakaram suntara namañkéssha, kaway namañkéssha tura eketainia nuna namañkéssha, kame ashí shuara namañkéssha nankaamantu ainia núnasha tura penké shuar ainia núnasha yuítarum.” Tu untsukmai.

<sup>19</sup> Tura nuyá Entsayá Yajasmacha tura jú nunkanam akupin ainia nunasha ashí ni suntaríijai wainkiamjai. Niisha kawainium eketka nujai tura nuna suntaríijai mesetan najanatai tusar iruntrarmai. <sup>20</sup> Tura nu mesetnum Yajasmasha tura Kukaria Yajasmasha, penké ántar yúsnan etsernia nu, mai achinkiarmai. Nuikkia Entsayá

Yajasma ni kakarmarín súam nu Kukariá Yajasmaka aents tujintiamun ti turak shuáran anaṅkawarmai. Túramtai nu shuar Entsaya Yajasma náarín apujmamsar ni nakumkamurín shiir awajsarmai. Tuma asamtai Entsaya Yajasmancha tura Kukariá Yajasmancha íwiakuk asuprijjái ti kea nu ji-antumiannum apeáwarmai. <sup>21</sup> Chíkichka kawainium eketkanumiá puniá tsakatskatin weneya jijnmia nujái mantamnawarmai. Túramtai nanamtin ni ayashín yuawar ejemakarmai.

## 20

### *Kristu mir uwí jú nunkanam akupkattawai*

<sup>1</sup> Nuyá nayaimpinmaya suntar táarun wainkiamjai. Nusha náṅkatkachu waa yawirín tura jínkiatai jirun kumpurman takakuyi. <sup>2</sup> Nu suntarsha Ti Kajen Yajasma jiru kumpurmajái jínkiamai. Nu Yajasma iwianchi kapitiántri Satanas tutainti. Yáunchuya-napiti niisha. Tura nu iwianchín jínkiá mir uwí pujusat tusa <sup>3</sup> náṅkatkachu wáanam epenmiai. Tura waiti uraichminian anujtukmai. Mir uwí naṅkaamatsajín ashí nunkanmaya shuaran anaṅkawarajín tusa túramai. Antsu mir uwí naṅkaasmatai ishichik tsawant ankant akupnaktiniaiti.

<sup>4-5</sup> Nuyá akupin pujutainium pujuinian wainkiamjai. Tura shuara túramurín írsarat tusa kakaram sunasarmai. Tura núnisan muuke tsupirka maamu wakaníncha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmancha ni nakumkamuríncha tikishmatracharu armai. Núnisan náaríncha nijiaíniumsha tura uwejnnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujái métek mir uwí akupeamun wainkiamjai. Antsu chíkich jákaruka mir uwí naṅkaamatsajín nantakcharmai. <sup>6</sup> Antsu emka nantaktin tsawantnum pachiinkiarua nú shuar, ti penker áimak, ti shiir warasmin ániawai. Nu shuarka jimiará jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujái métek mir uwí akupkartatui.

<sup>7</sup> Tura mir uwí naṅkaasmatai uunt iwianch urani akupnaktatui. <sup>8</sup> Túram ashí nunkanmaya shuáran anaṅkawartaj tusa jínkittiwai. Kuk nunkanmasha tura Makuk nunkanmasha ashí pujuinia nuna anaṅkawartatui. Tura mesetan najanataj tusa ni suntarín nekapmarchamnia ti untsurí irurtatui. <sup>9</sup> Tura ashí nunkan enetak Yus-shuar matsamtaincha tura Yus ti aneamu pépruncha mash éṅkekarmai. Túramtai Yus nayaimpinmaya jinia akuptuk mash áesawarmai. <sup>10</sup> Tura iwianchi kapitiántri, nin anaṅkawarmia nu, asuprijjái keá ji-antumiannum apenámai. Nu yaunchusha Entsaya Yajasmasha tura Kukariá Yajasmasha, penké ántar yusnan etserniua nu, nui apenáwarmai. Nuisha tsawaisha káshisha iniannatsuk ti wáitsartatui.

### *Ashí amúamunam súmamtikiatin tsawant*

<sup>11</sup> Nuyá akupin pujutain úuntan tura ti pújun wainkiamjai. Tura nui pujancha wainkiamjai. Niisha ti kakaram asamtai nunkasha nayaimpisha aya menkarar tuke atsúarmai. <sup>12-13</sup> Tura túrunatsajín nayaantsanam jákarua nusha jínkiarmai. Núnisan iwiarsamunam jaka pujuinia nusha jínkiarmai. Tura jákaruncha, naṅkaamantu arma nunasha tura penké shuar arma nunasha, ashí wainkiamjai. Tura Yusaj naka wajaarmai. Nuyá ashí shuar túramu aakma papí urantrarmai. Tura nu papinium aarma nujái métek ashí ni turamurí paant nékaneakui súmamtiknawarmai. Tura chíkich papisha tuke iwiaaku pujustin papí urankamai. <sup>14</sup> Nuyá jákatin amuukati tusa ji-antumiannum apenámai. Nu ji-antumiannum wétin jimiará jákatin tútainti. <sup>15</sup> Tura ashí shuar ni naari tuke iwiaaku pujustin papinium atsúarma nusha nui apenáwarmai.

## 21

### *Nayaim yamaram tura yamá nunka*

<sup>1</sup> Nuyá nayaimpisha tura nunkasha menkaramtai nayaim yamarman tura yamá nunkancha wainkiamjai. Tura nayaantsasha atsumai. <sup>2</sup> Wi, Juan, ti shiir péprun, Yusnumiá yamaram Jerusaréñkan nayaimpinmaya táarun, wainkiamjai. Anajmarma ni áishrin inkiuntaj tusa ti shiir iwiarmampra áintsan ti penker iwiaramuyi. <sup>3</sup> Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijiai pujakuí ashí ni shuari ártatui. Tura niijiai tuke pujak nekas tuke ni Yusri átatui. <sup>4</sup> Yus ni neajkin ujujturartatui. Tura nuik amia nuka ashí amuukarmatai jákatniusha, úuttincha, wáitsatniusha, tura najaimiatniusha atsuttawai.”

<sup>5</sup> Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.”

<sup>6</sup> Ataksha turutmiai “Yamaikia mash uminkiyai. Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiana núnaka tuke iwiaaku pujutai entsan penké kuítchajai áartatjai. <sup>7</sup> Nupetmakunka ashí yamarma juna mash susattajai. Wisha ni Yusri átatjai. Núnisan niisha winia uchir átatui. <sup>8</sup> Antsu sápijka, Yúsan enentáimtichusha, yajauchin máatrasha, mankartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijiai keá ji-antumiannum apenáwartatui. Nuka jimiará jákatin tútainti.”

### *Yamaram Jerusaréñ*

<sup>9</sup> Nuyá siati suntar pinin amúamunam wáitkiastinjai piakun takakua nuyá chikichik taruti túrutmiái “Winitia. Murikiu anajmarmarin iniaktustatjame.” <sup>10</sup> Taku mesekranam naint yakí juruki Yusnumiá ti shiir Jerusaréñ pepru nayaimpinmaya táarun iniaktursamai. <sup>11</sup> Nu péprusha Yusa wincharijiai tsáapniniuyi. Nu tsáapnincha kaya ti shírmachia núnis jaspi kaya nuní saar asa ti tsáapniniuyi. <sup>12</sup> Pepru yantamesha ti yakí pénkramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi. <sup>13</sup> Nantu tátainmaaní menaintiu waiti amai. Nantu akatainmaanisha menaintiu waiti amai. Nunkaanisha menaintiu waiti amai. Arakaanisha menaintiu waiti amai. <sup>14</sup> Ti uunt kaya tuse apujsamu armai. Tura nuí ekenir pénkramuyi. Nu tuse kayanam Murikiu akatramuri tuse armia nuna naari áarmauyi.

<sup>15</sup> Suntar wijiai chichaua nu, nekapmatain kurin takakuyi. Nujai pépruncha, wáitirincha, tura pénkramurincha nekapmartiniuyi. <sup>16</sup> Pepru esantisha wan kantisha yakirisha mash métekrak armai. Suntarsha péprun nekapmataijiai nekapmaram esantisha wan kantisha tura núnisan jeamkamu yakirisha jimiará mir jimiará siantu (2.200) kirúmitru amai. <sup>17</sup> Nuyá pénkriincha nekapmarmai. Suntar aents nekapmataijiai nekapmaram sesentikuatru (64) mitru amai. <sup>18</sup> Nu pénkramusha jaspi kayajai najanamuyi. Péprusha aya kúrikiyi. Nu kuri ti penker sáarauyi. <sup>19</sup> Peñ apujtukma kayasha ti shiir kaya ainia nujai najanamu asa ti shiir iwiaramuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kuatrua nusha ismirártauyi. <sup>20</sup> Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatísta káyauyi. Ti kayaim apujsamu asamtai ti shírmachiiyi. <sup>21</sup> Pepru wáitiri tuse ainia nu, ti shiir nayaantsanmaya shaukjai chikichik najanamu armai. Pepru jintisha aya kúrikiyi. Nu kuri ti penker sáarauyi.

<sup>22</sup> Yusa Uunt Jeeñcha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Niiniuyi. <sup>23</sup> Nu péprunmasha tsawai-nantusha kashí-nantusha atsumchamai. Antsu Yusa winchari tsáapin awajmiái.

Núnisan̄ Muriksha tsáapin awajmiais. <sup>24</sup> Nu tsáapnijiaisha ashí nun̄kanmaya shuar wekasartatui. Tura ashí nun̄kanam akupin ainia nusha nūi yujainiak ni péñkerijiāi nuna shiir awajtuiniawai. <sup>25</sup> Tura kashí atsá asamtai tuke tsawaiti. Tuma asamtai wáitirī tuke epenchamu ártatui. <sup>26</sup> Tura ashí nun̄kanam péñker ana nuna nūi itiaartatui. <sup>27</sup> Tura yajauchikia pen̄ké wayashatatu. Mūjmiainian túrincha tura anan̄kartincha pen̄ké wayachartatui. Antsu áyatik shuar tuke iwiaaku pujutai papinium naarī aarma ainia nuke wayawartatui. Nu papincha Murik takakui.

## 22

<sup>1</sup> Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jiiinmiais. Nu pujutaisha Yusna tura Muriknauyi. <sup>2</sup> Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukeshashí ashí nun̄kanmaya shuar tsuámatainti. <sup>3-4</sup> Ashí yajauchia nuka atsuttawai. Uunt akupin pujutai, Yúsnasha Murikniasha, nūin̄ aa asamtai ni shuarī ti paant wainiainiak tikishmatrartatui. Tura nijiāincha ni naarī anujmamkartatui. <sup>5</sup> Tura káshisha atsuttawai. Nūi pujuinia nuka shiripkincha etsancha atsumchartatui. Uunt Yúsak tuke tsáapin awajtiatui. Tura ni shuarī tuke iniannatsuk akupkartatui.

### *Jesukrístu tátintrī pen̄ké nuntumsai*

<sup>6</sup> Nuyá suntar turutmiais “Jū chicham ti nekas asa nekas enentáimtusminiaiti. Uunt Yus yaunchu níniun etserniun ni chichamen enentáimtikramia núnisan̄ yamaikia ni suntar̄in akuptuk wárik túrunatta nuna ashí ni shuarīn ujakuiti.”

<sup>7</sup> “Ti wárik winittiajai” tawai Murikkia.

Shuar jū papinium Yusa Chichamē áarman umirna nuka shiir warasminiaiti.

<sup>8</sup> Wi, Juan̄, jūna mash ísan mash antukmajai. Tura mash ísan antukan nayaimp-inmaya suntar iniaktursama nuna shiir awajsataj tusan tikishmatramjai. <sup>9</sup> Túram turutmiais “Pen̄ke áinkiaip. Wisha Yusa yáintrīntjai ámijiāi métek tura yatsumijiāi métek. Yúsnan etserin ásar tura jū papinium áarma nuna umirainiak Yusa yáintrī áiniawai niisha. Yúsak shiir awajsatniuiti.”

<sup>10</sup> Nuyá ataksha turutmiais “Jū papínium aarma Yusna asamtai úukam ikiusaip. Ashí túrunatin tsawant ishichik ajatesai. <sup>11</sup> Nu jeatsāinkia yajauch shuarka tuke yajauch túruki wetí. Núnisan̄ mūjmiainian túraka tuke túruki wetí. Antsu péñkeran túraka péñkeran túruki wetí. Núnisan̄ esetar enentáimniusha tuke esetar Yusjāi wekasati.”

<sup>12</sup> Muriksha tawai “Eta, ti wárik winittiajai. Túran ti shírmachin ashí péñker túramujāi métek súsatniua nuna takukin winittiajai. <sup>13</sup> Wiitjai. Yámankamtaiknumīa amúanmasha tuke pujuwitjai. Wisha A rétranmayā Y rétranam ashí retra áintsaitjai.” Tu tawai.

<sup>14</sup> Ni pushirī péñker nijiamatniua núnisan̄ péñker túrinia nú shuar shiir warasminiaiti. Nu shuar nū pepru wáitirincha wayamniaiti. Túrar tuke iwiaaku pujutai numinmayā yuamniaiti. <sup>15</sup> Tura antsu Yúsan enentáimtachuka, wawekratniuka, tsanirmatan pujurainia nuka, man̄kartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aā matsatainiak pen̄ké wayachmin áiniawai.

<sup>16</sup> “Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úuntrīntjai. Wikia ti tsáapin yaa, yánkuamia áintsan̄ketjai.” Tu tawai.

<sup>17</sup> Yusa Shiir Wakan̄isha tura Murik anajmarmasha “Winitiarum” tuiniawai.

Tura jūna ántana nusha “Winitiarum” tití. Tura ashí kitiana nuka winití. Wakerakka tuke iwiaaku pujutai entsan pen̄ké kuítchajai umartí.

<sup>18</sup> Ashí shuar jū papinium Yus-Chicham aarma nuna antukarun jūna ujaajai: Shuar jūi áarman chikichan pataakka Yus nin ti wáitsatin jūi aarma nuna patattsattawai.

<sup>19</sup> Núnisan̄ shuar jūi aarman emeneakūinkia Yus ni naarīn iwiaaku pujutai papiniumia



japirattawai. Tura ti shiir péprunam wayatniun suritkiattawai. Nu péprusha tura nu papisha jui paant ujakma áiniawai.

<sup>20</sup> Jú papí áantratniun ujakua nu tawai “Eta, ti wari winittiajai.”  
Pai, núnisan atí. Wari winitia, Uunt Jesusá.

<sup>21</sup> Ii Uuntri Jesukristu atumniasha shiir yainmakarti.  
Nuke atí.